

Rocapa Jesocristo tahimari dsodo inajaro

Lucas

Rocapa doctoro, madija comaquiri najari totonanomide. Puhuapa Jesocca dodosse jararaha Jeso dsoqquehi natti pohua tahimari dsodode dissera tajari. Jeso tahimari mittahissa tahijine Jesocca dodosse tabaqquidenidsa huati, pohua huatimade ohuahadenidsa huati, Jeso imeni Mariadsa huati huati naridsadsana pohua tahimari dsodo inajaro. Rocapa pohua tesse Teofiro Jeso tahimari nahato tahijine pohuadsa dsodo inajaro.

Rocacca dsodoniji onihi oninipi: Jesocca dodosse tabaqqi tahimari deni, inajaro. Najaro onini cariacca: Hechos, quinajari. Rocapa Pablodsa ccaridsajari, Jesocristo tahimari icassiejeranijinecca maride.

Rocapa Jeso tahimaritohui dissera tajari

1 ¹ ¿Nija Teofiro? Tiadsa Jeso tahimari dsodo onajaro. Tahide Jeso pohuadsa toquejenajarideni mota huapi taha pohua tahimari dsodo naridsamanapojaride. Pohua tossonapohui tahimaria aja nahatonidsa Imehidsa toccamacossanihi bacco tajaropaji. Pohua tahimari huapima pajiranissa tanijine quinadsa dsodode disseraqqiri najaride. ² Aja pohua huatimade pohuadsa jajahiridsa najarideni pocca nahatonaja onihi, onihi nehe qqui najonamanajari naqui dsodo quinajari. Aja Jeso pohuadeni mari mari ihicanabaqqi najari naco dsodo quinajari. Pohuadenipa Jesocca marinaja ehecomeraridsamana najaro naqui icahatterajaro. ³ Nadsapi ohua naqui Jeso tahimari dsodo ocadsanaponijine tohuini onadsa

aji Jeso pohua tahimaritohui, pocca marinajatohui dissera onajarode. Aji poccadeni dsodoniji huapima naqui hua onaridsajarode. Aja madija Jeso qqui toquinajarideni, pocca marinaja mittamanajarideni, najaridenicca ima naqui omittanissa tanijine onadsa occaridsajarode. Jeso pohua tahimari huapima dsodo quinajarocca onatassaqquidsaja ojine tahideccadsama pajissehera dsodo onajonajaroa ajjaropaji. Jehe Teofiro, Jeso tahimari huapima ticajinijine onadsa tiadsa dsodo onajaro. ⁴ Aji Jeso tahimari tia maridedeni tia mari icanamanajaro huapimapi pajissa nahato tinanijine tiadsa dsodo onajaro.

Dio Atti ccaccaronadepa Huano Baotista tossonahijine tahimari huati tapojari

⁵ Nadsama Herodepa Isaraeri potemahi jodiodenicca dsama onini

Jodea cacahuade tojadsa Sacaria naco madicajari. Puhuapa Diodsa dada toqqumade tojajari. Nahihuaji dsepedeni ihijimana najarideni mota onidenipa Abia potemahideni. Sacaria naco Abia potemahideni. Puhuadenipa *Diodsa dada toqqumahuaji cacahuade toquejenadsapa madijacca da naqquinaja Diodsa dada ihiquimamana najaro. Pocca amoneje Sabeopi *Arao potemani. ⁶Sacaria pocca amoneje tadsajanipa poccadeni ima Diodsa bica tajaro. Ia Medsede Diocca dosseniji naqui ecahuamanassa tajaro. ⁷Naraha Sabeopi ccaranije najaro. Maqqi tedseje ejedeni jiraha jadahi tocajamanajari.

⁸⁻⁹*Diodsa dada toqqumadedeni huapi taraha ojari ojari quinaha bodihuaji totoquedsimamana, najari *nahatohui majo bicabote tohuesside. Tohuessidsapa essene majo bica taha jami-mi canadsapa Diodsa huati huati totoquina najari. Sacariacca madija Abiadeni Diodsa dada toqquma ecahuamanadsapi madija ojaria bodihuaji toquedsimahijine qqui quinahijineccadsa Sacaria oni bacco quinajari. Nadsapa Sacariana majo bicabote iessihijine bodihuaji dosse idsimanajari. ¹⁰Toquedsimadsapa majo bicabote iessidsa jami-mi cananaja amossinihuaji madija huapima Diodsa huatide toquejenaja najari.

¹¹Sacariapa nahi bodihuaji madicadsa *Diocca dodosse Pohua Atti ccaccaronade pohuadsa ahuatomajari. Majo bicabote tohuessidsa majo toccabaquihijinecca huahuanari inorini nahatoni-huaji huajari. ¹²Nadsapa Sacaria

Diocca dodosse qqui inadsapa cappinajari: –¿Nejecora ohuadsa tojapadseje? –najari. ¹³Naraha manaco Dio Atti ccaccaronade attipa: –Sacaria ticappina-jeraji, Diopa ticca huatinaja mittahi. Ticca amoneje Sabeopi ejedeni cajinitohui. Tossonadsapa onipa: *Huano, tana –najari. ¹⁴–Ticca ejedeni tossonadsapa tetidsenitohui. Madija ohuahadeni naco huatidsemanahitohui. ¹⁵Nadsama najari ticca ejedenipa Diodsa bica taha tojahitohui. Puhuapa uva ppejene dse najarahitohui. Dsedse coma tanicca naco dse najarahitohui. Puhuapa tossona-jaraccadsama Dio Corime pohuadsa tojahitohui. ¹⁶Puhuapa ajama nahitohui: Nidsa Diocca ima ecomerarisadsapi Isaraeri potemahi jodiodeni mota huapi taha ia Medsede Diodsa toquejenani-pomahitohui. Nama nahitohui puhuapa. ¹⁷Nadsama Huanopa Dio Corime inadacorahitohui. Pina maittaccadsama *Dio Atti cacomerabote Eria Dio Corime inadacorajarissa nahitohui. Puhuapa ia Medsede tedsejema madija bodideni inanajorabaquipoहितohui. Nahi aja imehideni bodideni tobicamanadsapa pohuadeni bedidenidsa huatideni huanacquiri nahijine. Aja Diodsa iboquiri najarideni naco mittamanadsapa Diodsa tohuiboramanahijine. Nidsa pohuajine madijapa ia Medsedetohui najoramanahijine –najari Dio Atti ccaccaronade.

¹⁸Naraha Sacaria manaco huati tajari Dio Atti ccaccaronadsa: –¿Nejecoma onadsa ticca ima pajissa tojani nahato onanijine? Ohuapi jadahibote ojani, occa

amoneje naqui jadani tocajani
– najari Sacaria atti.

¹⁹Naraha Dio Atti ccaccaronade attipa: – Ohuapi Cabirie Dio madihihuajicca ojani. Dio acco acco ohocama najari. Dio ohua dosse naronajari tiadsa ima bicani huati onanijine. ²⁰Naraha aji huati onajarodsa pajissa tejeradsapi tetti jirehe timadicanitohui. Nidsa ejedeni tossonahicca abadsico bacco tadsapa tossonahitohui. Ticca ejedeni tossonadsana tetti ticajipomanijine. Nadsana aji pajissa huati onajaro nahato tinanitohui – najari Dio Atti ccaccaronade Sacariadsa.

²¹Naraha Diodsa dada toqquima huapihuajiccadsa Sacariatohui madimanajarideni attidenipa: – ¿Nejecotohui Sacariapa bodihuaji najojari? – quinajari.

²²Nanaja Sacaria qquenadsapa huati tahitohuiraha atti cappiraha qquenajari. Naraha madija pohuadenidsa ima ahuato teje najaro: – A, Diodsa dada toqquima bodihuaji Diojine pohuadsa ima ahuato tajaro nitide – quinajari. Nadsapa Sacaria madija nahatoquiri nahijinepa pohua dsepedsara dsopi dsopi najari, atti cappiradsapa.

²³Sacariapa nahi Diodsa dada toqquimahuaji madicajari. Aja pocca madija Abiadeni dsepedeni jicahicca huada bacco tadsapa Sacaria toccanijari pocca odsahuaji.

²⁴Nahidsa tomadinimanadsana Sacaria bedimeni Sabeopi jiajaro. Pina ponicca madijacca marinajassa najaro ejedeni idsonidsa huittidsadsapa abadsico 5 canaha ponicca odsahuaji qquena-jeraccani.

²⁵Nani ponicca odsadsa madidsapi

poni bodinidsa: – Jidapapi madija ohuadsa: “Ccarani” huahua quinarahitohui – najaro. – Jidapapi Diojine ejedeni ocajini. Ohuadsa ima bica tanicca tojani – najaro Sabeo.

**Dio Atti ccaccaronade Cabirie
Jeso tahimari ecomerapojaro**

²⁶Nadsapi Sabeo jianicca abadsico 6 canadsa odsa onihihuaji Dio pocca dodosse Pohua Atti ccaccaronade Cabirie dosse inaronapomajari. Najaro odsa oninipi Nasareti, dsama arobeni Carireahuajicca.

²⁷Nani Nasaretidsa dsohuato madijaro, poni oninipi Maria. Ponipi maqquideje caji-jeraccani, maqquideje ssamo taccani. Najaro dsohuatodsa Dio Cabirie dosse inaronajari, ponidsa huati tahijine. Nadsama najaro dsohuatopi Dsodse icajinijine tahide imehidenipa jehe canirepojari. Dsodsepa maittaccadsamacca tamine Dabi jinodi potemahi. ²⁸Nadsapa Dio Atti ccaccaronade Cabirie ccaronadsapa Mariadsa ahuatodsa huati tajari: – Nija Maria, Dio tia catidsehi. Ia Medsede Diopa tiadsa madihi – najari.

²⁹Maria pohua atti mittadsapi huajo najaro. Poni bodinidsa: – ¿Nejecotohui pohua atti nama najari? ¿Nejeco imara ohuadsa tojapadseje? – najaro. ³⁰Nanaja Cabirie ponidsa huati tapomajari: – Maria ticappina-jeraji. Diodsa bica tinani. ³¹Jidapapa ejedeni tidsonedsa huittidsahitohui. Nadsama ejedeni tossonadsa onipa: Jeso, tana – najari.

³²– Puhuapa denima madija bicahi tojahitohui. Pohuadsa: “Dio

memehuaji madijaricca Ejedeni” quiquinanahitohui. Ticca ejedenipa ia Medsede Djojine tamine deni tojahicca tojahitohui, pina pocca idi maittaccadsamacca tamine Dabissa nahitohui. ³³Pohuapa pocca madija Isaraeri potemahi ecahuabaquid-sanapohuitohui. Pocca cacahuehe naqui jiquejeranitohui –najari Cabirie atti Mariadsa.

³⁴Naraha manaco Maria Cabirie-dsa huati tajaro: –Ajijaro imapi ¿nejecoma najaro? Ohuapi maquideje ocappiraccha, maquideje ssamo onaccani –najaro.

³⁵Naraha manaco Cabirie huati tajari: –Dio Corimepa tiadsa bacconaronahitohui. Dio memehuaji madijaripa tiadsa pocca dacorehe inananitohui. Pina meme esseninahuini tiadsa huedsana najarossanadsapi Diocca dacorehe tiadsa tojanijine. Najarojine ejedeni nahatojaripa imasiri cappira, bodi ssiajatahitohui. Pohuadsa: “*Dio Bedi” quiquinanahitohui. ³⁶Nadsama aji ticca madija Sabeo naqui jadaniraha ejedeni cajini. Abadsico 6 canaha poni idsonidsa huittidsacchahi. Madija huapima ponidsa: “Ccarani” quiquinanaraha jijajaro. ³⁷Diopassamo tarajahi –najari Cabirie.

³⁸Nadsama Maria poni attinipi: –Jehe, Diocca medse ojani. Pohua Attidsa ibora onani. Aji huatinajaropi Dio ohuadsa inanana –najaro. Nadsapa Dio Atti ccaccaronade Cabirie toccamacossanijari.

Mariapi Sabeo quide toccajaro

³⁹Nadsapi Maria ponicca madija Sabeo quide dsama arobeni Jodeahuaji huassinaja toccajaro. Ssonohuajicca odsa panani bacco

tajaro. ⁴⁰Nanihuaji Maria bacco tadsapi Sacariacca odsadsa toqqe-dsimajaro. Sabeodsas: –¿Nija, bica tinaqui? –najaro. ⁴¹Maria nija nani Sabeo mittadsa poni idsonicca ejedeni ttai ttai nadsapa Dio Corime Sabeo bodinidsa tojahissa tajari. Nadsapi Dio Corimejine bodini nahato tajaro. ⁴²Nadsapi Sabeo poni attini ahuato tadsa Mariadsa huati huati tajaro: –Djojine tiadsa ima bicani tojani. Amoneje huapi taraha tiadsana Dio ima bicani denima inanjaro. Tidsonicca ejedenidsa naco Dio ima bicani inananitohui –najaro Sabeo. ⁴³–Nadsama ohuapi ajimani ojaraha ohua Medsedecca ami ohuadsa ticcajonajaro. ⁴⁴Ohuadsa nija tadsapi ohuidsonicca ejedeni huatidsejari, ttai ttai nahi. ⁴⁵Jehe, ia Medsede Dio tiadsa huati tapohuicca ima pajissa tojanijine pajissa tadsapi Dio tiadsa ima bicani inanjaro –najaro Sabeo Mariadsa.

⁴⁶Nadsapi Maria Diodsa huatidse-dsa attinipi:

–Obodi ohuattima: Ohua Medsede deni tojajari, bica tahi, onajaro.

⁴⁷Ohua ocorimema Dio ohua Tonassiajadedsa ohuatidseri najaro.

⁴⁸Ohuapi Diocca medse ajimanicca ojaraha aji jidapanadsama madija attidenipa: “Diocca biquehe tiadsa tojani” dsadsanapomana nahitohui.

⁴⁹Dio Dacorabote ohuadsa ima denima bica tanicca inanjaro. Pohua oni imittadsapi Pohuapa imasiri cappira, Pohua bodi ssiaja tahi nahato inajaro.

- ⁵⁰ Nadsama Diopa Pohuadsa
 madija cappinamanadsa,
 Pohuadsa huahuatidsemana
 nadsa naco
 pohuadenidsa huati cahanari
 canahitohui. Pohuadeni
 potemahidsa naco nama
 dsanapohuitohui.
- ⁵¹ Dio pocca dacorehema dsepe
 ihiji najari.
 Aja madija pohuadeni bodi
 attideni: “Nahato onani, Dio
 jirehe bica onani” quiquina-
 najaridenipa Dio pohuadeni
 inajaribaquihitohui.
- ⁵² Nadsama tamine dacorabote-
 deni naco Diopa poccadeni
 dossehepi inajicaridsanitohui.
 Ajamani toquejenajaridenina
 Diopa deni inanabaquihitohui.
- ⁵³ Pemi madimanajaridenidsana
 huemahi da inahitohui.
 Naraha dsepedeni ssequiri
 najaridenipa dsepedeni jiraha
 Dio pohuadeni dosse inani-
 baquihitohui.
- ⁵⁴ Nadsama ia Isaraeri potemahi-
 deni Dio Attidsa iboraquiri
 injaropi Dio Pohua ia acco
 tocamabaquihitohui.
 Isaraeri potemahideni iadsa
 Diopa huati ajama-jarahi-
 tohui. Pocca tohuati huane-
 hema iadsa huati cahanari
 cadsanapohuitohui.
- ⁵⁵ Jehe, najaro imapi Dio icca
 ididenidsa huati taja najona-
 pohui najari.
 Icca idi *Abarahaods, pohua
 potemahideni huapimadsa
 huati cahanari canajonajaria
 aja iadsa naco nama nahipaja
 dsanapojari

–najaro Maria Diodsa huati-
 dsedsa.

⁵⁶ Mariapi abadsico 3 canaha nani
 Sabeods madicajaro. Nadsapi
 ponicca odsahuaji toccanijaro.

**Huano Baotista
 tossonahicca ima**

- ⁵⁷ Sabeocca ejedeni tossona-
 hijinecca abadsico bacco tocana-
 dsapa maquideje bedi tossonajari.
⁵⁸ Tossonadsapa poni inorinidsa
 madimanajarideni, ponicca madija
 quinadsa ponicca odsadsa queriqqui-
 jari. –Diopa ponidsa huati huana
 tadsa ejedeni cajijaro –quinahi ima
 mittamanadsapa ponidsa jahijona-
 jari, poni tadsajani huatidsemana-
 hijine. ⁵⁹ Ejedeni huadari 8 nadsapa
 jodiodenicca *huissinaja caji-
 hijine poccadeni madija huapima
 naco jahijonajari. Pohua oni naco
 imehi onidsa icanacanimana-
 hijine: –Sacaria –quinahijineraha.
⁶⁰ Imeni attinipi: –Apajana, pohua
 onipa Huano –najaro. ⁶¹ Nadsapa
 attidenia: –Naraha ticca madija oni
 nama nahi nohuerahi –quinajari.
⁶² Nadsapa ejedeni imehidsa:
 –Ticca ejedeni oni ¿nejecoma nahi
 jipa tinani? –quinadsa pohuadeni
 dsepedsa dsopi dsopi quinajari.
⁶³ Naraha imehipa pohua bedi oni
 dsodo inahijine ahua ssapa tajaro-
 tohui pohua dsepedsa huahua
 najari. Nadsa dsodo inadsapi:
 –Pohua onipa: Huano –najari.
 Nadsapa huapima huajo canirejari.
⁶⁴ Nanaja Sacariapa atti cajimani-
 pomajari. Atti cajimanipomadsapa:
 –¡Diopa bica tahi! ¡Pohuadsa
 ohuatidsejaro! –najari.
⁶⁵ Nanaja Sacaria inoridsa madi-
 manajarideni jabojo quinajari.

Nadsapi najaro dsama arobeni Jodeacca ssono bedeni namidsa tanidsa madiridsamanajaridenidsa naqui ima tojaridsajaro. ⁶⁶Nadsapa huapima ima mittaridsamana-jaridenipa pohuadeni bodia: –¿Nejecoma napadsaja ajajari ejedenipa? –quinajari. Dio pocca dacorehema Huano ecahuahissa dsanapojari huapimadsa ahuato tajaro.

Sacaria bodi huatidsejari

⁶⁷Nadsama ejedenicca abi Sacariapa Dio Corime pohua bodidsa tojahissa tadsa Dio Atti ecomerajaro:

⁶⁸ –¡Diopa bica tahi! ¡Ia Isaraeri potemahideni Medsede deni tojahi!

Iapi Dio pocca tocattabaqqi-naja iquejenajaro. Dio iadsa ccajonahitohui, ia todini-baqqihijine. Najarojine Pohuadsa ehetidse najaro.

⁶⁹Ia Tonassiajade dacorabote iadsa dosse inaronajari.

Pohuapa maittaccadsamacca tamine *Dabi Diodsa ibora-bote potemahi.

⁷⁰Diopa maittaccadsama Pohua Atti cacomeraqquri najaridenidsa

ia Tonassiajade ccajonahijine tahimari huati tapodsapa ehecomeramana najonajaro.

⁷¹Ia Tonassiajadepa ia jaradedenicca jareheda ia tonassiajabaqqihitohui.

Iadsa jiperaqquri najarideni naco huadidi taraha pohuajinena icassiejeranitohui.

⁷²Diopa icca ididenidsa huati huana tajari.

Pohuadeni tedseje jehe canire-jaricca ima huati ajama-jarajari. Inapajiranissa tanitohui.

⁷³Najaropi maittaccadsama icca idi Abarahaodsa Dio huati tapojaripa: “Pajissa Ohuattissa onananitohui” napojari.

⁷⁴Icca ididenidsa huadiqquri najarideni jara jara ihina-baqqumana naraha Diona inassiajabaqqijari.

Jidapana naqui ia huadide noppine icappina-jeradsa Diodsara iboraqquri idsanaponitohui.

⁷⁵Ima jirehe Pohuadsara imadidnissa dsanaponitohui.

Icca madie naqui Diocca dosse-nijidsa pajiranissa dsanaponitohui –najari Sacaria atti.

⁷⁶Nadsapa pohua bedidsa huati tajari:

–Jehe Huano, tiapi occa ejedeni, nidsa tinapidsapi ia Medsede tedsejema madija bodideni tinanajorabaqqi-pojaripa pohua ccajonahitohui madimanahijine.

Nema tadsapi tiadsa: “Dio memehuaji madijari Atti cacomerabote” quiquinana-hitohui.

⁷⁷Huano, tiapi icassiejeranijinecca ima ia Dio pocca madija iquejenajaro iadsa huati tinaridsanitohui.

Dio icca imasiri epeje inandsapi nidsa pocca najidsohue tojadsa dsori icanirenitohui.

⁷⁸⁻⁷⁹Dio iadsa huati cahanari canadsa ia Tonassiajade iadsa dosse inaronabote nahi.

Najaripa madija inassiaja-
baquihitohui.

Dio tedseje icajoneranijinecca
ima naquí ia tonahattabaquihitohui.

Ia Tonassiajadepa pina dsidsi-
dsamassa maji ccajonadsa
ssire najonarissa najari.
Ssiajani dsati iadsa bacco
najaro.

Madija dsidsinidsa madiridsa-
manajaridenipa dsoqqeue
noppineni cappinamanaraha
ssiajani dsati pohuadenidsa
tossiajaridsasapi memehua-
jicca jahui ahuato inanajaro
– najari Sacaria atti.

⁸⁰Nadsama Sacariacca ejedeni
Huanopa Diocca dacorehema napi-
dsanapojari. Diotohui dissera taja
najari. Dsotode denima napidsapa
dsama huamoni ssono caji, siba caji
tanihuaji madidsanapojari. Nadsapa
Dio Pohua jipa tahicca huada bacco
tadsa Isaraeri potemahideni mari
icanabaquihijine Huano dosse ina-
jari.

Jeso tossonahicca ima

Mateo 1.18-25

2¹Jeso tossona-jaraccadsapa
dsama huapimacca imapi ajima
najaro: Tahidepa *romanodeni-
cca tamine deni tojahicca onipa
*Acosto pohua bodipa: –;Nejecoma
naha madija madimanahi occa
cacahueheda? –nadsa madija
onideni huapima dsodo naridsa-
manahijine pocca dosseniji cca-
ridsajaro. ²Nadsapa Acostojine
dsama huapimacca madija onideni
dsodode tahidecca dsodo quina-
jari. Najari huajanodsapa pohua biji
accode onipa *Quirinio dsama

Siriahuaaji cacahuade tojajari.

³Nadsama madija huapima dsama
onihí onihidsa mamadimaneri
naridsamanaraha biridideni-
cca dsamadsa jai tojaniridsajari.
Isaraeri potemahideni naco biridi-
denicca dsamadsana pohuadeni oni
dsodo quinahijine jai tojaniridsa-
jari. ⁴Nadsapa Dsodse. Pohua naco
dsama arobeni Carireahuajicca odsa
panani onini Nasaretidsa madiraha
biridi tamine Dabi madipohuicca
odsa panani Berenehuajina toccani-
jari, pohua oni dsodo nahijine.
Berenepe dsama arobeni Jodea-
cca. ⁵Nadsama Dsodsepa Maria
tadsajani Berenehuaji tohueda-
jari. Mariapi Dsodse pohuadsa da
quinaraha ponidsa huada huada
najaracchi. Poni idsonidsa ejedeni
huittidsaja najari. ⁶⁻⁷Nadsapa
Berenehuaji bacco toquinaraha odsa
ijiridsajaro. Madija huapima tahide
bacco toquinapoja najari. Odsa iji-
ridsadsapi Dsodse pocca amoneje
tadsajanipa bohuicca huahuadadsa
madimanajari. Nahidsa madimana-
dsana Mariacca ejedeni comajari.
Poni bedi tahidecca tossonajari.
Nadsapa etero dsojoranidsa teppe
inadsa dsero huanarini tetepidsa
ibari najari.

Dio Atti ccaccaronadepa edede cacahuadedenidsa huati tajari

⁸Nadsama odsapa panani Berene
huajira tanidsapa edede caca-
huadedeni madimanajari. Pohua-
denipa huamonidsa jassi jassi tajari.
Dsomepa edede cacahuade nocco-
deni bibissa najari. ⁹Nanaja pohua-
denidsa Diocca dodosse Pohua
Atti ccaccaronade ahuatojari. Dio
Pohua ssiejene tossiajabaquidsa

cappinamanajari. ¹⁰Naraha Dio Atti ccaccaronade pohuadenidsa: –Ticappinamana tejeraji. Tiadenidsa ima bicani huati onana –najari. –Huatidsehe imeni madija huapimadsa tojaridsanijine –najari. ¹¹ –Jidapapa tiadeni Tonassijade tossonahi, tamine *Dabicca dsamabote Berenedsa. Puhuapa ia Idinide *Cristo-Mesia najari. ¹²Nadsama aji occa huatinaja nahatoqquiri tiquinanijinepi ajima nani qqui tiquinanitohui. Ejedeni tossone-dsatipa etero dsojoranidsa teppe naha dsero huanarinidsa pori canahitohui –najari Dio Atti ccaccaronade. ¹³Nadsapa ima huati taha jicadsapa Diocca dodosse tabaqqi memehujicca huapi taha

amadsati ahuatoma-manadsa Dio-dsa huatidsemanadsa jiri jiri quina-jari:

¹⁴ –¡Dio memehujai madijaripa bica tahi, deni tojahi!
Namihujai Puhujine huatidsehe cajiridsani. Dio pocca cacatidse tabaqqidsa pocca jonehe tojaridsani –quinajari.

¹⁵Nadsapa Diocca dodosse tabaqqi memehujai jai tojamacossanidsapa aja edede cacahuade attidenipa: –¡Jina, Berenehuaji jaijanina! Ia Medsede iadsa huati tahi qquide jaijanina –quinajari.

¹⁶Nadsapa huassinaja jai tojanidsapa Maria Dsodse tedseje madi-manahidsa bacco toquinajari.





Nanaja ejedeni pori canajari dsero huanarinidsa. ¹⁷Nadsapa edede cacahuadedeni ejedeni qqui toquinadsapa aja Diocca dodosse attissa nehe qqui toquinajari. Nadsapa Diocca dodosse ejedeni tahimari pohuadenidsa huati tajaricca ima ecomeramanajaro nahicca madijadsa. ¹⁸Nadsapa madija mitta-manadsa: –A, nema najaroraha... –quinajari. ¹⁹Naraha Mariapi ponicca ejedenicca ima Dio ponidsa huati tapojari poni bodinidsa huatini ajima nejerajaro. Edede cacahuadedeni ponicca ejedeni tahimari huati toquinadsa naco najaro ima poni bodinidsa huatini ajima nejerajaro. ²⁰Nadsapa edede cacahuadedeni huamonihuaji jai tojanidsapa Diodsa tohuatidsenimanajari: –¡Abi Dio bica tinani! Tijine ia Idinide tahimari imittadsapi iadsa bica tani. Ia Idinide tossonahi qqui inadsa naco etidseni –tanimanajari. Imapi pina Diocca

dodosse huati tapojarissa nehe tojadsapi tohuatidsenimanajari.

**Imehi, imeni tadsajani
Diodsa dada toqqimahuaji
Jeso dsojo idsimamanajari**

²¹Ejedeni huadari 8 nadsapa jodiidenicca *huissinaja cajijari. Nadsapa pohua oni naco icanacanimanajari: Jeso, quinajari. Najari onipa Maria jia-jeraccadsa Diocca dodosse ponidsa huati tapojari.

²²⁻²⁴Nadsapa Jeso tossonahi natti huada 40 jicani nattinipi Dsodse Maria tadsajani aji Moisesicca marinajassa inanamananijine *Jerosarehuaji tohuedajari. Amoneje ejedeni tocassonadsa ama toccajarjine Diodsa bica tejerani, Moisesicca marinajadsa naqui *oppina tani, quiquinanajari jodiideni. Nadsapi ponicca ima Diodsa tobicanijinepi ajima nanina bica tajaro: –Ejedeni tossonahi natti huada 40 jicadsapi imenipi Diodsa dada toqqimahuaji

toquedsimadsa ponicca *daniji
 Diodsa da inahijine –nani nade Dio
 Atti dsodo nanidsa. Nadsama poni-
 cca daniji Diodsa da inahijinepa
 ajima nana: –Midsori pamehe amo-
 neje maqqi tedseje dada titiquina
 nana. Midsori nohueradsapi ococo
 napidsati pamehe naquí dada
 titiquina nana –nani nade Dio Atti
 dsodo nanidsa.

Nadsapa poccadeni ejedeni naco
 iaccamanajari: –Diodsa da ina-
 hijine –quinadsa. Najaro ima naquí
 Moisesicca marinajadsa dsodo
 najaro: –Ejedeni maqqideje bedi
 tossonapojaripa Diocca tojana
 –nani nade Dio Atti dsodo nanidsa.
 Nadsapa Dsodse, Maria poccadeni
 ejedeni Jerosarehuaji dsojo quina-
 jari, Diodsa dada toqqimade-
 deni qqí toquinadsa Diodsa huati
 toquinahijine.

²⁵Nadsama madija oni Simeopa
 Jerosarehuaji madijari. Puhuapa
 bica tajari. Diocca dossenijissa
 inananijine dissera tajari. Isaraeri
 potemahideni Idinide ccajonahitohui
 madijari. Dio Corimepa Simeodsa
 madijari. ²⁶Nadsapa pohua bodidsa
 ima ahuato inanajaro. Najaro imapi:
 –Tidsoqqe-jeraccadsama ia Idinide
 Cristo-Mesia qqí tinahitohui.
 Diopa Mesia dosse inaronabote nahi
 –napojari Simeodsa. ²⁷Nadsapa Dio
 Corime pohua icadossedsapa Diodsa
 dada toqqimahuaji toquedsima-
 jari. Nahidsa madidsapa Jeso imeni
 ímehi tedseje bacco dsimamanajari.
 Pahuadenipa pina Diocca dosseniji
 dsodo naniccassa nehe inamanana-
 nijine Jeso iaquedsimamanajari.
²⁸Nadsapa Simeo Jeso qqí tadsapa
 ididsa, dsojo ijidsadsa Diodsa
 huatidsejari. Puhua attipa:

²⁹ –Jehe ohua Medsede Dio,
 jidapanana ohuadsa huati
 tapojarocca *ima bicani tijine
 pajiranissa tani –najari.
 –Jidapapa ajajari ejedeni
 qqí onahi, najaritohui
 obodi huahuatoma naccade.
 Jidapapa Isaraeri potemahi-
 deni icca ima tobicanitohui,
 onajaro.

Nadsama ohuapi jidapanana
 odsoqquenijine onajorani.
 Odsoquedsapi bica tani,
 onajaro –najari Simeo atti.

³⁰ –Jehe jidapapa ohua onocodsá
 qqí onahi ia Idinide.

³¹ Puhuapa tossiejehe jinede,
 madija huapimacca tojahi-
 tohui.

³² Puhuapa pina ssiajanissa
 najari. Puhua ssiejene tossia-
 jabaquidsapi Isaraeri pote-
 mahi *jodio quejena-jarajari-
 denidsa

Diojine madija tocassiejerahi-
 jine tahimarini ahuato inana-
 nitohui.

Jehe Abi Dio, ticca madija ia
 Isaraeri potemahidenipi iadsa
 madija huapima attidenipa:

“Ticcadeni dsamadsa ia
 Idinide tossonadsapa Diojine
 tiadenidsa ima bicani tojani”
 quiquinanahitohui –najari
 Simeo.

³³Nadsapa Dsodse bedimeni
 tadsajani Simeo atti mittamana-
 dsapa jabojo quinajari. Nadsapa
 pohuadeni attipa: –A, icca ejedeni
 tahimari nahato taha –quinajari
 bedimeni tadsajani.

³⁴Naraha Simeopa pohuadenidsa
 denima huati huati tajari: –Diocca
 biquehe tiadenidsa tojadsanapona,

onajaro – najari. Nadsama Maria ponidsa naco huati huati tajari Simeo: – Diopa ajajari ejedeni dosse inaronajari, *Isaraeri potemahideni icanaroberidsa-baqquihijine. Mota huapi taha pahuadsa jiperaqquri nadsa Dio pahuadeni ettajobaqquidsapa ocasserani ahuamanahitohui. Naraha pahuadsa jipaqquri najari-denipa nidsa dsotodepa ima bicani cajimanahitohui, Diodsa madi-mana-dsanapohuijine. Jehe, ajajari ejedenipa Isaraerideni inassiaja-baqquihijine Dio dosse inaronaraha madija motapa pahuadsa jara jara quiquinanahitohui. Pocca mari-najadsa naco huattajojo tahitohui.

³⁵ Nama quinadsapa madija bodideni huatohue ahuato tajaro. Madija mota attidenipa: “Diodsapi jipaqquri inajaro” quiquinana-raha pahuadenipa Jesodsa jiperaqquri nadsapa pahuadeni atti pina maidsehessa nani. Diodsa jipaqquri najaripa pajissa jerani.

– Nadsama Maria, ticca ejedenicca imapi tiadsa ocassera tehe tojanitohui. Pina huahuajinadsa tibonoccori pora tocaniquimajarossa nanitohui – najari Simeo atti.

³⁶ Naraha nani Diodsa dada toqquimahuaji naqui amoneje jadani madijaro. Poni oninipi Ana. Ponipi Dio Atti ehecomera najaro. Imehi onipa Panohue. Najaripa idi Asera potemahi. Ponipi jadani tocajani. Dsohuatoponipi maqquideje cajiraha huajano 7 nadsapa maqqi dsoqqejari. ³⁷ Nahi maqqi dsoqqedsama tabira madijonajaroa huajanorini 84 bacco tajaripaja. Ponipi Diodsa dada toqquimahuaji madijaro. Amossinihuaji totoquena nejerani. Ponipi ssiajabote dsome

naqui Diotohui nadsapi dissera tajaro. Jipehe naqui huajijiradsa nenebocossa najaro. Diodsa naqui huajijiradsa huati huati teteje najaro. ³⁸ Nadsama Maria Dsodsendihuaji Ana ccajonadsa ejedeni qqi tadsapi huatidsejaro: – Jehe Abi Dio, jidapanana ticca dosseniji bica tahi qqi onajari, ia Idinide tojahijine – najaro Ana. Nadsapi madija huapimadsa pocca ima huati huati tajaro: – Jidapanana Jerosarecca madija aji ia Isaraeri potemahi iquejenajaro huapimadsa ia Idinide Cristo-Mesia bacco najonahi. Nidsa ia todinibaqquihitohui – najaro Ana attini.

Nasaretihuaji Jeso iaccanimanajari

³⁹ Nadsapa Dsodse Maria tadsajani ejedeni tossonedssaticca ima aji Diocca dosseniji dsodo najarossa inanamanehe jicadsapi Carireahuaji jai tojanijari, nahi poccadani odsa Nasaretidsa tomadinimanahijine. ⁴⁰ Nahidsa madimanadsapa Jeso napidsanapojari. Pohua bodi naco tohuatta-dsanapojari. Dio naco Jeso icatidseri najari.

Jesopa Diodsa dada toqquimahuaji mamaridedenicca ima ecomerajaro

⁴¹ Nadsama jodidenedicca ejete imenibote bacco tajaro, oninipi *Pascoa (Ettidsapi: Dio tossoniquimajari, inajaro.) Jeso imehi imeni tadsajanipa ejete tohuajiradsa totohueda najari Jerosarehuaji. Nama dsanapomanajari huajano huajijiradsa. ⁴² Nadsama Jeso huajanori 12 cajidsapa

pohuadenidsa Jerosarehuaji toccajari. Pina huajano huajijiradsa nama dsanapomanajarissa inanamana-jaro. ⁴³Odsa panani Jerosaredsa bacco toquinadsapa ejete qquide madimanaccajari. Ejete jicadsa Jeso imehideni huedaniraha Jesopa Jerosaredsa ibojari. Naraha Maria maqqi Dsodse tedsejepa bedidenitohui huatideni huato-jarajari. ⁴⁴Pohuadeni attipa: –Madija siba tajaria, pohua tessedsa ccanihitide –quinajari. Naraha cahadija-cossahidsa poccadeni ejedenitohui qqiiqquihihi naridsajari. Madija pohuadsa noccedeni jidsera tajaridsa, pohua imecotedenidsa naco huati naridsamanajari. ⁴⁵Naraha bacco quina-jaradsapa Jerosarehuaji tohuedanipomajari. ⁴⁶Nadsapa pohuatohui qqii naridsamanapomajari. Huada huatinimade tojari nadsana Diodsa dada toqquimahuajina Jeso bacco quinajari. Mamaridedenidsama pohua naco huittari canajari. Jeso pohua naco mamaridedeni imahaha canahidsa taharibo canajari. Pohua naco pohuadenidsa huati huati tajari, poccadeni huatinaja ecomerajaro. ⁴⁷Nadsapa huapima Jeso atti mittamanadsapa: –A, nahato tahi –quinajari. –Huati huati tahi imari bica taha –quinajari. ⁴⁸Nadsa imehi imeni tadsajani qqii toquina-dsapa jabojojanadsa: –A, ajadsana quejemajariraha –quinajari. Naneje imeni attinipi: –Ato ¿nejecotohui iadsa huatirani tibjarotte? Iapi amossi tajaro nitidija inadsa icappinadsa titohui qqiiqquihihi inaridsajaro –najar. ⁴⁹Naraha pohua attipa: –¿Nejecotohui otouhira ticadaridsajaro? Ohuadsa

ssamomo tinaccajaro nitide. Ohuapi occa Abicca odsadsa odsepe ijijaro –najari Jeso. ⁵⁰Naraha huati tahi mittamanaraha Jeso pocca ima mittamana-jaraccajari.

⁵¹Nadsapa pohuadenidsa toccanijari, poccadeni odsa Nasareti bacco tanimanajari. Imehideni attidsa ibora tajari. Mariapi pocca dacorehe qqii qqii tadsapi poni bodini nahato tajaro. Pohua tahimari huatini ajima nejerajaro. ⁵²Jesopa tohuattaja dsanapohui najari. Denima napi dsanapojari. Dio naco icatidseri dsanapojari. Madija naco icatidsemaneri dsanapojari.

**Huano Baotistapa dsama
huamonihuaji madija mari
icanabaqquijari**

Mateo 3.1-12; Maraco 1.1-8;

Huano 1.19-28

3 ¹Sacariacca ejedeni *Huanopa Dio pohua cadossejaridsa dsepe ijibote nadsa dsama cacahuadedeni ajama quinajari: Odsa panani *Romahuaji madimanageridenicca tamine deni tojahicca onipa *Tiberio. Pohuapa dsama huapima ecahuaridsajaro. Pocca cacahuehepi huajano 15 bacco tajari. Pocca dossenijidsapa madija ohuaha, madija ohuaha tamine toquejenaridsajari. Nadsama najaridenipa pocca dossenijidsa dsama cacahuade madiridsamanajari. Isaraeri potemahi jodiideni madimanahicca dsama oninipi Jodea. Nahicca taminepa Ponsio-Pirato. Isaraeri potemahi mota madimanahicca dsama oninipi Carirea. Nahicca taminepa *Herode. Herode pohua ohuaha Feripepa dsama onini Itorea ecahuajaro. Itorea

inorinicca naqui ecahuajaro. Najaro dsama oninipi Taraconite. Itorea inorini onihihuajicca dsama oninipi Abirinia. Nahicca taminepa Risania.

²Nadsama odsa panani Jero-sarehuaji dada toqqumadedenicca tamine deni toquejenahi pamaha madimanajari. Onidenipa: Anasa, Caipa, quinajari.

Jehe, najarideni taminedeni toquejenaridsadsa najari huajanodsasacariacca ejedeni Huanopa dsama todidi tanidsa madijari. Nanihuajipi dsama huamoni ponira, ssono caji, siba caji tani. Nanihuaji madidsapa Dio pocca dosseniji Huanodsas huati tajari. ³Nadsapa huani Jordao inidicca dsama huapima ccaridsadsa madija maride tojajari. Pohua attipa: –¡Ticcadeni imasiri tineboridsamanaji! –nandaridsa najari. –Tibodideni ajima tiquinaji: “Occa imasiri onebona. Jidapapi Diotohuira odsanapona” tiquinaji. Nadsana *totopa ticajiridsamanaji. Nema tiquinadsapi Dio ticcadeni imasiridsa: “Epeje, ohuati ajimani” nahijine –najari Huano. (Pohuadsa: Baotista, quiquinanajari. Ettidsapi: Totopade, inajaro.) ⁴Nadsama Huanocca imapi maittaccadsama Dio Atti cacomerabote Isahia dsodo inapojaro. Pohua atti ajama napojari:

–Nidsa dsama huamoni ssono caji, siba caji tanihuaji madijaripa atti mohui tadsa madija huahua huahua ihinajonabaqqui nahitohui.
Pohua attipa: “¡Ia Medsedeccejonabote nahi! ¡Tinajoramanaji! ¡Pohua tedsejema jahui tijinedeni tobicapoji!
Najaroa aji tibodideni pohuatohui tinajoramanaji” nanaja

nahitohui –napohui nade Dio.

⁵ –Pohua atti naco: “Nami totodohuedseri najaro tijinedeni ijiridsaji, onajaro. Ssono quequehemeri najaro ponanissa tanijine hui tiquinapoji.

Jahui johuidso tajaro naqui tijinedeni borocco tapoji. Jahui ccababa tajaro naqui tijinedeni huire tapoji.

Aji tibodideni naqui pina najarossa tinanamanapoji. Ia Medsedetohui tinajoramanaponijine ticcadeni ima tinanabicamanapoji, tibodideni tinahireridsamanaji.

⁶ Jehe, ia Medsedetohui tinajoramanadsa pohua ccajonadsapa pohujine madija huapimadsa Diocca daniji tossiejehecca ahuato tanijine”
nanaja nahitohui dsama huamoni huaji madijaripa –napohui nade Dio Atti Isahijine dsodo nanidsa.

⁷Nadsapa madija huapi taha totopa tohui quinadsa Huano madihihuaji jahijonana canajari. Naraha Huanopa pohuadenidsa huati tajari: –¡Tiadenipi pina maccassa tiquinani, ticcadeni imapi tabaccora tajaro! Tiadenipi tibodideni cacajiquimera-jeraraha: “Huano ia topa todsanabaqquidsapo Diocca najidsohuedsa dsori icanirenitohui” ¿tiquinajaroqui? Naraha tibodideni cacajiquimerajeradsapi dsori ticanire-jeranitohui.

⁸Naraha tettideni ajima tiquinadsana bica tani: “Imasiri onebona. Diotohuira obodi huahuatoma nanijine” tiquinadsapi tibodideni

cacajiquimeranicca ima ahuato tanijine ima bicanira tinanamanaji, onajaro –najari Huano. –Naraha tibodidenidsa ajima tiquinanitime: “Tcca idipa Abarahaoja najari, Diopa ia tohuattajobaqqi-jarahitohui” titiquina naraha tiadeni ticamaidsanimanajaro. Diopa madijassa najarahi. Pohua jipa tadsapa aji siba huihwitteri naridsa-jarodsa naco Diopa Abarahao potemahissa naha inahatoridsahijine pajirajari. Paji tiadenipi: “Abarahao potemahi iquejenani” tiquinaraha Diodsa iboraqquri tiquinejeradsapi tiadeni tohuattajobaqquihitohui. ⁹Nadsapi Diodsa iboraqquri tiquinejeradsa, ima bicani tinanamana-jeradsa naqui ticcadeni imapi pina ahua tabaccora tajaricca imassa najaro. Paji, najari ahua cacajine dsamipa najorahi. Ahua bono bica tajaradsapa ca tacaridsa tahi. Ca tacaridsadsapa bobottahuaji hua hua totdsima najari, diji tahijine –najari Huano.

¹⁰Nadsapa madija attidenia: –Nadsapi iaha ¿nejecoma inanijine, ibodi cacajiquimeranicca ima ahuato tanijine? –quinajari Huanodsa. ¹¹Naraha Huanopa: –Jehe, tiadenipi etero tetepicca pamehe ticajimanadsapi aja madija etero tetepicca cappirajaridsa ojarie da tiquinaji. Nadsama dsamatapa ticajimanadsa naqui madija dsamatapa cappirajaridsa da tiquinajo –najari Huano atti.

¹²Naraha nahidsa naco madija jahijonajari, aja *romanodeni-cca taminecca dosseniji dsiniro nanaccadedeni. Pohuadenipa: –Huano ia topa todsanabaqquina –quinadsa jahijonajari. Huanocca

marinaja mittamanadsapa Huanodsa huati toquinajari: –Mamaride, ia naqui ¿nejecoma inanijine, ibodi cacajiquimeranicca ima ahuato tanijine? –quinajari. ¹³Naraha Huanopa: –Jehe, tiadeni naqui aji dsiniro tinaccamanadsapi pina taminecca imassa nehera titinaccamana naji, onajaro. Denimapi poni –najari Huano.

¹⁴Naraha nahidsa soldadodeni naco totpatohui jahijonajari. Huanocca marinaja mittamanadsapa Huanodsa huati toquinajari: –Iaha ¿nejecoma inanijine, ibodi cacajiquimeranicca ima ahuato tanijine? –quinajari. Naraha Huanopa: –Tiadeni naqui madija pohuadeni dsepedenitajitohui, poccadeni dsinirotohui naqui jabojo tinanabaqquimana-jarajo, onajaro –najari Huano soldadodenisda. –Nadsama madija ima cappiraraha pocca dsinirotohui pohuadsa ima tinanamanajaro. Naraha tiadenipi nema tiquinejeraji. Ticcadeni cacahuehe manaconi tamine tiadenidsa dsiniro da inajarora epejena. “Najarodsara imadina” tiquinaji, onajaro –najari Huano soldadodenisda.

¹⁵Isaraeri potemahidenipa ia Idinide Cristo-Mesiatohui madimana-dsanaponaja Huanocca marinaja mittamanadsapa pohuadeni bodidsa: –¿Huanopa Cristo-Mesiaco? –quinajari. ¹⁶Naraha Huanopa pohua cacomerajari: –Ohuapi passodsa tiadeni topa odsanabaqqijaro. Naraha madija dacorajari ccajonabote nahi. Ohuapi tahide mari mari onaporaha aja dsotodecca mamaride ccajonajarina deni tojjari. Najarina Dio

Corime tibodidenidsa madihijine tiadenidsa inanaridsahitohui. Pohuapa pohuadsa toquejena-jarajardenipa jororoni jiquejeranihuaji hua idsimabaquihijine pajirajari. Ohuapi ajimani ojani. Pina pocca medsessa onanijinepi opajira-jerani. Pohua amoricca sadaria diccade naqui opajira-jerani –najari Huano.¹⁷ –Jehe, ccajonabote najaripa madija icattejidsa-baquihijine. Pina madija aroso jidsadsa trigo huire tahijine qquero quissa, qquero quissa, qquero quissa inamacossajarissa nahitohui. Trigo etero, eppe, ede najaripa jojodedsa toccadsapa noccona ecahuajari pocca odsahuaji. Naraha trigo etero, eppe, ede najaripa diji tahijine bobottahuaji hua idsimahitohui. Najaria aja Diodsa iboraquiri najarajardenipa *jororoni jiquejeranihuaji hua idsimabaquihitohui. Najaro jororonipi ohuihuira tani –najari Huano.

¹⁸Jehe, Huanopa madija Dio-tohui bodideni huatoma-manahissa tahijine mari icanabaquija najonapohui najari. Poccadeni imasiri nebomanahijine mari mari ihicana-baqqi najari. Pohuadeni bodi acco acco ihicamabaqqi najari. Pocca marinaja ajima najonajaro: –Ia Idinide ccajonabote nahi. Diocca cacahuehecca ima bicani tojabote nani –nandaridsa najari.

¹⁹Huanopa tamine Herode naco pocca imasiri nebohujine mari mari ihicana najari. Herodecca imapi tabaccora tajaro. Pohua imecote Feripecca amoneje onini Herodia idijidsadsa pocca amoneje tojajaro. Nadsapa Herodecca ima bica tejeradsa Huanopa Herode

mittahijine pohuadsa huati huati tataja naraha Herode pocca imadsa dissera tajari. ²⁰Pohuapa imasiri sse tapoja naraha ima denima tabaccora tanicca inanajaro. Najaria Huano toponi cocoro todsimadsa coro idsimajaripaja.

Jeso totopa cajjaricca ima

Mateo 3.13-17; Maraco 1.9-11

²¹Ajjaro imapi Huano coro todsima-jaraccadsa madija topa idsanaridsa-baquipodsapa Jeso naco topa idsanajari. Nahidsa Jeso Diodsa huatide tojadsapa meme naqui tohuaba najaro. ²²Nahidsapa Dio Corime ccaronajari. Ahuato taha pina midsorissa naha Jeso-huaji ccaronajari. Bacco naronadsapa memehuaji atti mittaronajari: –Tiapi occa ejedeni. Tiadsa ohuati huana tajaro. Ticca ima bica tajarojine ohuatidsejaro –najari Dio.

Jeso biridi onideni

Mateo 1.1-17

²³Jesocca huajano 30 nadsana madija maride tojaridsapojari. Nahihuajicca madija pohua tossonahi tahimari ssamoqqiri nadsapa pohuadsa: Dsodsecca ejedeni, quiquinanajari.

Nadsama Dsodsecca abipa Eri,

²⁴Ericca abipa Matata, Matatacca abipa Rebi, Rebicca abipa Meriqui, Meriquicca abipa Janai, Janaicca abipa Jose,

²⁵Josecca abipa Matatia, Matatiacca abipa Amosi, Amosicca abipa Nahomo, Nahomocca abipa Esri, Esricca abipa Nacai,

²⁶Nacaicca abipa Mahata,

Mahatacca abipa Matatia,
 Matatiacca abipa Semehi,
 Semehicca abipa Joseca,
 Josecacca abipa Joida,
²⁷Joidacca abipa Joana,
 Joanacca abipa Resa,
 Resacca abipa Sorobabeo,
 Sorobabeocca abipa Saratieo,
 Saratieocca abipa Neri,
²⁸Nericca abipa Meriqui,
 Meriquicca abipa Adi,
 Adicca abipa Cosama,
 Cosamacca abipa Eromodama,
 Eromodamacca abipa Eri,
²⁹Ericca abipa Josohue,
 Josohuecca abipa Eriesa,
 Eriesacca abipa Jorimi,
 Jorimicca abipa Matata,
³⁰Matatacca abipa Rebi,
 Rebicca abipa Simeo,
 Simeocca abipa Joda,
 Jodacca abipa Jose,
 Josecca abipa Jonao,
 Jonaocca abipa Eriaquio,
³¹Eriaquiocca abipa Merea,
 Mereacca abipa Mena,
 Menacca abipa Matata,
 Matatacca abipa Natana,
³²Natanacca abipa Dabi,
 Dabicca abipa Dsesse-Isahi,
 Dsessecca abipa Obede,
 Obedecca abipa Bohodsi,
 Bohodsicca abipa Sera,
 Seracca abipa Nahasao,
³³Nahasaocca abipa Aminadabe,
 Aminadabecca abipa Adami,
 Adamicca abipa Arani,
 Aranicca abipa Esero,
 Eserocca abipa Pare,
 Parecca abipa Joda,
³⁴Jodacca abipa *Jacobo,
 Jacobocca abipa Isahaca,
 Isahacacca abipa Abarahao,
 Abarahaocca abipa Tera,

Teracca abipa Nacoro,
³⁵Nacorocca abipa Seroco,
 Serococca abipa Racao,
 Racaocca abipa Pereque,
 Perequecca abipa Ebere,
 Eberecca abipa Sera,
³⁶Seracca abipa Cainana,
 Cainanacca abipa Arapacade,
 Arapacadecca abipa Seme,
 Semecca abipa Nohue,
 Nohuecca abipa Rameque,
³⁷Ramequecca abipa Matosare,
 Matosarecca abipa Enoco,
 Enococca abipa Jarede,
 Jaredecca abipa Maharareo,
 Maharareocca abipa Caino,
³⁸Cainocca abipa Enoso,
 Enosocca abipa Sete,
 Setecca abipa Adana,
 Adanacca abipa Dio.

**Jeso imasiri inananijine Satana
nattome inaraha jehe najarajari**

Mateo 4.1-11; Maraco 1.12-13

4 ¹Huano Jeso topa idsanaha jicadsapa Jeso bodidsa Dio Corime tojahissa tajari. Hueni Jordaohuaji qquemoranidsapa Dio Corime Jeso iaccajari, dsama huamoni ssono caji, siba caji tanihuaji madihijine. ²Nahihuaji bacco tadsapa huada 40 naha madijari. Nahidsa naco imasiri totonanade *Satanapa Jeso nattome inajari. Pohuapa Jeso imasiri inananijine dissera tajari. Nadsapa Jeso jiperahi huadari 40 naha madidsapa pemi-hissa tajari.

³Nadsapa Satana Jesodsa huati tajari: –Dio Bedi tijadsapi, jari, tijipanjine ajjaro siba dsamatapa tojanijine huati tinaji –najari.

⁴Naraha manaco Jeso Satanadsa huati tajari: –Dio Atti dsodo

nanidsapi ajima najaro: “Dsama-tapadsara imadini ojari-gerani” – najari Jeso.

⁵Nahi dsotode imasiri totonanade Satanapa ssono imeni huaji tani tetepihuaji Jeso iaquemoradsapa dsama huapima pohuadsa ahuato inaridsajaro. Satanapa amadsati Jeso dsama huapima dsopi icanaridsajari. ⁶Nadsapa Satana Jeso-dsa huati tajari: –¡Qui taneje! Ajijaro dsama huapimapi tiadsa da onanijine. Tiana najaro dsama huapimacca dosse tanijine. Najaro huapimacca biquehe naqui tiadsa onanijine. Ajijaro dsama huapimapi occa tojarode. Nema nadsapi ohua jipa onajarodsa da onanijine bica tani. ⁷Jehe, tipitodsa tittadsa ohuadsa tetidsedsa: “Occa tamine” taji. Ohuadsa nema tadsapi ajijaro huapimapi ticca tojanijine, onajaro – najari Satana atti. ⁸Naraha manaco Jeso Satana-dsa huati tajari: –Dio Atti dsodo nanidsapi ajima najaro: “Ia Medsede Dio Pohuadsara tetidsemanani ojari dsanapoji. Pohua Attidsara ibora-qquiri tiquinaji” nani Dio Attipi – najari Jeso.

⁹Nahi dsotodepa Satana Jeso odsa panani Jerosarehuaji iaccajari. Nanicca *Diodsa dada toqquma tetepihuaji inanajari. Nahidsa Satana Jesodsa huati tapomajari: –Jari, tiapi Dio Bedi tijadsapi joppa tinaronaneje, namihuaji tissona-geranitohui – najari. ¹⁰–Dio Atti dsodo nanidsapi ajima najaro: “Diopa pocca dodosse tabaquidsa huati tahitohui, tia ecahuamananijine. ¹¹Pohuadeni bijidsa tia dama ijidsamanadsapi temori naqui sibadsa cabiquera-geranitohui” nani Dio

Atti dsodo nanipi – najari Satana Jesodsa. ¹²Naraha manaco Jeso huati tapomajari: –Jehe, Dio Atti dsodo nani onhipi ajima najaro: “Ia Medsede ticca Dio nattome tajarajo. Tettidsa: ‘Dio ohuacatamana’ tejeraji” nani Dio Attipi – najari Jeso.

¹³Ima onihidsa ima onihidsa Satana Jeso icamaidsaridsaraha Jesopa Diodsa ibora tahissa tadsapa imasiri inaneje cama-gerajaro. Nadsapa Satana maidsehe onihibodi huatoma-jaradsapa toccanijari. Toccaniraha dsotode Jeso ica-maidsapomahijine madijari.

Jeso Carireahuaji maride tojapojari

Mateo 4.12-17; Maraco 1.14-15

¹⁴Jesopa dsama arobeni onini Carireahuaji Dio Corimecca dacorehema ccanijari. Nadsapa nahihuajicca madija huapima Jeso tahimari huati naridsamanajari. ¹⁵Odsa onihibodi onihibodi naridsanihuajiccaridsadsapa poccadeni Dio Atti mamarihuaji mari mari ihicanaridsabaqqi najari. Madija huapima attidenipa: –Jehe, Jesopa bica tahi –nanaridsamana najari.

Jesopa Nasaretihuaji toccanidsa mari icanabaqqijari

Mateo 13.53-58; Maraco 6.1-6

¹⁶Jesopa pohua napihiodsa panani Nasaretihuajiccanijari. Nahidsa madinidsapa *jassinajacca huada bacco tadsa *jodiodenicca Dio Atti mamarihuaji toqqedsimajari. Pohuapa odsa huapimadsa nama nanaridsa najari. Nadsapa

nahidsa queriquimanadsapa
pohuana totehemajari, Dio Atti
hua inanijine. ¹⁷Nahicca Dio Atti
mamari cacahuadena pohuadsa Dio
Atti dsodo nani da inajaro. Jeso
najaro papeo pico naquini tappa-
ppa inadsa Dio Atti cacomerabote
Isahiacca dsodoniji bacco inajaro.
Najaroa Cristo-Mesia madija Idinide
ccajonahitohui quiquinanajari tahi-
maripa ajiaropaji:

- ¹⁸ –Ia Medsede Dio, Pohua
Corime ohuadsa tojadsapa
pocca dacorehe ocajijaro.
Diopa ohua tocattejidsajari,
madija tohuati nahanaququiri
najaridenidsa
ima bicani icassiejeranijinecca
huati huati onaridsadsapi ima
mimittamana nahijine.
Nadsapa pohuadeni bodidenipa:
“Occa imasiri ohuadsa
ocassera tani” quinadsapa
onabicabaquihijine, onajaro.
Dio ohua cadossedsapa aja
madija cahacossamanajari-
denipa oneqqenabaquihihitohui.
Aja imasiri jinede Satanajine
madijapa pina cahacossama-
najarissa quinaraha
poccadeni imasiri epeje onana-
dsapi pina ojine jahinine-
jarissa nahitohui.
Aja madija noccodeni siri naco
noccodeni ssire onanabaquihijine.
Aja madija dsidsinidsa madi-
ridsamanajarideni naco
imasiri jinede Satanacca
maidsanijidsa jehe
quinaporaha
ossiejene pohuadenidsa bacco
tadsapi pohuadeni bodideni

ssire onanabaquidsa ohua-
dsana jehe quinahijine,
onajaro.

Madija nanajidso toquejenajari-
deni naco odinibaquihitohui,
onajaro.

¹⁹Diopa ohua cadossedsa huati
onaridsajaro.

Jidapapi madijadsa ia Medsede
Diocca ima bicani najorajaro.
Madija tocassiejerahijinepa
najorani

–nani Isahiacca dsodoniji Jeso
hua inajaro.

²⁰Nadsapa Jeso papeo pico
naquini pico inanidsapi Dio Atti
mamari cacahuadsa da inanijaro.
Nadsapa Jeso pohuadeni bacco-
huaji huittarijari. Nadsapa jassi
dsajarideni huapima Jeso icatta-
quimanadsapa pohuadeni mari
icanabaquijari. ²¹Nadsapa Jeso
huati tajari: –Dio Atti dsodo nani
aji hua onajarocca ima Cristo-Mesia
ccajonahitohui nanaja najaripa
jidapana tiadenidsa madijaripaja
–najari Jeso pohua tahimari huati
huati tadsa.

²²Nadsapa madija huapima atti-
denipa: –A, pohua attipa bica taha
–quinajari. –Naraha pohuapa
Dsodse bedia –quinajari.

²³Naraha Jeso huati tapoma-
jari: –Maittaccadsama icca idi-
denipa ajama quiquinanade:
“Toponi totonanomide tijadsapi
tia tinanomiji” quiquinanajari.
Nadsama tiadeni naqui ocanahatori
canani qqui tiquinanijine tohuini
tiquinadsapi ohuadsa tettideni
nema tiquinanitidija –najari.
–Aji odsa panani Capernaohuaji
ocanahatori canani ima timitta-
manadsapi tettideni: “Aji ticca

dsamadsa naqui najarossa tinanaji”
tiquinajaro nitide –najari Jeso.

²⁴Nadsapa denima huati dsanapojari: –Pajissara tiadenidsa huati onajaro: Maittaccadsamacca imapi ajima najonajaro: Dio Atti cacomerabote pocca dsamadsa bacco nanidsa naco pocca madijapa pohua attidsa jiperaquuri najari. Pina jidapana tiadeni naqui ohua aji occa dsamahuaji bacco onanijaroraha ohuadsa pajissa tiquinejerani.

²⁵Nadsama pajissara tiadenidsa huati onajaro: Maittaccadsama naco icca idideni Isaraeri potemahidenipa Diodsa jehe quinahissa tajaradsa Diopa dsama onihicca madijadsana canahatori canajari. Aja Dio Atti cacomerabote Eria madiccadsapa huajano huatimade tojari abadsico 6 canaha passo qquejerajaro. Nadsapi madija huapimadsa pemi tojaridsajaro. Ia Isaraeri potemahi jodiodeni iquejenajaro icca dsamadsa naqui amoneje maquirinideni jicamanaja najonapohui najarodeni huapi tajaro.

²⁶Naraha najarodeni huapimapi Eria acco icamabaquini jine Dio dosse inajarajari. Dsama onihihuajina Dio Eria dosse inajari. Odsa pamema najaro oninipi Sarepetahuajina toccajari. Sarepetapi odsa panani Sido huajira tanidsa odsa tojajaro. Nanicca amoneje jodio jerajaro maqqi dsoqqejarina acco icamajaro.

²⁷Ajjaro ima naqui nahatoquuri tiquinani. Maittaccadsama Dio Atti cacomerabote Eriseo madipodsa naco ia Isaraeri potemahi jodiodeni iquejenajaro icca dsamadsa dsamacoma onini *leprajine huapideni jadsimarojari deni huapi tajari. Naraha ojaría

jodio jarajari oni Nahamapa dsama Siriahuajicca madijaraha Eriseodsa ccajonadsapa pohuana tonomihi ojarijari –najari Jeso pohuadenidsa.

²⁸Naraha jodiodenipa aja Dio Atti mamaridsa jassi tarijari huapima Jesodsa huadimanajari. Jesocca marinajapi: –Dsama onihicca madija jodio quejena-jararaha Diopa najarideni naco acco icamabaquijari –nadsapa huadimanajari.

²⁹Nadsapa najarideni huapima Jesodsa huadimanadsapa mohua ininemanadsa iaqqenamanajari. Poccadeni odsa panani Nasareti denihuaji iaqqequequima-manajari. Nasaretipi ssonodsa odsa tojajaro. Nani ssono memedsaraniuaji iaqqemoramanajari, coro inaronamanahijine.

³⁰Naraha Jesopa pohuadeni jai tojahi nocconidsa tohuanajari. Cojojuhuaji bacco toquinadsapa: –Jeso coro inaronana –quinaraha madija huapi taraha dsodonijari Jeso. Dsodonidsapa toccanijari.

**Satanacca dodosse tocorime
madija bodidsa madidsajari**

Maraco 1.21-28

³¹Nadsapa Jeso Capernaohuaji toqquedsippajari. Capernaopi dsama Carireacca odsa panani. Nanidsapi Dio Atti mamari caji-manajari. Naniuaji poccadeni jassinajacca huadadsa Jesopa madija mari icanabaquijari.

³²Nadsapa pocca marinaja mittamanadsapa: –A, pocca marinaja bica taha –quinajari. Pohuapa atti caji tajarijine nama quinajari.

³³Nadsapa Dio Atti mamarihuaji Jeso mari icanabaquiaraha

nahidsapa madija bodidsa *Satana-cca dodosse tocorime cajijari huittarijari. ³⁴Nadsapa Jeso qqui tadsapa pohua bodicajine jadsirema atti atti najari: –¡Jaho, Nasarethuhajicca Jeso! ¿Nejecotohuira ticcajonajaro? ¿Icca ima tinajicanijine ticcajonajaroqui? Ticca ima nahato onani. Tiapi Dio-cca Ejedeni Bicabote tijani –najari Jesodsa.

³⁵Naraha joma nahijine Jeso atti dacoradsa huati tajari: –¡Epeje! ¡Didi taji! ¡Najari madijadsa tiqqe-naji! –najari. Nanaja tocorimejine madija pina cco inacossajarissa najari. Aja jassi taridsajarideni baccouhaji tohuedimajari. Nahidsa tohuedimadsapa pohua bodicca qquenajari. Naraha pohua inajidso-jaradsapa inabiquera-jarajari. ³⁶Nadsapa qqui toquinajari-denia huajo caniredsapa pohua-denira huati tocanirere canajari: –¿Nejecoma najaro marinaja cajijari? Ajararipa dacorehe caji, atti caji najaria. Madija bodicca tocorime pohujine qquenaha –quinajari.

³⁷Nadsapa Jeso tahimari huati naridsamanadsapa nahi pohuadeni inoricca huajirema nahicca madi-ridsamanajarideni naco Jeso tahimari mittaridsamanajari.

**Jesopa Ssino-Pedro massodini
inanomijaro**

Mateo 8.14-15; Maraco 1.29-31

³⁸Nadsapa Jeso aja jodiodeni-cca Dio Atti mamarihuaji qquenda-tocajari, Ssinocca odsahuaji toqquedsimajari. Nanidsapi Ssino massodini coma tajaro, huapini ppocorajaro. Nadsapa Jesodsa

huati toquinajari: –Poni tinanomiji –quinajari. ³⁹Nadsapa Jeso poni icattoma nadsa aji huapini ppocorajarodsa: –Epeje taji –najari. Naneje huapini tonahuihui najaro. Nadsapi amadsati tonomidsa totehemadsapi aja Jeso pocca mamari tabaqqui tedseje inajipa-baqquijari.

**Jesopa comaquiri najarideni
inanomiridsa-baqquijari**

Mateo 8.16-17; Maraco 1.32-34

⁴⁰Nadsapa maji tonahuidsapa aja comaquiri najarideni cacahuade-deni Jesohuaji eccajonabaqquijari. Poccadeni dsamacoma comani onihi onihi naridsajaro cajimanadsa Jesohuaji eccajonabaqquijari. Nadsapa comaquiri najarideni bara inaridsabaqquijari. Ohuaha bara inebo, ohuaha bara inebo naridsadsapa tocanomireridsajari. ⁴¹Madija bodidenidsa Satanacca dodosse tocorime cajimanajarideni naco Jeso pohua-denidsa huati tadsapa bodidenicca jahininejari. Tocorimedenia Jesopa madija Idinide Cristo-Mesia pohuadsa nahatoquiri nadsapa johua johua quinajari: –¡Tiapi Dio Bedi tijani! –quinaraha Jesopa pohua tahimari ecomeramananijine jipera tadsapa: –¡Epeje tiquinaji! –nadsa didi inanabaqquijari.

**Jesopa Carireahuaji Dio Atti
ecomeraridsajaro**

Maraco 1.35-39

⁴²Ssijajonadsa Jesopa nahi odsapananidsa toqquenadsapa madija madide nohuerahihuaji toccajari. Nadsapa madija huapima pohua-tohui qqui naridsamanajari. Jeso bacco quinadsapa: –Aji iadsa

timadiccaji, odsa onihihuaji tiqqe-
jeraji –quinajari. ⁴³Naraha pohua
attipa: –Ohuapi odsa onihihuaji
naqui Diocca cacahuehecca ima
bicani mari mari onaridsanijine,
onajaro. Nema onanijine occa Abipa
ohua cadossejari –najari Jeso.

⁴⁴Aja pohuapa Isaraeridenicca
dsama Jodeahuaji Dio Atti mamari
onihi onihi naridsanihuaji mari
mari nanaridsa najari.

**Jeso canahatori canajarijine
aba huemahi tojajari**

Mateo 4.18-22; Maraco 1.16-20

5 ¹Jesopa Carireahuaji Dio Atti
maride ccaridsadsapa Carireac-
cca coridsa onini onihi Jenesare
inidihuaji toqqedsippajari. Nahi-
dsapa madija huapi taha jahijona-
jari, Dio Atti mittamanahijine.
Nahidsana Jeso quebericossabote
najari. ²Nadsapa Jeso qqui taneje
canoa capamehe ijirani ssiqui-
dsa cacoda najaro. Canoa jinede-
denipa coridsa inididsa tajapa
ssahuade toquejenajari. ³Canoa
cajariepi Ssinocca. Najarods Jeso

toqqedsadsa jinededsa huati tajari:
–Ssino, madija domo huahi huajiji
canadsa mari ocanabaqquihijine
ohua dso ticanacossaccaji –najari.
Nadsapa Jeso canoadsa huittidsa-
dsapa madija huapima mari icana-
baqquijari.

⁴Nadsapa mari icanabaquua jica-
dsapa Ssinods huati tajari: –Ticca
canoa ajicca coridsa nocconi dsaja
tanihuaji ori ticanamanadsa ticca-
deni tajapa coro ticadsanamanaji,
aba ticajimananijine –najari Jeso.
⁵Nadsapa Ssino Jesods huati tajari:
–Ia Maride, iapi dsome inassiaja-
raha aba icaji nejerani –najari.
–Naraha ia ticadossebaqqui-
dsapi icca tajapa coro icadsippa-
na –najari Ssino.

⁶Nadsapa coridsa nocconihuaji ori
toquinadsa tajapa coro icadsana-
manajaro. Joca icanimoramana-
dsapi aba ijijari. Ccanaja tajarijine
tajapapi ojarie tajo tajo teri najaro.
⁷Nadsapa pohuadeni tesse canoa
onihiccatohui dsepedeni huadsa
huadsa quinajari, –Ibiji acco
tocamabaquua –quinadsa. Bacco



quinadsa joca icadsamanadsapa aba huemaja najari. Canoa capamaraha ijijari. Najari aba qquenejepa je tocanamanabote najari.

⁸Nadsapa Ssino-Pedro najari aba huemahi qqui tadsapa huajo najari. Nadsapa Ssino Jeso baccohuaji pohua pitodsa huittidsa nadsa huati tajari: –¡Ia Medsede, aji ohuadsapi huaji tinaji! Ohuapi imasiri sse onani –najari. ⁹Aja aba huemahi qqui toquinadsa Ssinopa cappinajari, pohua tessedeni naco cappinamanajari. ¹⁰Aja Ssino pohua tesse Sebedeo bedideni Satiaco, Huano quinajarideni naco: –A ¿nejecotohui aba huemajari? –quinajari. Huapima cappinamanaraha Jesopa Ssinodsa huati tajari: –Ticappina tejeraji. Jidapapi madija maride tijana. Tahidepi aba tiadsa tojahijine tidsepe ihiji naccadija naraha jidapapi madija Diodsa toquejenahijine tidsepe ijidsanaponitohui –najari Jeso Ssinodsa.

¹¹Nadsapa ori nanimanajari. Coridsa inidi bacco nanimanadsa canoapi ssoqueque icadsamanajaro. Nadsapa Jesodsa jai tojahijinepa poccadeni canoa, poccadeni tajapa, poccadeni aba, poccadeni madiejine huapima naqui inebomanadsa Jesodsana jai tojajari.

Huapi jadsimarajari Jeso inanomijari

Mateo 8.1-4; Maraco 1.40-45

¹²Jesopa dsama arobeni Carireada odsa panani onihidsa onihidsa mari mari naridsadsapa madija dsamacoma onini *leprajine huapi jadsimarohi pohuadsa bacco najonajari. Jeso qqui tadsapa

pohua bodia: –Jesona deni tojahi, ohuapi ajimani ojani –nadsa Jeso baccohuaji pohua pitodsa huitta nadsa panopi namidsana bacco tajaro. Nadsapa Jesodsa huati tajari: –Ohua Medsede, ohuapi bica onejeraraha tia jipa tinadsapi ohua tinanabicanijine nahato tinani –najari.

¹³Nadsapa Jeso pohua dsepedsa bara inadsapa: –Jehe, jipa onani. Tibicaji –najari. Nanaja amadsati pohua huapicca tomossissi nadsapa tobicajari.

¹⁴Nadsapa Jeso pohuadsa huati tajari: –Aji tibicanicca ima madijadenidsa huati taridsa tejerana. Naraha Diodsa dada toqqumahuajina ticcaji, onajaro. Nanidsa tiqquedsimadsapi dada toqqumade ojariadsara tepi tobicani tia nohue tinaji. Nadsapi Diodsa ticca ima bica tejeranicca toppineradsapi ticca daniji Diodsa tojanijine ohuaha ohuaha naha pina edede, ppiriri, oqui najari da da tidsimana. Pina Moisesicca marinajadsa iboraqu岸iri inajarossa tinanaji, onajaro. Nadsapi huapimadsa ticca ima toppinerani ahuato tadsapi: “Pajissa tibicajaro” quinahijine –najari Jeso pohuajine huapi tobicajaridsa.

¹⁵Naraha Jeso pohua tahimaripi ssaja taridsajaro. Najarojine madija huapima Jeso pohua atti mittade jahijonana canajari, madija tocanomirehijine naco jahijonana canajari. ¹⁶Naraha Jesopa pohua motta madija nohuerahihuaji totocca najari, Diodsa huati huati tahijine.

Jesopa madija ssomi tojahi inabiquemanijari

Mateo 9.1-8; Maraco 2.1-12

¹⁷Dsotodepa Jeso madija maride tojadsapa jodiodeni mota *marinaja pariseodsa jehe quinajarideni,



jodiodenicca marinaja maride-
deni naco mittade jassi tariridsa-
jari. Najaridenipa dsama arobeni
Carireahuajicca odsa huapimacca
jahijonaridsajari, dsama arobeni
Jodeahuajicca odsa huapimacca
naco jahijonaridsajari, odsa panani
Jerosarecca naco jahijonaridsa-
jari. Nadsama Jeso maride tojadsa,
madija inanomibaqquihijine naqui
Diocca dacorehepi Jesojine ahuato
tajaro. ¹⁸Nadsapa madija ide tone
biqueradsa isso ssomi tojahipa
pohua taborodsa poridsa pohua
tessedeni dsojo icanajonamanajari.
– Jeso baccohuaji porihijine odsa
bodihuaji dsojo icadsimana –quina-
jari. ¹⁹Naraha madija siba tadsapa
dsojo icadsimamanahijine tojera
tadsapi odsa tetepihuajina dsojo
icanamaromanajari. Odsa tetepini

arobenuhaji icatabojidsamanadsapa
madija ssomi tojahi pohua taboro-
dsa poridsa tappa icanaronamana-
jari. Madija domo huahuajanihi
nocconidsa da icanaronamana-
dsapa Jeso pohua baccohuaji bacco
tocanaronajari. ²⁰Jeso pohuatohui
dissessera tahi qqui tadsapa pohua
bodidsa nahato tajari: –Pajissa,
Jesopa madija inanomihijine nahato
tahi –quinahi Jeso pohuadsa
ahuato tadsapi coma tajaridsa huati
tajari: –Otesse, aji imasiri tinana-
jaro huapimapi onanamossini.
Jidapana ticca ima Diodsa tobicani
–najari Jeso.

²¹Jeso atti nama nadsapa jodio-
denicca marinaja maridedeni,
pariseodeni tedseje bodideni
huatoma-manadsapa: –Apaja,
Jesopa “Imasiri onanamossina”

naha. Pohua attipa: “Ohuapi pina Dio ojaní” nanaja najarissa naha. ¡Jesocca imapi bica tejerani pina Dio itamassojarissa nahi! Naraha Dio Pohuana ojarijari imasiri inanamossinijine –quinajari.

²²Naraha Jesopa pohuadeni bodicca ima nahato tadsapa pohuadenidsa huati tajari: –¿Nejecotohui tibodidenidsa nema tiquinajaro? –najari.

²³–Jari, tibodideni huatoma-manaji ¿nejecoma najaro imana tiadenidsa denima najora tani? Aja madija coma tajaricca imasiri onanamossini ¿najora taqui? Coma tajari onanabichahina ¿denima najora tajororane? ²⁴Naraha aji ohua *Madija Bedi oजारopi madijacca imasiri onanamossinijine Diocca dacorehe ocajini nahatoquiri tiquinanijinepi, aji namidsa naqui ohuatti ocajini nahatoquiri tiquinanijine coma tajaridsa huati onana –najari Jeso. Nadsapa madija ssomi tojahidsa huati tajari: –Tiadsa huati onadsa: ¡Titehemaji! ¡Titaboro tididsa ticca odsahuaji ticcaniji! –najari.

²⁵Nadsapa amadsati totehema-dsa... huapima cattomama canaraha pohua taboro idi nadsa pocca odsahuaji toccanijari. Nadsapa Diosda tohuatidsenidsa jiri jiri tanijari: –¡Diopa bica tahi, bica tahi! –tanijari. ²⁶Nadsapa madija huapima cappinamanaraha huatidsemanadsapa: –A, ¡Diojine bica tani! –quinajari. –Aji jidapana qqui inajaropi bica tani –quinajari.

Jesopa Rebidsa huahua najaricca ima

Mateo 9.9-13; Maraco 2.13-17

²⁷Nahi dsotodepa Jeso jahui toccadsa *romanodenicca

taminecca dosseniji dsiniro nanaccade qqui tajari. Pohua onipa Rebi. (Pohua oni ohuahapa Mateo.) Nahi romanodenidsa dsiniro da tanijine ihinaccamana nanihuajicca odsa bedeni bodidsa huittidsadsapa Jeso pohuadsa huati tajari: –Jina, ohuadsa ticcaji –najari. ²⁸Nadsapa Rebi pocca tarabaisda inebo, Jesodsana toccajari.

²⁹Dsotodepa Rebi Jesods huatidsedsapa: –Ijpaququina –najari. Nadsapa pocca odsahuaji pohua tessedeni Jeso tedseje jipaquimanahijine dsamatapa huemahi najorajari. Queriquimanandsa pohua tesse romanodenicca taminecca dosseniji dsiniro nanaccadedeni, pohua tessedeni tedseje jipaquimanajari. Nahidsa madija ohuahadeni naco Jeso pocca mamari tabaquima jipamanajari.

³⁰Naraha nahidsa naco jodiodenicca marinaja pariseods jehe quinarideni, jodiodenicca marinaja maridedeni tedsejepa madija imasiri cajimanajarideni tedseje Jesodeni jipamanahi qqui toquinajari. Najaro imadsa jiperaquiri nadsapa Jesocca mamari tabaquidsa atti atti quinajari: –A ¿nejecotohui tiadenipi romanodenicca taminecca dosseniji dsiniro nanaccadedeni tedseje, imasiri cajimanajarideni tedseje tijipamanajaro? –quinajari. (Aja madija nama najarideni tedsejepa jipade *oppina tani quiquinanajari.)

³¹Nadsapa Jeso pohuadenidsa huati tajari: –Ponima pohuadenidsa ojipa-jerajaro. Pohuama otohui huahua quina-jaraha. Nomiqqiri najaridenipa toponi totonanomide tohuini quina-jararaha

comaquiri najaridenina toponi totonanomide tohuini quiquinanajari –najari. –Ohuapi pina toponi totonanomidessa onajaro. Madijadenicca ima Diodsa tobicanijine pohuadeni accode occajonajarode.
³²Naraha madijapa: “Tapi bicaquiri inani” quiquinanajaridenicca ima onanabicanijine occajona-jerajaro. Imasiri cajimanajaridenicca ima onanabicanijinena occajonajaro. Pohuadeni bodideni acco ocambaququidsa: “Imasiri inebona” quina-hijine, onajaro. Pohuadeni bodi cacajiquimeradsapa Diocca ima dsatidsa toquejenahijine, onajaro –najari Jeso.

**Jesodsa jipehe nebocossanicca
 ima huati toquinajari**

Mateo 9.14-17; Maraco 2.18-22

³³Naraha nahicca madijapa Jesodsa huati toquinajari: –Huanocca *mamari tabaquipa jipehe nebocossamanadsapa Diodsara huati huati dsadsanapomana najari. Jodiodeni marinaja pariseodsa jehe quinajaridenicca mamari tabaqqi naco aja Huanocca mamari tabaquiissa quiquinanajari. Naraha ¿nejecotohui ticca mamari tabaquia jijipaquimana najari? –quinajari Jesodsa.

³⁴⁻³⁵Naraha manaco Jeso pohua cacomerajari: –Aja dsabisso amoneje cajibote najari pocca ejete najoradsa pohua tessedenitohui huahua nadsapa huapima pohuadsa queriquidsapa najaridenidsa: “Jipehepi tinebocossamanaccaji” ¿tiquinapadseje? Nema tiquinejarenitohui. Pohua tessedenipa pohuadsa huatidsemanadsa jipaquimana-hitohui. Naraha huada onihicadsa

dsabisso cajibote najari iacca-manadsapa pohua tessedeni jipehe nebocossamanahitohui –najari Jeso. (Nadsama najaro imapi Jeso aja namihuaji madidsapa pohua tessedeni pohuadsa huatidsemanadsa pohua tedseje jijipaquimana najaripaja. Naraha dsotode pohua inanadsoqqe-manadsapa pohua tessedenipa jipehe nebocossamanacchitohui, najaripaja.)

³⁶Nadsapa ajjaro namidsa imadnicca ima onihi Jeso pohuadenidsa huati tajari: –Icca etero dsatipi etero jadanidsa podsacossanijinepi beri beri inejerajaro. Icca etero nema inanadsapi icca etero dsati inatabcorajaro. Najaro etero dsati bobini beri tojidsani mota naqui etero jadanidsa podsacossadsapi najarossa nejerajaro. Jidsa tani. Etero jadanipi tobiquemaninira tani –najari Jeso. (Nadsama aji Jesocca marinajapi pina jodiodenicca marinajassa nejerani. Jeso pocca marinajapi dsati.)

³⁷ –Ima onihi naqui ajjima najaro: Uva ppejene nahatodsatipa bani etero ssequi nahi jadahidsa sso sso ihidsamana najarajari. Uva ppejene nahatodsatipa bani etero jadahidsa sso todsadsa ssicatadsapa jocaquera tajarijine sseo tahi caji tahi. Sseo tadsapa uva ppejene sso taha jica tahi, dsamine naco totabacoradsapa coro quina tahi. ³⁸Nadsama uva ppejene dsatipa bani etero ssequi nahi dsatidsara sso sso todotsa najari –najari Jeso. (Aja pohua atti nama najaripa madija bodi dsati tojadsana Jesocca marinaja dsati ecahuanijine pajirahi, najari.)

³⁹ –Ima onihi naqui tiadenidsa huati onana: Madija uva ppejene

jadahi dse dse quiquinanadsapa pohuadenipa uva ppejene nahato-dsati tohui quiquinana-jarajaripaja. “Uva ppejene jadahipa iadsa bica tajari, jidsera tahi” quiquinana-jari –najari Jeso. (Nadsama najaro imapi madija poccadeni ima jadani naqui najarossa najaro. Poccadeni ima jadanidsa huatideni huana-qquiri nadsapa Jesocca ima dsatidsa: –Najarona denima iadsa bica tani –quina-jarajaripaja. Poccadeni ima jadani nebomanahijinepa jiperaqquiri najaripaja.)

**Jassinajacca huadadsa Jesocca
mamari tabaqqupa aroso
jidsadsa trigo bono pore
dsanapomanajari**

Mateo 12.1-8; Maraco 2.23-28

6¹Naraha *jassinajacca huadadsa Jesopa pocca mamari tabaqqi tedseje toccajari. Huidsaja nocconi motta jahui toqqequimani jai tojeqqumajari. Nahihuajipa aroso jidsadsa trigo bono jadahi caji tajari. Jesocca mamari tabaqqi nahi jai tojeqqumadsapa pore dsanapomana-dsa pohuadeni dsepedsa siqui apa, siqui apa, siqui apa dsanapomanajari. ²Naraha jodiodeni marinaja pariseodsa jehe quinajarideni qqui toquinadsapa pohuadenidsa bica tejeradsa huati icanabaqqumanajari: –¿Nejecotohui jassinajacca huadara-ha najaro huidsajacca bono pore tiquinajari? Jassinajacca huadadsapi idsepe ijie *oppina taraha –quinajari. Naraha nonopa pamaha pore pore ijidsamaneri najariraha pariseodeni pohuama pohuadenidsa ima inahanamanajaro.

³Naraha Jeso pohuadenidsa huati tajari: –¿Naraha tiadenipi aji Dio

Atti maittaccadsama dsodo naniccasda Dabicca ima hua hua titiquina naraha tetideni ajimamanajarorane? Najaro imapi Dabipa pohua tessedeni tedseje pemimanadsapa pan Diodsa da tahicca oppina taraha jipamanajari. ⁴Diodsa dada toqqumahuaji toqquedsimadsa cacahuadedsa pan tohui huati tajari. Pan ohuaha nohueradsa Diodsa da tahiccaraha Dabi jipajari, pohua tessedenidsa naco da inabaquidsa jipamanajari. Najari pan Diodsa da tahipa dada toqquma cacahuadedenira jijipamana najariraha Dabideni pemimanadsa jipamanajari oppinera tahi –najari Jeso.

⁵Naraha Jesopa denima pohuadenidsa huati tajari: –Madija Bedi ojajaroa jassinajacca huadapi ohuana jinede ojani. Jassinajacca ima cacahuadepi ohuana paji –najari Jeso.

Madija dsepe siricca ima

Mateo 12.9-14; Maraco 3.1-6

⁶Jassinajacca huada onihidsa naqui Jesopa Dio Atti mamarihuaji toqquedsimadsapa mari icanabaqqipomajari. Naraha nahidsapa madija dsepe nahatonicca ccara tocajani huittarijari. ⁷Naraha jodiodenicca marinaja maridedeni, marinaja pariseodsa jehe quinajarideni tedseje Jeso innocodsamanajari. Jesopa *jassinajacca huadadsa madija inanomabaquidsapa pohuadenidsa pina jassinajacca huada jerajarodsa dsepe ijjarissa najari, quinajari. Pohuadeni bodipa: –Jidapana jassinajacca huadadsa dsepe siri inanomidsapa Jesodsa ima inahananijine –quinajari.

⁸Naraha Jeso pohuapa pohuadeni bodi nahato tadsapa madija dsepe siridsa huahua najari: –Titehemadsa ahuaaji ticcajonaji –najari. Nadsapa totehemadsa nahihuaji huajari. ⁹Nadsapa Jeso huapimadsa huati tajari: –Tiadenidsa huati onana. Moisesicca marinaja, icca madijacca marinaja naqui nahatoqqiri tiquinadsapi ohuatti tecomeramanaji. Jassinajacca huadadsapi ¿nejecoma najaro ima inananina “Bica tani” tiquinajaro? Jassinajacca huadadsa madija inabicabaquidsa “Oppina tani” ¿tiquinajaroqui? Madija inajidsobaquidsana “Bica tajaro” ¿tiquinajarorane? –najari. –Jassinajacca huadadsa naco ijine madija tossiajadsa ¿oppina taqui? “Paja dsoqquerina” ¿tiquinajarorane? –najari.

¹⁰Nadsapa Jeso madija huapima jassi nahuajanijari noccodeni icattabaqqi nadsa dsepe siridsa huati tajari: –Jari, tidsepe ohuahuaaji da ticanajonaji –najari. Nadsapa pohua dsepe pohuahuaaji da icanadsapi dsepe tocabicajaro. ¹¹Naraha jassi nahuajanijarideni motapa pariseodeni. Pohuadenina Jesodsa huadimanajari. Nadsapa pohuadenira imahaha canadsa: –¿Nejecoma inanadsa Jeso inandsoqqehijine? –quinajari.

***Jeso pocca dodosse
tabaqqi 12 quinajari
icattejidsabaqqijari**

Mateo 10.1-4; Maraco 3.13-19

¹²Nadsapa najari abadsicodsa Jesopa Diodsa huati tahijine ssonohuaaji toqqemorajari. Nahidsa dsome Diodsa huati huati taha

cassiaja najari. ¹³Cassiajadsapa pocca mamari tabaquidsa huahua najari. Huapima queriiquimanadsa 12 quinahana icattejidsabaqqijari, pohua huatimade toquejenahijine. Nadsapa Jeso onideni icanacani-baqqijari: –Occa dodosse tabaqqi –najari. ¹⁴Tahidepa Ssino. Pohua oni Jesojine icanacanidsatipa: *Pedro, najari. Pedro ohuaha Adiri. Pohuadeni tesse Satiaco, Huano, Feripe, Batorome quinajari. ¹⁵Pohuadeni tesse ohuaha naco Mateo, Tomas, Satiaco quinajari. Satiacopa Arapeo bedi. Pohuadeni tesse ohuaha naco Ssino, pohuadsa: romanodeni momohuade, quiquinajari. ¹⁶Pohuadeni tesse ohuahapa *Joda. Najaripa Satiaco bedi. Jicahiccapa *Joda Iscariote. Najaripa Jeso ccacorade. Najarideni Jeso icattejidsa-baqqijaripa 12 quinaha pohuadsa toquejenajari.

**Jesopa madija huapi taha mari
icanabaqqijari**

Mateo 4.23-25; Maraco 3.7-12

¹⁷Nadsapa Jeso pocca dodosse tabaqqi 12 quinajarideni tedseje qqedsippaniraha nani deoni huamo tanihuajipa madija huapima Jeso pohuatohui madimanajari. Nahihuaji Jesocca dodosse tabaqqi huapima queriiquimanajari. Nahidsa naco dsama arobeni Jodeacca madija, odsa panani Jerosarecca madija, passo imeni inididsa madimanajarideni, aja odsa panani pamehe Tirocca, Sidohuajicca jahijonana canajari. ¹⁸Huapimapa Jeso atti mittamanaja camahijine jahijonajari. Comaqqiri najarideni Jeso inanomibaqquihijine naco jahijonajari. Aja madija bodidenidsa

Satanacca dodosse tabaqqi tocorime madidsamanajarideni naco jahijonajari. Pohuadenipa nanajidso toquejenaraha najarideni naco Jesojine tocanomireridsajari. ¹⁹Madija comaqquri najaridenipa: –Jesodsa idsepedsa bara inadsapi icanomirenijine –quinadsa pohuatohui disseraqquri najari. Aja Jeso pocca dacorehe pohuadenidsa tojadsapi huapima tocanomireridsajari.

**Diopa madijadsa ima bicani
inanajarocca ima**

Mateo 5.1-12

²⁰ Jeso pocca dodosse tabaqqi icatabaqqi nadsa huati tajari: –Tiadeni motapi ticappiramana-
raha Diotohuira tiquinadsapi Diopa tiadenidsa ima bicani inanajaro. Diocca cacahuehe tiadenidsa tojanitohui.

²¹ –Tiadeni mota naqui jidapana tipemimanaraha Diotohuira tiquinadsapi Diopa tiadenidsa ima bicani inanajaro. Nidsa dsotode Diohuaji tiqueriquidsapi tipajiramana-
nissa tanitohui.

–Tiadeni mota naqui jidapana oji tiquinaraha Diotohuira tiquinadsapi Diopa tiadenidsa ima bicani inanajaro. Nidsa dsotodepi tetidsemaneri nadsa jaja taquimananitohui.

²² –Ohuapi Madija Bedi ojajaroa occa madija tiquejenararojinepi madija ohuadsa jiperaqquri najaridenipa pohuama tiadenidsa naco jiperaqquri nahitohui. Najaro ima tiadenidsa tojadsapi Diopa tiadenidsa ima bicani inanajaro. Madija ohuadsa jiperaqquri najaridenipa aja tiadenidsa naco: “Iadsa tiquejemamana tejeraji” quinadsapa

tiadeni dosse dosse tatanibaqqi-
mana nahitohui. Najaro ima tiadenidsa tojadsapi Diopa tiadenidsa ima bicani inanajaro. Nadsama madija tiadeni totamasso-baqqi-
manadsa naco Diopa tiadenidsa ima bicani inanajaro. Nadsama tiadenipi ohua onidsa tecanimanajarojine aja ohuadsa jiperaqquri najaridenipa tiadeni onidsa naco: “Imittana inejerani, tabaccoraqquri nahi” quiquinanahitohui. Najaro nacasserehe tiadenidsa tojadsa naqui Diopa tiadenidsa ima bicani inanajaro. ²³ Ohuadsa jiperaqquri najarideni biridideni naco maitta-
ccadsama Dio Atti cacomeraqquri najarideni inajidso-baqqiimanaja najonapohui najari. Najarideni potemahi jidapana naco tiadeni tonajidso-baqqiimanadsa jepeje!
Tibodideni ccaracossa tejerana. Pina tetidsemaneri nana, onajaro. Nidsa memehuaji Dio madihihuaji bacco tiquinadsapi Diocca daniji bicabote tiadenidsa tojanitohui –najari Jeso.

**Diopa madija
ettajobaqquihitohui**

²⁴ Nadsapa madija domo huajari-
dsa Jeso denima huati huati tajari: –Tiadeni motapi tidsepedenitaji ssequiri tiquinararojine Dio tohui tiquinejerani. Jidapana ajijaro namidsa timadimanadsapi tiadeni tohuini tiquinanica huapima ticajimanaraha nidsa dsotodepi tiadenidsa nohueranitohui. A, tiadenipi tohuati nahanaqquri tiquinani. Diopa oppina tanihuaji tiadeni tonanabaqquihitohui.

²⁵ –Aji tiadeni mota naqui jidapana jijipa, dsamatapa ssequiri

tiquinajarojine Dio tohui tiquinejerani. Naraha nidsa dsotodepi tipemimananitohui. A, tiadeni naqui tohuati nahanaqquiri tiquinani. Diopa oppina tanihuaji tiadeni tonanabaquihitohui.

–Tiadeni mota naqui ajjaro dsamadsa timadimanaccadsapi ponima jai tijaridsadsa tetidsemaneri, jaja tiquineri naridsadsa: “Jehe, bica tani” tataridsamana naraha nidsa dsotodepi ocasserani teridsamanadsa oji tiquinanitohui. A, tiadenipi tohuati nahanaqquiri tiquinani. Diopa oppina tanihuaji tiadeni tonanabaquihitohui.

²⁶ –Nadsama tiadeni mota naqui aji occa imassa tinanamana-jeraraha madija tiadenidsa: “Jehe, ticcadeni ima bica tani. Tiadenidsa etidsejaro” quiquinanadsa tetidsemanaraha tiadenipi tohuati nahanaqquiri tiquinani. Diopa oppina tanihuaji tiadeni tonanabaquihitohui. Maittaccadsama Dio Atti cacomeraqquiri najarideni madimanapodsaco naco Dio Atti mari icanabaquihissa taraha poccadeni marinajadsa: “Jehe, bica tani” quina-jarajari. Naraha maittaccadsama naco madija ohuahadeni attidenipa: “Ia naqui Dio Atti cacomeraqquiri inani” quiquinanaraha pohuadeni nanamaidsamana najari. Najaridenidsana madija huapima attideni: “Jehe, ticcadeni ima iadsa bica tani” quiquinanajari, maidsehena pohuadenidsa bica tadsa. Jidapana naco tiadenidsa: “Jehe, bicaqquiri tiquinani” quiquinanajari. Najaridenia ajaripaja jinodideni potemahi –najari Jeso.

**Tiadeni huadidedenidsa
tetideni huanacquiri nana**

Mateo 5.38-48; 7.12

²⁷ –Nadsama aji ohuatti timittamanajarodeni tiadenidsa ajima

onajaro: Tiadeni huadidedenidsa pina tetideni huanacquiri nana. Aja tiadenidsa jiperaqquiri najarideni naco pohuadenidsa pina ima bicanira titinanamana nana, nani tijinedeni ima bica tanijine, onajaro. ²⁸ Aja madija ohuahadeni naco tiadeni totamassobaquimanadsa: “Tabaccoraqquiri tiquinani” quiquinanaraha pina tettideni bica tadsa pohuadenidsa huati huati tataridsamana nana, onajaro. Aja madija tiadenidsa tabaccorehe ihinanamana nadsa naco pina Diodsara huati huati titiquina nana, nahi Diona inabicabaquihijine, onajaro. ²⁹ Madija huadidsa tipano idanidsa naco “Ohuaccone manaco odana” tejerana, onajaro. Tiadsa huadi tajaripa pajara tia cahadi, pajara tia cahadi naraha manacopi pohuadsa tedi tejeraji. Nadsama madija ohuahapa ticca etero pamacossajaro qqui tadsa huapicca tohuini incomadsa: “Ohuadsa da taji” nadsa naco pohuadsa da tinaji. Titetepicca onihi naqui teccocco-jeradsa pohuadsa da tinaji. Nema tiquinadsapi occa marinaja tecahuamanajaro. ³⁰ Madija tidsepetaji mitta nadsa naco pohuadsa da tinaji. Tidsepetaji huatirahi ididsa naco huati tidsima tejeraji. ³¹ Nadsama tiadenipi madija huapima tiadenidsa ima bicanira inamananijine tohuini tiquinadsapi madija huapimadsa naqui ima bicanira titinanamana nana, onajaro –najari Jeso.

³² –Tiadenipi madija tiadenidsa huatideni huanacquiri najaridenidsara tetideni huanacquiri nani ojari nadsapi ¿Diopa tiadenidsa: “Jehe, bicaqquiri tiquinani”

napadsaja? Nohuerahi. Aja madija imasiridsa disseraqquri najarideni naco pohuadeni tessedsa huatideni huanacquiri nahi. Naraha pohuadeni tesse jarajaridenidsapa huatideni huaneraqquri nahi.

³³ Tiadenipi madija tiadeni acco camamanajari-denidsara pohuadeni acco ticamabaquimanahi ojari nadsapi ¿Diopa tiadenidsa: “Jehe, bicaqquri tiquinani” napadsaja? Nohuerahi. Aja madija imasiridsa disseraqquri najarideni naco pohuadeni tessedeni acco icamamana tahi. Naraha madija pohuadenidsa noccodeni jidsaqquri najaridenidsapa pohuadeni acco camade jiperaqquri nahi. ³⁴ Tiadenidsa madija attipa: “Pohuama ohuadsa da taccajo, nidsa tiadsa da onanihijine” nadsa tibodidenipi: “Jehe, ohuadsa da inanihitohui, nidsa dsotode ocajipomanijine” titiquina nadsapi najaridenidsara da da tiquinani ojari nadsapi ¿Diopa tiadenidsa: “Jehe, bicaqquri tiquinani” napadsaja? Nohuerahi. Aja madija imasiridsa disseraqquri najarideni naco pohuadeni tessedsa pohuama da quina tahi, dsotode pohuadenidsa ccanipomahijine. Naraha madijapa da naniraqquri najaridenidsapa pohuama dade jiperaqquri nahi.

³⁵ –Naraha tiadenidsa ohuattipi: Tiadeni huadidedenidsa naco tetideni huanacquiri nana. Tiadeni acco cama-jarajarideni naco acco ticamabaquimanana. Madija naco tiadenidsa: “Pohuama ohuadsa da taccajo” quinadsapa pohuadenidsa da da tiquinana. Dsotode da inanihitohui tibodideni huato mana tejerana. Nema tiquinadsapi

manaco Diopa tiadenidsa pocca daniji bicabote da inanitohui. Nadsapi ticcadeni ima naqui ahuato tanijine, aja Abi Dio memehuaji madijaricca ejedeni tiquejenajaro. Pohuapa madija huapimadsa pocca nahatoniji eccocco-jerajaro. Dio Pohuadsa: “Ticca daniji ohuadsa bica tani” quina-jarajaridenidsa aja madija tabaccoraqquri najaridenidsa naco Abi Diopa huapimadsa huati huana tajari. Ajijaro dsamadsa madimanajarideni huapimadsa Dio pocca nahatonaja inanaridsajaro. ³⁶ Nadsama tiadeni naqui pina ticcadeni Abi Diojinessa tinanamanana. Abi Diopa tohuati huanehe, acco camehema madijadsa huati huana tajari, tiadeni naqui madija huapimadsa tetideni huanacquiri nadsa pohuadeni acco acco titicamabaquimana nana, onajaro –najari Jeso.

**Madija ohuahacca imadsa:
–Tabaccora tani –tiquinejeraji**

Mateo 7.1-5

³⁷ –Tiadenipi madija ticattejidsa mana tajarajo. Pina Diocca dosse-nijissa inana-jerani qqii tiquinadsa: “A, namajide rahi, pocca ima bica tejerani” tiquinejerana. Madija-denidsa tettideni nema tiquinejersana manaco Diopa tiadenidsa: “A, ticcadeni ima naqui bica tejerani” najarahitohui tiadenidsa. Aja madija ohuahacca ima tiadenidsa bica tejeradsa naqui tettidenipi: “Pohuapa tabaccora tahi, pohua nanajidso tojahi bica tahi” tiquinejeraji. Nema tiquinejeradsana manaco Diopa tiadenidsa: “Tia naqui tabaccora tinani, nanajidso tijanitohui” najarahitohui. Nadsama madija ohuahacca ima tiadenidsa

bica tejeradsa naqui epejena najaro imatohui tibodideni huatomana dsanapo-gerana. Pohuadsa tedimanasda naqui denima ticahadirejerana, pina ticajonerapomana, onajaro. Nema tiquinadsapi titesedsa ima bica tejerani tinanamanadsa naqui manaco tiadenidsa: “Epejena, huadi onejerani, ohuati ajimani” nahitohui. Diocca ejedeni tiquejenadsapi nidsa dsama jicadsa Dio naco ticcadeni ima huati nimani-jarahitohui. ³⁸Nadsama tiadenipi madijadsa da tiquinadsa naqui najaropi manaconitohui jerani ponima da tiquinaji. Nema tiquina-dsapi Diopa tiadenidsa da inanitohui. Pohuapa tiadenidsa huemani da inanitohui. Pina ticcadeni sacco Pohuajine ijijaro, epejeraha denima ajarini joca inadsa topa icamerijaro, denima quissa icameridsapi ijinissa tajaro. Nadsapi tiadenina huemani ticajimananitohui. Tijinedeni madija ohuahadsa tinanamanajarocca imapi manaco tiadenidsa najarossa najaro inanamananitohui, onajaro. Pina huemahi madijadsa da tiquinadsapi manaco Diopa tiadenidsa huemahi da inahitohui. Madijadsa badsira taha da tiquinadsa naco manaco Diopa tiadenidsa badsira taha da inahitohui, onajaro –najari Jeso.

³⁹Nadsama Jesopa ajijaro namidsa imadinicca imadsa mari icanabaqquijari: –Nocco siri pamahapa ¿ojaria pohua tesse eccaridsahijine nahato taco? Nahato tajarahi. Pohua tesse eccaridsadsapa odi tohuajaro-dsa pamaha tocatojedsimera tahi. Paji, pina nocco sirissa tiquinejerana. Ssamoqquiri tiquinejerana. ⁴⁰Ajjaro ima tetideni ajimamana tejerana: Madija pocca mamari tabaquipa pohuadeni maridedsa deni

toquejena-jarahi. Pohuadeni maridena denima nahato tajari. Naraha disseraqquri nadsa tocahatterahissa tadsana pina pohuadeni maridessa quinahitohui, onajaro. Jehe, nema tiquinana. Ohuadsa ticahatteranissa tana, onajaro –najari Jeso.

⁴¹Madija ohuahacca imadsa: –Bica tejerani –inejeranijine Jesopa ajijaro namidsa imadinicca ima tadsajani mari icanabaquipomajari. Pohua attipa: –Tiadenipi timecotecca madie pina Diocca dossenijissa nejerani qqui tiquinadsapi tettideni: “A, pohuajine ima bica tejerani” titiquina naraha tiadeni naqui imasiri ticajimanani. Nadsama najaro ticcadeni imapi pina timecote noccodsa ahua majiconi huedsani qqui tinajarocca imassa najaro. Timecotedsa: “A, tinoccodsa ahua majiconi huedsaha, tire oninena” taraha tinoccodsa naqui ahua majiconi imeni huedsani. Tinocco ahuatora tadsapi qqui tinanissa tejerani.

⁴²Nadsama tiadenipi imasiri ticajimanaraha ¿nejecotohui timecotedsara: “A, tijine ima bica tejerani. Tia acco ocamana, ticca ima tobicanijine” titiquina naraha tiadenipi tahide ticcadeni imaha tijinedeni tobicajonerani? ¿Jaho, nema tiquinadsapi pina mamaisadedenissa tiquinajaro! Ticcadeni ima bica tejeradsapi aji ticcadeni imaha tinanabicamanapoji. Nadsana timecote acco ticamamanahijine tipajiramananitohui, onajaro –najari Jeso.

Ahua bono tahimari

Mateo 7.17-20; 12.34-35

⁴³Jesopa ahuaacca imadsa mari icanabaqquihijine huati huati tajari: –Ahua bicahidsapa bono tabaccora tajari cahua-jarajari.

Ahua tabaccora tajaridsapa bono bicahi quejemaha cahua-jarajari. ⁴⁴Madijapa iquiera bono tohui quinadsapa ¿botani tetehuedsa iquiera bono pore pore quinaco? Nohuerahi. Uva bono tohui quina-dsa naco ¿cotihidsa uva bono pore pore quinaco? Nohuerahi. Nadsama ahua huapima bono cajiridsadsapa bono bicahi cajihi nahato inadsapi: “Najari ahuapa bica tahi” inajaro. Bono tabaccora tahi cajihi nahato inadsapi: “Najari ahuapa tabaccora tahi” inajaro. ⁴⁵Aji madijacca ima naqui pina ahuacca imassa najaro. Aja madijadenipa pohuadeni bodicca ima nahato inejeraraha poccadeni madie qqui inadsapi pohuadeni bodicca ima naqui iadsa ahua to tajaro. Madija bica tajaripa pohua bodidsa ima bicani cajidsapa ima bicani ihinana najaro. Naraha madija bica tajararipa pohua bodidsa ima tabaccora tani cajidsapa imasiri ihinana najaro. Aja madija huapimapa pohuadeni bodidsa ima caji tadsapi najaro imara huati huati totoquina najari –najari Jeso.

Odsa capamajarocca ima

Mateo 7.24-27

⁴⁶ –Tiadeni motapi ¿nejecotohui ohuadsa “Ohua Medsede” titiquina naraha aji ohuattissa tinanamanagerani? onajaro. ⁴⁷⁻⁴⁸ Aja madija ohuadsa bacco quinadsa ohuatti mittamanadsapa ohuattissa inananajaropi pina aja madija “Odsa bicani ocanahatona” najaricca imassa quinajari. Madijapa pocca odsa icanahatonijinepi odi hui idsimajaro. Nami ccara tanihuaji bacco tadsana huehuema ppa idsajari. Nadsapi odsa daco cajirajaro.

Nadsapi ppani imeni bacco nadsa dacorehe ssahaha canadsa odsadsa jiba jiba naraha cojo tocanajerajaro. Aji huehuemapi nami ccara tanihuaji bacco teje najaro. ⁴⁹Naraha madija ohuatti mittamanaraha ohuattissa inananagerajaropi pohuadenipa pina aja madija pocca odsa nahatode ssamo tajarissa quinajari. Najari madijapa pocca odsa icanahatodsapi huehuemajine odi hui todsanipi ssiqui nami ccara tanihuaji bacco tejerajaro. Odipi huaji tejerani. Nadsapi ppani imeni bacco nadsa dacorehema ssahaha canadsa odsadsa jiba jiba nadsapi odsa cojo tocanajaro. Odsa cojo tocanadsa toquehedimadsapi catirorijarossa najaro –najari Jeso.

Romanodenicca soldado dossedecca medse Jeso inanomijari *Mateo 8.5-13*

7 ¹ Jeso madija mari icanabaquia jicadsapa odsa panani Capernaohuaji toccanijari. ² Nahidsapa romanodenicca soldado dossede madijari. Pocca dodosse tabaqqi soldadopa 100 quinajari. Najari pocca odsahuajipa pocca medse coma tajari huatiabote najari. Puhuapa pocca medsedsa huati huana tajari. ³ Nanaja Jeso tahimari mittadsapa nahicca *jodiideni ime jocohuideni mota Jesods huati toquinahijine dosse inabaqqijari: –Jeso ahuaji ccjonahijine huati ticanamanahissatana, nahi occa medse inanomihijine –najari. ⁴⁻⁵ Nadsapa Jesods bacco toquinadsapa huati toquinahissa tajari: –Aja romanodenicca

soldado dossedepa bica tahi. Puhuapa icca madija jodiidenidsa naco huati huana tajari. Puhuapa icca Dio Atti mamari naqui pohuajinena icajijaro. Puhuapa iadsa bica tahi. Manaco pohua acco ticamajo, inajaro –quinajari Jesodsa.

⁶Nadsapa Jeso pohuadenidsa toccanijari. Odsahuaji bacco tani-manabote naraha romanodenicca soldado dossede pohua tessedeni tahide dosse inabaquijari, Jeso bacco ijidsamanahijine. Jeso jahuidsa bacco ijidsamanadsapa pohuadsa huati toquinajari: –Soldado dossede attipa ajama napaja: “Ohua Medsede, epeje, occa odsahuaji ticcajona tejeraji. Tiapi nahatojide tijirani naraha ohuapi ajimani, ssamo onani. Occa odsahuaji tiqqedsimanijine jipera tinanitide” napaja –quinajari Jesodsa. ⁷–Pohua attipa: “Jeso, ohuapi pina aji tia bica tinajarossa onejerani onadsa tia qquide oqqejerajaro. Naraha tia huati tinadsapi occa medse tonomihitohui, onajaro” napaja –quinajari. ⁸–Pohua atti denima naqui: “Aji ohua naqui occa taminecca dosse-nijidsa omadijaro. Manaco soldadodenipa occa dossenijidsa madi-manajari. Puhuadenitohui huahua onadsapi jahijona tahi. Dosse dosse onadsa naco ohuattidsa jai toja tahi. Occa medsedsa naqui: “Tidsepe ijiji’ onadsa naqui pina aji ohua odossejarossa inana tani. Nema nadsapi ajidsa huati tinadsa occa medse tonomihijine tipajirani, napaja tiquinana” najari romanodenicca soldado dossede atti –quinajari pohua tessedeni.

⁹Najaro ima Jeso mittadsapa huatidsedsa pohua bodi: –A,

pohuapa nahato taha –najari. Tahidehuajanidsa pohua nattihuaji jahimissajaridenidsa huati tajari: –Tiadenidsa huati onana: Ajajari bodi namanahapa pajissa nahissa tajari. Tiadeni Isaraeri potemahideni huapimapi tettideni ohomitta naraha ajajarissa najari tiadenidsapa nohuerahi. Pajissa tiquinanissata tani ohomitta nejerani –najari Jeso.

¹⁰Romanodenicca soldado dossede pohua tessedeni jai tojanidsa pocca odsahuaji bacco tanimanadsapa pocca medsepa tonomihira qqui toquinajari.

**Jesopa amoneje tabira
tocajani bedi inahatonijari**

¹¹Nahi dsotodepa Jeso pocca dodosse tabaqqi tedseje odsa onini Nainahuaji jai tojajari. Madija huapi taha naco pohuadenidsa jai tojajari. ¹²Odsa totoqquedsimahuaji bacco toquinabote naraha qqui toquinana madija dsoqqehei dsodsojo tocanadsa dsojo icanajonamanajari, ppa idsamanahijine. Aja dsoqqejari imenipi tabira tocajapojaro. Bedi dsoqqedsapa poni motta tojajaro. Poni bedi maqquideje ojari naraha dsoqqejari. Odsahuajicca madija huapima poni huatinimade jahijonajari. ¹³Naraha Jesopa ponidsa huati huana tadsapa: –Oji tejeraji –najari. ¹⁴Nadsapa Jeso tohuajiressijari, dsoqqejari dsodsojo tocanadsa bara nadsapa dsojodedeni domo huaha tahi najari. Nanaja Jesopa huati tajari: –Dsabisso, tiadsa huati onana: ¡Titehemaji! –najari.

¹⁵Nadsapa aja dsoqqejari camittemanidsa totehema, huittari

najari. Atti naco cajipomajari. Nadsapa imenidsa Jeso attipa: –Aja, ticca ejedeni tiadsa tojani-pomajo –najari. ¹⁶Madija huapima Jesojine dsabisso camittemanihi qqui toquinadsapa cappinamana-
raha Diodsa huatidsemanajari: –¡Iadsa Dio Atti cacomerabote nahato tajari bacco nahi, bacco nahi! –naridsamanajari huapima. –Iapi Diocca madija iquejeneje najaro jidapapi Diocca nahato-
hue aji ia qqui inajaroccapí Dio ia acco tocamabaquihitohui inajaro –quinajari.

¹⁷Nadsapa Jesojine dsabisso camittemanihicca ima tojaridsa-
dsapi dsama Jodeahuaji madimana-
jarideni huapima mittaridsamana-
jari. Poccadeni dsama jicaquini-
huaji naqui ima bacco taridsajaro.

**Huano Baotista pocca dodosse
tabaqqi tahimarideni**

Mateo 11.2-19

¹⁸Huano pocca mamari tabaqqi
–Jeso canahatori canahi –quinahi
ima mittamanadsapa Huanodsa
huati toquinajari. Nadsapa Huano
Jeso tahimari mittadsapa pocca
mamari tabaqqi pamaha Jeso-
huaji dosse inabaqquihijine huahua
inabaqquijari. ¹⁹Nadsapa pohua-
denidsa huati tajari: –Jesodsa
ticadaji, pohuadsa ohuatti huati
tiquinana. Ajima tiquinaji: “¿Tiapi
aji pohuatohui imadijaro Cristo-
Mesia tijaqui? ¿Ohuahatohui imadi-
ccanijinerane?” tiquinana Jesodsa
–najari Huano. ²⁰Nadsapa Huanoc-
ca dosseniji Jesodsa bacco toquina-
dsapa pohuadsa huati toquinajari:
–Huano Baotista attipa tiadsa huati
inanjine ia dosse najonabaqquijari.

Pohua attipa: “¿Tiapi aja tohui
imadijaro Cristo-Mesia tijaqui?
¿Ohuahatohui imadiccanejinerane?
nadija tiquinana” nade Huano atti
–quinajari Jesodsa.

²¹Aja pohuadeni Jesodsa huati
toquinadsama Jeso pohua dsepe iji
nahi qqui toquinajari. Madija coma-
qquri najarideni comani onihi, onihi
cajiridsamanajari inanomibaqquijari.
Madija bodidenicca tocorime ohuaha
ohuaha naridsajarideni naco Jeso-
jine jahinineridsajari. Madija nocco
sirideni naco nocco ssire inanaridsa-
jari. ²²Nadsapa Huano dosse ina-
jonabaqquijaridenidsa Jeso pohua
cacomerajari: –Jehe, ticadanidsa
Huanodsa huati tinanimanaji. Aji
qqui tiquinajaro, aji timittamanajaro
pohuadsa huati tinanimanana –najari
Jeso. –Ajima tiquinana: “Madija
nocco sirideni nocco ssire tocanirehi.
Madija isso sirideni naco tocanomire-
dsa jahiridsahi. Madija dsamacoma
onini *leprajine huapideni jadsimaro-
jarideni naco imedeni tobicaridsahi.
Madija huaribodeni didiqquri najari-
deni naco huaribodeni ssire tocanire-
ridsahi. Madija huatiajarideni naco
camittemani-ridsamanahi. Madija
tohuati nahanaqquri najarideni naco
icassiejeranjinecca ima mari icana-
baqquidsa mittaridsamanahi” tinani-
manana tiadeni maridedsa –najari
Jeso. ²³–Aja madija mota attidenipa:
“Jesopa Cristo-Mesia jarahi, pocca
imapi onihi, Cristo-Mesiacca ima-
ssa nejerani” quinaraha madija mota
nama quina-jarajari attidenipa:
“Pajissa Jesopa icca Mesia” quinadsa
pohuadenidsana Dio pocca biquehe
inananitohui. Ajijaro ima huapima
Huanodsa huati tinanimanana
–najari Jeso.

²⁴Nadsapa Huano dosse inajona-baqquijarideni tohuedanihi natti Jesopa pohuadsa queriquimanageridenidsa Huano tahimari huati tajari: –Dsama huamoni ssono caji, siba caji tanihuajipi ¿nejeco qquidera jajahi tija najarotte? Aja madija pocca ima japari tajaro pina boba jojodejine jene jene tocanajarissa najari ¿nama najari qquide jajahi tija najarottarane? Nohueraha. ²⁵Aji huamoni-huaji jajahi tija nadsapi ¿nejeco qquidera jajahi tija najarotte? Aja madija etero huatini ccara tanicca huedsajari qquide ¿jajahi tija najarottarane? Naraha tiadenipi nahatoqquri tiquinani: Madija etero huatini ccara tanicca huedsamanajaridenipa tamedenicca odsadsana mamadimana najari. Naraha Huanopa nema najaro madietohui najarajari. Puhuapa camello conera huehuedsa najari. Dsama huamoni-huaji mamadi najari. ²⁶Naraha ¿nejecotohuira pohua cattade jajahi tija najarotte? “Huanopa Dio Atti cacomerabote dacorajari” titiquina nadsa ¿jajahi tija najarottaqui? Jehe pajissa. Pocca marinajatohui jajahi tija najaro. Huanopa pina Dio Atti cacomeraqquri najaridenissa naraha pohuapa deni tojajari. Pohua dsepe iijjaripa ima deni tojanicca cajjari. Najaro imapi otahimari Cristo-Mesia tiadeni Idinide ojanijinecca ima inanajoridsapojaropaji. ²⁷Aja, Huano Baotistapa maittaccadsama pohua tedsejemacca ima Dio Atti cacomerabote dsodo inapojaro. Najaropi pina Diopa Cristo-Mesiadsa huati tapojari-ssa najaro:

“Tahide titahimari tohuaccade madija ojaria titedsejema dosse onapohuitoahui.

Nahi mittamanadsa madija bodidenipa titohui najoramanapohuijine, pina tijahine inajoramanapjarissa inanamananitohui, onajaro” napohui nade Dio Atti Maraquia dsodo inapodsa.

²⁸ –Nadsama tiadenidsa huati onajaro: Aji namidsa madiridsamanajaridenidsa naco madija ohuaha pina Huano Baotistassa najari nohuerahi. Huano Baotista pohuajinena madija bodideni otahimaritohui Diocca cacahuehecca ima dsati inanajorabaqquijari. Najarojine Huanopa namidsa madiridsamanajarideni huapimadsa deni tojajari. Naraha Diocca cacahuehepi ima onihi cajjaro. Najaroonidsa dsotode madijapa Diocca cacahuehecca ima dsati tojani qqui toquinadsa najarodsa toquejenadsapa Huano Baotistadsa deni toquejenahitohui. Madija ajamani tojajari pina tohuati nahana tajari Diocca cacahuehedsa tojadsapa pohua naco Huano Baotistadsa deni tojahitohui –najari Jeso.

²⁹ –Madija huapima Huanocca marinaja mittamanadsapa jodioideni mota, romanodenicca taminecca dosseniji dsiniro nanaccadeni naco: “Jehe, pajissa Diopa nahato tahi. Bicaqquri inejerani. Icca tabaccorehe inebona” quina- dsapa Huano topa idsanabaqquijari. ³⁰Naraha jodioideni marinaja pariseodsa jehe quinaridenipa, jodioidenicca marinaja maridedeni tedseje nama quina-jarajari. Huanocca marinajadsa huaribodeni sibaqquri nadsapa topaniji tohui quina-jarajari. Diopa pohuadenidsa

ima dsati bicani inananitohuiraha pohuadenipa ettajomanajaro. ³¹Naraha jidapanana aja madija madiridsamanajaridenipa çpina nejecojaridenissa quinajari? onajaro. Ohuatti timittamananissa tanijine ajijaro namidsa imadinnicca imadsa tiadeni mari ocana-baqquina. ³²Jehe, madija jidapana madiridsamanajaridenipa pina ejedenideni boronidsa jassi tadsa poccadeni ittome tossamodsahuaji johua, ahuaji johua quinarissa najari, onajaro. Pihuadenipa pohuadeni tessedenidsa: “Jaho, dsobi tiquinanijine totoresda tore tore inaraha tetidsemana-jevani, dsobi dsobi tiquinejevani” quinajari. Pihuadeni atti naco: “Ittomedsa naqui tiadeni oji inanabaqquinijine ajie tohuati nahana taniccadsa jiri jiri inaraha tiadenipi oji tiquinehe nejevani” quinajari – najari Jeso. ³³ – Jehe, aja jidapana madimanageridenipa pina ejedeni jamimanagerissa quinahi onajaropi Huano Baotista Dio Atti cacomerade tojadsapa ejetecca jipaqqiecca jijipa jipa-jarahi, dse najarahi nadsa johua johua quinadsa attidenipa: “Huano Baotistacca madie jidsa tani. ¡Satanacca dodosse tocorime pohua bodidsa madidsajari itidija!” quiquinanajari. ³⁴Dsotodepi ohua Madija Bedi ojararoa ejetecca jipaqqiecca jijipa ojipa, dsedse dse onadsapa ohuadsa johua johua quinajari attidenipa: “Jaho, pohuapa jipajide rahi, dsedsejide rahi. Romanodenicca taminecca dosseniji dsinero nanaccadeni, madija imasiri cajimanajarideni naco pohua tesse toquejenajari” quiquinanajari ohuadsa.

³⁵Huanodsas, ohuadsa attideni nama quinaraha nidsa imasiri cajimanagerideni ettijine bodideni cacajiqquimera, imarideni cacajiqquimera nadsapa Diocca nahatohue ahuato tanitohui – najari Jeso.

Marinaja pariseodsas jehe najari onipa Simon najaricca odsadsas Jeso jipajari

³⁶Madija marinaja onini pariseodsas jehe najaripa Jesodsas huahua najari, pocca odsahuaji inajipahijine. Najaricca odsahuaji Jeso toccadsa toqquedsimadsas huahuanaridsa huittarijari, jipahijine.

³⁷Naraha najaro odsas panandsapi amoneje huananari madijaro. Ponipi ima mittajaro: – Pariseoccas odsahuaji Jeso baccas nahi, nahihuaji jipahijine – quinadsa nanihuaji toqquedsimajaro. Jojo bicahi siba alabastro nahatoni dsojo inajonajari. Najari jojodsas majojo bicani ijijaro. ³⁸Ojiema Jesodsas baccas tadsapi pohua amorihuaji huadsas oji oji najaro. Nadsapi poni nocconi ppajani ssabororo nadsas Jeso amori ppajaja tocaja najaro. Nadsapi poni tatini conanidsas Jeso amori sse ippijari. Amori sse ippia jicadsas amoridsas mose najaro. Nani dsotodepi ponicca majojodsas naqui Jeso amori ssohoho icanarijaro.

³⁹Naraha aja pariseo Jesodsas huahua najaripa najaro amoneje Jesodsas nema nani qqui tadsas pohua bodipas: – Ajana, Jesopa Dio Atti cacomeraquiqui najaridenissas nadsas madija bodideniccas ima nahato tanaja. Najaro amoneje pohuadsas mari dsanajaropi

madierini tabaccora tajaro. Poni-
 dsa: “Huaji tinaji” nahitohuiraha
 – najari. ⁴⁰Naraha Jeso attipa:
 – Simon, tiadsa huati onana
 – najari. Naraha pohua cacomera-
 jari: – Jari Mamaride, huati tinaji
 – najari.

⁴¹Jesopa Simon pohua bodidsa
 atti atti nahi nahato tadsa ima
 ajima najaro huati tajari: – Maqqi-
 deje pamahapa dsiniro dada nanaja
 nahihuaji debe quinajari. Ojariapa
 dsiniro ccarara 500 *denario debe
 najari. Madija ohuahapa 50 denario
 debe najari. ⁴²Nadsama pohuadeni
 pamahapa poccadeni ima tossamo-
 dsapi paca quinahijine pajirama-
 jarahi. Nadsapa dsiniro dadade
 attipa: “Jehe, tipajirama-jera-
 dsapi ticcadeni cuenta ojine dsodo
 nani sse onanitohui. Nani tiadeni-
 dsa: Denima ohua paca tiquinaji,
 onejeranijine” najari dsiniro dadade
 atti. Nadsapi poccadeni cuenta
 jicani.

– Jari Simon ¿nejecoma tani
 tetti? ¿Nejecojarina dsiniro
 dadadedsa denima huati huana
 tajari? ¿Aja denima debe najaripa
 dsiniro dadadedsa denima huati
 huana tararico? ¿Ajamani debe
 najarina dsiniro dadadedsa denima
 huati huana tararirana? – najari
 Jeso Simonds.

⁴³Naraha Simon pohua cacomera-
 jari: – Ssamo onani. Aja denima
 debe najarina dsiniro dadadedsa
 denima huati huana tajari itide
 – najari. Nadsapa Jeso pohua-
 dsa huati tajari: – Jehe pajissa.
 Tecomeranissa tani – najari.

⁴⁴Nadsapa Jeso amoneje icattoma
 nadsa Simonds huati tajari:
 – Qqui, ajijaro amonejeca tohuati

huanehepi ahuato tani. Ohuapi
 ticca odsadsa oquedsimaraha tiapi
 ohuadsa pina icca madijacca ima-
 ssa tinana-jerani. Ohuadsa passo da
 ticanehe nejerani, ohuamori ssahua
 onanijineraha. Naraha ajijaro amo-
 nejena oji oji nadsapi poni nocconi
 ppajani toccadsa ohuamori ppajaja
 tocajadsapi poni tatini conani-
 dsa ohuamori sse ippijaro – najari
 Jeso. ⁴⁵–Tiapi ohuadsa pina icca
 madijacca imassa tinana-jerani. Icca
 madijapa itesse jipahijine huahua
 inadsa bacco nadsapa ipano mose
 mose ihinanajaro, itatidsa oqui naco
 sso sso ihinari najari. Opano mose
 tejeraraha ajijaro amonejena oqqe-
 dsimaponidsama ohuamori mose
 mose dsanapojaro. ⁴⁶Otatidsa oqui
 naco sso tari-jararaha ajijaro amo-
 nejena ohuamori majojodsa ssoho-
 icanarijaro – najari Jeso. ⁴⁷–Jehe,
 najarojinea aji huati onajaropaji:
 Ponipi ima sse taporaha ponicca ima
 tabaccora tanicca Dio sse inadsapi
 jidapapi ponidsa ima nohuerani.
 Ponina denima ohuadsa huatini
 huana tajaro. Madija ohuahadeni
 naco poccadeni ima tabaccora
 tanicca Dio sse inadsapi pohuadeni-
 dsa ima nohuerani. Naraha madija
 bodideni: “Icca tabaccorehepi huapi
 tapo-jerade” quinajaridenia aja
 ohuadsa badsira taha huatideni
 huanaquari najaripaja, onajaro.
 Nadsama Simon, najaro ima tibodi
 huatoji – najari Jeso.

⁴⁸Nadsapa Jeso amonejedsa huati
 tajari: – Aji, ima tinanapojaropi sse
 inehe jicajaro. Najaroa aji tibia-
 jaropaji Diodsa – najari.

⁴⁹Naraha nahi huahuanarihuaji
 Jeso tedseje jipamanahijine jassi
 tarijarideni pohuadenira huati

canirere canajari: –Ajajaripa
¿nejecoma najaritta? ¿Nejecotohui
pohuapa madija bodicca taba-
ccorehe tonanamosside nahato
taha? –quinajari.

⁵⁰ Pohuadeni atti nama quina-
raha Jesopa amonejedsa huati
tajari: –Tiapi ohuadsa jehe
tadsa tossiejehe ticajijaro. Diocca
jonehema, pocca cappinerehema
ticcaniji –najari Jeso.

Amonejedeni Jeso acco icamamanajari

8 ¹ Nahi dsotodepa Jeso odsa
panani onihihuaji onihihuaji
mari mari naridsajari. Diocca caca-
huehecca ima bicani huati huati
naridsajari. Pocca dodosse tabaqqui
12 quinaha pohuadsa jahiridsajari.
² Amonejedeni naqui Jeso pohuadsa
jahiridsajaro. Ponidenipi comaquiri
naporaha Jesojine tocanomireridsa-
jaro. Onihideni naqui tocorime-
jine comaquiri naporaha Jeso-
jine bodinidenicca jahininejari.
Najarodeni ojarie oninipi Maria,
poni dsamarini onini Madarena-
dsa cacanjaro. Poni naqui tahidepi
tocorime ⁷ quinajari cajiporaha
Jesojine jahininejari. ³ Amoneje
onihi naqui Jesodsa ccaridsajaro,
oninipi Dsohuana. Ponicca maqqui
onipa Cosa. Cosapa tamine Herode-
cca odsa imeni cacahuade tojajari.
Herodecca medsedeni naco dosse
dosse najari. Amoneje onihipi
Sosana ponidenidsama Jesodsa
toccajaro. Amoneje onihideni naqui
huapi tehe Jesodsa jai tojajaro. Poni-
deni huapimapi Jeso acco camade
toquejenajaro. Ponidenicca dsiniro-
dsa naqui pohuadeni taparideni
mitta mita nanaridsamana najaro.

Jesocca marinaja huidsaja ppappadecca ima tadsajani mari icanabaqquijari

Mateo 13.1-9; Maraco 4.1-9

⁴ Odsa pananica madija huapima
naco jai tojaja camajari Jeso
qquide. Madija huapima pohua-
dsa queriquimanadsapa Jeso
pocca marinaja mari icanabaqqui-
hijine ajijaro namidsa imadinicca
ima tadsajani mari icanabaqqui-
jari. Nadsapa pohuadenidsa ajama
najari:

⁵ –Jehe, huidsaja ppappadepa
pocca huidsaja huirade toccajari.
Huidsaja bacco tadsapa huirade
tojaridsajari. Cadsi huira, cadsi
huira, cadsi huira naridsajari. Aja
nocco huira inaridsajari motapa
jahuihuaji catojarijine ttai ttai
tojaridsajari. Nocco ahahuatori
nadsapa ppiriri saca quinajari. ⁶ Aja
nocco huira inaridsajari motapa
siba ccababa tanihuaji catojaridsa-
jari. Najari naco moro taraha jabo
nami ppaja tanihuaji bacco tajara-
dsapa maji ppoconejine botejari.
⁷ Aja nocco mota naco namidsa
cotihi caji tahihuaji catojarijine
cotihi tedseje paja moro toquinarihi
naraha cotihijine ssomi tojajari.
⁸ Nadsapa nocco mota huira naridsa-
jaripa nami bicanidsa catojaridsa-
dsapa mororo canaridsadsa bica
taha napijari. Bono cajiridsadsapa
ede ojariapa bono 100 naha cajijari.
Ede huapimacca nama naridsajari
–najari Jeso.
Jeso huati huati taha jicadsapa
pohuadenidsa jadsirema huati
tajari: –Nadsama teribodeni ticaji-
manadsapi ohuatti timittamanani-
ssa taji, onajaro –najari Jeso.

**Madija motapa Jesocca
marinaja mittamana-jarajari**
Mateo 13.10-17; Maraco 4.10-12

⁹Nahi dsotodepa pocca dodosse tabaqqi pohuadsa huati toquina-jari: –Jeso, ajijaro namidsa imadinicca ima tadsajani ia mari ticana-baqquijaropi ¿nejecoma najaro ticca marinaja? –quinajari. ¹⁰Naraha Jeso pohuadenidsa huati tajari: –Jehe maittaccadsama Diocca cacahuehecca ima dsati najorapora-ha madija inahattabaqqi-jaraccade. Jidapanana Diojine pocca cacahuehe tahimarinini dsati tiadenidsana ahuato tani. Naraha madija motapa ajijaro namidsa imadinicca ima tadsajani pohuadeni mari ocanabaqquidsapa mittamana-jarajari-paja. Nama quinajaripa pina Dio Atti cacomerabote Isahia dsodo inapojarossa najaro. Isahia attipa: “Qqui qqui toquinaraha pina qqui toquirahi nahitohui. Pohuadeni bodi pina ssamoqqiri najarissa nahitohui. Diocca dosseniji mimittamana naraha pina mittamanerahi nahitohui”
napohui nade Isahia atti –najari Jeso.

–**Huidsaja ppappadecca imapi
ajima najaropaji –najari Jeso**
Mateo 13.18-23; Maraco 4.13-20

¹¹–Aji occa marinaja ajijaro namidsa imadinicca ima tadsajani tiadeni mari ocanabaqquijaropi ajima najaro: Aja noccopa Dio Attissa najaro. ¹²Nocco huira inaridsajari mota jahuihuaji catojaripaja pina madija Dio Atti mitta-manaraha pohuadeni bodidsa

toja-jeranjine maidsehe jinede *Satana ccajonadsapa pohuadeni bodicca Dio Attipi amossi inanaridsajaro. Najaropi pina nocco jahuidsa catojadsa ahahuatori nadsapa ppiriri saca inaridsamanajarissa najari. Najarossa najaroha maidsehe jinede Satanajine bodideni inassamobaqquidsapa Diodsa pajissa quina-jaradsa tocassiejera-jarahitohui.

¹³–Madija ohuaha bodidenicca imapi pina aji siba ccababa tajarocca imassa najaro. Dio Atti mittamanadsa huatidsemanaraha pohuadeni bodidsa toja-jerajaro. Najaro imapi pina aja nocco moro taraha siba ccababa teje najaro jabo huapihuajira toccabaqquijaricca imassa najaro. Najaria aja moro todsatiraha maji ppoconejine botejaripaja. Najaro imapi pina madija tahidepa: “Jehe, Dio Atti bica tani” quinaporaha dsotode pohuadenidsa ima ssonaridsa ocasserani ahua-manadsapa: “Epejena, Dio Attipi inebona” quinajari.

¹⁴–Madija ohuaha bodidenicca imapi pina cotihi tedseje nocco moro tajaricca imassa najaro. Pohuadenipa Dio Atti mitta-manaraha pohuadenia ajijaro namicca ima Dio Atti tadsajani icanejemamana-dsanapojaro. Nadsama pohuadenia aja pohuadeni dsepedeni ihijimana najarotohuira disseraqqiri nadsapa Dio Atti tocahatterahissa tajarajari. Nadsama madija attidenipa: “Todsepetaji inehemana” quiquinadsa naco poccadeni jeheniji maidsehe toja tani. Aji namicca ima pohuadeni tohuini quinahiccasarsa huahuatidsemana nadsa naco

Dio Attipi huatideni ajamamanajari. “Dio Attina denima bica tani” quina-jarajari. Nadsama poccadeni jehenijipi pina aja cotihi tedseje nocco moro taraha cotihijine ssomi tojadsapa bono-jarajarissa najaro. Nama najari madija naco otahimari bicani icassiejeranijinecca pohuadeni tesse mari icanabaquimana-jaradsapa ohuatti mittamana-jarajaripaja. Poccadeni madiedsa occa marinaja ahuato tejeradsapi pohuadeni tesse ohuadsa pajissa quina-jarajari. Nama quinadsapa pina bononoraquiri najarissa quinajari.

¹⁵ – Naraha madija ohuaha bodidencica imapi pina aji nami bica tajarocca imassa najaro. Dio Atti mittamanadsapa jehe quinahissa tajari. Pohuadeni bodipa pajissehe tohuini quinajari, bodideni bicaququiri najari. Dio Atti pohuadeni bodidsa ecahuamana-dsanapojaro. Poccadeni jeheniji napidsapi pina aja nocco nami bicanidsa moro tahissa tadsapa bono cajijari. Nadsama pohuadenipa Dio Attidsa disseraquiri nadsa ocasserani ahuamanadsa naco nama naha Dio Attidsara jehe dsanapomanajari. Pohuadenipa madija ohuaha acco acco ihicamabaquimana nadsapa najarideni naco Diocca ejedeni toquejenajari – najari Jeso atti.

JoJORORO TAHIMARI

Maraco 4.21-25

¹⁶ – Nadsama joJORORO toquehessidsapa boco icanahijine jarahi. Huahuada dopanihuaji naco tocanajimahijine jarahi. JoJORORO toquehessidsapa aja pohua cacahittari nahidsana cacahittari najari, nahi madija odsa bodihuaji

jahidsimajarideni ssiajani cajimanhijine. Ohuatti naqui najarossa najaro, pina joJORORO ssiejene ssiaja tajarissa najari. Aja madija ohuatti cajimanajaridenipa ecomamanajeranijine, najaro ssiajanipi madija huapimadsa tossiajabaquiniijine, onajaro. ¹⁷Nadsama ima ahuatora tanicca caji taraha nidsa dsotodepi ahuato tanitohui. Aji occa marinaja mota ahuatora tadsa timittamanajeraraha nidsa dsotodena tiadenidsa ahuato tadsana timittamananitohui, onajaro – najari Jeso.

¹⁸ – Jehe, nadsama ohuatti timittamananissa taji. Paji, occa marinaja timittamanadsapi mohuaradsa ohuatti huapima tiadenidsa tojanissa tanijine timittamananissa taji. “Ponimaha” tiquinejeraji. Aji tiadeni ohuatti tecahuamanadsapi denima ticahatteranitohui. Naraha occa marinaja timittamanaraha ohuatti tecahuamana-jeradsapi occa marinaja odininitohui. Occa marinaja tiadenidsa tojapoma-jeranijine, onajaro. Nadsapi tiadenira tiadeni ticamaidsanimanadsa naqui: “Dio Atti ocajini, nahato onani” tiquinarahajaro naqui odininitohui. Paji, nemamana tejeraji, onajaro – najari Jeso.

Jeso imeni, pohua imecotedeni

Mateo 12.46-50; Maraco 3.31-35

¹⁹Naraha Jeso pohua mari mari nahihuajipa Jeso imeni, pohua imecotedeni quinadsa pohuahuaji bacco toquinajari. Bacco toquinarahajaro madija huapi taja najari pohuahuaji jai tojedsimahijineraha tojera tajaro. ²⁰Naraha madija ojaraja Jesodsa huati tajari: –Ticca ami,

timecotedeni amossinidsa domo
huapaja: “Tia qqui inana” quinapaja
– najari.

²¹ Naraha Jeso pohua attipa:

– Aja madija Dio Atti mittamana-
hissa tadsa Pohua Attissa inana-
manajarodenina pina occa amissa,
pina ohuemecotedenissa quinajari
– najari Jeso.

**Jesopa jojode inatappa
ssodadani inatappa nanicca ima**

Mateo 8.23-27; Maraco 4.35-41

²² Nadsapa Jeso pocca dodosse
tabaqqui tedseje canoadsa jai
tojedsadsa nahi canoadsa pohua-
denidsa huati tajari: – Jina,
coridsa jippehuaji jaijana – najari.
²³ Nadsapa tohuaccamanaraha
Jesopa huadaja dsanapojari.
Huatideni ajamama canaraha
jojode dacorehema ccajona, passo
dacorehema ccajona nadsapi coridsa
ssoda ssoda najaro, canoadsa passo
ssonidsa ssonidsa najaroline je
tocanamanabote najari. ²⁴ Nadsapa
Jeso huadahihuaji jai tojeppidsa
nocco tojahijine cobo quinajari:
– ¡Ia Maride, ia Maride! ¡Nocco
tijaji! ¡Je icanabote nani! – quina-
jari. Nadsapa Jeso totehemadsa
jojodedsa, passo ssodadanidsa
huati tajari: – ¡Epeje taji! – najari.
Nadsapi jojode, passo ssoda ssoda
najaro naqui joma najaro. Joma
nadsapi passo podsippanissa tajaro.
²⁵ Nadsapa Jeso pocca dodosse
tabaqquids huati tajari: – Tiadenipi
ohuadsa: “Jehe, Jesopa ia tohua-
cahua-baqquihijine pajirahi”
¿tiquinejajarorane? – najari Jeso.
Naraha pohuadenipa cappina-
manajari. Bodideni jabojo quinadsa
pohuadenira imahaha canajari:

– Aja ia Maridepa ¿nejeco madija?
Pohuapa jojode, passo ssodadanima
quejema naraha jojodedsa: “Epeje
taji” naneje joma naha – quinajari.

**Jerasacca madija Satanacca
dodosse tocorime cajijari**

Mateo 8.28-34; Maraco 5.1-20

²⁶ Jojode jicadsa denima tohuacca-
manadsapa dsama Carirea jippe-
huaji bacco toquinajari. Pohua-
deni huana tocanamanahihuajicca
dsama oninipi Jerasa. ²⁷ Nahidsa
Jeso toqqemoradsapa nahicca
odsacca madija ojaria pohua-
dsa bacco najari. Najari madijapa
*Satanacca dodosse tocorime caji-
jari. Najaripa tocorimejine ccoroje
mamadi najari. Odsadsa madi-
jarahi. Tonoccobirihuajina mamadi
najari. ²⁸⁻²⁹ Huajijiradsa tocorime-
jine totodacora najari. Nahi odsa
pananica madijapa ecahuamana-
hijine cadenadsa biji jore quinaraha
tocorimejine dacoradsa cadena
joca tajojo, joca tajojo najari. Isso
naco cadenadsa jore quinaraha
ttaí tajojo, ttaí tajojo najari. Dsama
huaji tanihuaji madija madide
nohuerahihuaji naco tocorimejine
joppa tajari.

Nadsapa Jeso toqqemoraraha
najari madija naco qqedsippajari.
Jesodsa bacco dsippadsapa madija
bodicca tocorime toqqenahijine
pohuadsa huati tajari: – ¡Tocorime,
tiqqenaji! ¡Najari madija tinebojo!
– najari. Nadsapa Jeso bacco-
huaji pohua pitodsa huitta nadsa
jadsirema johua johua najari: – Jeso
¿nejecotohuira ticcajonajaro? ¿Ohua
najidsode ticcajonajaroqui? Tiapi
Dio deni tojajaricca Ejedeni tijani.
¡Epejena, ohua najidso tejeraji!

–najari. ³⁰Nadsapa Jeso huati tapomajari: –¿Tia onipi nejeco?
 –najari. Naraha pohua cacomera-jari: –Ohua onipi Siba tani
 –najari. Pohuadenipa huapi taja najari pohua bodidsa madidsamanajari. ³¹Pohua bodiccana Jesodsa huati toquinajari: –¡Jaho, ia dosse tinebaqqi-jeraji! ¡*Nami odini huaji tanihuaji ia hua tidsima-jeraji, inaha! –quinajari. ³²Naraha nahi ssono huajira tanidsa poroco huapi taha jiparidsamanajari. Nadsapa tocorimedeni Jesodsa huati toquinapomajari: –Porocodsana iquejenaccana –quinajari. Nadsapa Jeso: –¡Jehe, porocodsana tiquejenana! –najari. ³³Nadsapa najari madija bodicca tocorime jahininedsapa porocodsana jai tojedsamaridsajari. Nanaja porocopa coridsa inidi sseberanihuaji domo toqqedsippadsa diri-ri-ri todsippadsapa cojo-jo-jo quinajari, tocatojedsippajari. Je tocaniredsapa coridsadsa cacotedsanajari.

³⁴Nadsapa poroco cacahuadenipa aja poroco tocatojedsippahiqqui toquinadsapa ahujicca odsapananihuaji ima joppa tocanajari, ohuahapa huidsajahuaji ima joppa tocanajari. Nama naridsamanajari. ³⁵Nadsapa madija huapima qquide jahijonana canajari. Jesohuaji bacco najonamanadsapa aja madija bodicca tocorime jahininedsatonomihira qqui toquinajari. Nahi Jeso huahidsa huitta canajari. Etero huedsapomajari, bodi huatohue naco cajipomajari. Nadsapa madija huapima cappinamanajari. ³⁶Qqui toquinapojaridenia aja madija tocorime cajiraha tonomihicca ima madija huapimadsa huati

toquinajari. ³⁷Nadsapa dsama Jerasahuajicca madija huapima cappinamanadsa poccadeni dsamadsa Jeso toccanihijine dossede dissassera tajari: –¡Ticcანი, აჯი icca dsamadsapi timadi tejeraji!
 –quinajari. Nadsapa Jeso canoadsa toqqedsanidsapa tohuaccanimanajari. ³⁸Naraha jai tojani-jaraccadsa aja madija bodicca tocorime jahininedsatonomihipa Jesodsa huati tajari: –Jeso, tiadsa occana ¿jehe taqui? –najari. Naraha Jeso pohuadsa: –Poni, tiboji –najari. ³⁹–Ticca odsahuajina ticcanina. Ticca madijadsa აჯი Diojine tinominicca ima huati tinanina –najari. Nadsa toccanidsapanahicca odsapananicca madija huapimadsa aja pohua tonomihicca, Jeso pohua inanomihicca ima huati taridsajari.

**Jairo bedeni tonominicca ima,
 Amoneje amaissoranaja coma
 taraha tonominicca ima**

Mateo 9.18-26; Maraco 5.21-43

⁴⁰Nadsapa Jeso coridsa jippe pohuadeni nattihuaji jai tojanidsapabacco tanimanajari. Bacco tanimanadsapa nahicca madija huapima huatidsemanadsa: –¿Nija, ticcánijaroqui? Iadsa bacco tanidsapibica tani –quinajari. Pohuatohuimadimanapoja najari. ⁴¹Naraha nahidsa Jeso bacco nanidsatiraha Jairo naco nahihuaji bacco najonajanajari. Pohnuapa jodiodenicca Dio Atti mamarihuajicca tamine. Pohnuapa Jesohuaji bacco nadsapa pohua bodipa: –Jesopa deni tojahi, ohuapi ajimani ojani –nadsa Jeso baccouhaji pohua pitodsa huitta tocattedsa najari. Nadsapa Jesodsa

huati tajari: –Jina, occa odsahuaji icadaccana. Occa ejedeni tomijirapaja –najari. ⁴²Jairo bedenipi ojari najaro, ponicca huajanopa 12 naraha huatiabote najaro. Nadsapa Jeso Jairocca odsahuaji toccajari. Madija pohua toccahi qqui toquina-dsapa madija huapima pohuadsa jai tojaja najari. Si tocajajari cadsanapoja najari Jesopa mere tabote dsanapojar.

⁴³Madija huapima jai tojahidsa naqui amoneje coma tajaro tohuanajaro. Ponipi dsamacoma onini amaissoranaja cajijaro. Poni coma tanicca huajanopa 12 naraha ama jicaquera tanicca tonahana-jonajaro. Toponi totonanomidedenidsa totocca naraha tonomi-jerajaro. ⁴⁴Naneje ponipi Jeso qqui tadsapi Jeso nattihuaji toccamissadsa tohuajressissi nadsa pocca etero iponi bara inajaro. Nahi poni bara inahidsa amadsati amani totappajaro.

⁴⁵Nanaja Jeso pajadsa huati najari: –¿Nejecojarina ohua bara najarinaja? –najari. Naraha manaco madija huapimapa: –Iapi nohue ijirani –quinajari. Naraha Pedro atti: –Ia Maride, madija huapi taja najari. Tiapi ahuaji bai, ahuaji bai quinajaria –najari Pedro. ⁴⁶Naraha Jeso pohua cacomerajari: –Madija ohua bara nahi nahato onani. Occa dacorehe pohuadsa tojani nahato onani –najari. ⁴⁷Naraha amonejepi poni cacomara-ha Jesojine ima tojani mittadsapi: –Jehe, nahato tahi –nadsapi cappinadsa tacca-cca caneha Jeso baccouhaji poni pitonidsa huitta nadsa ponicca ima ecomerajaro. Aji poni Jesocca etero bara inadsa

amadsati amani tomossijarocca ima huati tadsa madija huapima mitta-manajari. ⁴⁸Naraha Jeso ponidsa huati tajari: –Jehe asi, ohuadsa tibodi: “Jehe, Jeso ohua tonanomihijine pajirahi” tadsapi najaro-jine ticca dsamacomapi toccapa. Ticcanidsapi ticappina tejerana –najari.

⁴⁹Jesopa amonejedsa huati huati tahipaja naraha jodiodenicca Dio Atti mamarihuajicca tamine pocca odsacca madija ojaria bacco najonajari. Ejedeni imehidsa huati tajari: –Jairo, ticca ejedenipi huatiapaja. Ia Maride Jesodsa huati tidsima tejeraji: “Epejena occa odsahuaji tiqqejeraji” tana –najari. ⁵⁰Naraha Jeso ima mittadsapa Jairodsa huati tajari: –Tibodipi ticappina tejerana. Pina “Jehe, poni tonominijine” tadsapi ticca ejedeni tonominitohui –najari.

⁵¹Nadsapa Jeso Jairocca odsahuaji bacco tadsapa aja Jeso pohuadsa jahijonajaridenipa Jairocca odsadsa jai tojedsima-jarahijine Jeso eccocobaquijari. Naraha jai tojedsimahipa Jeso pohua, Pedro, Huano, Satiaco, aji ejedeni imehi imeni todsimamanajari. ⁵²Madija huapima nahidsa queriquimanagerideni oji oji camajari. Ponitohui huatideni huanacquiri nadsapa poccadeni ojiema johua johua quinajari. Naraha Jeso pohuadenidsa huati tajari: –Ojimana tiquinejeraji. Ejedenipi dsoqqe-gerani. Huadajaro –najari. ⁵³Naraha pohuadenipa ejedeni huatiani nahatoquiri nadsapa Jeso atti jaja icanamanajari.

⁵⁴Naraha Jesopa ejedeni huati-jaro porinihuaji toqqedsimadsa

dsapanidsa mari nadsa jadsirema huahua najari: –¡Ejedeni, titehemaji! –najari. ⁵⁵Naneje ejedeni ponipi camittemani-pomadsapi amadsati totehemajaro. Nadsapa Jeso attia: –Ticcadeni ejedeni tinajipamanaji –najari. ⁵⁶Ponicca abi ami jabojo quinaraha huatidsemanajari. Naraha Jeso pohua attipa: –Ajijaro imapi huati taridsamana tejerana. Poni –najari pohuadenidsa.

**Jesopa pocca dodosse tabaqqi
12 quinaha madija maride
dosse inaridsabaqqijari
Mateo 10.5-15; Maraco 6.7-13**

9 ¹*Jesopa pocca dodosse tabaqqi 12 quinajaridenidsa huahua nadsa queriqquijari. Jesopa tocorimedsa pohuana denima atti dacorajari. Najaro pohua atti dacorehe pocca dodosse tabaqqidsa inanajaro. Pohuadenidsa huati tadsa naco ajama najari: –Ohuatti, occa nahatohuema tiadenidsa onanana, aja madija bodidenicca tocorime ohuaha ohuaha naridsajarideni naco dosse dosse titamaridsa-baqquimana nahijine, onajaro. Madija huapima comani onihi onihi naha cajiridsamanajaridenicca naqui titinanomi-baqquimana nahijine, onajaro –najari Jeso. ²Pohuadeni motta jai tojaridsahijine Jesopa pohuadeni dosse inabaqqijari: –Diocca cacahuehecca ima tecomeraridsamanana. Madija comaqqiri najarideni tiadenidsa bacco quinadsa naco titinanomi-baqquimana nana –najari. ³Pohuadenidsa denima huati tajari: –Ticcadeni benehidsa naqui tiadeni totocahuejidsa ahua

dsojomana tiquinejeraji. Ticcadeni sacco, ticcadeni dsamatapa, ticcadeni dsiniro, najaro huapimapi tiaccamana tejeraji. Ticcadeni etero naqui pamehepi tiaccamana tejeraji. Aji tedsamanajarora ohajariri tinanamanaji. ⁴Nadsama odsa panani bacco tiquinadsapi aji jai tijedsimapojarocca odsadsara timadimanaccaji. Nani odsa panani huaji ticcadeni marinaja jicadsapi odsa panani onihihuaji denima jai tijapomaji. ⁵Nadsama odsa panani onihihuajicapa tiadenidsa: “Ajidsa timadimanaji, Diocca cacahuehecca ima imittanijine” quina-jaradsapa nani poccadeni odsa pananihuajipi tinebomanadsa jai tijeqquimani bica tani, onajaro. Jai tijeqquimadsa naqui temoridenicca sadariadsa ssiqui ma tajaro catojanijine pporo pporo tiquinana. Nahi poccadeni ibohue bodideni huatoma-manahijine –najari Jeso.

⁶Nadsapa poccadeni benehidsa jai tojabaqquiridsajari. Odsa panani huapimadsa ima bicani icassiejeranijinecca mari mari nanaridsamana najari. Madija comaqqiri najarideni naco ihinanomi-ridsabaqquimana najari.

**Huano Baotista dsoqquehi
natticca ima**

Mateo 14.1-12; Maraco 6.14-28

⁷Nadsama dsama arobeni Carireahuajicca tamine *Herodepa Jesocca ima huati toquinahi mittajari. –Jesopa canahatori canajari –quinahi mittadsapa Herode pohua bodidsa: –¿Ima nejecoma najarona paji? –najari. Madija motadeni attidenipa: –Aja canahatori canajaripa *Huano

Baotista nahatonijari – quiquina-najari. ⁸Madija ohuaha attideni naco: – Maittaccadsamacca Dio Atti cacomerabote Eria nahatonijari – quiquinanajari. Madija ohuaha attideni naco: – Maittaccadsamacca Dio Atti cacomerabote ohuaha nahatonijari itide – quiquinanajari. ⁹Naraha Herode attipa: – Ohuana ocadossebaquidsa Huanopa matto ca ijdssamanajaride. Nadsama aja canahatori canajari pohua tahimari ohuadsa huati huati totoquina najaripa ¿nejecoma najari napaja? – najari. Atti nama nadsapa Jeso qqui tahijine dissera tajari.

Jeso madija 5 mil quinajarideni inajipabaquijari

Mateo 14.13-21; Maraco 6.30-44; Huano 6.1-14

¹⁰Jesocca dodosse tabaqqi bacco nanimanadsapa poccadeni benehicca ima huati nanimanajari. Nahi dsotodepa Jeso pohuadeni pohuadenira odsa panani Besaidahuaji iaccabaquijari. ¹¹Nadsama madijadenipa Jeso toccahi nahatoqqiri nadsapa dsotode jai tojamissajari. Bacco toquinadsapa Jeso pohuadenidsa huati tajari: – ¿Nija, bacco tajonamanajaroqui? – najari. Nadsapa Diocca cacahuehecca ima mari icanabaquijari, aja comaqqiri najarideni naco inanomiridsa-baqqijari.

¹²Naraha Jesocca dodosse tabaqqi 12 quinajarideni maji toccahi qqui toquinadsapa Jesodsa huajiressimanadsa pohuadsa huati toquinajari: – Ajajari madijadeni huati tinabaquijo tocahadijnina. Pohuadeni tapari naco odsa onihihuaji mitta naridsamanana.

Aja iadsapa dsamatapa nohuerahi – quinajari.

¹³Naraha Jesopa: – Tiadeni tinajipabaquimanajo – najari pohuadenidsa. Naraha pohuadeni attipa: – Naraha pan 5, aba pama naha icajini. Denima icappirani – quinajari. – ¿Nadsapa pohuadeni tapari odsa pananihuaji mittade jaijanijinerane? – quinajari. ¹⁴Aja madija Jesohuaji queriqquijaripa maqquideje 5 mil quinajarijine pocca dodosse tabaqquideni inajipabaqqi-manahijinepa pajiramanajarajari. Naraha Jeso pohuadenidsa huati tajari: – Aja madija huapima jassi taridsahijine huati tinabaqqi-manajo. Madija 50 naha tinequeriqquimana, ohuaha 50 naha tinequeriqquimana naridsadsa jassi jassi teri tinanaridsa-baqqi-manajo, jipade najoraridsamanahijine. Nama tinanaridsa-baqqi-manajo – najari Jeso.

¹⁵Nadsapa nama inanaridsa-baqquidsapa madija huapima jassi taridsajari. ¹⁶Nadsapa Jeso pan 5 naha inacca, aba pamaha idsaba nadsa Jeso memehuaji tocattamacossa nadsa Diodsa huati tajari: – Jehe, epejeni. Ticca daniji iadsa bica tahi – najari. Nadsapa Jeso canahatori canajarijine pan, aba najari tohuapidsa icanabobiridsadsapa pocca dodosse tabaqqidsa da inabaqqijari. Pohuadenina aja madija jassi jassi teri najaridenidsa da inabaqqi-ridsamanajari. ¹⁷Da inabaqqi-ridsamanadsa jipamanadsapa accararidsa-manajari. Jipamanahissa taraha mota tojjari. Pan bobi, aba ime mota inaccaniridsamanadsapa quiqui 12 naha ijiridsajari.

– **Jesopa Cristo-Mesia**
– **najari Pedro**

Mateo 16.13-20; Maraco 8.27-30

¹⁸Nahi dsotodepa Jeso Dios huati tahijine pocca dodosse tabaqqi tedseje pohuadeni motta madija nohuerahihuaji jassi tajari. Nahidsa Jesopa pohuadenidsa huati tajari: –Madija otahimari huati huati nanaridsamana nadsapa ohuadsa attideni ¿nejecoma nejecoma quiquinanahi? –najari Jeso pohuadenidsa.

¹⁹Naraha pohuadeni attipa: –Tiadsa madija motapa: “Huano Baotista tijani” quiquinanajari. Ohuahadenipa: “Maittaccadsa-macca Dio Atti cacomerabote Eria tijani” quiquinanajari. Ohuahadeni naco: “Maittaccadsamacca Dio Atti cacomerabote ohuaha nahatonijari” quiquinanajari –quinajari Jesocca dodosse tabaqqi attidenipa.

²⁰Nadsapa Jeso pohuadenidsa huati tapomajari: –Naraha tiadenidsapi ¿nejecojari ojani? –najari. Nadsapa manaco Pedro huati tajari: –Tiapi Diocca dosseniji *Cristo-Mesia tijani –najari.

²¹Nadsapa Jeso attipa: –Jehe, bica tani. Naraha najaropi madija ohuahadenidsa tecomamanaccana –najari.

Jesopa pohua dsoqquehicca
ima huati tapojari

Mateo 16.21-28; Maraco 8.31–9.1

²²Jesopa pocca dodosse tabaqqi-dsa denima huati huati tajari: –Aji ohuapi Madija Bedi ojararoa nidsa dsotode najidsohue imeni ocasserani ohuanitohui. *Jodiodeni ime jocohuideni, *dada toqqimade

tamedeni, jodiodenicca marinaja maridedeni quinajaridenipa ohua ettajomananitohui. Nadsapi ohua inanadsoqqe-mananitohui. Naraha ohua ppa idsamanaraha huada huatinimade tojari nadsapi Abi Dio ohua nahatonihitohui –najari Jeso.

²³Nadsapa Jeso madija huapimadsa huati tajari: –Aji “Jesocca madija iquejenana” tiquinadsapi tiadeni tohuini tiquinanicca tohui tetideni ajimamanaji. Ohuadsara disseraqquri tiquinaji. Madija tiadenidsa: “*Ahua porimacossanidsa tidsosqqeji” quinadsa naco: “Jehe, odsosqqeni bica tani. Jeso onebo-jarahi” titidsanopamana nana huajjiradsa, onajaro.

²⁴Tiadenipi ticcadeni madie ohuadsa teccoramanadsapi madija tiadeni tonajicabaqqi-manaraha camittehe jiquejeranicca ticajimana-dsanaponitohui. Naraha madija ohuaha pocca madie ohuadsa acco tadsa ajijaro namidsa madi-dsanapohuijine tohuinira nadsapa dsoqquehitohui. Dsoqque-dsapa camittehe jiquejeranicca caji-jarahitohui –najari Jeso atti.

²⁵–Madija naco ajijaro namicca biquehe tohuini madidsa, ajijaro dsamacca ima deni tojanicca tohuini madidsa naco huapima pohuadsa tojaraha Diotohui najaradsapa nidsa dsoqquedsa jororoni jiquejeranihuaji dsori tajarahitohui. Nadsapa pohua caji-jaricca huapima ponima tojanitohui. ²⁶Nadsama aji tiadenipi madija ohuaha noppideni ticappinamanadsa: “Jesocca madija ojajerani” tiquinadsapi aji occa marinajadsa naqu: “Omittana onejerani” tiquineje camadsapi manaco ohuatti tiadenidsa: “Occa

madija tiquejena-gerani” onanito-
tohui. Ohuapi Madija Bedi ojararo
nidsaranibote ajijaro namidsa occa-
ronapomadsapi occa deni tojehema,
occa Abi Dio ssiejenema, Diocca
dodosse tabaqqi memehuajicca
dacorehema occaronapomanitohui.
Nadsana: “Onocco jidsa tani
tiadenidsa” onanito-²⁷Naraha
ohuapi pajissara tiadenidsa huati
onajaro. Ajidsa tidomodeni huajaro
motadenipi tidsoqquemana-jera-
ccadsama Diocca cacahuehe qqui
tiquinanitohui –najari Jeso.

**Jeso assire tojidsa,
jidseremani najari**

Mateo 17.1-8; Maraco 9.2-8

²⁸Jeso pohua tedsejemacca ima
huati tapohui jicani huada 8 nani
nattinipi ajijaro ima tojajaro. Jeso
pocca Abi Diodsa huati tahijine
ssonohuaji toqqemoradsapa
Pedro, Huano, Satiaco quinajari-
denira iaqqemorabaqqijari. Jai
tojemoradsapa ssono tetepihuaji
bacco tomoramanajari. ²⁹Nahidsa
Jeso Diodsa huatide tojanaja pano
todsibehihi najari. Pohua pano
todsibehidsapa pocca etero naqui
tonopo-po nadsapi todsibehijaro.
³⁰Nadsapa cattomama cananaja
nahihuaji madija pamaha Jesodsa
imahaha canajari. Najaridenipa
*Moisesi, Eria tedseje. Pohua-
denipa maittaccadsamacca Dio Atti
cacomeraqqiri najarideni Jesohuaji
ahuatoma-manajari. ³¹Pohuadeni-
huaji tossiajabaqqi najaro, Dio
madihihuajicca ssiajani pohua-
denidsa ahuatohujanijaro. Jesopa
madija huapimacca tabaccorehe
manaconi tojahijine Jerosare-
dsa inanadsoqqe-manahijinecca

ima imahaha canajari Moisesi,
Eria, Jeso quinadsa. ³²Naraha
Pedro, Huano, Satiaco quinajari-
denipa cahadijabote, noccodeni
ssire-re nadsa Jeso pohua ssiejene
qqi, pohuadsa madija pamaha
ahuatoma-manahi qqui toquinajari.

³³Moisesi, Eria tedseje Jesohuaji
tohuedanibote nadsa Pedro Jeso-
dsa huati tahijineraha pohua bodi
ssamo tadsa pohuama pohua attipa:
–Ia Maride, iapi ajidsa iquejenadsa
bica tani. Ticcadeni odsa huahua-
qqi 3 canehe inahatona. Nadsapi
tiadsa, Moisesidsa, Eriadsa cana-
nijine –najari. ³⁴Pedro huati huati
taja naraha essenipi pohuadeni
tetepihuaji ccaronajaro. Ccarona-
dsapi pohuadenidsa ijihuajani nadsa
cappinamana najari. ³⁵Nadsapa
nahi essen bodidsa atti qqenajaro:
–Ajararipa occa Ejedeni. Pohua-
dsa ohuati huana tajaro. Pohuapa
madija Idinide tojahijine ocatte-
jidsapojaride. Pohua atti timitta-
mananissa taji –najari Dio.

³⁶Najari atti jicadsapa qqui
toquinanaja Jeso pohua motta
hua canajari. Naraha Pedrodenipa
pohuadeni qqui toquinajaricca
ima ecomamana naccajaro. Madija
ohuahadsa huati naridsamana-
jaracchahi.

**Ejedeni bodidsa tocorime
madidsaraha Jeso dosse
ininejari**

Mateo 17.14-21; Maraco 9.14-29

³⁷Huada ssiaja ssonohuaji jai
tojedsippanidsapa madija sibema
Jeso bacco ijidsabaqqijari. ³⁸Nahi-
dsa madija ojararipa Jesodsa huahua
najari: –¡Ohua Maride, jari occa
ejedeni qqui taccajo! Occa ejedeni

ajajari ojarihi –najari. ³⁹ –Tocorime pohua dama inadsa johua johua najari. Pohua bodi tossamodsapa pitora pitora nanaja nadsapa pohua ajari ssabojene tocca tocca najari. Tocorime pohua inajidsoja najari, apaja inana-jarahi. ⁴⁰ Ticca dodosse tabaqquids huati onadsa: “Occa ejedeni tinanomimanajo” onaraha pajiramana-jarahi –najari imehi atti.

⁴¹ Nadsapa Jesoa: –Jaho, madija huapima Diodsa jehe tiquina-nissa tejerani. Ajijaro namicca ima bica tejeranicca ticajimaneje najaro. Tiadeni mari mari ohocana-baqqui naraha ¿nejecoma nadsa ticahatterapadseje? Ticcadeni jeheniji pajiranissa tejeradsapi ohuadsa ocassera taraha ¿nema nehe onahana-dsanaponijinequi? –nanaja: –¡Jari, ticca ejedeni ohuadsa teccajonajo! –najari Jeso.

⁴² Naraha ejedeni Jesohuaji tohuajiradsapa tocorimejine namidsa tohuedimajari. Pahuajine pitora pitora naraha Jeso pohua dosse ininejari. Pohua attipa: –¡Tocorime tabaccorabote! ¡Ejedeni tinebods tiqqenaji, onajaro! –najari. Nadsapa qqenadsa amadsati ejedeni tonomijari. Nadsapa Jeso ejedeni imehidsa inananijari. ^{43a} Nadsapa madija huapima jahijona-jaridenipa jabojo quinaraha huatidsemanajari: –A, nama nahi qqui qqui inapo-jarade. Diocca nahatohuepi deni tojani –quinajari.

**Jesopa pohua dsoqquehicca
ima huati tapomajari**

Mateo 17.22-23; Maraco 9.30-32

^{43b} Madija huapimapa Jeso ejedeni inanomihicca ima imahaha cananaja Jesopa pocca dodosse tabaqquids huati tajari: ⁴⁴ –Aji

ima huati huati onajaropi timittamananissa taji: Ohuapi Madija Bedi ojajaroa nidsa dsotode madija ojaria ohua ccaccoradsapa madija dsependenidsa ojanitohui –najari.

⁴⁵ Naraha pocca dodosse tabaqquipa aja Jeso huati huati tajari mittamanahissa tajarajari. Diojine Jesocca imapi ahuatora tajaro, mittamana-jaraccasihijine. –¿Nejecoma tajaro? –quina-hitohuiraha cappinamanadsapa Jesods huati toquina-jarajari.

**–¿Nejecojarina deni tojajari?
–quinajari**

Mateo 18.5; Maraco 9.33-37

⁴⁶ Nadsapa Jesocca dodosse tabaqquipa pahuadenira imahaha canajari. Ahuaji huati, ahuaaji huati quinadsa attideni ajama quinajari: –Aji ia huapimapi ¿nejecojarina deni tojajari? –quinajari. ⁴⁷ Naraha Jesopa pahuadeni bodi nahato tapojari. Nadsapa ejedeni idi nadsa, pohua inoridsa inahua najari.

⁴⁸ Nadsapa pahuadenidsa huati tajari: –Ajajari ejedenissa najaridsa tetideni huanaqquri nadsapi ohuadsa naqui tetideni huanaqquri najaro. Ohuadsa tetideni huanaqquri nadsa naqui ohua Cadossede Abi Diodsa tetideni huanaqquri najarossa najaro. Aja madija ejedenidsa huati huana tadsapa pohua tessedsa naco huati huana tajari. Najaripa madija huapimadsa acco camade dissera tadsapa pohua atti naco: “Ohuapi ajimani ojani, Diodsara ibora onani” nanaja najarina Diodsa bica tajari. Pocca ima bica tadsapi pocca deni tojehe pajissehecca ahuaato tajaropaji –najari Jeso.

–**Madija iadsa huadi
tajaradsapa ia acco camajari
–najari Jeso**

Maraco 9.38-40

⁴⁹Nadsapa Huano Jesodsa huati tajari: –Ohua Medsede, madija ohuaha tia oni hua nadsa madija bodicca tocorime madidsajari dosse ininehi qqui inade. Naraha pohuapa iadsa ccaridsa-jaradsa pohuadsa: “Epeje taji. Poni” inade –najari Huano. ⁵⁰Naraha Jeso attipa: –Pohuadsa poni tiquinejeraji. Pohuapa occa ima inatabaccora-jerajaro. Madija nama najaripa iadsa huadi tajaradsapa ia acco camade tojajari –najari Jeso.

**Samaritanodenipa Jesodsa
nacasseraququiri najari**

⁵¹Jesopa memehuaji tocca-macossanihijine tohuajiradsa huati tajari: –Jerosarehuaji occana. Ima ohuadsa oppina taraha nema nehe occana –najari. ⁵²Nadsapa dsama Samariacca odsa pamema nanihuaji huati toquinahijine Jesopa pohua tedsejema madija dosse inabaquiquipajari: –Nanihuajicca odsadsa edacossanihijine huati tiquinana –najari. ⁵³Nadsapa jai tojajari, bacco toquinadsa huati toquina-
raha *samaritanodenipa odsa dade jiperaququiri najari. Pohuadenipa –Jesopa Jerosarehuaji toccahitohui –quinahi ima nahatoququiri nadsa nahidsa Jeso huadahijine jiperaququiri najari.

⁵⁴Naraha pocca dodosse tabaqqui pamaha Satiaco Huano tedsejema samaritanodeni atti: –Jeso ajadsa huadahijine jiperaququiri inani –quinahi ima mittamanadsapa

Jesodsa huati toquinajari: –Ia Maride, iapi memehuajicca jororondisa jicahijine Diodsa huahua inana ¿jehe taqui? –quinajari. (Pina maittaccadsama Eriajine taminecca dodosse tabaqqui nama inanabaquiquidsa jicajarissa inanabaququina.) ⁵⁵Attideni nama quina-dsapa Jeso icattabaqqui nadsa pohuadenidsa huati tajari: –¡Nema tiquinejeraji, poni! –najari. –Occa tiquejenajaropi “manaco” inejerana. [⁵⁶Ohuapi madija nanadsoqueude occajona-jerajaro. Madija onassiajabaququihijinena occajonajarode] –najari Jeso. Nadsapa denicca odsa pamema najarodsana jai tojajari.

**Madija Jeso huatimade
toquejenahijineraha**

Mateo 8.19-22

⁵⁷Jahui jai tojadsapa madija ojaría Jesodsa huati tajari: –Ohua Medsede, tiadsa occaridsana onajaro –najari. –Tiadsa occaridsadsapi tia onebo nejeranihijine –najari. ⁵⁸Naraha Jesopa pohuadsa huati tajari: –Ohuadsa ticcaridsanijine tipajira-jeranitide. Ajana dsohuadsahuapa odinedeni cajiridsamanahi. Ppiriri naco tadsarideni cajiridsamanahi. Naraha aji ohua *Madija Bedi ojararopi odsa ocappira, ohuadanihijinecca huahuada ocappira nani –najari Jeso.

⁵⁹Nadsapa Jeso madija ohuahadsa huati tajari: –Ohuadsa ticcaridsaji, tia naqui occa dossenijidsa tidsepe ijinihijine –najari. Naraha pohua attipa: –Jehe ohua Medsede, occa abi huatiahi ppa odsahijine occa odsahuaji occanipocana. Nidsa dsotodena tiadsa occaridsanihijine

¿jehe taqui? –najari. ⁶⁰Naraha Jeso pohnuadsa huati tajari: –Madijapa Diocca camittehe cappiramana-jarideni caji tahi. Pohnuadenina poccadeni madija dsoqquedsa ppa idsamanahijine pajiramanahi. Naraha tiapi ohuadsa ticcaridsaji. Diocca cacahuehecca ima tecomeraridsanijine. Icca benehi inajorani –najari Jeso.

⁶¹Madija ohuaha naco Jesodsa huati tajari: –Ohua Medsede, ohua naqui tiadsa occaridsana. Naraha tahidepi occa odsahuaji occaniccana. Nidsa nanihuaji occa madijadsa occanicca ima huati onabaqquiccana –najari. ⁶²Naraha Jeso najaridsa naco huati tajari: –“Occa odsahuaji occaniccana” tadsapi Diocca cacahuehedsa tidsepe ijinihijine tipajira-jerani. Najaro imapi pina bani ssitedecca imassa najaro. Madija bani ssite inahijine pocca bobadsa joca icanaraha pohua nattiuhaji qqui tanidsapa bani ssite inajarahitohui. Bani ssite inahijinepa banihuaji paja tocattarihi nadsana bica tahi –najari Jeso.

**Jesopa pocca mamari
tabaqqui 72 quinaha dosse
inaridsabaqquijaricca ima**

10 ¹Jeso pocca *mamari tabaqqui mari icanabaqquia jicadsapa pohnuadenidsa: –Odsa panani onihi onihi nanihuaji mari ocanabaqqui-ridsahijine –najari. Pocca mamari tabaqqui pohua tedsejema dosse inabaqquiridsapojari: –Madija otahimari mitta-manapohuijine –nadsapa pocca mamari tabaqqui 72 quinaha Jeso icattejidsabaqquijari pohua tedsejema pama pama naha dosse

inabaqquiridsapojari. ²Nadsapa pohnuadenidsa huati tajari: –Madija Dio jiraha madimanahi huapi taraha pohnuadeni maridea huapi tajarahi. Pina huidsajacca ppa nahi bono jica-jarajarissa quinaraha poredea madija pama quinarajari. Nadsapi huidsaja jinede Diodsa huati tiquinaji, Pohua Atti maride dosse inabaqquidsa bono porede tohuapihijine –najari Jeso. ³Nadsapa denima huati tajari: –Jai tijabaqquiridsaji. Naraha aji tiadeni dosse onabaqquijaropi pina edede bedi dsomaji panahihuaji tiadeni dosse onabaqquijarossa najaro. ⁴Jai tijaridsadsapi sacco, dsiniro huahuadsa, sadaria naco tiaccamana tajarajo. Jahui jai tijadsa naqui “Ahuajicca madijadsa qqui ijidsaccana” tiquinejerana. Madija jahuidsa qqui tiquinadsa naco “Huati icanaccana” tiquinejerana. ⁵Madijacca odsadsa bacco tiquinadsa jai tijedsimadsa jinededenidsa huati tiquinadsapi ajima tiquinana: “Diocca jonehe tiadenidsa tojaji” tiquinana, onajaro. ⁶Nadsapa aja odsa jinede pajissa Diocca jonehe tohuini nadsa Diocca jonehe pohnuadsa tojanijine. Naraha madija ohuahapa Diocca jonehe tohuini quina-jaradsapa epejena pohnuadenidsa toja-jeranitohui. ⁷Nadsama aja odsa jinede: “Aji occa odsadsa timadimanaji” nanaridsamana nadsapa nani poccadeni odsahuajira timadimanaccana. Odsa panani onihihuaji jai tija-jeraccadsapi odsa onihihuaji, onihihuaji ticahadjaridsa tejeraji, tijiparidsamana tejeraji, onajaro. Aji odsa bacco tiquinapojarodsara tiadeni totonajipabaqqui nadsa poccadeni

dsamatapa titijipamana nana. Poccadeni passo, ahua bono ppejene ocassa tajari naco dse dse titiquina nana, onajaro. Nadsama madija Dio Atti maridera dsepe ijihissa tadsapa manaconi jirehe tiadeni totonajipabaquimana nana. Aji tidsepedeni ijiridsamanadsapi najaropi ticcadeni marinaja manaconissa najaro. ⁸Odsa panani onihihuaji bacco tiquineje naridsaponi nadsapi nahicca madija: “Ticcadeni marinaja imittana” quinajarideni tiadenidsa: “Aja tijipamanaji” quinajaridenidsara titijiparidsamana nana. ⁹Nahicca madija comaquiri najarideni naco tinanomibaquimanaja naridsapohui nana. Pohuadenidsa huati tiquinadsa naqui: “Tiadenidsa *Diocca cacahuehepi huajira tani” titiquina nana, onajaro –najari Jeso.

Madija iboquiri najaridenipa caji tahi

Mateo 11.20-24

¹⁰Jesopa pocca mamari tabaqui-dsa denima huati tajari: –Nadsama odsa panani onihihuaji bacco tiquinadsa naqui tiadenidsa: “Ajidsapi timadimana tejeraji” nanaridsamana nadsapa jahui jai tijequimadsa pohuadenidsa ajima tiquinana: ¹¹“Tiadenipi Diocca cacahuehecca ima mittade jiperaquiri tiquinadsapi epejena jaijequimanijine” tiquinana. “Tidsamari-denicca ssiqui emoridsa matajaro naqui catojanijine pporo inana, nani ticcadeni ibohue tibodideni huatoma-mananijine” tiquinana. “Naraha tiadenipi ¡timitamananissa taji! Diocca cacahuehe tiadenidsa huajira taraha...” tiquinana,

onajaro. ¹²Ajina, nidsa dsama jicadsa Diopa dsama huapima ima manaconi huati tadsapa najaro odsa pananica madija occa marinaja mittade jiperaquiri nadsapa najidsohue imenidsa madimana-hitohui. Ajina, maittaccadsama odsa panani *Sodomacca madijapa imasiri ssequiri nadsapa Diojine jicaridsapojari. Naraha pohuadenipa nidsa dsama jicadsapi poccadeni imasiri manaconipa najidsohue oppina tajaro pohuadenidsa tojanitohui. Naraha occa marinaja mittade jiperaquiri najaridenidsana najidsohue denima oppina tanicca tojanitohui, onajaro –najari Jeso.

¹³ –Jaho, madija odsa panani Corasinahuaji timadimanajarodenipi najidsohue oppina tanicca tiadenidsa ssonarinitohui. Jaho, madija odsa panani Besaidadsa timadimanajarodenipi naqui najidsohue oppina tanicca tiadenidsa ssonarinitohui. Ticcadeni odsahuaji ocanahatori canani qqui qqui tiquinaraha tibodideni cacajiquimerehe nejerade. Ajina, maittaccadsama odsa panani Tirohuaji madimanapojarideni tabaccoraquiri najari. Aji odsa panani Sidohuaji madimanapojarideni naco tabaccoraquiri najari. Pohuadeni huapimapa aji ocanahatori canani qqui toquinapo-jarajari. Nassa qqui toquinadsapa Diodsa toquejenahijine najomana-jarahitohuiraha. Poccadeni imasirijine bodideni occassera tadsapa *etero jidsa tanicca huedsamandsa dsippo oconidsa jassi tadsa oji oji quinahitohuiraha –najari Jeso. ¹⁴ –Naraha nidsa *madija

huapimacca ima cattermanijinecca huada bacco tadsa Dio Pohua bacco-huaji tidomodeni huadsapi Tirohuaji madimanajaridenidsa Dio pocca najidsohue ajimani tojanitohui. Sidohuaji madimanajaridenidsa naco ajimani tojanitohui. Naraha tiadenidsana Dio pocca najidsohue denima oppina tanitohui.

¹⁵ –Jaho, madija odsa panani Capernaohuaji timadimanajaro-deni naqui najidsohue oppina tanicca tiadenidsa ssonarinitohui. Dio memehuaji madijaridsa bacco tiquinadsa tiadenidsa Pohua Attipa: “Jehe, tiadenipi bicaququiri tiquinani” ¿napadsaja? ¡Nama najarahitohui! Ticcadeni ibohue-jinepi nami odini huaji tani jica-qquini nohueranihuaji tiadeni hua todsimahitohui –najari Jeso.

¹⁶ Naraha denima pocca mamari tabaqquids huati huati tajari: –Tiadenipi otahimari tecomeraridsamanadsapi madija tettidenidsa jehe quinadsapa ohuadsa naco jehe quinajari. Nadsama madija ohuahadeni tiadeni tohuattajo-baqquidsapa ohuadsa naco huattajojo tajari. Ohuadsa huattajojo tadsapa aja ohua cadossejaridsa naco huattajojo tajari –najari Jeso atti, pocca mamari tabaqqi jai tojaridsahijine dosse inabaqquijaridsa.

**Jesocca mamari tabaqqui 72
quinajarideni jahiqquinijari**

¹⁷ Jesocca mamari tabaqqui 72 quinajarideni jahiqquinidsapa huatidsemaneri nanidsa Jeso pohuadsa huati toquinajari: –Ia Medsede, tia onima huati inadsapi Satanacca dodosse tocorime ettidsa iboraququiri nadija –nanimanajari.

¹⁸ Nadsapa manaco Jeso pohuadenidsa huati tajari: –Jehe, ohuana Diocca huadi Satana memehuaji Diojine ssonaronahi pina sssiede-sa naronahi qqui onajaride. ¹⁹ Occa dacorehe tiadenidsa onanaridsa-jaropi aja Satanacca dacorehe cajimanajaridenidsa tiadenina deni tiquejenanitohui. Nadsama oppina tanicca pina macca ttai tinanaququimanadsa tiadeni cca todsa-jarahitohui. Dsorima ssidede naco ttai tinanaququimanadsa tiadeni ttodi todsa-jarahitohui. Satana pohua, pocca dacorehe cajimanajarideni naco tiadeni tonajidsobaququimanajarahitohui. ²⁰ Naraha tocorime tettidenidsa iboraququiri nadsa tetidsemanaraha najaro imapi ajimani. Ima denima bica taniccapi ajima nani: Occa madija tique-jenadsapi tiadeni onipi memehuaji Diocca papeods dsodo naridsani. Najaro imadsana denima tetidsemanaji, onajaro –najari Jeso.

**Jesopa Imehidsa huati tajari,
pocca mamari tabaqquids
naco huati tajari**

Mateo 11.25-27; 13.16-17

²¹ Huati taha jicadsapa Jeso Dio Corimejine huatidseri nadsa Imehidsa huati tajari: –Jehe Abi, tiadsa ohuatidsejaro. Tiapi memehuaji madimanajarideni Cacahuade tija, namihuaji madimanajarideni Cacahuade tija najaro. Jehe, madija nahatoququiri najaridenipa ajijaro dsamacca ima tocatheraraha Tiadsa jiperaququiri najari. Nadsama tijinepi ticca ima pajissacca mitta-mana-jarahijine pohuadenidsa ahuatora tinanajaro. Naraha madija motadenipa: “Iapi ssamoququiri

inajaro, pina ejedenissa inajaro. Dio, ia acco ticamabaquiji, iatta naccaraho” quiquinanajari. Jehe, nadsama tijinepi ticca ima pajissa-cca mittamanahijine pohuadenidsana ahuato tinanajaro. Jehe Abi, ¡pajissa! Tia jipa tinadsapi tijine nema tinanajarode, onajaro. Nadsama tijinepi ohuadsa bica tani, onajaro –najari Jeso. ²²Nadsapa pocca mamari tabaquidsa huati tapomajari: –Occa Abipa ohuadsa pocca nahatohue huapima inanaridsajaro. Occa Abina pohua motta ohuadsa nahato tahi ojari najari. Occa Abipa nadsama Pohua ojari naha ohuadsa nahato taha nama najonajari. Ohuapi Abi Diocca Ejedeni ojani. Ohua naqui nadsama. Ohua ojari onehe Pohuadsa nahato onehe nema onajonajaro. Nadsama ohua Dio Bedi ojadisapi madijadeni ohuadsa toquejenajaripa pohuadenidsa jipa onadsapi ojine pohuadenipa Dio Pohuadsa noccodeni tojidserahitohui –najari Jeso. ²³Nadsapa Jeso pocca mamari tabaqqi icattabaqqi nadsa huati tajari: –Aji ohua ocanahatoriri canajaro tinoccodenidsa qqii tiquinaridsajaropi Dio tiadenidsa ima bicani inanajaropaji. Ohuapi madija Idinide ojeje najaro aji tiadeni tinoccodenidsa qqii tiquinajaropaji. Dio naco tiadenidsa ima bicani inanajaropaji. ²⁴Maittaccadsama Dio Atti cacomeraquiqui najarideni, jodiodenicca taminedeni naco occa nahatohue aji jidapana tiadeni qqii tiquinajarocca qqii toquinahijine tohuini quinaporaha tahide tojicapodsapa qqii toquina-jarajari. Aji occa marinaja timittamanajaro-cca naqui najaro mittamanahijine

tohuini quinaporaha tojicapodsapa mittamana-jarajari –najari Jeso.

Diocca dosseniji deni tojanicca

Mateo 22.34-40; Maraco 12.28-34

²⁵Jassi nahuajanidsa aja jodio-
denicca marinaja maride pohua
bodipa: –Jeso nattome onana
–nadsa totehemadsa huati tajari:
–Mamaride ¿nejecoma onadsa
camittehe imadi-dsanaponicca
bacco onanijine? –najari. ²⁶Naraha
pohuadsa Jeso huati tajari:
–¿Nejeco ima hua hua tatte *Dio-
cca dosseniji dsodo nanidsa? Hua
tadsapi ¿nejeco imara tiadsa ahuato
tatte? –najari Jeso.

²⁷Nanaja jodiodenicca marinaja
maridepa Dio Atti ecomerajaro:
–“Tiadeni Medsede Diodsa teti-
deni huanacquiri naji. Tibodideni
huatonissa tadsa, dacoco tijira-
dsa Pohuadsara disseraquiri
tidsanapomanadsapi Pohuadsa
tetideni huanacquiri nanijine.
Tinoridenicadsa naqui tetideni
huanacquiri naji, pina tiadenidsa
tetideni huanacquiri najarossa
naji”

nade Dio Atti dsodo nanidsapi
–najari jodiodenicca marinaja
maride atti.

²⁸Nadsapa pohuadsa Jeso huati
tajari: –Huati tinani bica tani.
Nema tidsanapodsapi Diodsa
timadinitohui –najari.

²⁹Naraha jodiodenicca marinaja
maride pohua bodi attipa:
–¿Nejecojaridenina ohuinoricca?
Najaro Moisesicca marinaja Dio
Atti dsodo nanipi ¿ohuacahuani-
ssa tajaroqui? –najari. Nadsapa
Jesodsa huati tajari: –Diocca
dosseniji najarossa onananijineraha

¿nejecojaridenina ohuinoricca?
 –najari jodiodenicca marinaja
 maride.

Samaritano tahimari

³⁰ Jodiodenicca marinaja maride
 attipa: –¿Nejecojaridenina
 ohuinoricca pohuadsa ohuati huana
 tanijine? –nadsapa Jeso manaco
 pohuadsa ajijaro ima huati tajari:
 –Jodiodeni ojariapa odsa panani
 Jerosarecca jahui odsa Jericohuaji
 toccanihuaji toccajari. Toccaraha...
 bobotidedeni dama quinadsa ida-
 qqumanaha, huatiabote nadsa
 eterori ssiti quinehe jica nadsa jahui
 inorinidsa inebomanadsa jai tojani-
 jari. ³¹ Naraha *dada toqquimadepa
 huati ajama canaha jahui toccanaja
 madija biquerajari ponacossahi

qqui taraha toccarihuaja-dsanapo-
 jari. ³² Nahi dsotode naco dada
 toqquimade bijideni accode
 *rehuitadeni quiquinanajari ojaría
 najaro jahui toccajari. Najari naco
 madija biquerajari ponacossahi qqui
 taraha toccarihuaja-dsanapojari.
³³ Nadsapa madija ohuaha dsama
 onini Samariacca madija naco
 najaro jahui toccajari. (Aja Samaria-
 cca madijadenidsa: *samaritano,
 quiquinanajari. Pohuadenipa jodio-
 deni tedseje ahuaji jipera ahuaji
 jipera quinajari.) Nadsapa samari-
 tano quiquinanajari ojaría najaro
 jahui toccadsa madija biquerajari
 ponacossahi qqui tadsapa pohua-
 tohui huati huana tajari, pocca
 madija jararaha. ³⁴ Nadsapa samari-
 tano uva bono ppejene ahua oquini



icanejemadsa bobotidedenijine biquerajari ecanajijari. Pocca bejo jore inacossadsapa pocca bojodsa ibarijari. Nadsapa odsa onihihuaji iaccajari, nahidsa ecahuahijine. ³⁵Naraha huada ssiaja samaritano toccabote nadsa odsa jinededsa ccarara *denario capamehe dahaha icanajaro. “Coma tajari tecahuana. Nidsa occanipomadsa tiadsa aja tecahuajari manaconi mota tojadsapi da onapomanijine” nahi nade samaritano attipa –najari Jeso jodiogenicca marinaja maridedsa.

³⁶Naraha Jeso pohuadsa denima huati huati taccajari: –Aja madija 3 quinajaripa dada toqquimade, Rehuita, samaritano quinajari-denipa ¿nejecojarina paja aja bobotidedenijine biquerajaridsa pina pohua inoriccassa najari? –najari Jeso.

³⁷Nadsapa jodiogenicca marinaja maride ecomerajaro: –Aja madija biquerajaridsa huati huana tajarina paja –najari. Nadsapa pohuadsa: –Jehe, ticcanidsapi nema tidsanapoji –najari Jeso.

Jesopa Marta Mariadenicca odsadsa maride tojajari

³⁸Jesopa pocca dodosse tabaqqui tedseje poccadeni benehidsa denima jai tojeqquimadsapa odsa capamema nanidsa bacco toquinajari. Nanidsapi amoneje onini Marta madijaro. Najarona Jesodsas huahua najaro: –Occa odsadsa timadiccapi –najaro. Nadsapa Jeso toqquedsimajari. ³⁹Martacca eso Maria naqui nanidsa madijaro. Jeso maride tojadsapa Mariapi pohua atti mittade huittajaro. ⁴⁰Naraha

Martapi ponicca odsa bica tocananijine, huapima jipaquimanadsa bica tanijine dsapani ijiridsajaro. Dsapani jica-geradsa ponidsa tonajoni nadsa Jesodsas huati tajaro: –Ohua Medsede, ohua motta occa odsadsa odsepe ijini. Ohuemecote ohua acco cama-geradsapi ¿tiadsa bica taqui? Ponidsa huati tinaji, ohua acco camaccanijine –najaro.

⁴¹Naraha Jeso Martadsa huati tajari: –Marta, tiapi ticca odsa bica tocananijine, jijipa naco tinajoranijine najarotohuira teti huatojaro.

⁴²Naraha ima onihina denima bica tajaro. Najarotohuina teti huatonijine bica tajaro. Mariapi ima denima bica tajarocca icattejidsajaro. Jehe, epejena. Ponipi occa marinaja mittana. Tiahuaji dosse onejerani –najari Jeso.

Diodsa huati huati inanijinecca ima

Mateo 6.9-15; 7.7-11

11 ¹Jesopa pocca dodosse tabaqqui tedseje dsama onihihuaji maride ccaridsadsapa Diodsa huatide tojajari. Huatide jicadsa pocca mamari ojariapa Jeso pohuadsa huati tajari: –Jari, ia naqui Diodsa huati huati inanijine ia mari ticanabaqquiji, pina Huano pocca mamari tabaqqui mari icanabaqquijarissa tinanaji –najari.

²Nadsapa Jeso pohuadenidsa huati tajari: –Diodsa huati tiquinadsapi ajima tiquinaji:

“Jehe Abi Dio, iapi ticca ejedeni Tiadsa huati inajaro.

Jehe, Tiapi nahatojide tijirani ojari tani. ¡Bica tinani!

Madija huapima: ‘¡Dio, Tiapi deni tijani!’ quinana, inajaro.

Ticca cacahuehe huapimadsa tinanaridsana, inajaro.

³ Itapari naco huada huajjiradsa iadsa da da tajo.

⁴ Madija iadsa tabaccorehe inanamadsa poccadeni tabaccoreheda: ‘Epejena, huadi onejerani’ inadsapi manaco icca tabaccorehe epeje tinanaji, Abi Dio. Icca tabaccorehe manaconi najidsohue iadsa tinana-jeraji, inajaro.”

Jesopa: –Diodsa huatide disseraquiri tiquinaji –najaricca ima mari icanabaquijari

⁵⁻⁶ Jesopa Diodsa huatide tocatterahijine denima mari icanabaquijari: –Ajima najaro imadsa tiadeni mari ocana-baquina. Dsome nocconi titesse huaji tanicca bacco nadsa titapahijine nohueradsapa titesse tinoridsa madijaridsa huahua tajaro: “Otesse huaji tanicca bacco najonahi. Naraha otapari nohuerahi, pohuadsa da onahijine ocappirani. Ohuadsa pan huatimade tojari naha da tajo” tajaro. ⁷Naraha odsa bodicca pohua cacomerajari: “Ohuadsa huahua tejeraji, noccobiji cahacossani. Occa ejedeni ohuinoridsa cahadijahi. Tiadsa da onahitohuiraha otehemanjine tojera tani” najari tinoricca –najari Jeso. ⁸ –Naraha tiadenidsa huati onajaro: Tinoriccappa tisesse-rahua pohuadsa huahua tapodsapa qquna-jarahi. Naraha ticappina-jeradsa huade dissera tinadsana qqenahitohui. Qquenadsapa ticappiranicca tiadsa da inahitohui –najari Jeso. ⁹ –Nadsama

ohuapi tiadenidsa huati onajaro: Abi Diodsa huati huati titiquina naji, onajaro. Dio Pohuadsa huati tiquinadsapi tiadenidsa ticcadeni huatinajassa nehe da inanitohui. Pina tohuini tanicca qquide dissera tinadsapi bacco tinanitohui. Najarossa najaroa Diodsa huatide dissera tinadsapi Pohuapa ticca huatinaja tiadsa inapajiranissa tanitohui. Pina madijacca odsadsa tiqqedsimanijine tohuini tadsa odsa jinededsa huahua tadsapi tiadsa noccobiji icatabojidsanitohui. Najarossa najaroa Diodsa huati huati tiquinadsapi ticcadeni huatinaja mittahi. ¹⁰ ¡Pajissa! Madija Diodsa huati tadsapa Diopa pohuadsa pocca huatinaja da inanitohui. Madijapa Diodsa huatide dissera tadsapa Dio Pohuajine pocca huatinaja inapajiranissa tanitohui. Madijapa pina Diocca noccobijidsa huade dissera tajarissa nadsapa Dio pohuadsa noccobiji icatabojidsanitohui, onajaro.

¹¹ –Ajana, madijapa pocca ejedeni aba tohui huati tadsapa ¿pohua bedidsa macca da ina taco? Nohuerahi. Tiadenidsapa madija nama najari nohuerajari. ¹² Madija ohuaha pocca ejedeni tacara nappanitohui huati tadsa naco ¿pohua bedidsa dsorima da ina taco? Nohuerahi. ¹³ Tiadenipi tabaccorehe ticajimanaraha ticcadeni ejedenidsa bica tahicca dade nahatoquiri tiquinani. Aji tiadeni naqui ticcadeni Abi Dio memehuaiji madijaridsa huati tiquinadsapi tiadenidsa bica tahicca dade denima jipa tahi. Pohua Corime tohui tiquinadsa naqui Pohuadsa huati tiquinadsapi tiadenidsa da inahitohui, onajaro –najari Jeso.

**Jesocca dacorehe ahuato
tajaroraha pohuadsa ima
inanamanajaro**

Mateo 9.32-34; 12.22-32;

Maraco 3.20-27; 9.40

¹⁴Nadsapa madija pohua bodi-
dsa *Satanacca dodosse tocorime
madidsajarijine ebena siri tojajari.
Atti cappiraha madijari. Naraha
Jesojine ebena siri bodicca qquena-
dsapa ebena biquemanidsa atti
cajipomajari. Nadsapa nahihuaicca
madija qqui toquinadsapa: –A, bica
tahi. ¡Jesopa nahato tahi! –quina-
jari. ¹⁵Naraha nahihuaicca madija
ohuahadeni pohuadsa pajissa quina-
jaradsa mota attidenia: –Ajana,
Jesopa tocorimedenicca tamine
*Beheosebocca dacorehe cajijari-
jinea pocca dodosse tabaqqi dosse
ininebaqqijaripaja –quinaraha
maidsamanajari. ¹⁶Naraha mota
bodidenia: –Jeso nattome inana.
¿Nejecojaricca dacorehe caji-
jari? –quinadsapa Jesodsa huati
toquinajari: –Jari, pajissa Diocca
dacorehe ticajidsapi memehuaicca
nahatohue bicabote ahuato tinanaji.
Qqui inana, inajaro –quinajari
Jesodsa. ¹⁷Naraha Jesopa pohua-
deni bodi nahato tajari. Pohuadeni
bodi huatomanahijine pohuadeni-
dsa ajijaro ima huati huati tajari:
–Dsama huapimacca taminepa
madija ecahuabaqquiraha dsotode
pocca madija cahadiremanadsa
ahuaji atti ahuaji atti quinadsapa
pocca cacahuehe inassamomana-
jaro. Nadsapa pocca madija domo
tocca tahi. Najarossa najaro odsa
cajariecca madija cahadiredsapa
poccadeni ima tossamodsapi
tojaribaqqi tahi. ¹⁸Ima najarossa

najaroa Satanapa pocca dodosse
tabaqqi madija bodidsa madidsa-
manajarideni dosse ininebaqqi-
dsapa pina pohua pocca madija
tedseje cahadirejarissa najari. Nama
nadsapa pocca dossehe inassamo-
dsapi sara tabaqqi hitohuiraha.
¿Nadsapa pocca dodosse madija
bodicca dosse inehijine jipa taco?
Jipera tahi. Aji ohuadsa tettidenipi:
“Beheosebocca dacoreheda pocca
dodosse dosse tininejari” tiquina-
raha najaropi pajissa jerani. Nassa
najaro pajissa tojadsapi Satana
pohua pocca dodosse tabaqqi
inajaribaqqi-ridsahitohuiraha.

¹⁹Ajina, ohuadsa: “Beheosebo-
cca dacorehe ticajini” tiquinaraha
ticcadeni mamari tabaqqi naco
tocorime dosse dosse ihininebaqqi-
mana najari. Naraha pohuadenipa
¿nejecojaricca dacoreheda nama
quinajari? Aja ticcadeni mamari
tabaqqi dacorehe cajimanadsa
tocorime dosse ininebaqqi-mana-
raha pohuadenidsa: “Beheosebocca
dacorehe ticajimanani” ¿tiquina-
ttaqui? Nema tiquinejerani, onajaro.
Nadsama ¿nejecotohui ohuadsa
nema tiquinajaro? Tibodidenipi
quejemama canajaro –najari Jeso.
²⁰–Naraha ohuapi Diocca dacorehe
ocajije najaro Satanacca dodosse
tabaqqi dosse dosse ohonine-
baqquiridsa najari. Nema onana-
dsapi tiadenidsa ahuato onanajaro:
jidapana Diocca cacahuehe tiadeni-
dsa bacco najonajaropaji, onajaro
–najari Jeso atti.

²¹–Nadsama Satanapa dacorehe
cajiraha ohuapi deni ojararo.
Pohuapa ajamani, pina ajijaro ima
tiadenidsa huati onabote najaro-
ssa najaro. Aja madija dacorajaripa

dsepe cajidsa pocca odsacca huapima ecahuanissa tajaro.

²² Pohua bodipa: “Odsepe ocajidsapi daco ojirani” naraha madija ohuaha denima dacorajari bacco nadsapa odsa jinede dama inajari. Dsepecca equididsa jinede biji jore inadsapa pohua dsepetaji huapima inaccadsa da inabaquijaro. Ima najarossa najaroa aji occa dacorehe deni tojadsapi Satana jore onaquidsapa pocca dodosse tabaqqi dosse dosse ohoninebaqqi najaripaja –najari Jeso.

²³ Nadsapa Jeso denima huati huati tajari: –Nadsama madija ohuadsa toja-jaradsapa occa huadi tojajari. Pohua naco madija ohuadsa toquejenahijine pohuadeni acco icamabaqqi-jaradsa pohuajine ohuadsa tohuajimanajari, onajaro –najari Jeso.

Satanacca dodosse tocorime toccaraha ccanipoma tahi

Mateo 12.43-45

²⁴ Jesopa ima onihidsa mari icanabaquijari. Pohua attipa: –Nadsama tocorime ojaria madija bodidsa madidsaraha qquenadsapa toccajari. Aji dsama huamo tanihuaji, passo nohueranihuaji pohua madihijine qqide toccadsa qqi qqi naridsaraha pohua madihijine bacco tarajari. Nadsapa: “Jehe, occa mamadi botehuaji occanipomana” najari tocorime atti. ²⁵ Nadsapa ccanipomajari, bacco nanidsa madija pohua bodi tohuirehi qqi tadsapa pina odsa johue tocanehes huiisso tocanajarossa najaro. ²⁶ Nadsapa tocorime toccapomadsa pohua tessedeni tocorime 7 quinaha jina inanibaquijari.

Najaridenipa denima tabaccoraqquri naraha pohua tedseje jai tojedsimajari, madimanahijine. Nadsama ima nema najaro madijadsa tojadsapi pocca madie tabaccora taporaha dsotodepi denima totabaccorajaro –najari Jeso.

Huatidsehe icajinicca ima

²⁷ Nadsapa Jeso maride tojadsapa amoneje madija sibemadsa quejemajaropi jadsirema huahua najaro: –Jehe, ticca amidsapi ima bicani tojani. Ponipi bedi nahato tajari inanapidsapa huatidsehe cajini –najaro amoneje attini.

²⁸ Naraha Jeso huati tajari: –Jehe, naraha madijapa Dio Atti mittamanadsa najarossa inamanadsapi najaridenidsana ima bicani tojanitohui. Huatidsehe naqui cajimanahitohui –najari Jeso.

Madija tabaccoraqquri najarideni Jeso canahatori canahijine tohuini quinajari

Mateo 12.38-42; Maraco 8.12

²⁹ Nadsapa Jesodsa madija toquერიqqija dsanapohui najari. Nanaja madija si tocajajari canadsa mari icanabaquidsapa ajama najari: –Nadsama aja jidapana madija madimanajaridenipa tabaccoraqquri nadsa ocanahatoriri cananijine tohuira huati toquina-raha occa nahatohue onahatona onejerani. Naraha ocanahatoriri cananica ima ojariena ahuato onananitohui. Najaropi Dio Atti cacomerabote *Jonasocca imassa najaro. ³⁰ Najaroa aji Jonaso pina huatiajarissa naraha Diojine tossiajadsa madipomajari. Pocca

ima odsa panani Ninibehuaji madimanapojarideni mittamana-dsapa: “Jehe, ajararipa Diocca dosseniji, Dio Atti imittanijine” quinade. Najarossa najaro imadsa Diopa madija jidapana madimanagerideni inahattabaquihitohui. Aji ohua *Madija Bedi ojararopi nidsa ohuatiadsa Diojine ossiadsapi omadipomanitohui. Pina Jonasocca imassa najaro ohuadsa tojanitohui, onajaro –najari Jeso. ³¹ –Nadsapi nidsa *madija huapimacca ima cattemanijinecca huada bacco tadsapi Dio Pohua baccuhuaji tidomodeni huanitohui. Nanidsapi dsama Sebahuaji tamine amoneje madijaropi ticcadeni ima tiadenidsa inassonarinjine huati tanitohui. Poni attinipi: “Ohuapi dsama huaji tanihuaji omadiraha tamine *Saromocca nahatohue omittanijine occajonade. Naraha tiadenidsa madijaripa denima nahato taraha pohua atti mittade iboquiri tiquinajaro. Nema tiquinadsapi Dio tiadeni tohuattajo-baqquidsapa bica tani, onajaro” nanitohui Sebahuajicca tamine amoneje attinipi –najari Jeso. ³² –Najaro huadadsa odsa panani Ninibehuaji madimanajarideni naco ticcadeni ima tiadenidsa inassonarimananjine huati toquinahitohui: “Iapi Jonasocca ima imittadsa ibodi cacajiquimerade. Naraha tiadenidsapa Dio Atti cacomerabote deni tojarari madiraha pohua atti mittade iboquiri tiquinajaro. Nema tiquinadsapi Dio tiadeni tohuattajo-baqquidsapa bica tani, inajaro” quinahitohui Ninibecca madija –najari Jeso.

Dio ssiejene pina jojorossa najari

Mateo 5.15

³³ –Nadsama jorororo naco toquehessidsapa ahuatora tanihuaji tocanajimahijine jarahi. Ssapotodsa naco boco icanahijine jarahi. Jojororo toquehessidsapa aja pohua cacahittari nahidsa cacahittari najari, nahi madija odsa bodihuaji jahidsimajarideni ssiajani cajimanahijine. Najarossa najaro Dio ssiejene tiadenidsa bacco teje nadsapi tibodideni tossiajaridsani –najari Jeso. ³⁴ –Inoccopi essiredsa pina jororossa najaro. Inocco bica tadsapi essire ssiajani ijini. Idsepedsa naqui damade nahato inajaro. Emoridsa naqui ccaridsade nahato inajaro. Icca tarabadsa naqui ipajirajaro. Ibodi huatode naqui nahato inajaro. Naraha inocco bica tejeradsapi pina inocco dsidsi tajarossa najaro, issamo tani. Dama inanijine naqui ssamo tani, iccaridsanjine naqui ssamo tani, icca tarabadsa naqui ssamo tani. Imapi najarossa najaro tibodidenidsa Dio ssiejene toqqedsimadsapi tibodidenidsa ssiaja taridsani. Naraha Dio ssiejene toqqedsima-jeradsapi tibodidenidsa pina dsidsini ijiridsajarossa najaro –najari Jeso. ³⁵ –Aji tiadenipi: “Nahatoquiri inani. Ibodi ssiaja tani” tiquinadsapi ipaji onajaro. Najaro ssiajanipi occa imassa nejeradsapi ssiajani ticajimana-jerajaro. Dsidsini oppina taniccadsana timadimanajaropaji, onajaro. ³⁶ Naraha tibodidenidsa Dio ssiejene ijidsapi, aji dsidsinicca ima oba tanicca tibodideni

tecahuamana-jeradsapi, otahimari Diocca ima tibodidenidsa ahuato tanissa tanitohui. Pina jojororo ssiejene tiadenidsa tossiajabaqqui-jarissa nahitohui –najari Jeso.

**Pariseodeni, jodiodenicca
marinaja maridedeni
tedseje huahuattajo
toquejenahicca ima**

Mateo 23.1-36; Maraco 12.38-40;

Roca 20.45-47

³⁷Jesopa madija mari icana-baqquia jicadsapa marinaja pariseodsa jehe najari ojaria Jesodsa huati tajari: –Occa odsahuaji tijipanijine ticcajonaji –najari. Nadsapa Jeso najaricca odsadsa toqquedsimajari. Jipahijine huahuanaridsa huittarijari. ³⁸Nadsapa pariseopa pohua dsepe ssahua najari, –*Oppina tahicca bara onahitide –nadsa. Nama nama quiquinanajari marinaja onini pariseodsa jehe quinajarideni huapima. Naraha Jesopa pohua dsepe ssahuarahi huittaridsa pariseo qqui tadsapa huajo najari. ³⁹Naraha pohuadsa Jeso huati tajari: –*Marinaja pariseodsa jehe tiquinajaro, ticcadeni madiepi pina dsedse, parato huapihuajira ssahua ssahua tiquina-jarissa najaro. Naraha tibodidenina pina dsedse parato bodihuaji ssahuarahi oba tajarissa tiquinajaro. Tibodidenidsa tibotimanajarocca ima ijijaro. Tohuini tiquinajarrocca ima naqui ijijaro. ⁴⁰¡Ssamocquiri tiquinani! Diopa essire nemanehé inahatojaro. Puhuapa ¿ibodi nahato tajaraco? Ibodi nahato tahi. ⁴¹Nema nadsapi ticcadeni tabaccorehe tinebomanaji, tibodideni tohuirenijine. Nadsapi maidsehedsa dsiniro

denima tiadenidsa totoja nejera-nijine. Madija tohuati nahanacquiri najarideni naco acco acco titicana-baqquimana najo. Nadsana ticcadeni madie naqui tobicanitohui, onajaro.

⁴²–Jaho, marinaja pariseodsa jehe tiquinajaro, tiadenipi huahuattajo tiquejenanitohui. Ticcadeni odsa inorinicca ppa nahi dsamatapa quequejema majo bica tajari pore tiquinadsa naco badsira taraha *mota Diodsa da da titiquina najari. Najaro ticcadeni marinaja ajimanicaraha tecahuamanissa tajaro. Naraha Diocca dosseniji deni tojaniccapi tecahuamana-jerajaro. Diocca dosseniji deni tojaniccapi madija ticamaidsabaqquimana-jaradsa tettideni pajiranissa tanijine. Diodsa naqui tetideni huanaquiritanijine. Jehe, najaro dosseniji tecahuamana-jeradsapi ticcadeni ima dsori tajaro. Aji ticcadeni odsa inorinicca ppa nahi mota Diodsa da da titiquina najari bica tahi naraha najaro dosseniji ajimanicca aji Diocca dosseniji deni tojanicca tadsajani tecahuamanaji, onajaro.

⁴³–Jaho, marinaja pariseodsa jehe tiquinajaro, tiadenipi huahuattajo tiquejenanitohui. Ticcadeni Dio Atti mamarihuaji jassi tinarinijinepi deni toquejenaridenicca huihuittari tohuini titiquina najaro. Aji dadahuajicca jahuidsajai tajaridsadsa naqui madija tiadenidsa: “¿Nija, bica tinani? Tiapi deni tijani” quinahijine naqui tohuini titiquina najaro.

⁴⁴–Jaho, tiadenipi huahuattajo tiquejenanitohui. Tiadenipi pina madija ppa todsahibote noccobiri tohuatorajarossa tiquinajaro.

Madijapa najaro tonocobiri tetepihuaji jai tojequimadsapa madija nahidsa ppa todsaraha ssamoqquiri nahi. Nama quina-dsapa ima *oppina tanicca pohuadenidsa tojajaro. Madija tiadeni qqui toquinadsapa pina bicaquiri tiquinajarossa naraha tibodidenicca tabaccorehepi ssamoqquiri najari –najari Jeso.

⁴⁵Naraha jodiodenicca marinaja maride ojaría Jesodsa huati tajari: –Mamaride, tetti nema nadsapi iadsa naqui ima tinahanajaro –najari.

⁴⁶Naraha Jesoa: –Jehe, jodiodenicca marinaja maridedeni tiadeni naqui huahuattajo tiquejenanitohui. Tettidenipi: “Diocca dossenijidsa ajima tiquinaji” tiquinaraha ticcadeni marinaja najo taniccará tinaharimanajaro. Nadsapi tijinedeni ima toccanajani najaro. Najaro imapi madija ecahuamananjine pajirama-jarahi. Tiadeni naqui najaro ima madija ecahuamananjine acco ticamabaquimana-jarahi.

⁴⁷ –Jaho, tiadenipi huahuattajo tiquejenanitohui. Tiadenipi Dio Atti cacomeraquiri napojarideni noccobirideni tetepidsa siba hua tinamaro-manajaro, “Poccadeni ima bica tade, eti ajima-jerana” tiquinadsa. Naraha najaridenipa ticcadeni ididenijine jicaridsajari. ⁴⁸Pohuadeni noccobiri tetepidsa siba hua tinamaromandsapi pina ticcadeni ididenicca imadsa jehe tiquinajarossa najaro. Pohuadenijine Dio Atti cacomeraquiri najarideni jicaridsajari. Tijinedenina pohuadeni noccobirideni nahatoridsajaro.

⁴⁹ –Nadsama Diopa Pohua bodi nahato tapodsapa ajama

najari: “Madijadenidsa Ohuatti cacomeraquiri najarideni dosse onabaquihitohui. Occa dodosse tabaqqi naco pohuadenidsa dosse onabaquihitohui. Naraha motapa inajicamanahitohui. Motana jicahijine itaqquidso-ridsamanahitohui” napohui nade Dio. ⁵⁰Nadsama aji jidapana timadimanajaropi tiadenidsa najidsohue imeni ssonarinitohui. Aja dsama inahatopodsama Pohua Atti cacomeraquiri najarideni tojicadsa emenedeni toccajaro manaconedeni tiadenidsa ssonarinitohui. ⁵¹Aja tahidepa Abeona pohua ohuahajine dsoqqepojari. Najari emene toccapodsama aja Dio Atti cacomeraquiri najarideni naco inajicamanaja najonapohui najaria aja Sacaria inanadsoqqe-manahi bacco najonajaropaji. Sacariapa Diosda dada toquima bacconihuaji aji Diodsa da tahijinecca huahuanari inorinidsa inanadsoqqe-manajaripaja. Jehe, pajissara tiadenidsa huati onajaro: Aja Dio Atti cacomeraquiri najarideni huapima jicajonajari manaconedeni jidapana timadimanajarodenidsa Djojine najidsohue ssonarinitohui.

⁵² –Jodiodenicca marinaja maridedeni tiadeni naqui huahuattajo tiquejenanitohui. Dio Atti madija mari ticanabaquimanahissa tadsapa madija Dio Atti tocatterahijineraha. Dio Atti mari ticanabaquimanahissa tajaradsa, ticcadeni marinaja najo tanicca tinaharimanadsa naqui tijinedeni madija Dio Atti tocattera-jarajari. Nema tiquinadsapi pina Diocca cacahuehecca noccobiji ticahacossamanajarossa najaro. Nadsapa madija Diocca cacahuehdsá jai

tojedsima-jarajari. Tiadeni naqui pocca cacahuehdsas jai tijedsima-jerajaro –najari Jeso.

⁵³ Jesopa poccadeni ima huati taha jicadsapa najaro odsadsa toqquenadsa toccajari. Naraha jodiodenicca marinaja maridedeni pariseodeni tedsejepa poccadeni ima acconi huatideni jamimanajari. Nadsapa najaro huadadsa Jesocca ima tossamonijine ima idimamandasa huada huajjiradsa pohuadsa ima onihidsa huati, ima onihidsa huati dsanapomanajari. ⁵⁴ Jeso ima bica tejeranica ecomeranjine tohuini quinadsa pohuadsa huati huati dsanapomanajari. Pohuadsa ima inassonarimananjine disseraqquri naraha Jesopa ima pajirani-sa taniccara ehecomera najaro.

–Paji, pariseodenicca imassa tinanamana-jeraji –najari Jeso

Mateo 10.26-27

12 ¹ Isaraeri potemahi jodiodeni mota *marinaja pariseodsa jehe quinajaridenipa Jesocca marinaja inassamomananjine disseraqquri naraha madija Jeso pocca marinajatohui queri-qquidsapa denima tohuapi, denima tohuapi najari. Madija panahicca tohuapihi dsanapodsapa pohuadeni amori ahuaji ttai, ahuaji ttai quinajari. Naraha nahidsa Jesopa pocca dodosse tabaqquidsana tahide huati tapojari: –Pariseodeni mamaidsamana najari. “Dio Atti cacahuade iquejanani” quinarahs poccadeni marinaja Moisesicca marinajadsa inaharimanajaro. Poccadeni madie naqui Dio Attissa nejerani. Poccadeni ima najimehecca caji tani. Najaro

poccadeni marinaja, poccadeni madie maidsehecca totojaribacqui najaro. Pina *pan ssaja tahijine quequejemacca imassa najaro. Paji, poccadeni imassa tinanamana-jeranjine dacoco tijiraji. ² Nadsama madija huapima poccadeni maidsehecca imapi inajimanaraha nidsa dsotodepi ahuato tanitohui. Ima ahuatora tanicca huapimapi ahuatomanitohui. Aji ima bicani ahuatora tanidsa inamanajaro, aji ima bica tejeranica ahuatora tanidsa inamanajaro naqui ahuato tanitohui. ³ Nadsama dsome ima huati huati tiquinadsa naqui nidsa dsotodepi ssajanidsana ticcadeni imapi ahuato tanitohui. Odsa coba canahuajanini bodidsa ima ojidsa huati huati tiquinadsa naqui dsotodepi amossinihuajina madija huapima mittamanahijine ticcadeni ima madija ohuahana jadsirema ecomeramanitohui, onajaro –najari Jeso.

–¿Nejecojaridsara ticappinamananjine?
–najari Jeso

Mateo 10.28-31

⁴ –Nadsama otesседeni, ohuatti tecomeraridsamanandsa ticcadeni madiepi pina occa marinajassa tinamanandsapi madija ohuahadenipa tiadenidsa: “Jicana, jicana” quiquinandsapa ticappinamana tejerana. Madijapa tiadenidsa: “Jicana” quinadsapa timedeni jicanjine pajiramanaraha tijicani nattinipi tiadeni tonajidso-bacqui-pomahijine ssamoqquri nahi. Aji jororoni jiquejeranihuaji tiadeni hua todsimabaqquihijinepa ssamoqquri nahi. Nadsama tiadenipi

pohuadenidsa ticappinamana-jeraji, onajaro. ⁵Naraha Diodsana ticappinamanaji. Puhuapa: “Tijicaji” nadsapa tijicanitohui. Najarina tijicani nattini naco tiadeni tonajidso-baqquihijine nahato tajari. Puhuapa aji jororoni jique-jeranihuaji tiadeni hua todsima-baqquihijine naco nahato tajari. Madijadsapi ticappinamana tejeraji naraha Diodsana ticappinamanaji, onajaro –najari Jeso.

⁶⁻⁷ –Diopa madija huapimacca ima nahato tajari. Aji titati-deni conani huapima onini huade naco nahato tajari. Diopa dsama huapimacca cacahuade nahato tajari. Ajina: “Ppiriri mitta onana” tiquinadsapi ppiriri da da quina-hihuaji dsiniro bedenidsa ppiriri mitta mitta titiquina najari. Ppiriri 5 nahapa ccarara capamehedsa mitta mitta titiquina najari. Naraha ppiriripa huati ccarera tahiccaraha Diopa ppiriri naco ecahuabaqquijari. Ppiriri naco pohua dsoqqe-hicca huada bacco tejeraccadsapi dsoqqe-jaraccahi. Nadsama tiadenipi ticappinamana tejeraji, onajaro. Ppiriripa ajamani toque-jenaraha Diopa pohuadeni ecahuabaqquijari. Naraha Diopa tiadenidsana denima huati huana tajari. Tiadeni tohuacahua-baqquihissa tahitohui, onajaro –najari Jeso.

**Madija ohuahadeni
mittamanahijine: –Ohuapi
Jesocca ojani –quinajarideni
tahimarideni**

Mateo 10.32-33; 12.32; 10.19-20

⁸ –Nadsama ohuapi tiadenidsa huati onajaro: Madija ojariapa madija ohuaha mittamanahijine

pohua cacomeradsa: “Ohuapi Jesocca madija ojani” nadsapa manaco ohuapi Madija Bedi ojajaroa Diocca dodosse tabaqqi memehuajicca mittamanahijine pohuadenidsa ohuacomeranitohui: “Ajajari madijapa occa madija tojahi” onanitohui. ⁹Naraha madijapa madija ohuaha mittamanahijine pohua cacomeradsa: “Ohuapi Jesocca madija ojajarani” nadsapa manaco ohuapi Diocca dodosse tabaqqi memehuajicca mittamanahijine ohuacomeranitohui: “Najaripa occa madija jarahi” onanitohui –najari Jeso.

¹⁰ –Aji ohua Madija Bedi ojajaro-dsa madija atti atti quinadsa ohua itamassomanaraha nidsa dsotode: “Icca ima inebona” quinadsapa poccadeni imasiri, poccadeni tamassohue Diodsa ecomeramanadsa Diopa poccadeni imasiri epeje inananitohui. Naraha Dio Corime itamassomanadsa, pohuajine tojajarodsa maidsehe huahua quinadsa naco Diopa pohuadeni atti huati ajama-jarahitohui. Poccadeni imasiri epeje inana-jeranitohui.

¹¹ –Naraha jodiodenipa nidsa otahimari tiadenidsa tojajaro acconi huadimanadsapa poccadeni Dio Atti mamarihuaji tiadeni tohuaqqe-dsimabaqqi-manahitohui. Tiadeni tonajidso-baqquimanahijine ima cacattemededenihuaji, taminedenihuaji naqui tiadeni tohuaqqe-dsima-baqquimanadsapa ticcadeni ima tecomeramananijine ¿nejecoma onapadseje? tiquinejerana. Occa marinaja tecomeramananijine naqui ticappinamana tejerana. ¹²Nani pohuadeni tedsejema terimanadsa huati tiquinanijinepi Dio Corimena

tiadeni tonahattabaquihitohui,
onajaro – najari Jeso.

–Paji, tidsepetaji tohuapinjine
tohuira tibodideni huato-
jeraji – najari Jeso

¹³Nadsapa aja madija panahicca ojaría Jesodsa huati tajari: –Mamaride, occa atodsa huati tinaji. Aja occa abi *dsoqqejari dsepetajibote mota ohuadsa pohuadsa nanijine. Occa atodsaha ojari nani – najari. ¹⁴Naraha manaco Jeso attipa: –Otesse, ohuapi ticca abi dsoqqejari dsepetajibote ticca atodsa, tiadsa nanijine cacahuade ojajerani – najari Jeso pohuadsa.

¹⁵Nadsapa Jeso huapimadsa huati tajari: –Paji, todsepetaji acconi tedimana tejeraji. Tibodideni tecahuamanaji, aji tidsepedeni tossenijine tohuira tibodideni huato-jeraji. Najaro tidsepetaji huemadsa tetidsemanehe timadimanani ojari-jerani. Diotohuira timadimananina bica tajaro – najari Jeso.

¹⁶Nadsapa Jeso pohuadenidsa ajjaro namidsa imadinicca ima huati tajari: –Madija dsepe sse tajari nami bicani cajidsapa pocca huidsajacca porede toquejenadsapa huemahi pore pore quiquinanajari. Aroso jidsadsa trigo mota totoja najari. ¹⁷Nadsapa dsepe sse tajari bodipa: “¿Nejecoma onanijine? Occa huidsajacca trigo mota cacahuahijine odsa onihí occapirani” najari. ¹⁸Nadsapa pohua bodi huatojari: “Jehe jidapanana nahato onani. Occa trigo huadsaridsajaricca odsara otaboridsadsa denima ojine odsa motaraqquiri naridsana. Nani najarodsana occa trigo, aja

huapima ocajjaricca ohuacahuaridsahijine” najari. ¹⁹Pohua bodidsa naco: “Nadsapi aji ohua otahimari huati onanijine: Jehe, jidapapi sse onani. Huajano huapi taha omadinijine opajirani. Jehe, nadsapi pina jassi onana. Pina ojipa, dse onajaro ohuatidseri ohuatidseri naridsana, onanitohui” najari. ²⁰Naraha Diopa pohuadsa huati tajari: “Tiapi ssamo tinani. Ajjaro dsomedsa tidsoqqenitohui” najari. “Aja tidsepetaji, aja huidsajacca bonoma tecahuaridsajaripa tidsoqqedsapi ¿tiadsa nama dsanapopadsaja? ¡Nohuerahí! Tidsepetajipa madija ohuahadsana tojaridsahitohui” najari Dio. ²¹Imapi nema najaro madija pohua tonanabichijine todsepetaji inehemaraha Diodsapa pina cappirajarissa najari, Diodsa huatidse-jaradsa – najari Jeso.

**Dio pocca ejedeni
ecahuabaquijari**

Mateo 6.25-34

²²Nadsapa Jeso pocca dodosse tabaqqidsa huati tajari: –Tiadenidsa ohuattipi: Timadimananijinecca ticappiramanani noppineni ticappinamana tejeraji, onajaro. Pina ¿nejecora ojipapadseje? ¿Nejecora ohuedsapadseje? tiquinejeraji. Najarotohuipi tibodideni huahuatomacca nejerana, onajaro. ²³Ícca madiepi dsamatapaha ojari-jarahi. Ícca madiena denima bica tajaro. Essire naqui etero edsanijinea ojari-jerani. Essirecca imana denima bica tajaro – najari Jeso. ²⁴–Jari, tosiccoca imadsa tibodideni huatomamanaji. Tosicopi huidsajacca ppa nahi pperaquiri, huidsajacca ppa

nahi bono poreraquiri nadsapi nidsa dsotode jipamananijine ppa nahi bono naco odsadsa ecahuamana-jarajari. Naraha Diona ponidenidsa jipamananijine da da ihinanajari. Diopa tosicodeni-dsa huati huana taraha tiadenidsana denima huati huana tajari. Tiadenidsa naco tijipamananijinecca da da ihinanahitohui. ²⁵Naraha tiadenipi ¿nejecotohui tibodideni: ¿Denima omadi-dsanapopadseje? tiquinajaro? Najarotohui tibodideni huahuatomacca nadsapi ¿ticcadeni madie denima tinanamananijine nahatoqquiri tiquinaqui? ¡Nahatoqquiri tiquinejerani! ²⁶Najaro nahatohue ssamoqquiri tiquinarahaha Diodsapi najora tani. Nadsama ¿nejecotohui ima onihitohui, ima onihitohui tibodideni huahuatoma najaro? Pina Dio tiadeni tohuacahuabaquui-jarajarissa najari. Naraha “Jehe, Diona nahato tahi ia cacahuabaquuihitohui” tiquinana, onajaro.

²⁷ – Jari, qqui tiquinanaja mohue ppata taridsajari. Naraha mohuepa tarabaidsera, huepe picocora, etero ssequiquira taraha ppata taridsadsapa pina etero bicani huedsamanajarissa najari. Ajana maittaccadsama naco Isaraeri potemahidenicca tamine Saromopa dsepe ssejide radsapa etero bicani huatini ccara tanicca huedsadsapa bica tataja naraha mohuena denima bicaqquiri najari. ²⁸ ¡Jaho, ticcadeni jehenijipi badsira tani! ¿Nejecotohui tiadenipi “Dio ia tohuacahua-baquuihi” tiquinejerani? Ajina, dseropi etero huedsanijine cappiraraha Diojine poni mohueni cajidsapi pina etero

bicani huedsajarossa nani. Dseropi mohueni cajini bica taraha huada huada huada nadsa dsequeri nadsapi botta ina tani. Naraha dseropi ajimanicca. Tiadenipi pina aji dserossa tiquinejerani, Diocca cacatidse tabaqqi tiquejenajaro. Nadsama Diopa tedsamananijinecca etero naqui denima tiadenidsa da inanitohui, onajaro. ²⁹Naraha tiadenipi ticappinamaneri naridsajeraji. “¿Nejecora ojipapadseje? ¿Nejeco dsamatapa ppejenera dse onapadsaja?” tiquinejerana, onajaro. ³⁰ Ajijaro dsamacca madija Diodsa toquejena-jarajarideni huapimapa nama nama nanaridsamana najari. Poccadeni jijipa tohuira pohuadeni dsepetaji tohuira bodideni huahuatoma-mana najari. Naraha tiadenipi Abi bicahi ticajimanani. Puhuapa ticappiramananicca huapima nanahato najari. ³¹ Diocca cacahuehecca imadsa tibodideni huatomaridsanijine Diotohuira tataridsamana naji. Nema tiquinadsana Diojine ticappiramananicca tiadenidsa inanaridsanitohui, onajaro – najari Jeso.

– **Memehuaji Dio madihidsa
ima bicanira tinahapimanana**

– **najari Jeso**

Mateo 6.19-21

³² – Nadsama tiadenipi occa edede, occa cacachua tabaqqi tiquejenajaropi ticappinamana tejeraji. Aji tiadeni ohuacahuabaquuijaropi tipamema naraha occa Abipa tiadenidsa: “Aji occa cacahuehepi tiadenidsa onanajaro” najari. ³³ Nadsama ohuatti tiadenidsa ajima najaro: Tidsepedenitaji manaconitohui da tinaridsamanaji.

Najaro manaconi dsiniropi madija cappiramanajaridenidsa da tina-baqqui-ridsamanaji. Aji tidsepe-denitaji, dsiniro naqui ¿nejecodsara tecahuamanadsa ticajimana-dsanaponijine? ¿Aji dsiniro dsamini totabaccorarera tanicca caji taqui? Nohuerani. Naraha cappira-manajaridenidsa da tinabaqqui-ridsa-manajaropi pina memehuaji aja Dio madihidsana ima bicani tiadenidsa tinahapimanapojarossa najaro. Najaropi Diocca daniji bicabote jiquejeranicca tiadenidsa da inanitohui. Najaro Dio pocca danijidsapa bobotide botihijine nohuerahitohui, poni maccanijine naqui ssari nanijine nohuerani.

³⁴ Ajina, tiadenipi ajijaro namicca todsepetaji tohui, dsiniro tohuira timadimaneje nadsapi najarodsara tetidseridsamanajaro. Naraha Dio Pohua tohuini nahicca tohuira timadimanadsapi Diocca danijidsana tetidsemananitohui, onajaro –najari Jeso.

Ia Medsede ccanipomahitohui inajorehe imadinijinecca ima

Mateo 24.43-44

³⁵⁻³⁶ Jesopa pohua ccaronapomahitohui najoramanahijine mari icanabaqquijari. Pohua attipa: –Tiadenipi tinajoramanaji, pina madija pohuadeni medsede caji-cajicca ejetehuaji toccadsa “dsome bacco nanihitohui” quinadsa poccadeni etero huedsamana, jorororo iquehessimana nadsa najoramana-jarissa tiquinaji, onajaro. Ajana pocca dodosse tabaqqui pohuatohui najoramanadsa bacco nanidsapa noccobijidsa coba coba nadsa amadsati icatabojidsamananitohui.

³⁷⁻³⁸ Dsome nocconi bacco nanihitide, ssiajajonadsa itide ssamoqquri naraha noccodeni bissadsa pohuadeni medsede bacco nanidsapa pohuadenipa ima bicani cajimanahitohui. Pajissara tiadenidsa huati onajaro: Pohuadeni medsede pohuadenidsa huatidse-dsapa: “Huahuanaridsa jassi tahuajaniji” nahitohui. Nadsapa jipamanahijine pohuana taparideni dsojo dsojo nahitohui, pina poccadeni dodossessa nahijine.

³⁹ –Nadsama tiadenipi ajijaro imadsa tibodideni huatoji: Odsa jinedepa bobotide ccajonahijinecca maji nahato tapodsapa pocca odsadsa botide qquedsima-jarahijine pocca odsa ecahuanissa tanitohuiraha ssamo taja najari. ⁴⁰ Naraha tiadenipi tinajoramanehe timadimanaji. Madijapa ohua Madija Bedi ojajaroa occaronapomanicca huada ssamoqquri nahi. Nidsa huatideni ajamama canadsa bacco onanipomanitohui –najari Jeso.

Madijacca dodosse ibora tadsapa ima bicani cajihitohui, tabaccora tadsapa nanajidso tojahitohui

Mateo 24.45-51

⁴¹ Nadsapa Pedro huati tajari: –Ia Maride ¿aji titohui inajorehe imadinijinecca ima huati huati tinajaropi iadsaha ojarinijinequi? ¿Madija huapimadsarane? –najari.

⁴²⁻⁴³ Nadsapa Jeso pohuadenidsa ima onih huati tajari: –Madija dsepe ssebotepa huaji tani toccahijine najoradsapa pocca dodosse ojariadsa huati tajari: “Occa madija tecahuabaqquina. Jipamanahijine bacco tadsa pohuadeni tapari da da

titinabaqqui nana” najari. Nadsapa dsepe ssebote toccajari.

–Nadsapa pocca dodosse nahato tadsa, ibora tadsapa madija ecahuabaqquihissa tahitohui, pina pohua dossede attissa inananitohui. Nama nadsapa dsepe ssebote ccanidsa qqui tadsapa pocca dodossedsa ima bicani inananitohui. ⁴⁴Nadsapi pajissara tiadenidsa huati onajaro: Madija dsepe ssebote pa pocca dodosse ibora tajaridsa ajama nahitohui: “Tiapi occa odsa, occa huidsaja, odseptajaji huapima tecahuaji” nahitohui –najari Jeso.

⁴⁵ –Naraha dsepe ssebotecca dodosse tabaccora tadsapa pohua dossede attissa inana-jeranitohui. Pohua bodi attipa: “Ohua dossede ccanihijine najoccahi, qqui tajarahi” nahitohui. Nadsapa pohua dossedecca dodosse tabaqqui maquideje inajidsobaqqui, amoneje inajidsobaqqui nahitohui. Jipadera ccaridsadsa coma tanicca dse dse naridsadsapa comani ahahua nahitohui. ⁴⁶Pocca dodosse tabaccorabotepa pohua dossede ccanihicca maji, huada ssamo tadsa pohuatohui najora-jarajari. Nama nanaridsa nanaja dsepe ssebote bacco nanidsapa pocca dodosse inajidsohuitohui. Dsoqquedsapa iboqquri najaridenihuaji inananitohui –najari Jeso.

⁴⁷ –Jehe madijapa pohua dossede atti nahato taraha pohua attissa inananijine ibo tadsapa nanajidso inahananitohui. ⁴⁸Naraha madija ohuahapa pohua dossede atti ssamo tadsapa pohuajine bica tejera dsapi cossi cossi inebo nahitohui. Jehe, Dio naco madijadsa dosse dosse najari. Pocca dossenijissa

inanadsana bica tani. Diopa iadsa: “Occa madija tecahuabaqquina” nadsa pocca madija ecahuabaqquihissa tadsana bica tani –najari Jeso.

Jesojinepa madija pohuadenira pohuadenira naridsamanajari

Mateo 10.34-36

⁴⁹ –Nadsama ajijaro namidsa occaronajaropi pina dsippo diji tajarossa onanadsa madija huapimadsa ssonariridsanijine. Nidsa imasiri manaconi ojanijinepi Diocca najidsohue madijadsa ssonariridsanitohui. Jaho, najaro ima jidapana ohuadsa toja naccaraho, onajaro.

⁵⁰ Aji ohua imasiri manaconi ojanijinepi najidsohue imeni onahanaccanitohui. Najaro imapi nahato onaraha najaro ima ohuadsa toja-jeraccadsapi aji nacassera onajaropaji. ⁵¹Tiadenipi tibodideni: “Jehe, Jesopa ajijaro namidsa jonehe tojaridsanijine ccajonajari” ¿tiquinajaroqui? Naraha ohuapi najarotohui occajona-jerani. Madija motapa ohuadsa jehe quinajari, madija motapa ohuadsa jehe quinaradsapa pohuadenira pohuadenira naridsamanahitohui. ⁵²Aja jidapana naco odsa cajariecca madija 5 quinajari pamahapa pohuadenira, huatimade tojari najaripa pohuadenira quinajari. Nama quinararipa cahadire cahadire naha nama dsanapomanahitohui.

⁵³ Nadsama ojine madija pohuadenira pohuadenira quinadsapa ajima nanitohui: Dsabissoa imehidsa huahuadi nahitohui. Imehipa bedidsa huahuadi nahitohui. Imenipi bedenidsa huahuadi nanitohui. Bedeni naqui imenidsa

huahuadi nanitohui. Massodinipi jinomadinidsa huahuadi nanitohui. Jinomadini naqui massodinidsa huahuadi nanitohui –najari Jeso.

**Meme qquide nahatoqquri
naraha pohuadenidsa
ima dsati tojani qquide
ssamoqquri najari**

Mateo 16.1-4; Maraco 8.11-13

⁵⁴Jesopa madija huapimadsa ima denima huati huati tajari: –Maji toccahihuaji meme essen caji tani qqui tiquinadsapi: “Passo cabote nani” titiquina najaro. Nadsapi nema neneje najaro. ⁵⁵Dsama napicossanihuajicca jojode jojo najonani qqui tiquinadsa naqui: “Icca dsamadsa ppororanitohui” titiquina najaro. Nadsapi nema neneje najaro. ⁵⁶Jaho, tiadenipi pina *maidsajidede rabotedenissa tiquinajaro. Meme qquide nahatoqquri, nami qquide nahatoqquri tiquinaraha aji jidapanacca ima dsati toजारोपी qquide ssamoqquri tiquinani. Najaropi Diojine ajijaro dsamadsa Cristo-Mesia pohua dsepe ijiridsahi tiadenidsa ahuaato taraha ticahattera-jerajaro –najari Jeso.

**Aja tia huadidepa huati
tinassonapona nanicca ima**

Mateo 5.25-26

⁵⁷–¿Nejecotohui tiadenipi ima bica taniccara ticattejidsamana-jerajaro? –najari Jeso. ⁵⁸–Nadsama madija ohuahadsa ima tinanadsa naqui pohua attpa: “Tia ohuaccana ima cacattemahuaji” nadsa naco tahide tia tohuacca-jaraccadsama pohua tedseje ticcadeni ima ticattemamanapoji. Pohua huati tinassonapojo, nahi taminehuaji

tia tohuacca-jarahijine. Ticca ima ticattemamanapo-jeradsapi ima cacattemahuaji bacco tinadsapi ima tinanajaro manaconi todsepe tjanitohui. Toponi cocorohuaji tia coroidsimamananitohui. ⁵⁹Tiadsa huati onajaro. Nani toponi cocorohuaji timadidsapi amadsati tiqquena-jeranitohui. Ima tinanajaro manaconi nemaneha tinajicanissa tadsana tiqqunenitohui –najari Jeso.

**Tibodideni cacajiquimera-
jeradsapi tijcaridsanitohui**

13 ¹Jeso mari mari naraha madija jahijonaridenia aja tamine Pirato dsama Carireacca madija inajicajaricca ima Jesodsa huati toquinajari: –Carireacca madijapa Jerosarehuaji Diodsa dada toqquimadsa poccadeni da naqquinaja iaqquedsimamanajari. Bani ette tojahicca Diodsa da quinahijine ssiporti huisside toquejenaraha tamine Piratocca dodosse tabaqquideni bacco todsimamanadsapa ijinedeni ahuanamanajari. Pohuadenijine bani bedi dade toquejenajari emenedeni bani bedi emene tedseje quejemajaro –quinajari Jesodsa.

²Naraha manaco Jeso pohuadenidsa huati tajari: –Tettidenipi: “Carireacca madijapa imasiri sseqquri nadsa oppina tanidsa jicajari” ¿tiquinajaroqui? Aja “Carireacca madija motapa imasiri badsira tehe cajimanadsapa pohuadenidsa ima oppina tehe bacco nejerajaro” tiquinanitidija. ³Naraha imapi nema nejerani. Tiadeni huapima Dio Attidsa ibobo tinadsa tibodideni cacajiquimera-jeradsapi *dsoqqehe jiquejericca bacco tiquinanitohui –najari Jeso.

4 –Ima onihi naqui ajima najaro: Jerosaredsa passojine hui todsani onini Siroe inorinidsa siba hua nahuajanijaro tirocossadsa madija 18 naha jicajari. Najaridenidsa naqui tettidenipi: “Imasiri sseqquiri nadsa oppina tanidsa jicajari” ¿tiquinajaroqui? Aja “Jerosarecca madija motapa imasiri badsira tehe cajimanadsapa pohuadenidsa ima oppina tehe bacco nejerajaro” tiquinanitudija. ⁵Naraha imapi nema nejerani. Tiadeni Dio Attidsa ibobo tinadsa tibodideni cacajiquimera-jeradsapi dsoqqeche jiquejericca bacco tiquinanitohui –najari Jeso.

**Ahua iquiera bono-
jarahicca ima**

⁶Jesopa ajijaro namidsa imadinicca imadsa mari icanabaqqujari, madijadeni bodi cacajiquimera-jeradsapa jicahi noppine bodideni huatohujine. Pohua attipa: –Maqquideje ojariapa pocca huidsajadsa ahua iquiera ppa todsahi huajari. “Nanihuaji occana, ahua iquiera bono cajihitide” najari. Naraha nahihuaji bacco tadsapa bono cahua najarajari. ⁷Nadsapa huidsaja cacahuadedsa huati tajari: “Huajano tahideccadsa qquide occajona, huajano dsotodeccadsa qquide occajona, jidapana naqui qquide occajona naraha bono qqui onajaraha. ¡Ca tinajo! Pohuama nahidsa hua dsanapona onejerani” najari. ⁸Naraha huidsaja cacahuadepa manaco huidsaja jinedsada huati tajari: “Ohua medsede, ca inajaraccana. Ajari huajano-dsa jabohuaji hui onahuajani-dsa ahua huahuassa tadsajani

ocanejemahijine” najari. ⁹“Nama onanadsa bonohitudija. Naraha bono-jaradsana ca tahijine” najari huidsaja cacahuade –najari Jeso.

**Jesopa jassinajacca
huadadsa amoneje ideni
jocadsajaro inanomijaro**

¹⁰Nadsama dsotodepa jassinajacca huadadsa Jesopa Dio Atti mamarihuaji toqquedsimadsapa madija mari icanabaqqujari. ¹¹Nanidsa naqui amoneje coma tajaro qquedsimajaro. Satanacca dodosse tocorimejine poni ideni jocadsajaro. Huanissa tanijine ssamo tani. Huajano 18 naha nema najonajaro. ¹²Naneje Jeso qqui inadsapi poni ccajonanijine huahua najari. Bacco nadsapi: –Asi, ticca dsamacoma tomossini –najari Jeso.

¹³Nadsapa pohua dsepedsa bara inadsa amadsati ideni tobicajaro. Nadsa huanissa tadsapi huatidsedsa Diodsa jiri jiri najaro: –Jehe, Tiapi bica tinani, bica tinani –najaro Diodsa. ¹⁴Naraha Jeso jassinajacca huadadsa madija inanomidsapa Dio Atti mamaricca tamine jipera tajari. Aja jodiodenipa: –Jassinajacca huadadsa madija dsepedeni ijimanahijinepa *oppina tani –quiquinanajari. Nadsapa Dio Atti mamaricca taminepa huadi tadsa madija queriquimanajaridenidsa huati tajari: –Huada 6 nehe idsepe ijini bica tani. Najaro huada 6 nehe ticanomirenijine jai tijedsimaji. Naraha jassinajacca huadadsa toponi totonanomidetohui jai tijedsima tejeraji ¡poni! –najari Dio Atti mamaricca tamine atti. Pohua atti nama nadsapa Jesodsa ima inanajaro. Jassinajacca huadadsa

madija inanomibaquidsapa pina pohua dsepe ijjarissa najari.

¹⁵Naraha Jeso taminedenidsa huati tajari: –¡Mamaidsadedeni, ponima huati tiquinajaro! ¿Jari, tiadeni naqui ticcadeni bohui, ticcadeni bojo, ticcadeni odsadsa ssoque ssoque dsaneri naridsadsapa jassinajacca huadara-ra madone dicca tiquinadsa passo dse quinahijine passohuaji joca joca titiquina nejeraqui? Najaropi jassinajacca huadadsa tidsepedeni ijimana tani. Naraha: “Najaropi icca bohui nomiqqiri nahijine, oppinera tani” titiquina najaro –najari Jeso. ¹⁶–Nadsapi jassinajacca huadadsa ticcadeni bohui tecahuabaquidsapa aji amoneje jassinajacca huadadsa onanomidsa naqui oppinera tani. Ponipi Abarahao potemahije najaro pina tiadenissa naraha ponipi huajano 18 nehe tabacorehe jinede Satana-jine ideni siri tojehe madijaro. Ponipi huajano huapi tahi coma tajaro. Satanapa pina poni ssoque idsanajarossa najaro. Nadsama jassinajacca huadadsaraha ponipi Satana ssoque idsanaraha tappa inanijine bica tani, onajaro. ¿Naraha tiadenidsapi bica tejeraqui? –najari Jeso Dio Atti mamaricca taminedenidsa huati tajari.

¹⁷Ima nema najaro huati tadsapa pohuadsa huadiqqiri najarideni cappinamanajari. Naraha madija motapa amoneje tonomini qqi toquinadsa Jesocca nahatohue bicani, deni tojanicca qqi toquinadsapa huatidsemanajari.

Jesopa mostaza noccocca ima tadsajani mari icanabaquijari

Mateo 13.31-32; Maraco 4.30-32

¹⁸Nadsama najaro ima jicadsa Jeso attipa: –Tibodideni

huatomanaji. ¿Nejecoma najarona paji Diocca cacahuehe? Aji Diocca cacahuehe tahimarini timittamana-nijinepi ajijaro namidsa imadinicca ima onihidsa tiadeni mari ocana-baqquina –najari Jeso madijadenidsa huati tadsa. ¹⁹–Diocca cacahuehepi pina *mostaza noccossa najaro. Mostaza noccopa potera taraha madija huadsajadsa ppa idsadsa napidsapa pina ahua imehissa najari. Motaradsapa pohua inine-dsa ppiriri pohuadeti tadsari bina tarimana tahi. Jehe, Diocca cacahuehecca ima mari ocanaquijari-pina najaro imassa najaro. Tahidepi madija pamahadsa tojapojaro. Dsotodena madija huapimadsa tojaridsadsapi Diocca cacahuehedsa madija tohuapihitohui –najari Jeso.

Jesopa pan ssaja tahijine quequejemacca ima tadsajani mari icanabaquijari

Mateo 13.33

²⁰Jeso huati tapomajari: –Aji, Diocca cacahuehecca ima timittamananijine ima onihi tadsajani tiadenidsa huati onana. ²¹Diocca cacahuehepi pina pan ssaja tahijinecca imassa najaro. Amonejepi pan inahatohuijinepa *pan ssaja tahijine quequejema oni levadura aja trigo ria nahidsa ijine icanejemajari. Ssaja tahijine quequejema badsira taraha trigo ria nahi harina 3 kilopa motarajari. Naraha ssaja tahijine quequejema trigo ria nahi harinadsa tojaribaquidsapa ssaja tajari. Aji Diocca cacahuehecca ima naqui najaro imassa najaro. Tahidepa madija pamaraha dsotodena Diocca cacahuehecca ima dsama huapimadsa tojaribaquidsa

madija huapimadsa tojaridsajaro
– najari Jeso.

**Noccobiji tohuabaccadsa
jai tijedsimanijine
tinajomana tejeraji**

Mateo 7.13-14, 21-23

²²Nadsama Jesopa Jerosarehuaji pocca benehidsa toccadsapa odsa panani onihidsa, onihidsa mari icana-baqqiija dsanapohui najari. ²³Madija mari icanabaquidsapa nahicca madija ojaria pohua bodi huatodsa Jesodsa huati tajari: – Ohua Medsede ¿madija tocassiejerahijine naco ipama najaroqui? – najari Jesodsa.

Nadsapa Jeso atti huapimadsa: ²⁴–Dacoco tijiraji. Noccobiji tojera tanihuaji jai tijedsimanijinepi tinajomana tejeraji. Aji occa imadsa jehe tiquinanijine Diocca cacahueheda tiquejenanijine naqui tinajomana tejeraji. Tiadenidsa ohuattipi ajima onajaro: Nidsa dsotodepi madija huapi taha: “Jaijedsimana, Jesodsa iquejenana” quinahitohuiraha ohuadsa toquejenahijine pajirama-jarahitohui, onajaro. ²⁵Tahide ohuadsa jai tijedsima-jeradsapi nidsa dsotodepa odsa jinede najoradsa totehemama, noccobiji ecossani nadsapi jai tijedsimanijine ssamo tanitohui. Nadsapi amossinidsa tidomo huadsa noccobijidsa coba coba tiquinadsa odsa jinededsa: “Noccobiji iadsa ticatabojidsaji” tiquinaraha pohuapa: “Tiadenipi ¿nejecohuajicca tiquejenani?” nahitohui tiadenidsa. ²⁶Nadsapi ima huati ticadsanamananitohui: “Nadsa timadidsama ia qqui tinabaqquide. Tiadsa ijpaqquidsa oca tanna naqui dse inada. Icca odsa boronidsa naqui ia mari ticana-baqquide” tiquinanitohui, onajaro.

²⁷Naraha odsa jinedepa manaco tiadenidsa huati tahitohui: “Naraha ohuapi jai tijajonanihuaji ssamo onani. Tiadenipi jidsaqquri tiquinani” nahitohui. “Imasiri ticajimanadsapi ohuadsa timadimana-jeraji. ¡Ajicca jai tijaji!” nahitohui, onajaro.

²⁸–Nadsapi Diocca cacahueheda huati tinadsa ticattomama canadsapi ticcadeni idideni Abarahao, Isahaca, *Jacobodenipa, aja Dio Atti cacomeraqquri najarideni tedseje, huapima nahidsa madimanahi qqui tinabaquimanaraha tiadenipi huahuattajo tiquejenanitohui. Tiadenipi ocasserani temanadsanapodsapi tipanodeni todsani nadsa oji oji tiquinanitohui. ²⁹Nadsapa dsama nemanehedsa madiridsamanajarideni naco Diocca cacahuehehuaji jahijonana canahitohui. Motapa Isaraerideni quejena-jararaha ohuadsa pajissa quinajarideni naco jahijonana canahitohui. Dio pocca cacahueheda queriquimanadsapa pocca jipaqqueicca ejete imenidsa huahuanaridsa jassi nahuajanihitohui. ³⁰Nadsapa madija mota ajijaro dsamadsa madimanaccadsapa Dio Atti cajimanapojari. Naraha najarideni arobedeni motapa Diocca cacahueheda toquejena-jarahitohui. Madija ohuaha naco ajijaro dsamadsa madimanaccajaridenipa Dio Atti cajimanapo-jarajari. Naraha dsotodena Dio Atti pohuadenidsa bacco tadsa pohuadeni motapa Diocca cacahueheda toquejenahitohui – najari Jeso.

**Jesopa Jerosarecca madijatohui
oji oji najari**

Mateo 23.37-39

³¹Jeso huati huati taja naraha jodiideni marinaja onini pariseodsa

jehe quinajarideni bacco najona-
manadsa pohuadsa huati toquina-
jari: –Ajidsapi timadi tejeraji.
¡Ajicca ticcaji! Tamine Herodepa:
“Tia onanadsoqueña” nahi
–quinajari Jesodsa.

³²Naraha manaco Jeso pohua-
denidsa pohua cacomerajari:
–Najari dsomaji huadibotedsa
huati tiquinaji: “Jeso attipa ajama
nahi” tiquinana. “Tibodi huatoji.
Jidapana, dsemassa naqui, madija
bodidenicca tocorime dosse
onineridsa-baqquihitohui, madija
tocanomirehijine. Comaqquri
najarideni naco onanomibaqqui-
hijine. Huada onihidsana odsepe
jicanitohui. Najarotohui occarona-
jarode nadija” tiquinana Herodedsa
–najari Jeso. ³³ –Nema nehe nani
occanitohui. Occa imapi najora-
pode. Jidapanapi ajidsa odsepe
ijiccani. Dsemassana denima occa-
nitohui. Huada ssiajapi denima
occapomanitohui. Huada onihi-
ccadsa naqui nema odsanapojaroa
Jerosare bacco onanitohui. Aja Dio
Atti cacomeraqquri najarideni naco
Jerosarehuajina jijicamana najari.
Odsa onihihuaji odsoqquenijinepi
bica tejerani –najari Jeso.

³⁴Nadsama Jesopa odsa panani
*Jerosarehuaji madimanajarideni-
cca ima huati tajari: –Ohuapi
titohuideni oji oji onadsapi: “Jero-
sare, Jerosare” ohonanajaro.
Maittaccadsama ticcadeni idideni
madimanapodsa naco Dio Atti
cacomeraqquri najarideni inana-
dsoqqe-ridsamanaja najona-
pohui najari. Diopa pocca dodosse
tabaqqi tiadenidsa dosse dosse ina-
jonabaqquiporaha sibadsa tiquina-
baqquimanaja najonapohui najari.

Naraha ohuapi tiadeni ohuacahua-
baqquina, onajaro. Pina tacara
poni bedi poni appani dopanidsa
ecahuabaqquijarissa onanijine-
raha tiadenipi ohuadsa jiperaqquri
tiquinajaro. ³⁵Tetideni huatoji.
Diopa tidsamarideni Jerosare inebo-
nitohui. Tiadeni tohuacahuabaqqui-
jarahitohui. Ohua naqui ohua qqui
timanimanapoma-jeraccanitohui.
Nidsaranibote ima najoranissa
tadsa occanipomadsana ohua qqui
tiquinapomanitohui. Nadsana tetti-
denipi: “Jehe, ajaripa Dio onima
ccaronajari. Pohuapa bica tahi, bica
tahi” tiquinanitohui –najari Jeso.

Jesopa madija jitemarajari inanomijari

14 ¹Jassinajacca huadadsa
Jesopa pariseodeni tamine-
cca odsahuaji jipade toccajari.
Nahidsapa pariseo ohuahadeni naco
jipamanajari. Pohuadenipa Jeso
inocodsamanajari: –Nidsa pocca
ima dsori tadsapi pohuadsa ima
inassonariniijine –quinajari. ²Nahi
Jeso tedsejemapa madija jitemaro-
dsa coma tajari qquedsimajari.
³Nadsapa Jeso najari qqui tadsapa
pariseodenidsa, jodiodenicca
marinaja maridedenidsa naco huati
tajari: –Jari, Moisesicca marinaja-
dsa, icca madijacca marinajadsa
naqui jassinajacca huadadsa madija
coma tajari inanomihipa “Oppinera
tani” ¿tiquinaqui? “*Oppina tani”
¿tiquinajarorane? –najari Jeso.

⁴Naraha pohuadenipa joma
quinajari. Nadsapa Jeso madija
coma tajari bara inadsa tonomijari.
Nadsapa: –Ticcianiji –najari pohua-
dsa. ⁵Nadsapa Jeso pariseodenidsa
huati tapomajari: –Jari, tiadenipi

jassinajacca huadadsa idsepe iji-nijine “oppina tani” tiquinaraha pina ticcadeni ejedeni itide, ticcadeni bohui itide passojine hui todsanidsa tossonippadsapa ¿joca timoranimana-jaraco? Naraha coma tajari onanomijaripa pina najaro imassa najaroa – najari Jeso.

⁶Naraha pariseodeni, jodiodenicca marinaja maridedeni Jesodsa ima inassonarimananjine tohuini quinadsapa pohuadeni cacomanajari.

**Jipaquiedsa
jahidsimajaridenicca ima**

⁷Nadsapa nahi pariseodenicca taminecca odsadsa jipaquimana-hijinepa deni toquejenajaridenicca huihuittari bica tanicca tohui icattejidsaridsa-manajaro. Pohuadeni bodipa: –Jehe, ohuana bica onani –quinahicca ima ahuato tanijine deni toquejenajaridenicca huihuittaridsa jassi tarijari. Nama naridsamanahi Jeso qqui tadsapa pohuadeni mari icanabaquijari, ajijaro namidsa imadinicca imadsa.

⁸ –Jari, tiadenidsa huati onana, timittamananjine –najari. –Madijapa pina cacajirehijinecca jipaquie tojabote nadsapa tiadenidsa huahua nadsa jai tija tani. Naraha nanihuaji jai tijedsimadsa jassi tinarinjine huihuittari deni toquejenajaridenicca huihuittaridsa huittarimana tejeraji. Deni toquejenajaridenicca huihuittaridsa tittarimanadsapi nidsa dsotode madija tiadenidsa deni tojajari bacco nahitide. ⁹Nadsapa odsa jinede tiadsa huati tahitohui: “Ticca huihuittaridsapa ajararina huittarina” nahitidija. Nadsa tibodi

cappinadsapi ajamani toquejenajaridenicca huihuittaridsa tittarirana, onajaro. ¹⁰Naraha ticca ima bica tanijinepi madija pohuadsa tijipanijine titohui huahua nadsa aja ajamani toquejenajaridenihuaji tittarinina bica tani. Nadsapa odsa jinede tia qqui tadsa: “A, otesse, denima bica tanihuaji tittariji” nahitohui. Nadsama aja huapima jassi nahuajanjarideni qqui toquinadsapa odsa jinede denima bica tanihuaji tia dosse tahitohui. Nadsapa: “Jehe, pohuapa denima bica tajari” quinahitohui tiadsa. ¹¹Najaro imadsana Diocca cacahuehecca madie ticahatteranjine. Madijapa: “Ohuapi deni ojani” nadsa Diopa najari ajamani inanahitohui. Naraha madijapa: “Epejena, ajimani ojani naqui bica tani” nadsapa najarina Dio deni inanahitohui –najari Jeso.

¹²Jesopa marinaja onini pariseodsas jehe quinajaridenicca tamine Jeso pohuadsa jipahijine huahua najaridsa huati tajari: –Jehe, madija tiadsa jipaquimanahijine jipa tinadsapi titessedenitohui, timecotedenitohui, ticca madijatohui huahua tejerana. Tinocco jidsera tarjaridenitohui, dsiniro ssequiri najaridenitohui, najaridenitohuipi huahua tejerana. Manaco pohuadenipa tijipanijine tiadsa huahua quinahitohui. Nadsapi pohuadenidsa ima bicani tinanajaro manaconi ticajini. ¹³Naraha madija tiadsa jipaquimanahijine jipa tinadsapi aja madija cappirajarideni, madija siri toquejenajarideni, aja madija isso sirideni, madija nocco sirideni, nama najaridenitohuira huahua tana. ¹⁴Nema tadsapi tibodi tetidsenitohui. Pohuadenipa manaco

tiadsa jipaqqie inahatomana-nijine pajiramana-jarahi, ssamo-qquiri najari. Naraha nidsa Diopa pocca madija inahatonibaquidsana manaco Pohuana tiadsa ima bicani inananitohui –najari Jeso.

Jesopa jipaqqie imenicca ima tadsajani mari icanabaquijari

Mateo 22.1-14

¹⁵Nadsapa nahidsa jipade jassi tarijarideni ojaria Jesocca marinaja mittadsapa Jesodsa huati tajari: –Nidsa Diocca cacahueheda madija toquejenadsa Diocca jipaqquinaja imenidsa jipamanadsapa Dio pohuadenidsa ima bicani inananitohui –najari.

¹⁶Naraha Jesopa pocca marinaja ajijaro namidsa imadinicca ima tadsajani pohuadsa huati tajari: –Jehe, madija dsepe sse tajaria: “Jipaqqie imeni onahatona” nadsapa madija huapi taha huahua inabaquijari. ¹⁷Jijipa najoradsapa jipaqqie jinede pohua tessedenitohui pocca dodosse dosse inajari, pohua tessedenidsa: “Ohua medsede atti: ‘Jijipa najorahi, jai tijajonaji’ napaja” nahijine.

¹⁸ –Nadsapa pohua tessedenidsa huatide ccaridsaraha “Idsepe ijini” naridsamanajari. Pohuama huati toquinajari. Tahidecca attipa: “Ohuapi huadsaja tojanijine dsama mitta onajaro, najaro qquide occa-bote nani. Tia medsedecca jipaqquedsa occanijine opajira-gerani. Epejena, otohui timadi tejeraji” najari. ¹⁹Nadsapa jipaqqie jinedecca dodosse madija ohuahadsa naco huati taraha najari naco: “Odsepe ijini. Occa bohui mitta odsati 10 quinajari ojine papamacosseri nadsa

occa huadsajacca nami boto nanijine nattome onabaquiccana, onajaro.

Tia medsedecca jipaqqietohui occanitohuiraha odsepe ijini” najari.

²⁰Nadsa huahua inapojari ohuahadsa naco huati taraha najari naco: “Ohuapi oqqejerani. Tia medsedecca huati tinana: Aji ohuapi amoneje ocajidsatije najaro. Epeje, ticca jipaqquedsa oqquedsima-gerani” najari.

²¹ –Nadsapa jipaqqie jinedecca dodosse toccanijari, poccadeni ima huapima huati tanijari. Jipaqqie jinedepa najaro ima mittadsa huadijari. Pocca dodossedsa huati tajari: “Nema nehe huassinaja odsa panani-huaji ticcaji. Nanihuajicca jahui onihi onihicca madijatohui qqui taridsaji. Aja dsinero cappiramanajarideni, madija siri toquejenajarideni, pina isso siri tojajari, nocco siri tojajari najari-deni ahuaji teccanibaquijo” najari.

²²Nadsapa dsotode pocca dodosse madija huapima eccanibaquijari. Jipaqqie jinedecca huati tajari: “Jehe ohua medsede, tettissa onanaraha ticca odsapi cajinissa tejeraccani” najari. ²³Nadsapa jipaqqie jinede huati tapomajari: “Jari, jahui onihi odsa panani inidihuajicca jahui ticcaridsaji. Madija ohuahadeni teccanibaquijo, jahidsimahijine. Occa odsa cajinijine, onajaro” najari. ²⁴“Aja madija huahua onabaquipojaridenipa occa jipaqquedsa jai tojedsima-jarahitohui. Occa jijipa ecatamanajarahitohui” najari jipaqqie jinede –najari Jeso, Diocca cacahuehecca ima mari icanabaquidsa.

– Occa madija tiquejenanijine ajima tiquinana –najari Jeso

²⁵Nadsapa Jeso pocca benehidsa toccadsapa madija huapi taha

pohuadsa jai tojamissajari. Nadsapa Jeso cattahuajanihi nadsa pohuadenidsa huati tajari: ²⁶ –Madijapa ohuadsa tojahijine tohuini naraha pohuapa pocca madijadsana denima huati huana tadsa, ohuadsapa ajamani huati huana tadsapa najaripa occa tojahijine pajira-jarahi. Madijapa pocca abi, pocca ami, pocca amoneje, pocca ejedenideni naco, pocca ato naco, pocca asi naqui, pocca esodeni naco, ojari itide, huapi tahitide, ima onihi pina ohuattissa nejeranicca pohuadsa huati toquinadsa pohuadeni attidsana ibora tadsapa occa madija tojahijine pajira-jarahi. Occa madijapa ohuattidsana iboraqquri najari. Madija naco pohua pocca madiesa denima huati huana tadsapa ohuadsa ajamani huati huana tajari. Pina ohuattissa inana-jeradsapi occa madija tojahijine pajira-jarahi. ²⁷Madija ohuadsa dissera tajaradsapa occa madija tojahijine pajira-jarahi. Occa madija tojahijinepa otahimarijine ocasserani inahanaraha nema nehe otahimaridsara dissera tajari. Pohuadsa: “Ahua porimacossanidsa tia inandsoqquena” quinadsa naco pohua attipa: “Epejena odsoqquena. Jeso onebo-jarahi” nadsapa najarina occa madija tojajari –najari Jeso.

²⁸ Jeso denima huati huati tajari: –Jehe, occa dodosse tabaqqi tiquejenanijinepi ponima “Jesocca ojana” tiquinejerana. Tahidepi tibidideni huato-mananissa tapoji. Pina ajijaro imassa najaro: Tettidenipi: “Odsa imeni nami macconi botta tanidsa ocanahatona” tiquinadsapi ¿nejecoma titiquinapo najaro? Jehe, tahidepi: “Odsa manaconipi

ajima nanitide” titiquinapo najaro. Nadsapi: “Occa odsa cajicanissa tanijine ¿occa dsiniro pajirapadseje?” titiquinapo najaro.

²⁹ Naraha tahidepi ticca odsa canahatonijine manaconi nattome tapo-jeradsapi dopanihuajicca nami macconi botta tani hua inariridsamanajarodsara ticca dsiniro jicacqunitidija. Najarods dsiniro jicadsapi ticca odsa cajica-jeranitohui. Nadsapi madija huapimatia jaja icanaquimananitohui.

³⁰ Attidenipa: “Ajajari madijapa odsa icanahatoraha cajicanissa tanijine ssamo tajari” quinahitohui –najari Jeso.

³¹ –Nadsama ima onihipi ajima najaro: Tamine pamaha dsama onihicca dsama onihicca tedseje cahadirehijine poccadeni soldado tedseje najoraridsamanajari. Tamine ojariapa pocca soldado 10 mil naha cajijari, naraha tamine ohuahaccapa denima huapi tajari, 20 mil naha cajijari. Nadsapa aja soldado 10 mil naha cajjaripa aja tamine soldado 20 mil naha cajijari tedseje bacco tocanire-jaradsama ¿pohua bodipa nejecoma napopadsaja? Jehe, pohua bodi huatopohuitohui: “Ohuapi aja tamine soldado 20 mil naha cajijari tedseje icahadiredsapi ¿deni ojapadseje? ¿deni ojajerapadseje?” nahitohui najari tamine. ³² Nadsama: “Occa soldado 10 mil nadsapa deni ojajeranitohui” nadsapa aja tamine soldado 20 mil cajijari jahijonahi huaji taccadsama pohuadsa ima dosse inajaro: “Icahadire-jerana. Ijicarana. ¿Nejecora tiadenidsa da inadsa icajoneranijine?” nahitohui –najari Jeso.

³³ – Jehe, ima najarossa najaroca tiadeni naqui occa madija tiquejenanijine tahide tibodideni huato-mananissa tapoji, onajaro. “¿Jesocca ojadsapu huapima oneboridsanijine opajirapadseje?” tiquinaji. Aji ticajimanajarocca huapima tinebomananijine iboqquri tiquinadsapi occa madija tiquejenanijine tipajiramanajeranitohui –najari Jeso.

Saho tahimarini

Mateo 5.13; Maraco 9.50

³⁴ – Nadsama sahopi bica tani. Banidsa coro idsippadsapi ajibo tajaro. Aba jadsi-jarahijine naco sahosda huira inajari. Naraha saho ajiboni tomossidsapi tomajidera tani, icca bani naco totabaccora tahi. Ajibo tapomanijine ssamo tani. Saho ajiboni tomossidsapi ponima tojajaro. ³⁵ Namidsa huira inadsapi sahojine icca ppa nahi moro tajarahi. Ahua huassa tajaridsa quejemadsa naqui sahojinepi ppa nahi moro tajarahi. Nadsama saho ponima tojadsapi nebojaro. Najaro imapi pina tiadeni naqui ajijaro dsamacca madijadsa ima bicani tinanamanaridsajaro. Nema tidsanapomanana. Nema tinanamana-jeradsapi ticcadeni jeheniji ponima tojarana. Nadsama teribodeni ticajimanadsapi ohuatti timittamananissa taji –najari Jeso.

Edede amossi najari tahimari

Mateo 18.12-14

15 ¹ Nadsapa aja romanodeni-cca taminecca dosseniji dsiniro nanaccadedeni, imasiri sseqquri najarideni tedsejepa: –Jesocca marinaja imittana –quinadsa Jesohuaji jahijonajari. ² Naraha

jodiodeni mota marinaja pariseocsa jehe quinajarideni, jodiodeni-cca marinaja maridedeni tedsejepa aja imasiri sseqquri najaridenidsa Jeso quejemahi qqui toquinadsapa jiperaqquri najari. Nadsapa atti atti quinajari: –Ajana, ajajari madijapa imasiri sseqquri najaridenidsa nija nahi taji. Pohuadeni tedseje naco jipajari. Naraha iapi pohuadeni tedseje ijipanijinepi *oppina tani, inajaro –quinajari.

³ Naraha manaco Jeso pohuadenidsa ajijaro namidsa imadinicca ima tadsajani mari icanabaqqujari. ⁴ Pohua attipa: –Jari, tiadenipi ticcadeni edede 100 naha ticajimanadsapa onideni hua tiquinadsa ojaría amossi nadsapa ¿pohuatohui qquide jai tija-jeraqui? Jehe, edede jinedepa pocca edede qquide toccahitohui. Pocca edede 100 naha cajiraha ojaría amossi nadsapa 99 tojajari. Pocca edede 99 naha huamonihuaji inebobaqquidsapa ojaría amossi najari qquide toccajari. Nadsapa qqui qqui naridsanajapa pocca edede bacco inanijari. ⁵ Bacco inanidsapa pohua mattodsa ibari nanijari. Nadsapa huatidsenijari. ⁶ Nadsapa odsa bacco nanidsapa pohua tessetohui huahua najari: “¿Occa edede amossi najaripa bacco onanihi! ¿Occa odsahuaji jai tijajonaji, etidsenijine!” najari. ⁷ Nadsama pajissara tiadenidsa huati onajaro: Najarossa najaro madija imasiri sseqquri najaridenipa pina edede jano tojadsa amossi najarissa quinajari. Naraha ojaría: “Diodsa ojanijine, occa ima onebona” nadsapa Diopa pocca dodosse tabaqqi memehuajicca tedseje huatidsemana tahi. Aja madija

tahide Diodsa toquejenapojari-
denicca imadsa naco memehuaji-
ccapa huatidsemana tahi. Naraha
aja madija Diodsa tojedsatidsapa
denima huatidsemana tahi
–najari Jeso.

**Amoneje ponicca dsiniro
amossi cananica ima**

⁸Nadsapa ima onihi naqui huati
tajari: –Amonejepi dsiniro ccarara
10 nehe cajiraha ponicca dsiniro
cajarie amossi canadsapi ¿quide
dissera tejeraku? Dissera tajaro.
Jojororo iquehessidsa ponicca
odsadsa johue naridsajaro. Poni-
cca dsinirotohui mohuaradsa qqui
naridsanissa tajaro. ⁹Bacco icana-
nidsapi poni tassanitohui, poni
inoriniccatohui huahua najaro:
“¡Ohuadsa tetidsemanaji! Occa
dsiniro amossi canaraha bacco
ocananini” najaro –najari Jeso.
¹⁰ –Nadsama ohuapi tiadenidsa
huati onana: Najarossa najaroa
madija imasiri sse tajaripa: “Dio-
dsa ojanijine, occa ima onebona”
nadsapa Dio pocca dodosse
tabaqqi tedseje huatidsemana
tahi –najari Jeso.

**Madija pohua bedi
jano tojaraha bacco
nanipomahicca ima**

¹¹Jesopa *dsoqqejari dsepe-
tajibotecca imadsa huati huati
najari: –Madijapa pohua bedi
pamajari. ¹²Dsotodeccapa imehidsa
huati tajari: “Abi, tidsepetaji, ticca
dsiniro, ticca dsama huapima nidsa
tidsoquedsapi icca tojanijine tade.
Nadsapi aji occapi tidsoque-jera-
ccadsama ohuadsa arobeni da taji”
najari. Nadsapa imehi pohua bedi

pamahadsa pohua dsepetaji, pocca
dsama icanaroberidsadsa pohua-
denidsa da inaridsajaro. ¹³Naraha
huada onihidsapa pocca abicca
daniji aji dsama cajidsati, pohua
dsepetaji cajidsati naqui dsiniro-
tohui da inaridsajaro. Nadsapa
dsiniroma dsama huaji tanihuaji
toccajari. Nadsapa dsama huaji
tanicca odsa bacco tadsapa ejete-
tohui, dsodsobitohui, amonejetohui
naridsajari.

¹⁴ –Nadsapa pocca dsiniro
nemanehe inajicajaro. Naraha najari
huajanodsapa pemi naqui tojaridsa-
jaro. Dsamatapa naco bonoridsa-
jarajari. Nadsapa dsabisso pemijari.
¹⁵Tarabaidساتohui nahihuajicca
madijadsa huati tajari. Nahihuaji-
cca madija pohuadsa: “Occa poroco
tecahuabaqqiijo” nadsa pocca
poroco madimanahihuaji dosse
inajari. (Naraha dsabissopa jodioja
nadsa poroco cacahuade pohuadsa
ocassera taraha nama naha poroco
ecahuajari.) ¹⁶Pohuadsa dsama-
tapa da quina-jaradsa pemidsapa:
“Poroco tapari ojipa naccaraho”
nanaja naraha poroco tapari pina
imissa najaro naqui pohuadsa da
quinehe nejerani.

¹⁷ –Nadsapa bodi huatomajari:
“Occa abicca odsadsapa tatara-
baidadedeni caji taraha pohua-
denidsa dsamatapa mota totoja
nade. Naraha ohuapi ajihuaji pemi,
ohuatiabote nani” najari pohua
bodi. ¹⁸Nadsapa pohua bodi huato-
dsapa: “A, occa abicca odsahuaji
occanina. Bacco onanidsapi pohua-
dsa occa ima huati onanijine: Abi,
ojine ima tabaccora tani Diodsa.
Tiadsa naqui ojine ima tabaccora
tani, onanijine” najari pohua

bodidsa. ¹⁹“Nadsama: Abi jidapapi ohuadsa: ‘Occa ejedeni’ tejeraji. Tiapi bica tinaraha ojinepi ima bica tejerani, onanitohui. Naraha jidapapi ticca dodosse ojanijine ¿jipa tinaqui? onanitohui” najari pohua bodidsa.

²⁰ –Nadsapa pocca abihuaji toccanijari. Toccanijari... bacco tani-bote nadsa pocca abipa huaji taraha pocca ejedeni ccanihi qqui tajari. Qqui tadsapa pocca ejedenidsa huati huana taja najari. Joppa tojidsajari, dama, icahuajocossa, pano mose inajari. ²¹Naraha bedi attipa: “Abi, ojine ima tabaccora tani Diodsa. Tiadsa naqui ojine ima tabaccora tani. Abi, jidapapi ohuadsa: ‘Occa ejedeni’ tejeraji. Tiapi bica tinaraha ojinepi ima bica tejerani” najari imehidsa.

²² –Naraha pocca abipa bedi atti mittaraha pina mitterahi najari. Pocca dodosse tabaqquidsana huati tajari: “¡Huassinaja occa ejedeni etero bicanidsa tinehedsamanajo! ¡Todsepecca naqui dsepe tinahana-manajo, amoricca naco tinehedsamanajo!” najari. ²³“Bohui napidsati oqui tajari naco teccanimanadsa tidamanajo, ijpaqquinijine” najari. ²⁴“Etidsenijine bica tani. Occa ejedeni pina dsoqqejarissa naraha madinipomahi. Puhuapa pina jano tojararissa naraha bacco nanipomahi” najari. Nadsapa pocca odsacca huapima huatidsemanajari.

²⁵ –Naraha pohua bedi tahideccapa huidsajahuaji dsepe ijidsa ccaninaja odsa huajiranidsa mittajari. Tire tire camaja, tore tore



camaja najari, pocca abicca odsadsa dsodsobi tojajaro. ²⁶Naraha pohuapa pocca abicca medsetohui huahua najari. Ccajonadsapa pohuadsa huati tajari: “¿Nejecotohui icca odsadsa ejete tojajaro?” najari.

²⁷Naraha imehicca medsepa pohuadsa huati tajari: “Timecote bacco nanijari. Nomi, bica taha ccanidsa ticca abi bohui bedi oquibote inana-dsoqquejari” najari.

²⁸ –Naraha pohuapa jamijari.

Odsahuaji toqquedsimanide jipera tadsapa pocca abina qquenajari. Qquenadsapa bedidsa huati huati tajari, toqquedsimanihijine.

²⁹Naraha manaco imehidsa huati tajari: “Ohuapi tiadsa huajano huapi taha odsepe ijijaro. Ticca dosseniji aji jipa tinajarocca ohuadsa dosse dosse tajarossa onanaraha ohuadsa bani ette tojahi da taha najarahi, otessedeni tedseje ohua naqui ohuatidsenijineraha” najari imehidsa. “Bani huati ccarera tahicca pina edede jidsadsa cabra bedi naco ohuadsa da taha najarahi, otessedeni tedseje ijipaquinijineraha.

³⁰Naraha ticca ejedeni aja ticca dsiniro ponima amoneje pehiquiri najarodenidsa inajicajaro pohuadsana bohui bedi oquibote tinana-dsoqquejari” najari imehidsa.

³¹ –Nadsapa manaco imehi pohuadsa huati tajari: “Ato, tiapi ohuadsa timadi-dsanapojaro. Odsepetaji, occa huidsaja, occa bani ette tojahi, occa odsa najari huapimapa ticca” najari. ³² “Naraha jidapapi ijipaquidsa etidsenijine bica tani. Ticca eso dsoqquejarissa naraha jidapapa ima dsatidsa madinihi. Pohuapa jano tojaraha qqui imanihi” najari pohua bedidsa –najari Jeso.

Madijapa pohua dossedecca dsiniro ecahuaraha ponima inajicajaro

16 ¹Nadsapa Jeso pocca dodosse tabaqquidsa ajijaro namidsa imadinicca ima onihidsa huati tajari: –Jehe, madija dsepe ssebotepa pohua cajjaricca huapima pohua biji accode ojaría ecahuajaro. Naraha pohua biji accodepa pohua pohuajine pocca cacahuehe tossamojaro. Nadsapa madija ohuahadenia dsepe ssebotedsa huati toquinajari: “Tibiji accodepa ticca dsiniro ponima inajicajaro” quinajari. ²Nadsapa dsepe ssebote pohua biji accodedsa huahua nadsa huati icanajari: “Nija, ticca ima ohuadsa huati toquinajari. Ponima occa dsiniro tinajicani quinahi ima omittani. ¿Ticca cacahuehe nejecoma tinanajaro? Ohuadsa ticca cacahuehecca dsodonani huapima tinajoradsa ohuadsa da taniji, onajaro. Nadsama tiapi denima tecahuaji onejerani” najari pohuadsa.

³ –Nadsapa aja pohua biji accodepa pohua ehuerahi bodi huatojari: “Jidapapi ¿nejecoma onapadseje? Ohua dossede ohuadsa jipera tadsapa odsepe ijinihine nohueradsapi ocappiranitohui” najari. “Huidsaja ppa onanijinepi opajira-jerani. Madijadenicca dsiniro manaconi jirehe mitta onanijine naqui cappina onani. ⁴Pina ajima onana. Ohua dossede-dsa debe quinajaridenicca debe ajimani onanaridsana. Nadsana ohuadsa huatidsemanadsa nidsa tarabadsa ocappiradsapi aji ima onajorapojarojine ohuadsa: ‘Aji occa

odsadsa timadiji' quinahitohui"
najari pohua bodidsa.

⁵ –Nadsapa pohua dossededsa debe quinajaridenitohui huahua najari. Ojaria huahua ccajona, ojaria huahua ccajona najari. Nadsapa tahide ccajonapojaridsa huati tajari: "Ohua dossededsa debe tani ¿nejecoma natte?" najari. ⁶Nadsapa huati tajari: "Ahua oribo bono oquine jorori imeni 100 nehe debe onajaridija" najari. Nadsapa dsepe ssebote biji accode attipa: "Aji ticca cuenta dsodo nani tiadsa da onanina. Ajidsa huassinaja tittaridsa ticca cuenta 50'ra dsodo taji" najari. ⁷Nadsapa dsotodeccadsa naco huati tajari: "Tia naqui ¿ohua dossededsa nejecoma nehe debe tajaritta?" najari. Naraha pohua attipa: "Aroso jidsadsa trigo saco 100 naha debe onajaridija" najari. Nadsapa pohuadsa huati tajari: "Aji ticca cuenta dsodo nani tiadsa da onanina. Ajidsa huassinaja tittaridsa 80'ra dsodo taji" najari. Nama nama najari debe quinajarideni huapimadsa.

⁸ –Naraha dsepe ssebotepa pohua biji accodejine pohuadsa debe quinajaridenicca debe ajimani inanaridsani ima mittadsapa pohua attia: "Jehe, obiji accodepa pohua tedsejemacca ima maidseheda najorapohuijine bodi nahato tajari" najari. Jehe imapi nema najaro. Madijapa pohuadeni tessedenidsa maidsamanahijine bodideni nanajoramanapo najari. Naraha Diocca madijapa pohuadeni tessedenidsa maidsamanahijine najoramana-pohuijine ssamoqquri nahi –najari Jeso.

⁹ –Tiadenidsa huati onajaro: Ajijaro namicca ticajimanajarocadsa madija

acco ticamabaquimanajo. Nema tiquinadsapi titedsedeni tohuapihitohui. Nidsa dsotode Dio madihihuajicca mamadi jiquejeraniccadsa timadimanadsapi ticcadeni accorehe manaconipi Dio pocca biquehena tiadenidsa inanaridsanitohui.

¹⁰ –Madijapa cacahuaniji badsira tehe ecahuadsa maidsa-jaradsapa nidsa dsotode cacahuaniji deni tojanicca ecahuanijine "Bica tahi" quinahitohui. Naraha cacahuaniji badsira tehe ecahuadsa maidsadsa dsapa cacahuaniji deni tojaniccadsa "Jehe pohua ecahuana" quina-jarahitohui. ¹¹Najarossa najaroa ajijaro namicca biquehe tecahuamanaraha maidsadsa tinadsa tijinedeni toccanissa tejeradsapi Diopa pocca biquehe pajissacca tiadenidsa: "Tecahuamanaji" najarahitohui. ¹²Madija ohuahacca dsiniro tecahuamananissa tejeradsapi ticcadeni dsiniro naqui tecahuamananissa tejeranitohui. Nema nadsapi ticcadeni dsiniro tiadenidsa da quina-jeranitohui.

¹³ –Nadsama tiadenipi tiadeni dossede pamahadsa tidsepedeni ijimananijinepi tipajiramana-jerani. Tiadeni dossede pamaha ticajimanadsapi ojariadsana tetideni huanaqquri najaro. Pohua attidsana iboraqquri tiquinanitohui. Ohuahadsapi ajimani tetideni huanaqquri nadsapi pina pohuadsa jiperaqquri tiquinajarossa nanitohui. Pohua attidsa ibobo tinanitohui.

–Diocca tiquejenadsapi dsinirocca dodosse tiquejenanijine ssamo tani. Dsinirotohuira tetidsemanadsapi Diodsa tetidsemananijine ssamo tani. Ima pamehepi Diotohui,

dsinirotohui, timadimananijinepi ssamo tani –najari Jeso.

¹⁴ Jeso maride tojadsa marinaja pariseodsa jehe quinajarideni naco nahidsa quejemamanadsa taharibobo canajari. Pohuadenipa dsinirodsana huatideni huanaququiri najari. Naraha Jeso atti nama nahi mittamanadsapa pohuadsa ssamoni huahua quinajari. ¹⁵ Nadsapa Jeso manaco pohuadenidsa huati tajari: –Tiadenipi madija noccodeni-dsa bicaququiri tiquinaraha Diopa tibodideni nahato tajari. Madija huapimapa tiadenidsa: “Bicaququiri nahi” quinaraha pajissa jerani. Ticcadeni madiedsapa Dio jipera tahi –najari Jeso.

**Diocca cacahuehecca ima
dsatina Moisesicca marinaja
inapajiranissa tajaro**

¹⁶ –Maittaccadsama Moisesicca marinaja nemaneha, Dio Atti cacomeraququiri najaridenicca dsodoniji naqui mari mari quinaja najonapohui najaria aja Huano Baotistapaja. Nadsana Diocca cacahuehecca ima bicani madijadsa tojanijine Huano Baotistapa tahide mari mari najonapojari. Jidapana ohua naqui maride nema onajonajaroa ajijaropaji. Naraha madijapa Diocca cacahuehecca imadsa jiperaququiri nadsa pohuadenijine najidsohue ssonari ssonari najonaraha nama naha madija Diocca cacahuehedsa totoquejena najaripaja.

¹⁷ –Ajina ¿meme, nami jicanijine najora taqui? Najo tani. Naraha Moisesicca marinaja jicanijinepi denima najo tani. Jicanijinepi ssamo tani. Dio Atti dsodo nanicca marinaja huapima pajiranissa

tanitohui. Tohuatti ojarie dsori teje cama-geranitohui.

¹⁸ –Naraha tiadenipi *Diocca dosseniji Moisesidsa huati tapo-jaricca imadsa madija mari ticana-baququiraha tijinedenia tojidsajaro. Diocca dosseniji pajissaccapi ajima najarona paji: Maququidejepa pocca amoneje inebodsa amoneje onihira icajidsapi imasiri inanajaro. Nama nadsapa Diocca dossenijipi ecahua-gerajaro. Madija ohuaha naco aji amoneje ponicca maququi inebojaro “Ocajina” nadsa icajidsapi imasiri inanajaro. Nama nahipa Diocca dosseniji ecahua-gerajaro –najari Jeso.

**Madija dsepe sse tajari Lasaro
tedseje tahimarideni**

¹⁹ Jesopa ima onihi huati huati tajari: –Madija dsepe sse tajaripa etero bicani huehuedsa najari. Huada huajjiradsa ejete ihinana najaro. Pohua tessedeni tedseje jijipa bica tahiccara jijipamana najari. ²⁰ Naraha madija tohuati nahana, huapi jadsimaro najaripa nahi dsepe ssebotecca noccobijidsa huihuitta najari. Pohua onipa Lasaro. ²¹ Dsepe sse tajaricca jijipa motatohui huihuitta najari. Pohua huapi jadsijarijine naco ette eno eno quiquinanajari. ²² Nadsapa tohuati nahana tajaripa dsoququejari. Dsoququedsapa Diocca dodosse tabaququi memehujicca iaccamacossanimanajari. Nahihujajipa Isaraeri potemahi jodiodeni huapimacca idi Abarahaohuaji bacco tajari. Nadsapa Abarahao tedseje memehujicca dsama bicanidsa madimanajari. Dsotode dsepe sse tajari naco dsoququedsa

ppa idsamanajari. Naraha pohuapa paja jicamanarijaridenihuaji bacco tajari.

²³ –Nadsama dsepe sse tajaripa paja jicamanarijaridenihuaji madidsapa ocasserani ahuajari. Nahihuaji madidsapa huaji taraha Lasaro Abarahao tedseje qqui inabaquijari. ²⁴Nadsapa Abarahao-dsa huahua najari: “¡Idi Abarahao, ohuadsa teti huana taji! Lasaro ohua acco camahijine pohua dsepe cote passodsa iquehedsippa nadsa dosse tajonajo, ohuebeno tonahuini nanijine. Ohuapi aji jororoni pporanidsa ocasserani ohuani” najari. ²⁵Naraha Abarahao pohuadsa huati tajari: “Neppe, teti huatomaji. Tahide namihuaji timadiponipi bicani tepode. Naraha Lasaropa ocasserehedsa madipode. Jidapapi Lasarodsa ima bicani tojajaro. Naraha tiapi ocasserani tinahanajaro” najari Abarahao dsepe ssebotedsa. ²⁶“Ima onihinaquiti timadi ia imadi nani nocconihuajipi cojojo imeni cahuajiquimanihuaji imadjarossa najaro. Aja imadinihuajicca madija tiadenihuaji bacco toquinahijine ssamo tani. Manaco nahihuajicca madija iahuaji bacco najonahijine ssamo tani. Nadsama Lasaro tiahuaaji dosse onahijine naco ssamo tani” najari Abarahao.

²⁷ –Naraha dsepe sse tajari huati tapomajari: “Idi Abarahao, Lasaro namihuaji dosse tinaronanijo, occa abicca odsahuaji ohuemecotedenidsa huati tahijine. ²⁸Nadsama ohuapi ohuemecote 5 quinaha ocajidija. Pohuadenidsa ohuatti Lasaro huati tanihijine: ‘Paji Diocca dossenijidsa iboququiri tiquinadsapi

nacasserehehuaji bacco tiquinaitohui’ nahijine pohuadenidsa” najari dsepe ssebote atti.

²⁹ –Naraha Abarahao huati tapomajari: “Dio Atti Moisesi dsodo inajaro, Dio Atti cacomeraququiri najarideni dsodo quinajaro naqui cajimanahi. Najaro ima mitta-manadsa bodideni cacajiquimera-manahijine pajiramanahi” najari. ³⁰Naraha dsepe ssebote attia: “Jehe idi Abarahao, najaro dsodo nani cajimanaraha najarodsa pajissa quina-jarajari. Naraha madija dsoquejari nahatonidsa pohuadenihuaji huatide toccanidsana pajissa quinahitohui, poccadeni imasiri inebomananijine” najari dsepe ssebote atti.

³¹ –Naraha Abarahao attia pohuadsa: “Dio Atti Moisesijine dsodo nani cajimana, Dio Atti cacomeraququiri najaridenijine dsodo nani naqui cajimana nahi. Najaro Dio Atti mittamana-jaradsapa aja madija dsoqqueraha nahatonijari attidsa naco mittamana-jarahitohui. Pajissa quina-jarahitohui” najari Abarahao atti –najari Jeso.

**Imasiri tinanadsapi
oppina tanihuaji
ticcanitohui**

Mateo 18.6-7, 21-22; Maraco 9.42

17 ¹Nadsapa Jeso pocca dodosse tabaquidsa huati tajari: –Aji namidsa timadimanageropi ima tinanamananijine caji tani. Paji, nema najarodsa imasiri tinanamana tani. Naraha madijajine imasiri tinanamanadsapi pohuadsa ima denima oppina tanicca ssonarinitohui. Madija nama najaripa Diona inajidsohuitohui. ²Nadsama

madija ojariajine ohuadsa jehe quinajari imasiri inanamandsapi pohuadsa najidsohue oppina tanicca ssonarinitohui. Ejedeni ohuadsa jehe quinajarideni naco madija imasiri mamaridejine imasiri tocahatteradsapa aja imasiri mamaride pohuadsa najidsohue oppina tanicca ssonarinitohui. Pina ajijaro imassa najaro: Siba ccanajabote pohua mattodsa ssoque dsanadsa passo imenihuaji je tahijine cco todsippadsapa oppina taraha najidsohue denima oppina tanicca pohuadsa ssonarinitohui. ³ ¡Paji! Tiadenipi tiadeni tecahuamananissa taji, imasiri tinanamana-geranijine –najari Jeso.

–Nadsama timecote ohuadsa jehe najari tiadsa imasiri inandapsapi manaco mohuaradsa pohua huati ticanajo: “Ohuadsa tijine ima bica tejerani” tana. Nadsapa pohua cacomeradsapa: “Jehe, tiadsa nema onade. Ojine bica tejerani. Jidapapi nema onapoma-geranitohui” nadsapa manaco pohuadsa: “Jehe, epejena, tiadsa ohuadi-gerani” tana, onajaro. ⁴ Nadsapa timecote ohuadsa jehe najari tiadsa tabacorehe inanajaro. Dsotode tiadsa imasiri inanapomajaro. Dsotode naqui tiadsa tabacorehe inanapomajaro. Nama dsanaporaha pocca imasiri jicani nattinipa pohua atti tiadsa: “Epeje, ojine tiadsa bica tejerani. Jidapapi nema onapoma-geranitohui” nadsapa manaco pohuadsa tetti: “Jehe, epejena, tiadsa ohuadi-gerani” taji, onajaro. Huada ojariedsa nama dsanapojari ⁷ nehe bacco taraha nema nehe pocca imasiridsa epeje tidsanapoji, onajaro –najari Jeso.

**Diodsa jehe inanissa
tadsapi ima najo taniccadsa
ipajiranissa tanijinecca ima**

⁵ Nadsapa Jesodsa pocca dodosse tabaqqupa huati toquinajari: –Ia Medsede, icca jeheniji Diodsa todacorani nanijine iadsa denima tinanaji –quinajari.

⁶ Nadsapa manaco ia Medsede pohuadenidsa huati tajari: –Ticcadeni jeheniji badsira tehe pina *mostaza nocco badsira tajarissa nehe ticajimanadsapi ssmo tanicca tinanamananjine tipajiramanoitohui. Pina ajijaro ahuadsa huati tiquinadsa: “Ahua, tia motta jeo tinadsa passo imeni inididsana tia ppa tidsana” tiquinadsapi ahua tettidenidsa ibora tanitohuiraha –najari Jeso.

**Diodsa idsepe ijie
jicanissa tadsapi –Deni
ijani –inejeranijine**

⁷ –Madijacca tatarabadsade tarabadsahuaji ccaccani nadsa pohua dossede attipa ¿nejecoma napadsaja? Pina huidsaja ppade ccanidsa, pina edede cacahuade ccanidsa nadsapa pohua dossede: “Jehe, ajidsa tittaridsa tijipaji” ¿napadsaja? Nama najarahitohui pocca tatarabadsadedsa. ⁸ Pohua dossede attipa ajama nahitidija: “Ohuadsa dsamatapa ppe tadsa, ojipanijine tinajoradsa jijipa hua tarijo. Nidsa ohuajari jicani nattinina manaco tijipanijine” nahitohui –najari Jeso. ⁹ –Nadsapa tatarabadsade pohua dossede attissa inanadsa pohua dossede attipa: “Jehe, tijine bica tani” ¿napadsaja? Nama najarahitohui. Najaropi

pocca tarabaisda epeje. ¹⁰Nadsama tiadeni naqui Diocca dosseniji tecahuamananissa tadsapi tettideni: “Epeje, najaropi ia icca idsepe ijie” titiquina nana. “Tapi deni iquejenajerani. Ia dossedecca tatarabaisdade iquejenani” titiquina nana –najari Jeso.

**Jeso madija 10 quinajari
lepra cajimanajarideni
inanomibaqqujaricca ima**

¹¹Nadsapa Jeso pocca benehidsa Jerosarehuaji toccajari. Dsama arobeni onini Samaria, dsama arobeni onihi onini Carirea tadsajani ttomooqqunihuaji ccaridsajari. ¹²Nadsapa nanihuajicca odsa capamema nahihuaji Jeso bacco tajari. Nahidsapa madija 10 quinajari dsamacoma onini *leprajine huapideni jadsimanahi madimanajari. Nadsapa Jesohuaji jai tojjari, pohuadsa huajiji nadsa domo hua najari. ¹³Jadsirema pohuadsa huahua quinajari: –¡Jeso, ia Medsede, iadsa teti huana taji! –quinajari.

¹⁴Nadsapa Jeso pohuadeni qqui inabaquidsapa pohuadenidsa huati tajari: –Diodsa dada toqqimadenihuaji jai tijedsimadsa pohuadenidsa tepideni nohue tiquinaji –najari. Nadsapa pohuadeni huapi nohuede jahui jai tojaninaja tocanomirejari.

¹⁵Nadsapa ojaría pohua huapi tobicahi qqui tadsapa dsodonijari. Huatidsedsa jadsirema: –¡Diopa bica tahi, bica tahi! –nanijari.

¹⁶Jesodsa bacco nanidsapa –Jehe bica tinani –nahijine Jeso baccohuaji pohua pitodsa huitta, tocattedsa nadsa assari namidsa bacco tajaro. Nadsama aja

madija dsodonijaripa dsama Samariacca. ¹⁷Nadsapa Jeso huati tajari: –Naraha aja ¿madija 10 quinajaripa tocanomire-jaraco? Tocanomireraha mota 9 quinajari-denipa ¿nejecohuaji? –najari Jeso. ¹⁸–Ajajaripa icca madija jodio jararaha pohuapa dsodonidsa Diodsa huatidsenijari. Motapa Diodsa: “Jehe, tijine icanomireni bica tani” nanimana-jarahi –najari Jeso. ¹⁹Nadsapa pohuadsa Jeso huati tajari: –Titehemadsa ticcaniji. “Jehe, Dio ohua tonanomihijari pajirahi” tadsapi tinomijaro –najari Jeso.

**Diocca cacahuehepi
ajima nehe tojanitohui
Mateo 24.23-28, 36-41**

²⁰Nadsapa marinaja pariseodsa jehe quinajarideni Jesodsa huati toquinajari: –¿Nejecoma nadsa *Diocca cacahuehe tojjapadseje? –quinajari. Naraha Jeso pohuadenidsa huati tajari: –Diocca cacahuehepi ahuatora tani, innocodsa qqui inejerani. ²¹Madijapa: “Qqui taji, Diocca cacahuehe ajidsa bacco nani, ajiccadsa bacco tani” quinajaritohui. Diocca cacahuehepi jidapana tiadenidsa tojaridsani –najari Jeso.

²²Dsotodepa pocca dodosse tabaqquidsapa huati tajari: –Ohuapi Madija Bedi ojjararoa nidsa occaronapomanicca huada bacco tani tohuini tiquinadsapi: “Jaho, najaro huada qqui inaccaraho” tiquinaraha nohueraccanitohui. ²³Naraha madija tiadenidsa maidsamandsapa ajama quinahitohui: “Qqui tiquinajo, Cristo-Mesia ajadsa bacco nanihi, ajiccadsa bacco nanihi”

quiquinanahitohui. Naraha madija attideni nama quinadsapa: “Jina qqui inana” tiquina tejerana. ¡Poni!
²⁴Ohuapi Madija Bedi ojajaroa occaronapomanicca huada bacco tadsapi ahuato tanitohui. Pina ssissiede memedsa ssie nadsa meme nemanehe tossiajabaquijjarossa nanitohui. ²⁵Naraha ohuapi Madija Bedi ojajaroa tahide ima onihi, onihi najaro ocasserani onahana-ponitohui. Jidapana madija madimanajarideni naco ohua ettajomanaponitohui –najari Jeso.

²⁶ –Ohuapi Madija Bedi ojajaroa nidsa occaronapomadsapi pina maittaccadsama *Nohue madipodsapa ppani ccajonajarocca imassa nanitohui. ²⁷Madijadenipa jijipamana najari, dse dse quinajari, caji caji canajari. Nama quiquinapojaria aja Nohue pocca canoa imenidsa toqquedsimahicca huada bacco tajaropaji. Naraha madija motapa ssamoquiri nadsa ppani bacco najonadsapi huapima je tocaniredsa jicajari. ²⁸Dsotode Abarahaocca ejedeni ohuaha *Rote odsa panani Sodomahuaji madidsa naco pina aji Nohue madipohuicca imassa napomajaro. Madijadenipa jijipamana najari, dse dse quinajari, todsepetaji mitta mitta quinajari, poccadeni dsamatapa da da quinajari, poccadeni huidsaja ppa ppa quinajari, poccadeni odsa ihinahatomana najaro. ²⁹Naraha Rotepa Sodomadsa nebodsa joppa taraha najaro huadadsa Diojine memehujicca jororoni *azufre quejemani Sodomahuaji catojadsapi madija huapima jicajari. ³⁰Jehe, ohuapi Madija Bedi ojajaroa occaronapomanicca huada naqui

najarossa nanitohui. Pina Nohue madipodsassa, pina Rote madipodsassa najaro. Nidsa dsotode ajijaro namidsa jidsera onanipomadsa madija mota otohui najoramana-jarajaridenipa jicahitohui –najari Jeso.

³¹ –Nadsama najaro huada bacco tadsapi madija pocca odsa amossinihuaji ccaridsadsapa pohua dsepetajitohui pocca odsahuaji toqquedsimani-jarana. Madija ohuaha pocca huidsajahuaji dsepe ijijari naco pocca odsahuaji toccanijarana. ³²Aji Rotecca amonejcca ima tetideni ajimamana-jarana. Ponidsa Dio Attipa: “Tinattihuajipi qqui tani tejerana” naraha poni nattinihuaji qqui nanidsapi siba tojajaro. ³³Madijapa pocca madie Diodsa acco tadsa ajijaro namidsa madi-dsanapohuijine tohuinira nadsapa dsoqquehitohui. Dsoqquedsapa camittehe jiquejeranicca caji-jarahitohui. Naraha madijapa pocca madie Diodsa eccoradsapi pohua inanadsoqqe-manaraha camittehe jiquejeranicca cajidsanapohuitohui –najari Jeso.

³⁴ –Jehe, nidsa occaronapomanijine ima ajima nanitohui: Madija pamaha dsome huahudadsa cahadijaraha ojaria otohui najorapojarina iaccamacossanihitohui. Naraha ohuahapa otohui najorajaradsapa inebohuitohui. ³⁵Amoneje pamehe dodods dode toquejenajaro naqui. Ojarie otohui najorapojarina iaccamacossani-nitohui. Naraha onhipi otohui najora-jeradsapi inebonitohui. [³⁶Maquideje pamaha huidsajahuaji dsepedeni ijimanajari naco. Ojaria otohui najorapojarina iaccamacossanihitohui.

Naraha ohuahapa otohui najora-jaradsapa inebohuitohui – najari Jeso.]

³⁷Najaro ima Jeso huati huati taha jicadsapa pocca dodosse tabaqqi pohuadsa huati toquina-jari: –Ia Medsede, ajijaro imapi ¿nejecoma nanidsana tojapadseje? –quinajari. Naraha Jeso pohua cacomerajari: –Abaridsa toqueri-qquinidsa bani huatiahi ponahi nahatoqqiri tiquinajaro. Pina najaro imassa najaro occaronapomadsapi madija huapima nahatoqqiri nahitohui – najari Jeso.

**Ima cacattemade amoneje
tabira tocajajaro acco
icamarocca ima**

18 ¹Jesopa ajijaro namidsa imadinicca imadsa pocca dodosse tabaqqi mari icanabaqqi-jari. Madija Diodsa huatide disseraqqiri nahijine, –Diopa ohuatti mitta-jarahi –quina-jarahijine huati huati tajari. ²Nadsapa ima ajima najaro huati tajari: –Odsa panani-huajipa ima cacattemade madijari. Puhuapa Dio noppine cappinajarajari. Madijadsa naco cappinajarajari. ³Najaro odsa pananidsa amoneje maqqi dsoqqejari madijaro. Ponipi huajijiradsa ima cacattemadedsa huatide totocca najaro: “Ohua acco ticamaji” naneje najaro. “Madijacca nacasserehe onahana-dsanaponi” naneje najaro. ⁴Naraha pohuapa poni acco camade ibojide rajari. Naraha dsotodena bodi huatodsaja narama najari: “Diodsa ocappina-jerani madijadenidsa naqui ocappina-jerani. ⁵Naraha aji amoneje tabira tocajajaro ohuadsa tonajo huati cajiradsapi poni acco

ocamana. Acco ocama-jeradsapi poni attini ohuadsa tocasseraqqi-nitohui” najari ima cacattemade ibobote. Nadsapa poni acco camade tohuiborajari – najari Jeso.

⁶Nadsapa ia Medsede Jeso attipa: –Jehe, ima cacattemade bica tarajararipa atti nama najari. ⁷Pohua atti nama naraha Diopa nama najarajari. Puhuapa bica tajari. Pocca tocattejidsabaqqi-naja attidieni mittajari. Puhuadenipa Diodsa ssiaja huati, dsome huati totoquina najari. Nadsapa ¿Dio pohuadeni acco icamabaqqi-hijinepa najopadsaja? Najo-jarahitohui. ⁸Najaroa tiadenidsa huati onajaropaji: Diopa najo-jaradsa tiadeni acco tocamabaqqi-hitohui, onajaro. Naraha ohuapi Madija Bedi ojajaroa nidsa occanipomadsapi ¿occa madijapa Dio Pohuadsa huatide disseraqqiri nahipaja napadsaja? Puhuadeni naco: “Jehe, Dio ohua acco camahi” ¿quiquina-nahipaja napadsaja? onajaro – najari Jeso.

**Marinaja pariseodsaja jehe
najaricca ima, romanodenicca
taminecca dosseniji dsiniro
nanaccadecca ima tadsajani**

⁹Jesodsaja queriquimanajari mota bodidenipa: –Jehe, ohuapi Moisesicca marinaja ohuacahuani-ssa tajaro, bica onani –quiquinanajari. Najari bodidieni naco: –Madija ohuassa quina-jarajaridenipa Moisesicca marinaja ecahuamananissa tejerani, bicaqqiri najarahi –quiquinanajari. Naraha Jesopa najaridieni bodicca ima nahato tadsapa ajijaro namidsa imadinicca ima huati tajari.

¹⁰ –Madija pamahapa Diodsa huati toquinahijine dada toquima-huaji tohuededsimajari. Ojaria Diodsa dissera tajari, pohuapa marinaja onini pariseodsa jehe najari. Ohuahapa imasiri sse tajari, pohuapa romanodenicca taminecca dosseniji dsiniro nanaccade.

¹¹Nadsapa marinaja pariseodsa jehe najari huadsa Diodsa huati tadsapa ajama najari: “Jehe Abi Dio, tiadsa bica onajaro, ohuapi pina madija ohuahadenissa onejerani. Pina bobotidedenissa, pina mamaidsadenissa, pina amonejecca cahassibotedenissa onejerajaro. Pina ajajari romanodenicca taminecca dosseniji dsiniro nanaccadessa onejerani. Bica onajaro” najari. ¹²“Ohuapi semana huajijiradsa jipehe ohonebocossa najaro. Ohuapi occa dsiniro ohuadsa totoja najaro *mota naqui tiadsa da da ohodsanapo najaro” najari.

¹³ –Naraha romanodeni-cca taminecca dosseniji dsiniro nanaccadepa huajima huajari. Madija ohuahadenipa tocattamacossamanadsa Diodsa huati huati toquinaraha pohuapa cappinaja najari tocattedsa najari. “Tabaccora onani” najari. Pohua attipa: “Abi Dio, ohuadsa teti huana taji. Ohuapi imasiri ocajini” najari taminecca dosseniji dsiniro nanaccade –najari Jeso.

¹⁴Najaro ima huati taha jicadsapa aja –Bica onani –quiquinanajari-denidsa Jeso attipa: –Nadsama ohuapi tiadenidsa huati onajaro. Ajajari maqquideje imasiri sse tajaripa pohua bodi tobicadsapa pocca odsahuaji toccanijari. Pocca ima Dio sse ineje najaro, Diodsa

tobicajari. Naraha madija ohuaha marinaja pariseodsa jehe najaripa Diodsa bodi tobica-jarajari. Pocca ima mota tabaccora taniccapi Diodsa huati tajaradsapa pocca ima Dio sse inejereje najaro. Jehe, madijapa: “Occa biquehe qqui tiquinaji” nanaja najaripa Diodsa ajamani tojahitohui. Naraha madijapa: “Ohuapi ajimani ojani” nanaja najarina Dio deni inahanitohui –najari Jeso.

Jesopa: –Abi, ticca biquehe ejedenidsa tinanaji –najari
Mateo 19.13-15; Maraco 10.13-16

¹⁵Nadsapa madija poccadeni ejedeni badsiraqquri najarideni Jesodsa eccajonabaqqui-manajari, –Jeso tatideni bara inabaqquidsa Diodsa huati tahijine –quinadsa. Naraha Jesocca dodosse tabaqqui qqui toquinadsapa attidenia: –¡Ejedenipa pohua! ¡Jesohuaji teccajonabaqquimana tajarajo! –quinajari. ¹⁶Naraha Jeso pohuapa ejedenitohui huahua najari. Pohua huatimadedenidsa pohua attipa: –Pohuadeni jahijonana, onajaro. Eccajonabaqqui-manahijine tecossamana tejeraji. Madijapa pina ajajari ejedenidenissa quinajarina Diocca cacahuehedsa toquejenahitohui –najari Jeso. ¹⁷ –Pajissara tiadenidsa huati onana: Madijapa pohua bodicca jeheniji pina ejedenicca jehenijissa najaradsapa Diocca cacahuehedsa toja-jarahitohui –najari Jeso.

Tamine dsepe sse tajari
Jesodsa huati tajari

Mateo 19.16-30; Maraco 10.17-31

¹⁸Madija ojaria tamine tojararipa Jesodsa huati tajari: –Nija

Mamaride bicahi ¿nejecoma onadsa camittehe jiquejeranicca bacco onanijine? –najari. ¹⁹Naraha manaco Jeso pohuadsa huati tajari: –¿Nejecotohui ohuadsa: “Mamaride bicahi” tajaro? Madija bicahi nohuerahi. Diona bica tahi ojarihi. ²⁰Naraha camittehe jiquejeranicca bacco tinanijinepi *Diocca dosseniji Moisesi dsodo inajarocca nahato tinani. ¿Najaro huapima tecahuani-ssa taqui? Pocca dossenijipi ajima najaro: “Madija ohuahacca amoneje tija tejeraji. Madija tinanadsoqqe-jarajo. Tiboti tejeraji. Maidsehe-
dsa naqui madijadsa ponima ima tinahana tejeraji. Ticca abi, ticca amidsa bica tinadsa tinamadi-
baquihissa tajo” nani Diocca dosseniji Moisesi dsodo inajaro –najari Jeso.

²¹Naraha tamine attipa: –Najaro dosseniji huapimapi dsabisso ojapodsama ohuacahuajonajarode –najari. ²²Naraha Jeso tamine atti mittadsapa pohuadsa huati tajari: –Naraha ima ojarie tiadsa dsori taccani. Ticcanidsa tidsepetaji nemanhe manaconidsa da tinaridsaji. Nani najaro dsiniropi madija tohuati nahanaqquri najaridenidsa da tinabaqquinijine. Nema tinanadsapi nidsa memehuaji Diocca biquehe tiadsa tojanitohui. “Nema onana” tadsapi ohuadsara dissera tinaji –najari Jeso.

²³Naraha taminepa najaro ima mittadsa: –Jehe, nema onana –najarajari. Pohua dsepetajitohui, pocca dsinirotohui huati huana tajari. Pohuapa dsepe sse taja nadsapa bodi ocassera taha hua canajari. ²⁴Tamine bodi ocassera tahi Jeso qqui tadsapa huati tajari:

–¡A, madija dsepedeni ssequiri najaridenipa Diocca cacahuehdsa toquejenahijine najo tani! –najari. ²⁵–Pina bani imehibote camello etero ssessequi odinidsa toqqe-
qqumahijine pajira-jarajarissa najari. Madija dsepe sse tajaripa Diocca cacahuehdsa tojahijine ssamo tani –najari Jeso.

²⁶Nadsapa Jeso atti nama nahi mittamanadsapa madija attidenia: –Jaho, madija tocassiejerahijinepa ssamo tani. ¿Nejecojarina tossiapa-
padsaja? –quinajari. ²⁷Naraha Jeso attipa: –Madijapa ssamomo taraha Diodsapi ssamo tejerani. Pohuajinena madija tocassiejerahitohui –najari.

²⁸Naraha Pedropa Jesodsa huati tajari: –Ia Maride, iapi tiadsa jaija-
ridsanijinepi icca odsa, icca madija, huapima ineboridsabaqquide –najari.

²⁹Manaco Jeso pohuadenidsa huati tajari: –Pajissara tiadenidsa huati onana: Madija ohuadsa dsepe ijihijinepa pocca odsa icanebo, pocca amoneje inebo, pohua imecote inebobaqqi, pocca abi, ami inebobaqqi, pocca ejedeni inebobaqqi nadsapa Diocca cacahuehe madijadsa tojaridsanijine dsepe ijiridsajari.

³⁰Nadsapa nidsa dsotode huapima pohua ineboridsajarossa nehe Diojine cajipomahitohui. Jidapana ajijaro namidsa pohua madicadsa huemani cajihitohui. Nidsa Diojine dsama dsati tojadsa naqui camittehe jiquejeraniccadsa madi-dsanapohuitohui –najari Jeso.

**Jesopa pohua dsoqquehicca
ima huati nimanipomajari**

Mateo 20.17-19; Maraco 10.32-34

³¹Jesopa pocca dodosse tabaqqi 12 quinajari tedseje Jerosarecca

jahui jai tojadsa pohuadenira huahua inabaquidsa pohuadsa queriquijari. Nadsapa pohuadenidsa huati huati dsanapojari: –Aji odsa panani Jerosarehuaji jaijemorajaropi nahatoqqiri tiquinani. Ohuapi Madija Bedi ojajaroa nidsa Jerosare bacco inadsapi aja Dio Atti cacomeraqqiri najarideni otahimari dsodo quinapopjaropi ohuadsa tojanitohui, onajaro. ³²Ohuapi madija ohuaha *jodio quejena-jararideni dsepedenidsa ojanitohui. Najaridenina ohua jaja icanauquimanajaro, ohua itamassoquimanajaro, ohua ppito inaquimanajaro nanitohui. ³³Nadsapi ohua cossi inaquimanadsapi ahua porimacossanidsa ohua inanadsoqqe-manadsa ohua ppa idsamananitohui. Naraha huada huatinimade tojari nadsa onahatoninitohui –najari Jeso.

³⁴Naraha pocca dodosse tabaquidsa Jeso pohua tahimari huati huati taraha mittamana-jarajari. Pohuadeni bodidsa najaro ima ahuatora tajaro. Pohuadenipa: –Ja, pohua dsoqqehijinecca ima huati tajari –quina-jarajari.

**Jesopa Jericocca madija
nocco ssire inanajari**

Mateo 20.29-34; Maraco 10.46-52

³⁵Jesopa odsa panani Jericohuaji tohuajirajonadsapa jahui inididsa madija nocco siri huihuitta najari. Pohua dsepe da nadsa: –Ohuadsa dsiniro da tiquinaji –tatacossa najari. ³⁶Nadsapa madija huapima pohuahuaji jai tojeqqumama canahi mittadsapa huati tajari: –¿Nejecotohui madija huapima jai tojeqqumama canajari? –najari. ³⁷Naraha pohuadsa

huati toquinajari: –Jeso Nasareti-huajicca huajirajonahi –quinajari. ³⁸Nadsapa nocco siri huahua najari: –¡Jeso, *Dabi Potemahi! ¡Ohuadsa teti huana taji, onaha! –najari.

³⁹Naraha madija tahidejonamanajari attidenia: –¡Poni! ¡Joma taji! –quinajari. Naraha denima paja huahua tarihi huahua tarihi najari: –¡Tamine Dabi Potemahi! ¡Ohuadsa teti huana taji! –napomajari.

⁴⁰Nanaja Jeso ccajonaraha mittadsapa huaha tahi nadsa: –Jari, nocco siri ahuaji teccajonamanajaro –najari. Nadsa eccajonamanadsapa pohuadsa huati tajari: ⁴¹–¿Nejecora tiadsa onananijine? –najari. Naraha nocco siripa: –Ohua Medsede, onocco ssire tinanaji, onajaro –najari.

⁴²Nadsapa Jeso: –Jehe, tinocco ssire tana. Tibodi ohuadsa pajissa tadsapi tinomini –najari.

⁴³Nadsapa Jesojine amadsati pohua nocco ssire tadsapa Jesodsa toccajari. Diodsa huatidseri dsanapojari. Madija huapima naco pohua nocco tonomihi qqui toquinadsapa huatidsemanadsa: –¡Diopa bica tahi, bica tahi! –quinajari.

Saqueo tahimari

19 ¹Jesopa odsa panani Jerosarehuaji toccahijine tahidepa odsa panani Jericodsaha bacco tapojari. Nadsapa Jerico nocconi toqqequimahijine toqqedsimajari. ²Naraha nahidsapa maqquideje dsepe ssebote madijari, pohua onipa Saqueo. Pohuapa jodiodeniraha *romanodenicca taminecca doseniji dsiniro nanaccadedenicca tamine tojajari. ³Nadsapa –Jeso

ccajonahi –quinahi mittadsapa Saqueo bodipa: –Jeso qqui onana –najari. Naraha pohnapa tere tajarijine, madija huapi tadsapa Jeso qqui inajarajari. ⁴Nadsapa Saqueo madija jai tojeqqumahi qqui tadsapa tedsejemadenina joppa tajari: –Aji ahuadsa occamarodsa Jeso toqqeqqumahi qqui onana –nadsa ahuadsa toccamarojari. ⁵Naraha Jeso Saqueo huittarihihuaji toqqeqqumadsapa Saqueo ahuadsa huittarihi qqui tajari. Nadsapa Saqueoosa huahua najari: –¡Saqueo, huassinaja ticcaronaji! Ohuapi jidapana ticca odsahuaji omadiccana, onajaro –najari.

⁶Nadsapa Saqueo huassinaja ccaaronadsa Jesodsa: –Jehe, occa odsadsa timadiccaji –najari. Saqueo

pocca odsahuaji Jeso iaccanidsapa tohuatidsenijari. ⁷Naraha madija huapimapa Jeso Saqueooca odsadsa toqquedsimahi qqui toquinadsapa pohnadenira imahaha canajari: –A, Jesopa imasiri ssebotecca odsadsaraha toqquedsimaha. Jeso nama nadsapa iadsa bica tejerani –quinajari jodiideni atti, aja romanodeni-cca taminecca dosseniji dsiniro nanaccadedenidsa jiperaqqiri nadsa.

⁸Nadsapa odsadsa jassi todsanaja Saqueo toتهمadsa ia Medsededsa huati tajari: –Jehe ohua Medsede, jidapapi ajima onana: Aja cappiramanajaridenidsa odseptaji arobeni ocanarobenissa taridsadsapi pohnadenidsa da onaridsana. Nadsama aja ocamaidsabaqqujaridenidsa



naqui pina aja ocamaidsabaquipojarissa nehe pohuadenidsa da omanina. Nadsapi pohuadenidsa najarossa nehe denima da, denima da, denima da omaniridsanjine – najari.

⁹Nadsapa Jeso madija huapima mittamanahijine huati tajari: – Jehe, jidapana ajajari maqquidejepa pocca imasiri inebodsa Diosda pajissa nadsapa pina maittaccadsama pocca idi Abarahao Diosda pajissa najarissa najari. Nadsapa pohua, pocca odsacca madijadsa naqui Diocca tossiejehe tojaridsani ahuato tani – najari Jeso atti.

¹⁰ – Nadsama aji ohua *Madija Bedi ojararopi madija jano toquejenajarideni pina ajajari maqquidejessa quinajari qquide occajonajaro. Imasiricca dodosse toquejenajarissa quinaraaha onassijabaquihijine. Huapima ohuadsa pajissa quina dsapa camittehe jiquejeranicca cajimanahijine – najari Jeso.

**Jesopa dsiniro
inahapimanahijinecca imadsa
mari icanabaquijari**

Mateo 25.14-30

¹¹ Jesopa Saqueodsa huati huati tahidsa madija queriquimanajarideni mittamanajari. Jeso Jerosarehuaji tohuajirajonadsa pohuadeni bodi attidenipa: – Nidsa Jeso Jerosaredsa bacco tadsapa amadsati Diocca cacahuehe tojanitohui – quinaraaha najaro ima tojanijine jerani. Nadsapa Jeso pohuadeni bodi huatomanahijinepa ajijaro namidsa imadinicca imadsa mari icanabaquijari.

¹² Jeso attipa: – Dsama huapimacca tamine deni tojahicca dsama

onihicca deni toquejenajarideni ojariadsa huahua najari: “Tia ocattejidajaro, ticca dsama arobeni cacahuade tijanjine. Ohuadsa huatide ahuaaji ticcajonaji” najari. Nadsapa huaji taraha pohuahuaaji huatide toccahijine najorajari. Pohua bodipa: “Nidsa occanidsa ohuapi occa dsamacca tamine ojanitohui” najari. ¹³Nadsapa toccabote nadsa pocca dodosse tabaqqi mota 10 quinaha huahua inabaquijari. Nadsapi dsiniro ccarara huatini ccarata tanicca 10 najaro pohuadenidsa ojari nehe da inaridsajaro. Nadsapa pohuadenidsa huati tajari: “Ajijaro dsinirodsamitta, da, mitta, da taridsamanana, dsiniro tohuapinijine. Nidsa occanidsapi ohuadsa nemanehe da tanimanahijine” najari. ¹⁴Aja tamine tojahijinepa tamine deni tojahicca madihihuaaji toccajari. Naraha toccahi nattipa pocca dsamacca madijapa pohuadsa jiperaquiri nadsapa madija dosse inabaquimanajari, tamine deni tojahiccadsa huati toquinahijine. Bacco toquinadsa attidenipa: “Aja ticattejidsajaripa icca tamine tojahijine jiperaquiri inani” quinajari, dsama huapimacca taminedsa.

¹⁵ – Naraha tamine deni tojahiccapa attidenidsa jehe najaradsa pohua icattejidsajaripa tamine inanajari. Nadsapa tamine tojadsapa pocca dsamadsa dosse dosse nahijine toccanjari. Bacco nanidsapa pocca dodosse tabaqqi pohuadenidsa dsiniro da inaridsajarodenidsa huahua najari, “¿Dsiniro nejecoma nehe tojani?” nahijine. ¹⁶Nadsapa tahide qqe dsimapojaripa pohuadsa huati tajari: “Ohua dossede, ticca dsiniro

ccarara cajariraha ojine deni tojadsapi 10 nehe tojani” najari. ¹⁷Nadsapa tamine tojedsati manaco pohuadsa huati tajari: “Jehe, tiapi occa dodosse bica tinani. Ohuattidsa ibora tinadsapi occa dosseniji ima bedeniraha tijine toccanissa tadsapi odsa panani 10 najarocca cacahuade tjanitohui” najari. ¹⁸Pocca dodosse ohuaha naco qquedsimadsa huati tajari: “Ohua dossede, ticca dsiniro ccarara cajariraha deni tojadsapi 5 nehe tojani” najari. ¹⁹Nadsapa tamine tojedsati manaco pohuadsa huati tajari: “Jehe, tiapi odsa panani 5 najarocca cacahuade tjanitohui” najari.

²⁰ –Naraha pocca dodosse ohuaha qquedsimadsapa pohuadsa huati tajari: “Ohua dossede, ajijaropaji ticca dsiniro. Eterodsa jore onacquinissa tadsa ohuacahuajaro. ²¹Ohuapi tinoppine ocappinajaro. Tiapi madijadsa daco tijirajaro. Tiapi tarabaisda tejeraraha ticca dodosse tabaqquijine titicaji najaro” najari. ²²Nadsapa manaco tamine tojedsati attipa: “¡Occa dodosse tabaccora tinani! Tia tettijine tiadsa ima ssonarijaro. Aji ohuattidsa ibo tinadsapi ohuadsa bica tejerani. Tettipi ohuadsa: ‘Madijadsa daco tijirajaro. Tarabaisda tejeraraha ticca dodosse tabaqquijine titicaji najaro’ taha. Naraha occa ima nahato tinadsapi ²³ ¿nejecotohui occa dsiniro tohuapinijine dsiniro ehcahuamana nanihuaji da tidsima-jerajaro? Nassa occanidsapi aji occa dsiniro tohuapijarocca tadsajani ocajinitohuiraha” najari tamine atti. ²⁴Nadsapa aja pocca dodosse tabaqqi domodeni

huaridsajaridsa huati tajari: “Jari, occa ccarara tidinimanadsa ccarara 10 cajjaridsana da tiquinaji” najari tamine atti. ²⁵Naraha pohuadeni attipa: “Ia dossede, najaripa ccarara 10 nehe caji” quinajari. ²⁶Naraha tamine attipa: “Epejena, ohuapi tiadenidsa huati onajaro: Madija occa dossenijidsa dissera tadsapa pohuadsa denima tojanitohui. Naraha aja madija occa dossenijidsa dissera tajaradsapa cappirahissa tahitohui. Badsira tehe cajiraha najaro naqui todininitohui. ²⁷Nadsama aja ohuadsa huadiqquri najarideni tamine ojanijine jiperappuri najarideni ohuahuaji teccajonabaqquimanadsa obacchohuaji domo huadsapa tinajica-baqqi-manajo” najari tamine tojedsati atti –najari Jeso.

**Jesopa Jerosaredsa
bacco todsimajari**

Mateo 21.1-11; Maraco 11.1-11;

Huano 12.12-19

²⁸ Jesopa ima huati huati taha jicadsapa denima jai tojajari, Jerosarehuaji bacco toquinahijine. ²⁹Tahidepa ssono onini Oribodsa jai tojemorajari. Najaro ssonodsa odsa capamema najaro pamehe anijaro, oninidenipi Betapaque, Betania najaro. Najaro odsa pamehedsa bacco toquinabote nadsa pocca dodosse tabaqqui pamahadsa huati tajari: ³⁰ –Jari, ajicca odsa capamema nanihuaji ticadapoji. Nanihuajipi bojo namidsadsa napidsati ssoque dsanaha huahi. Najari bojopa idedsa madija huittari-jaraccahi. Najari dicca tiquinadsa teccanimanajo –najari. ³¹ –Naraha tiadenidsa madija

attipa: “¿Nejecotohui bojo dicca tiquinajari?” nadsapa pohuadsa huati tiquinana: “Ia Medsede ajajari bojo tohui nadsapaja” tiquinana –najari Jeso.

³²Nadsapa tohuedanaja, bojo napidsati ssoque dsanaha huahi qqui quinajari, pina aja Jeso huati tajarissa najaro. ³³Bojodsa baccho toquinadsapa dicca quinana jinedepa: –¿Nejecotohui occa bojo dicca tiquinajari? –najari.

³⁴Naraha manaco pohuadani

cacomermanajari: –Ia Medsede tohui nadsapaja –quinajari. Nadsapa jinede jehe nadsa eccanimanajari.

³⁵Nadsapa bojo eccanimanajari... Jesohuaji baccho nanimanadsapa poccadeni etero huapicca motarajaro ssiti quinadsa bojo idedsa bina quinadsa nahidsa inahittarimanajari Jeso. ³⁶Nadsapa Jeso bojodsa tocchahi tedsejema pohuadsa jahiridsajaridani poccadeni etero jahui bina idsanapomanajaro, pohuadsa: –Deni tijani



–quinahijine. Nadsapa Jeso jahui bina tani motta toccadsanapojari. ³⁷Nadsapa ssono Oribo jahui toqqe-dsippanihuaji bacco tabote nadsa pocca dodosse tabaqqui, pohuadsa jahiridsajarideni huapima Jeso canahato-huajapohui canahi qqiu toquinapoja najarijinea Diodsa tohuatidsemana-dsanapojari. Jiri jiri dsanapomanaja mohua mohua dsanapomanaja najari. ³⁸Attidenipa: –¡Ia Medsede onima ccajonajaridsa biquehera tojana, tojana! ¡Pohuapa ia Isarari potemahideni icca tamine! ¡Pohuadsa biquehera tojana, tojana! –dsanapomanajari. –Memehuaaji Dio icca imadsa cajoneri canahi, canahi, najaro jonehe tojaridsanijine. ¡Memehuaaji Diodsa madimanagerideni pohuadsa: “¡Deni tijani!” quinana, quinana! –quinajari, huahua dsanapomanadsa.

³⁹Nadsapa nahi odsa panani-huajicca madija huapima Jesocca madija tedseje toqueriqqui najari. Naraha nahidsa jodiodeni mota marinaja pariseodsas jehe quinajari-deni quejemamanajari. Najarideni motaha Jesodsas huati toquinajari: –Mamaride, ticca dodosse tabaqqui huati tinabaqquijo. Nama nama quinahipa oppina tani. Pohuadeni joma tinanabaqquijo –quinajari. Aja pariseodenipa Jesodsas huatidsemanahijine jiperaqquri najari.

⁴⁰Naraha Jesopa pohuadenidsa huati tajari: –Tiadenidsa huati onana: Aja oca dodosse tabaqqui joma onanabaqquidsapa aji jahui inidicca sibana Diojine mohua mohua quinanitohui. Occa ima huati toquinanitohui –najari Jeso.

⁴¹Nadsapa Jeso Jerosarehuaji tohuajiradsa najaro odsas panani

qqiu tadsapa nahicca madija-tohuiu oji oji najari. ⁴²Pohua attipa: –A, jidapana tiadenidsa Diocca jonehe tojanitohuiraha ssamoqquri tiquinajaro. Jehe, ajijaro jonehe pajissacca tohuini tiquinejeradsa najarojine Diocca ima tiadenidsa ahuato tejerajaro. ⁴³Nema tiquina-dsapi nidsa ima oppina tehe tiadenidsa tojanitohui. Jerosarecca siba hua nahuajanini memedsararaha idenihuaji ticcadeni huadidenipa nami ppa inamaromanadsa siba hua nahuajanini tetepi bacco toquina-dsa cottajahuajanimanaha jicadsapa tiadenidsa ssonarimanahitohui. ⁴⁴Nadsapi tijicaridsanitohui. Ticcadeni odsas siba hua tamaroni huapima naqui pohuadenijine cco-cco bototo tohuedi, cco-cco bototo tohuedi naridsanitohui. Tiadeni Tonassajade Cristo-Mesia tiadenidsa Dio dosse inaronaraha tibodideni pajissa tiquinejerajaro. Nema tiquinadsapi ima oppina tehe tiadenidsa tojanitohui –najari Jeso.

**Diodsa dada toquimacca
odsadsa manaconitohui
dadadedeni mohua
ininebaqquijari**

Mateo 21.12-17; Maraco 11.15-19;

Huano 2.13-22

⁴⁵Nadsapa Jeso Jerosaredsas bacco todsimadsa *Diodsa dada toquimahuaji toqquedsimajari. Najaro odsacca boronidsa madija *bani bedi Diodsa da tahijinecca dade toquejenahi qqiu tajari. Manaconitohui dadadedeni qqiu inabaqquidsapa huapima mohua ininebaqquijari.

⁴⁶Nadsapa pohuadenidsa huati tajari: –Dio Atti dsodo nanidsa ajima najaro: “Occa odsapi ohuadsa

huati huati toquinahijinecca odsa tocajanitohui” naponi nade Dio Atti dsodo nanidsa. Naraha tiadenipi madija titicamaisa-baqqumana nadsa tijinedenia pina bobotidendenicca quequeriqui odsassa ticananamanajaro –najari.

⁴⁷Jesopa huada huajjiradsa Diosda dada toqqumahuaji mari mari ihicanabaqqi najari. Naraha dada toqqumade taminedeni, jodiodenicca marinaja maridedeni, odsapanani Jerosarecca deni toquejenajarideni quinadsa Jesodsa jiperaqquri nadsa pohuadeni attipa: –¿Nejecoma inanadsa Jeso inandsoqquehijine? – quiquinanajari.

⁴⁸Jeso dsoqquehijine tohuini quinaraha madijapa Jesocca marinaja pohuadenidsa bica tadsa mittade dissassera taja najari. Nadsapa inandsoqqe-manahijine pohuadenidsa ssamo tajaro.

–¿Nejecojaricca dacorehe ticajijaro? –quinajari Jesodsa
Mateo 21.23-27; Maraco 11.27-33

20 ¹Jesopa huada huajjiradsa Diosda dada toqqumahuaji madija huapima mari mari ihicanabaqqi najari. Ima bicani icassiejeranijinecca Jeso madija mari icanabaqqiraha pohuadsa jiperaqquri najarideni aja dada toqqumade taminedeni, jodiodenicca marinaja maridedeni, *jodiodeni ime jocohuideni quinadsa Jesodsa tohuajiressimanajari. ²Nadsapa pohuadsa huati toquinajari: –Iadsa ticca ima tecomeraji. ¿Nejecojaricca dacorehe ticajijaro? ¿Nejecojari attidsa dadadedeni mohua tininebaqqijari? –quinajari, Jeso pohua cacomerahijine tohuini quinadsa.

³Naraha manaco Jeso pohuadenidsa huati tajari: –Ohua naqui tiadenidsa huati onana. Ohuadsa tecomeramanaji. ⁴Huanopa ¿nejecojari icadossedsa topa idsanabaqqijaritta? ¿Diojine ttarana, madijajine ttarana? ¿Tettideni nejecoma tiquinani? –najari Jeso.

⁵Naraha taminedenipa pohuadenira huati tocanirere canajari: –Jaho “Huanocca topanijipi Diocca dosseniji” inadsapi Jesopa: “¿Nejecotohui pohuadsa jehe tiquinejararotte?” nahitohui –quinajari. ⁶–Naraha “Huanocca topanijipi madijacca dosseniji” inadsapi madija sibadsa ia toquina-baqquirana. Aja madija huapima attidenipa: “Huanopa Dio icadossajari. Dio Atti cacomerabotedija” quiquinanade –quinajari taminedeni, madijadeni noppine cappinamanadsa. ⁷Nama quinadsapa taminedeni Jesodsa huati toquinajari: –Huano madija topa idsanabaqquihijine pohua dossedepa ssamomo inani –quinajari.

⁸Nadsapa Jesoa: –Ohua naqui ohua dossede onipa tiadenidsa ohuacomera-jarahi –najari.

Huidsaja cacahuade tabaccoraqquri najaridenicca ima

Mateo 21.33-44; Maraco 12.1-11

⁹Dsotode Jesopa pocca marinaja ajijaro namidsa imadnicca ima tadsajani madija mari icanabaqqijari: –Madijapa pocca huidsajadsa ppa nahi uva pohuara ppa inajari. Nadsapi pocca huidsaja ecahuamananijine madijatohui qqi naridsajari, nahi pocca huidsajadsa tarabadsa quinahijine, ppa nahi

uva ecahuamanahijine. Uva bono jadadsapa motapa huidsaja jinede-
 dsa tojahijine. Motapa huidsaja cacahuadedeni pohuadenidsa tojahijine. Nadsapa pocca huidsaja ecahuamanahijine madija qqui inabaquidsapa pocca huidsaja pohuadenidsa inebojaro. Nadsapa jinede dsama huaji tanihuaji toccajari. Nahidsa madi-dsanapoccahijine.
¹⁰Uva bono jadahicca abadsico bacco tadsapa huidsaja jinedepa huaji tanidsa madiraha pocca dodosse ojaria pocca huidsajahuaji dosse inanijari, huidsaja cacahuadedeni uva bono mota pohuadsa da quinahijine. Naraha pocca dodosse huidsajahuaji bacco nanidsapa huidsaja cacahuadedenipa inajidsomanajari. Uva jiraha dosse inanimanajari.
¹¹Nadsapa huidsaja jinede pocca dodosse ohuaha dosse inanijari. Huidsaja cacahuadedenihuaji bacco naniraha najari naco inajidsomanajari. Itamassomandsa uva jiraha dosse inanimanajari.
¹²Nadsapa pocca dodosse ohuaha dosse inanijari. Naraha najaripa inabiqueramanandsa huidsaja inidihuaji jadsirema joca coro inemanajari.
¹³—Najari toccanidsapa huidsaja jinede attipa: “¿Nejecoma onanijine? A, jehe, ajima onana. Occa ejedeni ohua obonoccoriccana dosse onanina. Najaridsana cappinamanahitohui” najari.
¹⁴Nadsapa dosse inanijari, toccaniraha huidsajahuaji bacco nanidsa huidsaja cacahuadedenipa pohua qqui toquinadsapa pohuadenira huati tocanirejari: “Ajaripa huidsaja jinede bedi. Nidsaranibote imehi dsoqquedsa huidsajapi pohuadsa tojanitohui.

Jari, inanadsoqquena, huidsajapi icca tojanijine” quinajari.
¹⁵Nama quinadsapa huidsaja jinede bedi dama quinadsa huidsaja inidihuaji joca quinadsa inanadsoqqe-manajari —najari Jeso.

Nadsapa pohuadsa queriqqui-manajaridenidsa huati tajari: —Jari, tibodideni huatoji. Huidsaja jinede pohuadenidsa ¿nejecoma napadsaja?
¹⁶Pohuapa ima mittadsapa pocca huidsajahuaji toccanipomahitohui. Manaco pocca huidsaja cacahuadedeni inajicaridsahitohui. Pocca huidsajapi madija ohuahadenidsana da inanitohui —najari Jeso.

Naraha pohuadsa queriqquimana-jaridenia najaro ima mittamandsapa: —¡Jaho, najaro ima iadsa toja-gerana! —quinajari.

¹⁷Nadsapa Jeso pohuadeni icatta-baqqi nadsa huati tajari: —Tettidenipi: “Najaro ima iadsa toja-gerana” tiquinaraha pajissa tojanitohui. Najaro imassa najaro Dio Atti dsodo nanidsa dsodo napojaro. Imapi ajima najaro:

“Odsa sibadsa icanahatomanahijinepi nanahatodedenipa siba ojariepi ettajomanani nade.

Naraha dsotodepi najaro sibana odsa daco cajiranijine tojajaro” nani Dio Atti dsodo nanidsa dsodo napojaro.
¹⁸Nadsama najaro siba dacorehe cajjarodsa madija tohuedimamanandsapa poccadeni ima tossamodsapi assiredeni tajoridsamanajarissa quinahitohui. Najaro siba madijadsa ssonaridsapi mere tocaniredsapa jamiromanahissa tahitohui —najari Jeso, pohua tahimari huati tadsa. (Aja pohua atti nama najaripa madija pohuadsa

pajissa quina-jaradsapa paja jicarihi nahitohui, najari.)

¹⁹Nadsapa dada toqqimade taminedeni, jodiidenicca marinaja maridedeni quinadsa Jesocca marinaja mittamanadsapa bodideni nahatoqqiri najari: –Jesopa icca ima huati huati tajari, iapi pohua ettajojarijine –quinajari. Nadsapa Jesodsa huadimanadsa: –¡Jari, jidapana Jeso todsepe inanana! –quinaraha madija noppinedeni cappinamanadsa dama quina-jarajari.

–¿Romanodenicca taminedsa icca dsiniro mota da inanijine bica taqui? –quinajari

Mateo 22.15-22; Maraco 12.13-17

²⁰Nadsapa dada toqqimade taminedeni, jodiidenicca marinaja maridedeni quinadsa Jeso innocodsamanajari. Attidenipa: –Jesopa romanodeni jiperaqqiri nahicca huati tadsapa romanodenicca dosseniji cacahuadsa huati inanijine, nahi pohua dsepe-dsa tojahijine –quinajari. Nama quinadsapa poccadeni madija mota Jesodsa huati toquinahijine dosse inabaqqimanajari. Pohuadenipa pina pajissa Jeso pohua attitohuissa quinaraha pohuadeni bodidsa maidsehe najoramana-jari. Nadsapa Jesodsa tohuajiressimanajari. ²¹Pohuadenipa Jesodsa ajama quinajari: –Nija, Mamaride, ticca marinajapi toccanissa tajaro nahatoqqiri inani. Ticca ima dsori torani naridsajaro. Madija attideni noppine ticappina-jeradsapi ticca ima onihi toja-jerajaro. Madija deni tojajari, madija dsepe sse tajari, madija ajamani tojajari tedsejepa

tiadsa najarissa caniquimerajari. Pajissara Diocca marinajadsa madija madimanahissa tahijine mari mari titicanabaqqi najari –quina-jari Jesodsa. ²²–Nadsama iapi *romanodenicca tamine deni tojahicca pocca dossenijidsa icca *dsiniro mota pohuadsa da inanijine ¿bica taqui? ¿Bica tejerarane? Moisesicca marinajadsa ¿oppina taqui? ¿Oppinera tarane? ¿Tetti nejecoma tani? –quinajari maidsehedsa.

²³Pohuadsa ima inassonari-mananijine huati toquinaraha Jeso poccadeni maidsehe nahato tajari. Nadsapa pohuadenidsa huati tajari: ²⁴–Jari, dsiniro *denario ohuadsa nohue ticanamanaji –najari. Nohue icanamanadsapa huati tapomajari: –Jari, ajijaro ccararadsapi ¿nejecojari corimena anijaro? ¿Nejecojari onidsodo najaro? –najari Jeso. Naraha pohuadeni attipa: –Romanodenicca taminediya –quinajari.

²⁵Naraha Jeso attipa: –Romanodenicca tamine pocca dsiniropi pohuadsa da tinanimanaji. Naraha Diocca tiquejenadsapi Pohua jipa tahiccara Pohuadsa da tiquinaji –najari Jeso.

²⁶Naraha taminedeni, mamaridedeni quinajaripa Jeso atti cobara inanamanadsa madija queriqqimanajari huapima mittamanahijine tohuini quinaraha pajiramana-jarajari. Jabojomanadsa attidenipa: –A, icca ima ecomeranjine nahato tajaria –quinadsa todidimana najari.

Nidsa jicamanajarideni nahatonimanadsapa cajicaji nohueranitohui

Mateo 22.23-33; Maraco 12.18-27

²⁷Nadsapa Isaraeri potemahi jodiideni mota *marinaja onini

sadoseodsa jehe quinajarideni Jeso madihihuaji jahijonajari. Poccadeni marinajapi: –Idsoqquedsapi inahatoninijine nohuerani – quiquinanajari. ²⁸ –Najaro imadsa Jeso atti ijine tossamodsa cobara tana –quinadsa Jesodsa najaro ima huati toquinajari: –Mamaride, Moisesicca mari-najadsapi ajima nani: “Maqqidejepa amoneje cajiraha ejedeni jiraha dsoqquedsapa pocca amonejepi pohua imecotena icajina, nahi ejedeni cajidsapa pocca ato dsoqquejaricca ejedenissa nahijine” nade Dio Atti Moisesijine dsodo nanidsa –quinajari. ²⁹ –Nadsama tiadsa ima ajima najaro huati inana: Aja pohuadeni imecote pohuadenira 7 quinaha madimanajari. Tahideccaha amoneje cajipojari, naraha bedi jiraha dsoqquejari. ³⁰ Dsotodecca naco pohua ohuaha bedimene icajiraha ejedeni jiraha dsoqquejari. ³¹ Dsotodecca naco najaro amoneje icajiraha najari naco ejedeni jiraha dsoqquejari. Najarossa dsanapojaro cajide 7 quinaraaha ejedeni jiraha jicajari. ³² Najarideni jicadsapa poni naqui dsoqquejaro. ³³ Nadsapi dsama jicadsa madija nahatonimanadsapa pohua imecote 7 quinaripana najaro amoneje icajiqquimanaporaha ¿nejecojarina ponicca maqqi tojapadsaja? –quinajari. ³⁴ Naraha Jeso attipa: –Jidapana aja namidsa madimanajaridenipa caji caji cacana nadsa madimana-cajari. ³⁵ Naraha nidsa dsotode madijapa memehuaji Dio madihihuaji madimanadsapa nama quinapoma-jarahitohui. Caji caji canapoma-jarahitohui. Aja Diosda iboraquiri najaridenipa Dio

inapajirabaquihissa taja nadsa pohuadeni inahatonibaquihitohui. ³⁶ Nadsapa pohuadenipa dsoqque-manapoma-jarahitohui. Pina Diocca dodosse tabaqqi memehuajiccassa quinahitohui. Diocca nahatonihc cajimanadsapa Diocca ejedeni toquejenajari.

³⁷ –Nadsama Djojine madija nahatonimanahicca imapi Moisesi dsodo inajaro. Aji ahua diji tani tahimarinidsa Moisesipa ia Medsede Dio Atti dsodo inajaro: “Ohuapi Dio, ticca idideni Abarahao, pohua bedi Isahaca, pohua bedi Jacobo quinajaridenicca Dio ojani” nahi nade, Moisesijine dsodo nanidsa. ³⁸ Aja Dio Atti nama nadsapa Abarahodeni nahatonimanadsa madimana-dsanapohuicca ima ahuaato tajaro. Diopa paja dsoqquemanarihi najaridenicca Dio jarahi. Diopa camittaquiri najaridenicca Dio. Puhuapa jidapana naco poccadeni Dio. Pahuadsa huapima madimana-dsanapojari –najari Jeso.

³⁹ Jodiodenicca marinaja marideni motana Jesodsa huati toquinajari: –Jehe Mamaride, imapi najarona paji –quinajari.

⁴⁰ Nadsapa aja huati toquinapojari cappingamanadsapa apaja quinajari.

–¿Cristo-Mesiapa nejecojari
potemahi tiquinajaro?
–najari Jeso

Mateo 22.41-46; Maraco 12.35-37

⁴¹ Jesopa madija bodideni huatoma-manahijine pohuadenidsa huati tajari: –¿Nejecotohui madija attidenipa: “Cristo-Mesiapa *Dabi Potemahi” quiquinanajari?

⁴²Naraha tamine Dabipa maitta-ccadsama madidsa pocca jijiridsa pohua tedsejemacca ima dsodo inapojaro. Dabicca dsodonijipi ajima najaro:

“*Ia Medsede Diopa ohua Medsede Mesiadsa huati tajari: ‘Ohuini nahatonihuaji tittariji. Ohua tedsejepi tohuatti dacorajaro ticajiji’ najari.*” ⁴³“*Nidsarani bote tia huadidenipa ajamani onanabaqquihitohui. Poccadeni dacorehepi onajicanitohui’ napohui nade Dio.*”

⁴⁴Naraha madija attidenipa: “*Cristo-Mesiapa tamine Dabi Potemahi’ quiquinanadsapa ¿nejecotohui Dabipa pohua potemahidsaraha: ‘Ohua Medsede’ napojaritta? –najari Jeso.*”

**Pina jodiodenicca
marinaja maridedenicca
madiessa tiquinejeraji**

*Mateo 23.1-36; Maraco 12.38-40;
Roca 11.37-54*

⁴⁵Madija huapima taharibobo canadsa Jesopa pocca dodosse tabaqquids huati huati tajari: ⁴⁶– ¡Paji, tiadenipi! Pina jodiodenicca marinaja maridedenicca madiessa tiquinejeraji. Pohuadenipa etero dequerarods huedsariidsamanadsa attidenipa: “*Iapi pina taminessa inani*” quiquinanajari. Aji dadahuajicca jahuids jahiridsadsa naco madija pohuadenidsa: “*¿Nija, bica tinani? Tiapi deni tijani*” quinahijine tohuini quiquinanajari. Dio Atti mamarihuaji jassi tarihijinepa deni toquejenajaridenicca huihuittaridsa jassi tarihijine tohuini quiquinanajari. Jipacquie imenidsa naqui deni

toquejenajaridenicca huihuittaridsa jassi tarihijine tohuini quiquinanajari. ⁴⁷Nadsama tabira tocajanajarodeni ponideni madi-mananijineccaraha icamaidsabaqqui-manadsa pohuadenidsa totoja nadsapi ponidenicca odsa naqui pohuadenidsa totocajaridsa najaro. Naraha poccadeni tabaccorehe ahuatora tanijinepi Diodsa huati huati toquinadsapa poccadeni huatinaja dequerarajo, aja madija pohuadenidsa: “*A, Diodsa disseraqquri nahi*” quinahijine. Pohuadenipa Dio Attima mamaidsamana nadsapa nidsa Diocca najidsohue denima oppina tanicca pohuadenidsa ssonarinitohui –najari Jeso.

**Amoneje tabira tocajani
ponicca dsiniro Diodsa
da inanicca ima
Maraco 12.41-44**

21 ¹Jesopa Diodsa dada toquimahuaji dsepedeni ssequiri najarideni dsiniro dade toquejenajari qqui inabaqquijari. Poccadeni dsiniro da naqqinajacca bahods hua idsamanajaro. ²Nanihuaji naqui amoneje tabira tocajanipi poni madinijinecca dsiniro bedeniraha ponicca danijijine capamehe cororo icadsajaro. ³Nadsapa Jeso pohuadsa toqueri-qquijaridenidsa huati tajari: –Pajissara tiadenidsa huati onana: Ajijaro amoneje tabira tocajani ponipi cappiraraha ponicca daniji dsiniro bedeniraha deni tojani. Pina Diodsa denima da inajarossa najaro. Naraha aja huapima dsepedeni ssequiri najaridenicca danijipi pina ajimani Diodsa da quinajarossa najaro. ⁴Pohuadenipa poccadeni

dsiniro mota arobeni da quinajaro. Naraha ponipi cappirajaro, tohuati nahana tajaro. Poni madinijineccaraha da inehe jicajaro –najari Jeso.

**–Diodsa dada
toqqimahuajicca odsa
taboridsanitohui –najari Jeso**

Mateo 24.1-2; Maraco 13.1-2

⁵Jesocca dodosse tabaqqupa *Diodsa dada toqqimahuajicca odsa qquide bica tocanadsa imahaha canajari: –A, siba noponi bicabotedsa nahatoridsajaro. Madijacca daniji oro dsibehi tajarodsa nehebedsoridsajaropi bicaqquirinani –quinajari. ⁶Naraha Jeso attipa: –Aji odsa imeni sibadsa nahatoridsani jidapana qqutiquinaraha nidsa dsotodepi taboridsehe jicanissa tanitohui –najari Jeso.

**Dsama jicani tohuajiradsa
nahatoqquri inanijinecca ima**

Mateo 24.3-28; Maraco 13.3-23

⁷Nadsapa Jesocca dodosse tabaqqi pohnadsa huati toquinajari: –Ia Maride, jidacca huati tinajaropi ¿nejecoma nadsa tojapadseje? Najaro ima tohuajiradsa nahatoqquri inanijinepi ¿nejecora qqui inapopadseje? –quinajari.

⁸Nadsapa Jesoa: –Paji, madija tiadeni tocamaidasabaqqui-manarana. Nidsa madija huapi taha pohnama ohua onidsa maidsamanadsapa: “Ohuapi Cristo-Mesia ojani” quiquinanahitohui. “Jidapana dsama jicanicca baccotani” quiquinanahitohui. Naraha najarideni attidsa jehe tiquinejeraji. ⁹Nadsama madija dsama onihicca, dsama onihicca tedseje jadsire

imeni inahatomanani tahimarini timittamanadsa naqui ticappinamana tejerana. Ticcadeni dsamahuaji, dsama onihihuaji naco huadiqquri najarideni taminedenicca cacahuehe najidsoridsamanahitimittamanadsa naqui ticappinamana tejerana. Najaro ima oppina taniccapi tahide tojaporaha dsama jicanijinepi nohueraccanitohui –najari Jeso.

¹⁰Jesopa denima huati huati tajari: –Nadsama madija dsama onihicca, dsama onihicca tedseje jadsire inanamana-ridsanitohui. Tamine ohuahacca madija, tamine ohuahacca madija tedseje cahadire-ridserahitohui. ¹¹Nadsama namidsadsa imeni naqui caji tanitohui, pemi naqui cajiridsanitohui. Dsamacoma naqui dsama onihidsa, dsama onihidsa cajiridsanitohui. Nadsapi memehuaji naqui oppina tanicca ahuatodsa tijabojomananitohui. Najaro qqutiquinadsapi dsama jicanicca bacco tani nahatoqquri tiquinanitohui –najari Jeso.

¹²–Naraha aji ima huapima huati huati onajarocca toja-jeraccadsama tiadenidsa ima tojaridsaponitohui. Madija huadiqquri najarideni tiadeni tadamamanadsapa tiadeni tonajidsobaqqui-manahitohui. Jodiodenicca Dio Atti mamarihuaji tiadeni tohuacquedsimabaqqui-manahitohui, toponi cocorodsa naqui tiadeni coro todsima-baqqui-manahitohui. Otahimari tiadenidsa tojajaro acconi huadimanadsa dsama onihicca dsama onihicca madija tamine deni toquejenajarihuaji tiadeni tohuacquedsimabaqqui-manahitohui. Dsamacacahuadedenihuaji naco tiadeni

tohuaquuedsimabaquui-mana-hitohui. ¹³Nani pohuadeni dsepedsa tiquejenadsa taminedenidsa ticcadeni ima tecomeramanadsapi otahimari naqui mittamanahijine.

¹⁴ –Nadsama ticcadeni ima tecomeramanadsapi tiadenidsa ima ssonari-jeranijine tibodideni titinajoramanapo nejerana. ¹⁵Tettideni tecomeramananijinepi tiadeni acco ocamabaquunitohui, tiadeni huadidedeni tettideni inassamana-jeranijine, ima huatide nahatoququiri tiquinanijine. Nadsapa pohuadeni attina tettidenidsa ajimani tojanitohui. ¹⁶Naraha tiadeni huadidedeni naco ticca abi itide, ticca ami nitide, timecotedeni itide, ticca madija itide, titesse itide pohuadenipa otahimari tiadsa tojajaro acconi huadimanadsa todsepe tiquejenanijine tiadeni eccoramana-ridsanitohui. Tiadeni mota naqui tiadeni inanadsoque-maneje camaridsanitohui. ¹⁷Occa madija tiquejenajarojinepi madija huapimapa tiadenidsa jiperaququiri nahitohui. ¹⁸Naraha Dio tiadeni tohuacahua-baqquihitohui. Pohua jipa tadsa naco titatideni conani ojarie amossineje camajeranitohui. ¹⁹Nadsama tiadenidsa ohuattipi: ¡Dacoco tijiraji! Najaro huadie tinahanamana-dsanapodsapi tiadenina ticassiejeranitohui –najari Jeso.

²⁰Jesopa dsama jicanicca ima denima mari icanabaquujari: –Nidsa dsotode ticcadeni odsa panani Jerosare huapihuaji jajadsirededeni cottajahuajanimanaha jica nahi qqui tiquinadsapi: “Jerosare jicanicca huada bacco tani” tiquinana. ²¹Nadsama aji dsama Jodeahuaji timadiridsa-manajaropi

ssonohuaji tidomo toqqemorana. Jerosarelsa timadimanajaro naqui tidomo toccana. Aji huidsajadsa timadimanajaropi odsa pananihuaji jai tijani tejerana, tijicarana.

²² –Najaro ima oppinabote tojajaropi Jerosarecca madija iboququiri nadsapa Diocca najidsohue pohuadenidsa ssonarinitohui. Pina Dio Atti dsodo napojarossa nehe tojanitohui. ²³Najaro ima oppina tajaro bacco nadsapi amoneje jiamanajarodeni, bacconideni ijimanagerodeni naqui joppa toquinanijine tohuati nahanaququiri nanitohui. Jehé, ajijaro dsamacca madija Diocca najidsohuejine ocasserani ahuamanahitohui. Diocca huadie imeni ajajari madijadenidsa ssonarinitohui. ²⁴Jadsirejinecca massitodsa motadenipa jicaridsahitohui. Motadeni naco jajadsirededeni itadamanaridsadsa pohuadeni dsepedsa toquejenadsapa dsama onihihuaji dsama onihihuaji iaccanibaququiridsamanahitohui. Nadsapa jodio quejena-jarajarideni deni toquejena-dsapa Jerosare inatabaccoramananitohui. Pohuadenijine Jerosarepi pina ttai ttai tojajarossa nanitohui. Naraha dsotodepi poccadeni huajano Jerosarehuaji madimananijine pajiranissa tadsapi najidsohue jicanitohui –najari Jeso.

Jeso ccaronapomahicca ima

Mateo 24.29-35, 42-44;

Maraco 13.24-37

²⁵Jesopa ima denima huati huati tajari: –Ima nahatoququiri tiquinaponijinepi maji, abadsico, abadsico bedi najaridenipa tojidsaridsahitohui. Aja memehuajicca tojidsaridsadsapa namihuaji

madimanajarideni jabojo quinahitohui. Coridsa imenicca passo poni ssodadani tojidsadsapi mohuini oppina tajarojine madija huapima jabojo quinahitohui. ²⁶Jidapapa aja maji, abadsico, abadsico bedi naco dacoraquiri naraha najaro ima tojadsapi meme dsadsa nadsa memecca huapima huenene huenene canahitohui. Madijapa: “¡Iadsa dsama oppina tani! ¿Nejecoma napadseje?” quina-dsa cappinamanadsapa tossamoridsamanaja huahuatia cossamanerinaja camahitohui. ²⁷Nadsana ohuapi Madija Bedi ojararoa meme essenima oquejemehe occaronapomani madija huapima qqui toquinahitohui. Occa dacorehe, occa deni tojehe ahuato tanitohui. ²⁸Madija ohuahapa cappinaridsamanaraha tiadeni occa madijapi aji huati onajaro qqui tiquinadsapi pina tetidsemanana. Memehuaji ticattamacossassa canana. Ohuapi tiadeni odinibaquiniijine titohuideni occaronanitohui –najari Jeso.

²⁹⁻³⁰Nadsapa ajijaro namidsa imadinicca imadsa pohuadeni mari icanabaqqijari: –Jari, ahua iquiera tahimaridsa ticahatteraji. Ahua iquiera, ahua huapima naco eppe moro nimaniji qqui tiquinadsapi: “Jehe, dsadsajade toje-manani” titiquina najaro. ³¹Pina najaro imassa najaro aji dsama jicani tahimari huati huati onajaro qqui tiquinadsapi: “Jehe, Diocca cacahuehe tohuajirajonani” tiquinana, onajaro –najari Jeso.

³² –Pajissara tiadenidsa huati onajaro: Aji dsama jicani tahimari huati huati onajarocca madija dsoqquemana-jaraccadsama

najaro ima huapima tojanissa tani qqui toquinacahitohui. ³³Meme, nami naqui jicaridsanissa tanitohui. Naraha ohuattipi jiquejeranitohui. Aji huati huati onajaropi najarossa nanitohui –najari Jeso.

³⁴ –Paji tiadenipi tiadeni tecahuamananissa taji, tibodidendi ccara-cossa-jeranijine. Aji bica tejeraraha tohuini tiquinajaroccapi tineboridsamanaji. Aji dse tiquinadsa comani teteridsamana najaro naqui tineboridsamanaji. Aji timadimanacca tohuira tibodidendi huahuato najaro naqui tineboridsamanaji. Najaro tinebomanajeradsa dsama jicanicca huada amadsati bacco tadsapi huajo ticanirenitohui. ³⁵Najaro huada bacco tadsapi pina tajapa abadsa cassonaridsa tohuittamanajarissati tiquinarana. Dsama jicanicca oppinehepi ajijaro dsama huapimacca madijadsa ssonarinitohui.

³⁶Najaro noppineni tinajoramanehe timadimanaji, onajaro. Diodsa huati huati titidsanapomana naji, aji ima oppina tehe tojadsa dsori ticanirenijine. Ohuapi Madija Bedi ojararoa nidsa occaronapomadsapi ima jirehe obaccohuaji tidomodeni huanijine naqui Diodsa huati huati titidsanapomana naji, onajaro –najari Jeso.

³⁷Jesopa huada huajjiradsa Diodsa dada toqqimahuaji maride totoja najari. Dsomedsapa Ssono Oribo quiquinana-hihuaji totoccani najari. Nahidsa huahuada najari. ³⁸Naraha madija huapimapa dsidsidsamassa Diodsa dada toqqimahuaji bacco bacco nanajonamana najari, Jesocca marinaja mittamanahijine.

Jeso todsepe tojahijine ima najoramanajari

Mateo 26.1-5, 14-16; Maraco 14.1-2, 10-11; Huano 11.45-53

22 ¹Jodiodenicca ejete imeni tohuajirajonajaro, oninipi *Pan ssaja tajarahicca. Najaro ejete onini onihipi *Pascoa. (Ettidsapi: Dio tossoniqquimajari, inajaro.) Najaro ejete toja-jeraccadsapi ajijaro ima tojajaro. ²Dada toqquimade taminedeni, jodiodenicca marinaja maridedeni quinajaridenipa Jesodsa jiperacquiri nadsa attidenia: –¿Jeso nejecoma inandasa dsoqquehijine? –quinajari. Naraha pocca madija noppine cappinamanajari. –Jeso dama inahi qqui toquinadsapa mohua mohua canarana –quina-jari.

³Nadsapa Joda. Pohuapa Jesocca dodosse tabaqqui 12 quina-jari ojaría. Pohua oni ohuahapa Iscariote. Pohua bodidsa imasiri mamaride Satana toqquedsimadsapa pohuana Jeso eccorahijine bodi najorajari. ⁴Nadsapa dada toqquimade taminedeni, nahicca odsa cacahuadedeni quinajaridenidsa Joda huatide toccajari. –Jeso tidsepedenidsa onanahijine, onajaro –nadsa pohuadeni tedseje Jeso dama quinahijine imahaha canajari. ⁵Nadsapa huatidsemanadsa: –Jehe, nema tadsapi tiadsa dsiniro da inanitohui –quinajari. ⁶Nadsapa Joda jehe nadsa bodi najorajari. Toccanidsapa Jeso pohuadenidsa eccorahijine innocodsarisajari. Pohua bodipa: –Madija nohue quiradsa Jeso dama tiquinajo, onanijine –najari.

Ia Medsedecca jipaqqie

Mateo 26.17-29; Maraco 14.12-25; Huano 13.21-30; 1 Corintodenidsa 11.23-26

⁷*Pan ssaja tajarahicca ejete bacco tapojaropi huada 7 nehe jicanijine. Najaro ejetecca huada tahideccadsa jodiodeni pohuadeni motta edede bedi Diodsa da da quiquinanajari. Edede bedi inandsoqqe-manadsa ibanamanadsapa jipamanajari. Najaro ejete oninipi Pascoa quinajari. ⁸Nadsa Jesopa Pedro Huano tedseje dosse inabaqquijari: –Jidapana Pascoacca jipaqqie tinajoramanapoji, dsome ijipaqquinijine –najari. ⁹Naraha pohuadeni attipa: –¿Nejecohuaji inajoranijine? –quinajari.

¹⁰⁻¹¹Naraha Jeso pohuadenidsa huati tajari: –Jerosarehuaji ticadapoji. Nahidsa madija jojoridsa passo dsojo tanihi qqui tiquinadsapa najari natti ticadamissadsa pocca odsa bacco tiquinana. Nadsapi nahicca odsa jinededsa huati tiquinana: “Ia Maride attipa: ‘¿Nejecohuajicca coba canahuajaninidsa Pascoacca jipaqquedsa ojipanijine occa dodosse tabaqqui tedseje?’ napaja” tiquinana. ¹²Nadsapa pocca odsa tetepicca coba canahuajanini imeni tiadenidsa nohue inanitohui. Nanidsapi huahuanari, huihuittari najoraponi. Nanidsana jijipa tinajoramanaponijine –najari Jeso. ¹³Nadsapa tohuedadsapa pina Jeso pohua huati tajaridsa najaro odsa najorani qqui toquinajari. Nanidsa Pascoacca jipaqqie dsome jipaqqi-manahijine najoramanajari.

¹⁴Jipamanahijinecca maji bacco tadsapa Jeso pocca dodosse

tabaqqi tedseje jipamanahijine huahuanaridsa jassi nahuajani-jari. ¹⁵Nadsapa Jeso pohuadenidsa huati tajari: –Obodipi: Ocasserani ohua-jeraccadsama occa dodosse tabaqqi tedseje Pascoacca jipa-qquiedsa ijipaqqi naccaraho, ohodsanapo najaro. ¹⁶Nadsama ajijaro ejetecca jipaqqiepi ojipapomanijine huaji taccani. Nidsa Diocca cacahuehe tojadsana nanidsana ijipa-qquipomanitohui –najari Jeso.

¹⁷Nadsapa Jeso dsedse equidi nadsa Diodsa huati tajari: –Jehe Abi Dio, ticca daniji iadsa bica tahi –najari. Nadsapa pohuadenidsa huati tajari: –Aja, tiadeni huapima dse tiquinajo. ¹⁸Ajijaropi tiadenidsa huati onajaro: Diocca cacahuehe tojanijinecca huada bacco tejera-ccadsapi uva ppejene dse onapomajaraccatohui –najari Jeso.

¹⁹Nahi dsotodepa pan pohua dsepedsa idi nadsa Diodsa huati tapomajari: –Jehe Abi Dio, ticca daniji iadsa bica tahi –najari. Nadsapa icanarobedsa dside jai da, dside jai da inaridsajari. Nadsapa Jeso huati tajari: –Ajijaropi ohuemecca ima. Ticassiejeranijinepi ohua ohuana ohua ohuaccoranijine. Nidsa ohua nohue ojiradsa naqui ohuadsa tetideni ajimamana nejeranijine ajima titinanamana nana, onajaro. Aja pan ocanabobiridsadsa tiadenidsa da onaridsadsa tijipamanajaropi titiqueriquimana nadsa nema titidsanapomana nanijine, onajaro –najari.

²⁰Jipaqquimanahi natti naco dsedse equidi nadsa huati tapomajari: –Ajajari dsedsecca imapi *Dio madija tedseje jehe canirehijinecca ima dsati tojanijine. Nidsa ohua

odsoquedsa ohuemene toccadsapi najaro jehe canireniji dsati pajissa tojanitohui. Aji ohuemene toccajaropi tiadenidsa ima bicani tojanijine. Najaropi ticcadeni imasiri manaconi ohuadsa tojadsapi ticassiejeranijine –najari Jeso.

²¹–Nadsa aji ijipaqquinidsa ohua ccaccorade naco ajijaro huahuanaridsa ohuadsama jipade huittarihi. ²²Naraha ohuapi Madija Bedi ojajaroa nidsa odsoqquenitohui. Pina Diojine maittaccadsama otedsejemacca ima najorapojarossa onanitohui. Naraha ohua ccaccoradedsa oppina tehe tojanitohui –najari Jeso.

²³Nadsapa pohuadenira huati tocanirere canadsa: –¿Nejecojarina Jeso dsoqquehijine madija dsepedenidsa inanahijine? –naridsamanajari Jeso huatimadedeni.

–¿Nejecojarina iadsa deni tojajari? –quinajari

Mateo 20.25-26; Maraco 10.42-43

²⁴Jesocca dodosse tabaqqi pohuadenira ahuaji huati ahuaji huati quinadsapa: –¿Nejecojarina iadsa deni tojajari? –quinajari.

²⁵Naraha Jeso pohuadenidsa huati tajari: –Madija ohuaha *jodio quejena-jarajaridenicca tamine huapimapa dossede dacoraquiri nadsa poccadeni madija dosse dosse quiquinajari. Dodossede ohuahadeni naco deni toquejensapa attideni dacoradsa poccadeni madija dosse dosse nanaridsamana najari. Pohuadenidsa poccadeni madija attidenipa: “Ia acco camade tiquejenani. Iadsa bica taniccara tinanamanajaro” quinaraha maidsa maidsa quinajari. ²⁶Naraha aji

ohuadsa tiquejenaropi pina najari taminedenissa tiquinejeraji. Aji tiadeni deni tijeje camajaropi pina dsabisso dossehedsa ibora tajarissa tiquinadsana bica tani. Madija dossede tijadsa naqui: “Ohuana deni ojani” tejeraji. Ticca madija bijideni acco ticamabaquirdsahina bica tajaro. ²⁷Ajaro namicca madijapa “Ojipana” nadsapa pocca huihuittaridsa huittaridsa pocca medsena jijipa dsojo dsojo najari, pohua medsedecca huahuanaridsa hua inarihijine. Naraha tiadenidsa huati onajaro: ¿Nejecojarina deni tojajari? ¿Madija huihuittaridsa huittarijaripa deni tojajarico? ¿Pocca medsena deni tojajarirana? Aja huittarijarina deni tojajari. Pocca medsepa ajamani tojajari. Naraha ohuapi tiadeni Medsede ojaraha pina ticcadeni medse ojararossa najaro, tibijideni acco ocamabaquijaro. Tiadeni naqui nema tiquinana, onajaro –najari Jeso.

²⁸ –Aji ohuapi ocasserani ohuadsa, madija ohuadsa ima oppina tanicca inanamanadsa naqui tiadenipi ohuadsa paji timadimanarini dsanapojaro. Ohuatimade disseraquiri tiquinajaro. ²⁹Nema najaroa aji ohua tiadenidsa onanijinepi pina aji occa Abi ohuadsa inanajarossa najaro. Ohuadsama tiadeni naqui madija dossede tiquejenanitohui, onajaropaji. Pina occa Abi ohuadsa huati tapojarissa najaro, ohua cadossejarissa najaro: “Nidsa madija dsama huapimacca dossede tijanitohui” napode. ³⁰Nidsa occa cacahuehe bacco tadsa huapimacca tamine ojadsa naqui tiadenipi occa huahuanari aji ohua

ojipanihuaji ohuadsama tijipamana-dsanaponitohui. Ticcadeni cacahuehe icca madija jodiodeni aja icca idi *Isaraeri pohua bedi 12 quinajarideni potemahi techuabaquui-manaridsadsapa poccadeni tamine tiquejenanitohui. Nadsama tiadenipi pohuadeni dossedecca huihuittari 12 quinajarodsa ima cattemade jassi tinariridsanitohui –najari Jeso.

**Pedro pohua namaidisahijine
Jeso huati tapojari**

*Mateo 26.30-35; Maraco 14.26-31;
Huano 13.36-38*

³¹ Jesopa Ssino-Pedrodsa huati tajari: –Ssino, tibodi huatoji. Satanapa titohuideni tonacoma-baqquihi. Pihuapa titohuideni Diodsa huati tajari, tiadeni nattome tabaqquihijine. Pina aroso jidsadsa trigo etero toccahijine qqero huira, qqero huira quinajarissa najari ohua tinebomananijine tiadenidsa ocasserehe inananitohui. ³²Naraha Ssino, titohui Diodsa huati huati onajaro, ohua tinebo-geranijine. Ohuadsa epeje tanitohuiraha, otohura tapomadsapi timecotedeni aja ohuadsa jehe quinajaridenicca jeheniji todacoranijine pohuadeni acco ticamabaquijo, onajaro –najari Jeso.

³³Naraha Ssino attia: –Ohua Medsede, ohuapi nema onejeranitohui. Toponi cocorodsa tia coro idsimamanadsa naqui ohua naqui onajorani, tiadsama ohuedsanijine. Tiadsama odsoqquenijine naqui onajorani –najari.

³⁴Naraha manaco Jeso attia: –Pedro, tiadsa huati onana: Nidsa ajijaro dsome ssijaricossanihuaji

tacara huahua najaraccadsa tetti tinamaidsanitohui. Ohuadsa: “Onocco jidsa tani” tanitohui. Dsotode naqui: “Onocco jidsa tani” tapomanitohui. Dsotode naqui nema tapomanitohui –najari Jeso.

**Ima oppina tanicca
Jesodsa tojabote najaro**

³⁵Nadsapa Jeso pocca dodosse tabaqqidsa huati tajari: –Madija maride tiquejenaridsanjine tiadeni dosse onabaquipodsa jai tija-ridsade. Ticcadeni sacco, ticcadeni dsiniro, ticcadeni sapato najari jirehe jai tijaridsaji onadsapi ¿nejecora ticappiramanatte?

–najari Jeso. Naraha pohuadeni cacomeramanajari: –Nohuerade. Icappira nehe jaijaridsa-jerade –quinajari.

³⁶Nadsapa Jeso pohuadenidsa huati tapomajari: –Naraha jidapapi occa dosseniji tahidessa nejerani. Jidapapi sacco, dsiniro ticajimana-dsapi tiaccamanaji. Nadsama jadsirecca massito ticappiramanadsa naqui ticcadeni ssirinijinecca huehuedsa da tiquinadsa mita tiquinaji. ³⁷Nadsapi otedsejemacca ima tiadenidsa huati onana: Dio Atti dsodo naponiccapi pajissa ohuadsa tojanitohui. Pohua Atti cacomerabote Isahia dsodo inaponipi ajima najaro: “Nidsa madija attidenipa: ‘Ajajaripa tabaccoraquiri najaridenidsama quejemajari’ quinahitohui” napohui nade Isahia. Najarossa najaropi ohuadsa madija attideni nama quinahitohui –najari Jeso.

³⁸Naraha pohuadeni attipa: –Ia Maride, ajidsapi jadsirecca massito capamehe icajini –quinanaja

Jesopa: –Jehe, najarodsapi tipajiramanani –najari.

**Jesemanihuaji Jeso Diodsa
huati huati tajari**

Mateo 26.36-46; Maraco 14.32-42

³⁹Nadsapa Jeso huati taha jicadsapa odsadsa toqquenadsa ssono Oribohuaji toqqemorajari. Aja pohua huajjiradsa totocca nahihuaji toccajari. Pocca dodosse tabaqqi naco pohuadsa jai tojemorajari.

⁴⁰Aja pohuadeni quequeriquimana nahihuajicca ahua oribo ppa nahi dopehuaji bacco toquinadsapa pohuadenidsa huati tajari: –Jari, Diodsa huati huati tiquinaji, aji ticappinamanadsa ima tinanamanajeranjine –najari Jeso.

⁴¹Jesopa pocca dodosse tabaqqi jassi tahidsa toqqequimajari, cahuaqqi nadsa pohua pitodsa huittadsa Diodsa huati huati tajari.

⁴²Ajama najari: –Abi, jipa tinadsapi otedsejemacca ima oppina tanicca ohuadsa toja-jerana, onaraha. Madija huapimacca ima manaconi najidsohue ohuadsa tojadsapi ocasserani ohuanitohui. Pina dsedse bidabote dse onanijinessa najaro. Najaro onahananjine jipera onaraha ohua jipa onanica tohui onejerajaro. Tia jipa tinaniccana paji. Najarodsana ibora onajaro –najari Jeso.

⁴³Nanaja nahi Jeso pohua Diodsa huati huati tahihuaji Diocca dodosse memehujicca ahuatajari. Najaripa Jeso acco icamadsa inadacorajari. ⁴⁴Naraha Jeso pohua bodi ocassera-ra canajari. Diodsa huatide todacorahi nadsapa taniccojari. Pohua taniccone toccadsa namidsa catojadsapi pina ama

motarehe ssaboro ssaboro najarossa najaro.

⁴⁵Diodsa huati taha jicadsapa pocca dodosse tabaqquihuaji ccani-jari. Bacco nanidsapa cahadijahira qqui tajari. Bodideni oji quinajari-jine tocamiireradsapa cahadija-jari. ⁴⁶Naraha pohuadenidsa huati tajari: –¿Nejecotohui ticahadija-jaro? Nocco tiquejenadsa Diodsa huati huati tiquinaji. Ima oppina tehe tojadsapi tijaparimanadsa ima tinanamana-jeraniijine, onapa –najari Jeso.

Jeso dama quinajari

*Mateo 26.47-56; Maraco 14.43-50;
Huano 18.1-11*

⁴⁷Jesopa huati huati naccaraha madija huapi taha bacco najonamanajari. Jodana tahidejona-jari. Pohuapa Jeso pocca dodosse tabaqqui 12 quinajari ojariaraha pohuana Jesohuaji tohuajiressi, pano mose inajari. ⁴⁸Naraha Jeso attipa: –Joda, ohuapi Madija Bedi ojajaroa ¿opano mose tajaropi aja ohuadsa huadiqquri najaridenidsa ohua teccorajaroqui? –najari.

⁴⁹Naraha aja Jeso huatimadedeni attidenia: –Ia Medsede ¿massitodsa itacaridsaco? –quinajari. ⁵⁰Nadsapa Jesocca madija ojariana dada toqqimadedenicca tamine deni tojajaricca medse huaribo nahatonihuajicca ca taneje tajo canajaro. ⁵¹Naraha Jeso attia: –¡Apajana, denima ca tejeraji! –najari. Nadsapa taminecca medse huaribo bara icanadsapa huaribo tocabiquemanijari.

⁵²Jesotohui jahijonajaridenipa aja dada toqqimade taminedeni, Diodsa dada toqqimahuajicca

cacahuadedeni, ime jocohuideni quinajari. Najaridenidsa Jeso huati tajari: –¿Nejecotohui tiadenipi jadsirecca massitoma, huahuaccama jai tijajonajaro? Nema tiquinadsapi pina bobotidetohui jai tijajonajaro-ssa najaro. ⁵³Nadsa tiadenidsama huajijiradsa Diodsa dada toqqimahuaji ohoquejema naraha ohua dama tiquinehe nejerade. Naraha ohuadsa ima tinanamananijinepi dsidsinidsara jai tijajonajaro. Jidapapi tijinedeni dsidsini jinede deni tojajari –najari Jeso. Nadsapa Jeso dama quinajari.

Pedropa Jesodsa: –Onocco jidsa tani –najari

*Mateo 26.57-58, 69-75;
Maraco 14.53-54, 66-72;
Huano 18.12-18, 25-27*

⁵⁴Nadsapa Jeso dama quinadsa dada toqqimadedenicca tamine deni tojajaricca odsahuaji iaccamanajari. Naraha Pedropa Jeso iaccamanahi nattideni huajima tohuanamissajari. ⁵⁵Odsadsa bacco toquinadsapa boronidsa dsippo inadsamanadsa jiade jassi nahujanijari. Pedro naco pohuadenidsama huittabacossajari. ⁵⁶Naraha najaro odsacca medse dsuhuato Pedro dsippodsa huittahi qqui tadsa icattoma nadsa aja jassi nahujanijaridenidsa huati tajaro: –Ajajaripa Jesodsa ccaccaridsa nade –najaro. ⁵⁷Naraha Pedropa pohua namajidsajari: –Dsohuato, ohuapi pohuadsa onocco jidsa tani –najari.

⁵⁸Nahi dsotode madija ohuaha naco Pedro qqui tadsapa: –Tia naqui Jesocca madija tijani –najari. Naraha Pedropa pohua

namaidsapomajari: –Ohuapi najari-cca madija ojajerani –najari.

⁵⁹Nahi dsotode maji ojaría tossoniquimadsa madija ohuaha attipa: –¡Pajissade! Ajararipa Jeso huatimadedija. Puhuapa dsama arobeni Carireahuajicca madija jidsera tahi –najari.

⁶⁰Naraha manaco Pedro pahuadenidsa huati tajari: –¿Nejecoma najaro imara huati huati tiquinajaro? Ohuapi najaro ima ssamo onani –najari. Pedropa najaro ima huati huati nanaja tacara huahua najari.

⁶¹Nanaja Jesopa cattahuajanihi nadsa Pedro icattoma najari. Nadsapa Pedro pahuadsa Jeso huati tapojaricca ima bodi huatomanijari: –Nidsa ajijaro dsome ssajaricossanihuaji tacara huahua najaraccadsa tetti tinamaidساني 3 nanitohui –napohui nade. ⁶²Najaro ima Pedro bodi huatomanidsapa toqquenajari. Pohua motta oji oji najari.

Jesodsa jidsa jidsa quinajari

Mateo 26.67-68; Maraco 14.65

⁶³Jeso cacahuadedenipa huadiedsa jidsa jidsa quinajari. Jeso huaccade jo narihi najari. ⁶⁴Nocco ssoque quinadsa naco pahuadsa huati toquinajari: –Jari ¿nejecojari tia idajari? ¡Tecomerajo! –quinajari. ⁶⁵Attideni tabaccora tajarodsa itamassoquimanajari.

Jodiodenicca ima cacattemahuaji Jeso pohua cacomerajari

*Mateo 26.59-66; Maraco 14.55-64;
Huano 18.19-24*

⁶⁶Ssajadsapi jodiodeni ime jocohuideni, dada toqqumade taminedeni, jodiodenicca marinaja maridedeni quinadsa

queriquimanajari. Nadsapa jodiodenicca *ima cacattemadedeni deni toquejenarideni quequeriquimana nahihuaji Jeso iaccamanajari. Nahihuaji huapima jai tojedsimadsa pahuadsa huati toquinajari: ⁶⁷–Cristo-Mesia tijadsapi iadsa tia tecomerajari: “Ohuapi Cristo-Mesia ojani” taji –quinajari.

Naraha Jesopa: –Tiadenidsa: “Ohuapi Cristo-Mesia ojani” onadsapi ¿ohuadsa pajissa tiquinapadseje? Pajissa tiquinejerani nahato onaponi. ⁶⁸Manaco tecomeramanijine tiadenidsa huati onadsapi ¿tecomeramanapadseje? Tecomeramana-jeranitohui –najari. ⁶⁹–Ohuapi *Madija Bedi ojajaroa nidsa dsotode Dio Dacorabote ohua deni tonanadsapa Pohua inori nahatonihuaji ohuittarinitohui. Nanihuaji ohuittaridsapi Abi Pohua tedseje dosse dosse onanitohui –najari Jeso.

⁷⁰Naraha pahuadeni attia: –Nema tadsapi ¿tiapi Dio Bedi tijaqui? –quinajari Jesodsa. Naraha Jeso pohua cacomerajari: –Jehe, tiadeni ohuadsa nema tiquinajaro-paji –najari. ⁷¹Nadsapa pahuadeni attia: –Jidapapi pocca ima huati toquinahijine madija ohuahatohui huahua inejerana. ¡Epeje! Pohua pohua cacomeradsa pohua atti oppina tanicca imittanissa tani –quinajari. Nadsapa najaro imadsa dsoqqehijine najoramanajari.

Tamine Piratodsa Jeso iaccamanajari

*Mateo 27.1-2, 11-14; Maraco 15.1-5;
Huano 18.28-38*

23 ¹Nadsapa jodiodenicca taminedeni nahidsa queriquimanajari huapimapa

totehemamanadsa tamine Piratohuaji Jeso iaccamanajari. Tamine Piratopa romanodeni. Pohuapa jodiodenicca dsama cacahuade tojajari. ²Tamine Piratohuaji bacco toquinadsa pohuadsa poccadeni maidsehe huati toquinajari: –Jesojinepi ima bica tejerani, pocca ima ajima nani –quinajari. –Jesomadija inequeriqquidsa mari icanabaquidsapa romanodenicca cacahueheda tojiperamanajari. “Iara ia ecahuana” quinajari. Pocca marinaja naqui: “Romanodenicca tamedsa ticcadeni dsiniro mota naqui paca tiquinejeraji” nanajanahi. Nadsama pohua atti onihinaqui: “Ohuapi Cristo-Mesia, ticcadeni tamine deni tojahicca ccajonahitohui quiquinanajari ojan” nahanaco imittani –quinajari.

³Nadsapa Pirato Jesodsa huati tajari: –¿Tiapi jodiodenicca tamine tijaqui? –najari. –Jehe, tetti nema tajaropaji –najari Jeso.

⁴Naraha Piratopa dada toquimade tamededenidsa, nahidsa madija queriquimanajarideni huapimadsa huati tajari: –Ajajaripicca dsamacca marinaja inajidsojecama-jerani. Ima oppina tanicca inana-jerani. Tettidenidsa onajidsohuijine pajira-jerani –najari Pirato. ⁵Naraha pohuadenipa denima jadsirema johua johua quinajari: –Ajajari madija mari mari naridsadsapa pohuajine mohuaniji tojaridsani. Dsama Carireahuaji mari mari napojari. Nahi dsotode naco aji icca dsama Jodeahuaji mari mari naridsadsapa ajadsa bacco najonajari –quinajari.

⁶Madija attideni: –Dsama Carireahuaji mari mari napojari

–quinahi mittadsapa Piratoattia: –¿Ajajaripa Carireaccaco? –najari. ⁷Nadsapa jehe quinahi mittadsapa tamine Herodehuaji Jeso iaccamanahijine dosse inajari. *Herodepa Carireahuajicca cacahueraha Jerosaredsa huada pamehe madicajari. Nadsapa Herodehuaji Jeso iaccamanajari.

Tamine Herodedsa Jeso iaquedsimamanajari

⁸Tamine Herodehuaji Jeso iaquedsimamanajari. Aja Herodepa tahide Jeso tahimari mimitta napodsapa: –Jeso qqui onaccaraho –nanaja najari. Nadsapa pohuahuaji Jeso iaquedsimamanahi qqui tadsapa huatidsejari. –Jehe, jidapanana pohua canahatori canahi qqui onanitohuia –najari. ⁹Nadsapa Herode Jesocca ima mittahijine pohuadsa huati huati dsanaporaha Jesopa pohua cacomanajari. ¹⁰Naraha nahihuaji naco dada toquimade tamededeni, jodiodenicca marinaja maridedeni tedsejepa dissassera tadsa ima onihima onihima huati toquinadsapa: –¡Jesopa tabaccora tahi! ¡Tinajidsojo, tinajidsojo! –quinajari. ¹¹Nadsapa Herode pocca soldadodeni tedseje Jeso momohua inamanajari. Jesodsa maidsamanadsapa etero bica taniccadsa inehedsamanajari. Pina tamedessa inamanadsa pohuadsa jidsa jidsa quinajari. Nadsapa Herodepa tamine Piratohuaji Jeso dosse inani-pomajari. ¹²Tahidepa Herode Pirato tedseje ahuaji jipera ahuaji jipera quinapojari. Naraha Jeso ahuajidosse, ahuajidosse quinadsapanajaro huadadsa cajonerajari.

– **Jeso dsoqquehi bica tahi**
– **quinajari**

Mateo 27.15-26; Maraco 15.6-15;
Huano 18.39–19.16

¹³Nadsapa tamine Piratopa dada toqquimade tamedeni, jodiodeni ime jocohuideni, madija ohuahadeni naco huahua inajonabaquidsa queriqquijonajari. ¹⁴Nadsapa pohuadenidsa huati tajari: –Aja Jeso ohuadsa teccajonamanapodsapa tettidenipi: “Pohujine mohuaniji tojaridsani” tiquinaraha tiadeni tinoccodenidsa pohuadsa huati onapa. Pocca ima omittadsapi pina tettidenissa nejerani. Pohuadsapi ima nohuerani –najari. ¹⁵–Tamine Herode naco pocca ima mittaraha pocca ima tabaccora tanicca nohueradsa ohuahujidosse inanipomajari. Aja Jesopa ima tabaccora tanicca inana-jeradsapi pohuapa dsoqquehijine bica tejerani. ¹⁶Nama nadsapa pina ocadossebaquidsa cossi inaquimanaha jicadsapa dosse onanina, toccanijine –najari tamine Pirato.

¹⁷⁻¹⁸Naraha madijapa Pirato: –Jeso toccanijine –nahi mitta-manadsa huapima johuahua johuahua canajari: –¡Najaripa dsoqquena! ¡Aja coro todsimajari Barabana tijine qquenajo! –quinajari. [Aja huajano huajiradsa ejete Pascoa tojadsapi Piratojine toponi cocorodsa madija huedsamanajari ojaria qquequena najari.] ¹⁹Naraha Baraba pohujinena odsa panani Jerosaredsa madija inequeriqquidsa romanodenidsa mohua mohua quinadsa coro idsimamanajari. Pohujine naco madija dsoqquejari.

²⁰Piratopa Jeso tappa inahijine tohuini nadsa madija huapimadsa

huati tapomajari: –Jeso apaja onanana. Pohuadsapi ima nohuerani –najari. ²¹Naraha pohuadenipajadsirema johuahua johuahua canapomajari: –¡Ahua porimacossanidsa dsoqquena, dsoqquena! –quinajari.

²²Naraha Pirato pohuadenidsa huati tapomajari: –¿Naraha nejecotohui dsoqquehijine? ¿Nejeco imara inanajaro? Jesocca ima omittadsapi imari tabaccora tanicca nohuerani. Pohua inanadsoqquehijinepa bica tajarahi. Jesopa pina ocadossebaquidsa cossi inaquimanadsapa apaja onanadsa toccanijine, onajaro –najari Pirato.

²³Naraha madijadenipa Jeso ahua porimacossanidsa dsoqquehijine tohuini quinadsapa dacoco radsa denima johuahua johuahua canapomajari. Nama dsanapomanadsapa pohuadenina deni toquejenajari.

²⁴Nadsapa Piratopa pohuadeni attidsa jehe najari. ²⁵Madija Baraba qquenahijine jipaquiri nadsapa Piratojine qquenajari. Aja Barabapa madija inequeriqquidsa romanodenidsa mohua mohua naridsamanadsa coro todsimajari. Pohuapa madija ijine ahuahiraha ijinedeni qquenajari. Naraha Jesona dsoqquehijine pohuadenidsa eccorajari. Pina pohuadsa huati toquinapojari-ssa inananijine Jeso dsoqquehijine icadossebaquijari.

Jeso ahua porimacossanidsa
coba idsanamanajari

Mateo 27.32-44; Maraco 15.21-32;
Huano 19.17-27

²⁶Soldadodenipa Jeso iacca-mananaja dsama Sirenecca madija Ssinopa huidsajahuaji ccanidsa bacco ijidsamanajari. Jeso ahua


porimacossani dsojo inaraha ja tojadsa soldadodenipa Ssino dama iijdsamanadsa icadossemanajari: –Manaco tia ajararicca ahua porimacossani dsojo tinaji –quinajari. Nadsapa ahua porimacossani Ssino johuidsa ibarimanadsa Jeso natti dsojo inamissajaro.

²⁷Madija huapi taha Jeso natti jai tojajari. Amoneje naqui nani toquejemamanajarodeni Jesotohui oji oji dsanapomanajaro, jadsirema johua johua dsanapomanajaro.

²⁸Naraha Jesopa ponidenihuaji qqui nanidsa huati tajari: –Aji Jerosarecca amoneje tiadenipi otohui oji oji tiquinejeraji. Aji tiadeni titohuideni, aji ticcadeni ejedenitohuira oji oji tiquinana –najari. ²⁹–Aji otohui oji oji tiquinajaropi nidsarani-bote aji Jerosaredda ima oppina tanicca bacco nadsa nanidsana pina aji otohui oji oji tiquinajaro-ssa tiquinanitohui. Najaro huada bacco tadsapi madijapa ajama quinahitohui: “Amoneje ccaranipi

bicani ahuamanani ojimana-jerani. Ejedeni cappiramanajaroline ojimana-jerajaro. Ponideni dsojorindsa ejedeni tomide nohue quirajaro naqui ojimana-jerajaro” quiquina-nahitohui. ³⁰Ima oppina tani bacco nadsa madijapa cappinamanadsa ajama quinahitohui: “Jaho, ssono imeni dequerajaro iahuaji cojo naronaccaraho, bodi iquejena-dsapi nani oppina tanicca qqui inejeranijine” quinahitohui. ³¹Aji ohuapi imasiri onana-jeraraha ohua inajidsomanajaro. Naraha aja Jerosarehuaji madinanajarideni imasiridsa disseraquiri nadsapa najidsohue pohuadenidsa denima oppina tanitohui –najari Jeso.

³²Madija pamaha naco Jesodsama topamajonahijine iaccabaquimanajari. Pohuadenipa botijidede raja, madija inanadsoququimana najarideni. ³³Ssono Totati Tonanissa nani quiquinanahihuaji bacco tomoramanadsapa *ahua porimacossanidsa que tahijine Jeso



coba idsanamanajari. Coba idsanamanaha jicadsapa acca icanamacossa-manajari. Aja botijidede raja, madija inanadsoqquemana najarideni naco coba idsanamana-ridsajari. Ahua porimacossani onihidsa, onihidsa naridsamanajari. Ohuahapa Jeso que tahi inori nahatonihuaji, ohuahapa Jeso que tahi inori ssamohuaji quinajari.

[³⁴Nadsapa Jeso Imehidsa huati tajari: –Abi, pohuadenipa ohuadsa ssamoquiri nadsa ohua inanadsoqqe-manaraha epejena. Aji ocasserani ohuajaro manaconipi pohuadenidsa tinana-gerana, onajaro –najari Jeso.]

Nadsapa soldadodeni Jesocca eterotohui siba bedenidsa coro coro quinajari, –¿Pocca etero nejecojari-dsana tojanijine? –quinadsa. Najaro sibadsa ittomemanadsapa pocca etero pohuadenidsa ojari ojari naridsajaro. ³⁵Madija huapima nahidsa cattade domo huajari. Taminedeni naco nahidsa cattade domo huadsa attideni tabaccora tadsa Jesodsa jidsadsa jidsadsa canajari: –Ajana, madija ohuaha inassijabaquira jidapanana pohua tonassijana. Pajissa madija Tonassijade Cristo-Mesia tojahijine Dio icattejidsadsapa nama nahi qqui inana. Nahato taranaja –quinajari.

³⁶Soldadodeni naco Jesodsa jidsadsa jidsadsa canajari. Nadsapa jai tojessidsa uva ppejene ssicata, bidada najari Jeso dse nahijine da icanamacossa-manajari, –Pohua comene ojidssama nanijine –quinadsa. ³⁷Attideni onihi naqui: –Tiapi jodiodenicca tamine tijadsapi tia tinassijaji –quinajari.

³⁸Jeso tati tetepihuaji naqui dsodo nani coba idsanamanajaro.

Najaro dsodo nanipi: –Ajajaripa Jodiodenicca Tamine –najaro.

³⁹Naraha botijidede raja, madija inanadsoqquemana najarideni Jeso inoridsa cobaba dsanajari ojaría Jesodsa atti tabaccora tadsa jidsa jidsa najari: –Tiapi Cristo tijadsapi tia tinassijaji. Ia naqui ia tinassijabaquiji –najari. ⁴⁰Naraha aja coba dsanajari ohuaha attia: –¿Paji, nema tejeraji! ¿Diodsa ticappinajerajarorane? Tia naqui ahua porimacossanidsa coba dsanahi tijaraha ¿nejecotohui tetti nema tajaró? ⁴¹Aji iapi ponima ocasserani ejerani. Inajidsarójine ocasserani ejaro. Naraha ajajari maquidejepa najidso-jararaha ocasserani ahujari –najari. ⁴²Nadsapa Jesodsa huati tajari: –Jeso, ticca cacahuehuaji bacco tinadsa ohuadsa teti huato nana –najari. ⁴³Manaco Jeso pohuadsa huati tajari: –Pajissara tiadsa huati onajaro. Aji jidapana ohuadsama memehuajicca *dsama bicanihuaji timadinijine –najari.

Jeso huatiajari

Mateo 27.45-56; Maraco 15.33-41;

Huano 19.28-30

⁴⁴Maji itetepi tojadsa dsama nemanehe todsidsini najaro. Dsidsi dsanapoparopi maji 3 bacco tajaró.

⁴⁵Maji todsidsidsapa Diodsa dada toquima odsa imeni bodihuajicca *huahuacossa etero sibabotepi Djijine sseo naronajaro, carobe najaro.

⁴⁶Maji najarissa nadsa ssonohuaji Jesopa jadsirema huati tajari: –Abi, ticca cacahueheda ojapomanijine, onajaro –nadsapa Jeso huatiajari.

⁴⁷Nadsapa soldado tamine Jeso cacahuadepa dsama todsidsini nani qqui, Jeso huatiahi qqui tadsapa:

—¡Dio bica tahi, deni tojahi!
 —najari. Pohua attipa: —Pajissa,
 ajajari maqquidejepa bica tahi. Ima
 cappirajari —najari.

⁴⁸Nadsapa madija huapima Jeso
 cattade domo huajaridenipa maji
 todsidsihi qqui, Jeso huatiahi qqui
 toquinadsapa cappinamanadsa
 domo toccanijari. Pohuadeni bacco
 huaccacca huaccacca tocananijari:
 —¡Jaho, icca dsamadsa ijine bica
 tejerani, bica tejerani! —tanimana-
 jari. ⁴⁹Naraha aja Jesodsa huatideni
 huanacquiri najaridenipa huaji
 tanidsa qquide domo huajari. Amo-
 nedeni naqui pohuadensama
 domoni huajaro. Najarodenipi Jeso
 Carireadsa ccaridsapodsa pohuadsa
 jahiridsajaroa Jeso pohuadsa Jero-
 sarehuaji jahijonajaro.

Jeso ppa idsamanajari

Mateo 27.57-61; Maraco 15.42-47;

Huano 19.38-42

⁵⁰⁻⁵¹Nahidsapa madija bicabote
 madijari. Pohua onipa Dsodse,
 dsama Jodeacca odsa panani
 Arimateahuajicca madija. Pohuapa
 Diocca dosseniji inapajiranissa,
 pocca ima toccanissa tajaro.
 Dsodsepa Diocca cacahuehetohui
 naco najoraha madijari. Pohuapa
 jodiodenicca ima cacattemade-
 deni ojaria. Pohua tesse ima
 cacattemededeni: —Jeso dsoquena
 —quinaraha pohuapa jehe najara-
 jari. Pohua tessedeni Jeso inajidso-
 manadsa naco najidsode jipera
 tajari.

⁵²Dsodsepa Jeso assire ppa idsa-
 hijine tamine Piratohuaji huatide
 toccajari. Bacco tadsapa Pirato-
 dsa huati tajari: —Jeso assire ppa
 odsahijine ¿jehe taqui? —najari.

⁵³Nadsapa Pirato jehe nadsa Dsodse
 nahi Jeso coba dsanaha que tahi-
 huaji tocanajoranijari. Jeso assire
 dicca inadsa etero dsojorani onini
 linodsa jore inaqquijari. Jore
 inaquia jicadsapa tonoccobirihuaji
 dsojo inajari. Najaro tonoccobiripi
 sibadsa hui todsimajaro. Najaro-
 dsapa madija dsoquehi podsa-jara-
 ccahi. Najarodsa Jeso ibedsajari.
⁵⁴Najaro huada viernepi jodio-
 denipa poccadeni *jassinajacca
 huada sabadotohui najoramanajari.
 Najaro jassinajapi dsomeme nadsa
 bacco bacco tajaro.

⁵⁵Aji amoneje Jeso pohuadsa
 Carireahuaji jahijonajarodenipi
 Jeso assire tonoccobirihuaji Dsodse
 dsojo inadsapa ponideni naqui
 nani jai tojajaro. Jai tojamissadsapi
 tonoccobiridsa Jeso assire ibedsahi
 qqui toquinajaro. ⁵⁶Nadsapi odsa-
 huaji jai tojanidsa majojo majoni
 bica tajaro, ahua majiconi majoni
 bica tajaro najoramanajaro.
 (Pina jodiodeni poccadeni madija
 dsoquejari assiredsas sse inamaro-
 manajari, huirra inamaromanajari-
 ssa inamananijine najoramana-
 jaro.) Nadsapi jassinajacca huada
 tojadsapi jassi quinajaro, pina
 Moisesicca marinajassa inamanana-
 jaro.

Jeso nahatonijari

Mateo 28.1-10; Maraco 16.1-8;

Huano 20.1-10

24 ¹Semana tojapomanicca
 huada tahidecca domingo
 dsidsidsamassana amonejedeni
 Jeso noccobirihuaji qquide jai
 tojanipomajaro. Ahua majiconi
 majoni bica tajaro najoramana-
 poje najaro iaccamanajaro. ²Bacco



toquinadsapi qqui toquinaneje tonocobiripi tohuabeje najaro. Siba imenipi pajimaranihuajina huitteje najaro. ³Nadsa jai tojedsimadsa qqui toquinaraha Jeso assirepa podsas najarajari. ⁴Nadsapi jabojo-manadsa: –¿Nejecoma najari? –quinajaro. Nanaja madija pamaha eterorideni ssiaja tajaro ponideni inorinidsa ahuatoma-manajari. ⁵Nadsapi cappinamananissa tadsa ponideni pitonidsa jassi, tocattedsamana, namidsa assarinideni bacco tajaro. Najarideni pamaha ponidenidsa huati toquinajari: –¿Nejecotohui Jeso qquide ahuaji jai tijajonajaro? Paja dsoqqemana-rihi najaridenina pohuadeni nocco-biridsa podsamana tahi. Naraha

Jesopa camittemanidsa madihi –quinajari. ⁶–Tibodideni huatomaniji. Dsama arobeni Carireahuaji timadimanapodsas tiadenidsa pocca ima huati huati nanaja napode. ⁷Pohua attipa: “Ohuapi Madija Bedi ojajaroa nidsa dsotode madija ojaría ohua ccaccoradsapa imasiri ssequiri najarideni dsepedenidsa ojanitohui. Ahua porimacossanidsa ohua inanadsoqqe-mananitohui. Ohua ppa idsamanaraha huada 3 nadsa onahatoninitohui” napode pohua atti –quinajari.

⁸Nadsapi Jeso atti bodinideni huatoma-manajaro. ⁹Tonocobirihuaji jahinidsa odsahuaji bacco nanimanadsapi Jesocca dodosse tabaqqi 11 quinajaridenidsa ima

huati toquinajaro. Jesocca madija motadenidsa naqui huati naridsa-manajaro. ¹⁰Ponideni oninipi Maria Madarenahuajicca, Dsohuana, Maria Satiaco imeni quinajaro. Amoneje onihideni naqui ponidenidsa quejemamanajaro. ¹¹Naraha Jesocca dodosse tabaqqi ima mittamanadsapa pohuadenidsa jidsa tajaro, pina ponideni bodini tossamojarossa najaro. Ponideni attinidsa pajissa quina-jarajari.

¹²Naraha Pedropa nama naha Jeso noccobirihuaji joppa tajari. Bacco tadsapa tonoccobiri bodihuaji tocattedesima nanaja Jeso assire jojore naqqi eteroa podseje nanira qqui tajari. Nadsapa Pedro pocca odsahuaji bodi huatohua toccanijari.

Emao jahuidsa

Maraco 16.12-13

¹³Najaro ssiajadsa Jeso huatimadeni pamaha odsa capamema najaro onini Emaohuaji tohuedajari. (Aji Jerosarenda maji 3'dsa ticcadsapi maji 6'dsa Emao bacco tinani.) ¹⁴Nadsapa najarideni pamaha najaro jahui tohuedajaria Jeso tahimari huahuatiti dsanapojari, aji ima huapima mitta-manajari, aja pohuadeni qqui toquinajaricca ima huahuatiti dsanapojari. ¹⁵Jahuidsa ahuaji huati ahuaji huati dsanapomananaja Jeso naco pohuadenidsa bacco tadsapa huapima jai tojajari. ¹⁶Najaripa Jeso pohuaraha pohuadsa noccodeni jidsa tajari. ¹⁷Nadsapa Jeso pohuadenidsa huati tajari: –¿Nejeco imara ahuaji huati ahuaji huati tidsanapomanajaro jahui motta? –najari. Nadsapa ba nanaja panodeni todsahi najari.

¹⁸Najari madija pamajarideni ojaría Cleopa pohuana Jesodsa

huati tajari: –Tia naqui Jerosarehuaji Pascoacca ejetetohui timadiraha ¿ima dsati ssamo tinajaroqui? Aji Jerosarecca ima dsati huapima nahatoqqiri inaraha ¿tiaha ssamo tinani ojari tajarorane? –najari.

¹⁹–Naraha imapi ¿nejecoma najaro? –najari Jeso. Naraha Cleopa pohua tesse tedseje huati toquinajari: –Jeso Nasaretihuajicca pohuadsa ima inamanajaro tahimarinipi ajima najaro: Pohuapa Dio Atti cacomerajide rabote. Diocca dacorehejine pocca marinaja bica tajaro. Diocca dacorehejine canahatori canaridsajari naco bica tajari. Madija huapimadsa, Diodsa naco pocca ima bica tade. ²⁰Naraha dada toqquimade taminedeni, ia jodiodeni icca taminedeni quinadsa Jeso dsoqquehijine romanodenidsa da quinajari. Pohuadenina idsahuamanahi dsotodepa ahua porimacossanidsa coba idsanamanadsa inanadsoqque-manajari. Nama inanamanade. ²¹Naraha Isaraeri potemahi jodiodeni iapi icca dsamadsa iara imadinijine aja “Jeso pohuajinena icca cacahuehe tojapomanijine” inajaro ibodidsa. Naraha pohua huatiahicca huadapi jidapapi huadari 3 nani. ²²Naraha iadsa amoneje queriquimanajaro-denijine ijabojo najaro. Ponidenipi ssiajaricossadsa Jeso cahuahihuaji jai tojajaro. ²³Naraha pohua assire qqui quina-jaraha. Nadsama amonejedenipi jahinidsa huati nanimanajaro: “Diocca dodosse tabaqqi memehuajicca qqui inabaquipa. Iadsa attidenipa: ‘Jesopa nahatonihí’ quinapaja” quinajaro. ²⁴Nadsapa itesse pamaha tohuedajari Jeso cahuahihuaji. Pohuadeni naco pina aji amoneje ponideni attinidenissa nehe qqui toquinaraha Jesopa qqui quina-jaraha –quinajari Cleopadeni.

²⁵Nadsapa Jeso huati tajari: –¡A, tiadenipi ssamomo tinajaro! Dio Atti cacomeraququiri najaridenicca marinaja dsodo quineje najonaponi najaro nemanhe Dio Atti dsodo nanidsa dsodo napojaro titimittamana naraha ¿nejecotohui pajissa tiquinanijine tibodideni najoqqquiri nani? ²⁶Dio Atti dsodo nanidsa ajijaro ima ahuato tajaro: Najaroa aji madija Tonassajade Cristo-Mesiatohui imadijaro ocasserani ahuahitohui, madijacca tabaccorehe manaconi tojahijine. Ocasserani ahuajaradsa dsoquejaradsapa Diocca deni tojehe pohuadsa ahuato-jeranitohuiraha. Pajissa najidsohue imeni ocasserani ahuadsa dsoqueqsapa nahatonidsa Imehihuaji toccamacossanijari. Nadsapa pocca Abi Dio pocca deni tojehe pohuadsa inanajaro –najari Jeso.

²⁷Nadsapa *Dio Atti dsodo nanicca pohuadeni bodi huatoma-manahijine mari icanabaququijari Jeso. Tahidepa Moisesicca marinajadsa Cristo-Mesia tahimari dsodo nanidsa Jeso pohua tahimari pohuadeni mari icanabaququijari. Dio Atti cacomeraququiri najaridenijine pohua tahimari dsodo najonamanajaricca dsodoniji naqui mari icanabaququijari.

²⁸Odsa capamema najaro Emao bacco toquinadsa Cleopadenidsa Jeso attipa: –Jehe, ajidsa tibomanaji. Ohuapi denima occani –najari. Pohua atti nama nadsapa tossoniqquimahitohuiraha ²⁹Cleopadenipa Jeso pohuatohui quinadsa pohuadsa huati toquinajari: –Iadsa tiboccaji. Maji toccahi, dsomebote nani –quinajari.

Nadsapa pohuadenidsa ibojari Jeso. Pohuadenidsama odsadsa toqqquedsimajari. ³⁰Nadsapa jipamanahijine

jassi taridsa Jeso pan ididsa Diodsa huati tajari: –Jehe Abi Dio, tiadsa etidsejaro. Ticca daniji iadsa bica tinanajari, inajaro –najari. Icanarobedsa pohuadenidsa da inaridsajari.

³¹Nanaja noccodeni ssire-re nadsa Jeso jidsera nimananijari. Naraha amadsati amossi najari. ³²Nadsapa pohuadenira huati tocanirejari: –¿Nejecotohui pohuapa jahuidsas qqui inajonaraha inocco jidsa tapa? Iadsa huati huati najonadsa Dio Atti dsodo nani ia mari tocanabaququidsa ibodi etidsepa –quinajari.

³³Nadsapa huassinaja totehemanadsa Jerosarehuaji tohuedanijari. Bacco tanimanadsapa Jesocca dodosse tabaqqqui 11 quinajarideni pohuadeni tesse tedseje queriqquimanahihuaji tohuededsimajari. ³⁴Queriqquimanageridenipa aja huededsimajaridenidsa huati toquinapojari: –¡Jesopa pajissa nahatonijari! Ssino attipa: “Qqui onahi” napa –quinajari.

³⁵Manaco Emaohuaji tohuedajari-denipoccadeni ima huati nanimanageri. Aja jahuidsas Jeso pohuadenidsa huati huati dsanapojaricca ima huati, odsadsa Jeso pan icanarobedsa pohuadenidsa da inaridsadsa noccodeni jidsera najari naco huati toquinajari.

***Jesopa pocca dodosse
tabaqqquidsa ahuatomajari**

Mateo 28.16-20; Maraco 16.14-18;

Huano 20.19-23

³⁶Aja Jeso qqui toquinajari-cca ima imahaha canaraha nahi noccodidsa Jeso ahuatomajari. Pohuadenidsa: –Nija, ticappananageri. Diocca biquehera tiadenidsa tojana –najari Jeso.

³⁷Naraha jabojojanadsa bodidenipa: –¡Corime itidija!

–quinadsa cappinamanajari.

³⁸Naraha Jeso pohuadenidsa huati tajari: –¿Nejecotohui ticappinamanajaro? ¿Nejecotohui tibodidendi tossamojaro, pina ohuadsa pajissa tiquirani naha? –najari. ³⁹–Jari, ohuamori qqui, odsepe qqui tiquinaji. Ohuapi ohua. Ohueme bara tiquinaji, nadsana nahatoto tinanijine. Aji icorimepi ime cappira, tone cappira nahi naraha ohuapi ohueme ocaji, otone ocaji nani qqui tiquinani –najari Jeso. ⁴⁰Nadsapa pohua dsepe nohue, pohua amori nohue najari.

⁴¹Nadsapa huatidsemanaraha pohuadendi bodipa: –¿Pajissa, Jeso nahatonijarico? –quinajari. Nadsapa nahatoqquri nahijine Jeso pohuadenidsa huati tajari: –¿Ajidsa ojipanijine ticajimanaqui? –najari.

⁴²⁻⁴³Nadsapa pohuadsa aba ibanahi bobi da quinadsa pohuadendi dsepecca ididsapa cattomama canaraha jipajari. ⁴⁴Nadsapa pohuadenidsa huati tajari: –Aji ima ohuadsa tojajaropi pina tiadenidsa occaridsaponi huati onapojarossa najaro tojajaro. Najaropi Dio Atti dsodo naponiccassa najaro. Aji Moisesi otahimari dsodo inapojaropi najarossa najaro. Dio Atti cacomeraqquri najaridendi naco otahimari dsodo quinapojari. Ajie jijiridedendi naco otahimari dsodo quinapojari. Najaro huapimapi maittaccadsama dsodo quinaja najonapohui najari. Najarossa najaro Djojine ohuadsa tojajaro –najari Jeso.

⁴⁵Nadsapa Dio Atti dsodo naponicca mittamanahissa tahijine bodidendi acco icamabaqqujari.

⁴⁶Pohua atti naco: –Jehe, Dio

Atti dsodo nanidsapi otahimari. Najaroa aji madija Idinide *Cristo-Mesia quiquinanajari ccajonadsapa ocasserani imeni inahananitohui. Madija inanadsoqqe-manadsa ppa idsamanaraha huada 3 nadsa nahatonihitohui. ⁴⁷Najaro pohua tahimari ecomeraridsa-manadsapi madija bodidendi cacajiqquimera-manahijine naco huati toquinahitohui. Nadsapa madija pohuadendi bodi cacajiqquimera-manadsa: “Occa imasiri onebona” quinadsapa Dio poccadendi imasiri epeje inananitohui. Najaro ima bicanipi madija huapima mittaridsamanahijine Cristo-Mesiapa pocca dodosse tabaqqui mari naridsamanahijine dosse inaridsabaqquihitohui. Tahidepa Jerosaredsa mari icanabaqquimanahitohui, dsotodepa dsama huapimadsa maride jai tojaridsahitohui. Najari Cristo-Mesiapa ohua. Otahimari maridepa ohua occa madija dosse onabaqquihijine –najari Jeso. ⁴⁸–Nadsama tiadendi occa dodosse tabaqqui tiquejenajaropi ohua Cristo-Mesia ojani nahatoqquri tiquinani. Odsoqqueraha onahatonini pajissa tinoccodenidsa qqui tiquinajaro. Nema nadsapi otahimari tecomeraridsamanaji. ⁴⁹Naraha tahidepi Jerosaredsa timadimanaccaji. Nidsa occa Abi Dio huati tapojarissa najari ohuana tiadenidsa dosse onarona-hitohui. Najari Dio Corimena tiadenidsa tojaridsahitohui. Pohuapa Dio memehuaji madijaricca dacorehe tibodidenidsa inanaridsanitohui. Nadsana otahimari mari taridsamananijine –najari Jeso.

Jeso toccamacossanijari

*Maraco 16.19-20;
Tahimarideni 1.9-11*

⁵⁰Nadsapa Jeso pohua huatimadeni odsa pananidsa iaquena-baqquijari. Odsa capamema najaronini Betania tohuajiranidsa domo huajari. Nahidsa pohua huatimadenitohui pocca Abi Diodsa huati tajari. Pohua dsepe memehuaji da tamacossadsa: –Jehe Abi, ajajarideni tecahuabaquijo. Ticca biquehe pohuadenidsa tinanaridsaji –najari.

⁵¹Pohuadenitohui Diodsa huati huati tanaja toccamacossanijari. Imehi Dio memehuaji iaccamacossanijari. ⁵²Nadsapa pohua huatimadeni attidenipa: –¡A, Jesopa bica tahi! ¡Deni tojahi! –quinajari. Nadsapa Jerosarehuaji huatidsemaneri tanimanajari. ⁵³Huajijiradsa Diodsa dada toqqimahuaji quequeriquimana dsanapojari. Diodsa huatidsemanadsa jiri jiri quinajari. Pohua Atti mimittamana najari, Pohuadsa huati huati dsanapomana najari.